



Librairie Religieuse & Pelture.

A. JOSEPH,
Rue/Blanche, 15
PARIS.





58,457/3 Supp.

BORSIERI G.





Digitized by the Internet Archive
in 2016

**INSTITUTIONUM
MEDICINAE PRACTICAE**

QUAS

AUDITORIBUS SUIS PRAELEGEBAT

IO. BAPT. BURSERIUS

DE KANILFELD

VOLUMEN QUARTUM

**DE MORBIS PECTORIS ET IMI
VENTRIS**

OPUS POSTHUMUM

RECUDI CURAVIT

JUST. FRID. CAR. HECKER

MEDICINAE UTRIUSQUE DOCTOR ET PROFESSOR P. E. IN UNIVERS. LITTER.
BEROLINENSI, PLURIUM SOCIETATUM MEDICARUM AC LITTERARIARUM
SODALIS.

L I P S I A E

SUMTIBUS FRIDERICI FLEISCHERI.

MDCCCXXVI.



UBALDI VIGILII BURSERII

IO. B. APF.

PRAEFATIO.

Ex prima fronte libri quisque perspiciet, quale sit praecipuum, de quo hic agitur, argumentum. Quae nam autem in unoquoque capite peculiariter comprehendantur, ex utriusque partitionis indiculis clarius innotescet. Uberiorem adhuc rerum cognitionem acquireret, si quis discendi cupidus singula quaeque capita attente perlegerit. Quid plura? Restat modo, lector, ut certior de iis fias, quae aliunde scire, aut ex libro conicere non posses. Quare praemonitum te volo, hoc quartum volumen longe ab iis differre, quae vel auctor edidit, vel mihi edenda commiserat. Non enim elaboratas absolutasque continet praelectiones, uti fortasse sunt, quae tribus prioribus continentur voluminibus, sed rudes eas ac informes, quales nempe illi tum e calamo exciderunt, cum primum eas de die in diem festinanterque in usus scholasticos exararet. Quamquam integrum novennium in schola Ticinensi docentis munere functus est, non tamen eas pluries auditoribus suis, sed semel tantum tradidit excipiendas. Quod sane mirum videri posset, si primo restitutae academiae anno MDCCLXX., quo simul et publice docere, et clinice ad tironum institutionem facere in valetudi-

nario ipse susceperat, haec illi provincia de medicina practica, ut aiunt, explananda demandata fuisset. Verum non hanc illico medicinae partem, ad quam reapse tradendam per legati litteras fuerat invitatus, sed alias atque alias, ipso quidem invito et discipulis aegre ferentibus, ad exitum usque anni IV. tradere coactus est in gymnasio. Causas vero non remiscar, ob quas ei denegatum est, quod sibi ipse deberi contendebat iure promissi, et conventi anno primo, quoniam culpa magis temporum calamitati quam aliorum invidiae erit verosimiliter tribuenda. Id unum fas mihi sit animadvertere, munus huiusmodi ei delatum postea fuisse, cum nempe primum studiorum cura demandata est Cl. equiti **NICOLAO PECCIO**, cuius recentis iacturae minus dolendum, quod modo illustres fratres iique iuris consultiissimi **JACOBUS** et **JOHANNES DE BOVARIIS**, alter quidem in eius locum suffectus prolegati Insubricae praefecturae, alter vero consiliarii rei que litterariae curatoris partes aequissima lance gerunt. Sub initium itaque anni quinti aggressus est ea methodo tradere praelectiones ad praxin medicam, qua scilicet scholasticum curriculum intra triennium obsolveretur, et re quidem vera in fine septimi primum idem absolvit. Nono autem vertente sive altero secundi curriculum anno, quo omnia clariori in lumine collocanda uti par erat sibi ipse proposuit, ab incertis cessare compulsus est medio veluti cursu abreptus, ut Mediolanum concedens novo ei concedito regii archiatri fungeretur officio. Ab eo tempore praelectiones ad morbos pectoris et ini ventris spectantes, quas mox erat traditurus, in scriniis suis reposuit, ibique repositae ad ultimum fere vitae terminum manserunt. Etsi namque omnes subsecivas horas studiis impertire solitus erat, has tamen sibi vin-

dicaverant tria priora volumina, eaque praesertim de febribus morbisque exanthematicis febrilibus; quorum postremum vix initio illius quo decessit anni in ordinem redegerat, et una edendum paraverat aliud, quod tertio loco de capitis morbis prodivit. Potior rem temporis partem praeter suum officium, quod etiam infirma valetudine fere semper usurpavit, alienis curis, quibus domi forisque distinebatur, donabat; minimam vero omnium saluti prospiciendae suae, etiamsi molestiis invalescentis quotidie morbi affectus acerbisque doloribus conflictatus nec rheda vehi, nec pedes ire commode posset. Prima autem quae se obtulit occasio educendi in lucem, et contrectandi iterum praelectiones illas de morbis pectoris imique ventris, haec fuit. Aeger ipse, iam nulla spe reliqua de salute eius, in lectulo iacebat, cum properaret ad exitum tertii voluminis editio. Mecum de ea re colloquens conquestus est, se non posse institutiones medicas perficere, quas edendas suscepserat suadentibus amplissimis viris tum laudato NICOLAO PECCIO, tum vel maxime comite WILZECKIO, qui splendidissimos honores caesareae per Italiam regiaeque simul Insubricae legationis florente adhuc aetate consecutus, eosdem aliquot ab hinc annis sapientissime ac integerrime tuetur. Capiens tamen, quoad vires deficientes sinerent, bene de tantis viris promereri, voluit sibi adferri fasciculos earum praelectionum, quas me iussit e scriniis depromere, ut supremam manum iis imponeret, meque peramanter rogavit, ut ego ei ad easdem exscribendas adiutor forem, singula quaeque prout mihi ipse indicasset adornando. Facere aggressus libenter sum quod iubebat, at non satis fausto felicitque omine. Postquam duo capita de tussi et cruenta exspuitione, nec non diagnosin phthiscos pulmonaris, de qua tertio

morborum pectoris capite disputatur, omnia ab ore morientis excipiens ego conscripseram, ipse vero ea mihi dictare inter summas anxietates et spiritus angustias, licet repetitis intervallis, plures dies conatus erat, tandem necesse fuit omnino desistere; nam vires eius fractae penitus sunt, et vox fere intercepta. Hinc dolenti mihi et querenti, quod idem fatum, quo dulci eius consuetudine privabar, nobis eius lucubrationum fructum eriperet, ut solatium aliquod afferret, sic me, leniter subridens, allocutus est: „haec rerum humanarum vicissitudo est: *opus ipsa suum eadem quae coagmentavit natura dissolvit*: aequo animo ferendum quod aliter fieri nequit. Si quid e meis scriptis in vulgus edidi, iam nosti non meo tantum quam aliorum iudicio fecisse, et praesertim ut legibus academicis obtemperarem, nulla sane spe praemii allectus, nulla laudis cupiditate aut prospiciendi posteritati arrogantia permotus. Primum siquidem frustra expectassem; alterum vero sibi polliceri post innumeras doctissimorum medicorum commentationes insanientis hominis esset. Morte vero obrepente citius adhuc quam gravi senecta, vitio mihi non vertetur, si quod fueram aggressus non absolverim. Nihil est ergo, quod te nimis reddat sollicitum. Mihi vero petenti instantique quidnam agendum et reliquis praelectionibus decerneret? an eas evulgandas, et cui credendas esse existimaret? ipse post breve silentium me iterum alloquens respondit: „se nullo modo talium rerum editionem esse probaturum; nam manca et imperfecta plura cum sint, litteris aliisque vitiis non paucis commaculata, nec legi eadem recteque intelligi, nec periodos quandoque sive orationis membra inter se parum interdum connexa colligari facile posse; praeterea multa in usum scholae vix delibata (quae tamen ipse oretenus lon-

giori sermone explicare solitus erat tum scholae, tum in valetudinario) maiorem amplitudinem exposcere ut lucem mererentur; quaedam etiam fortasse tollenda, quaedam addenda; perpolienda omnia, et ad priorem formam atque ordinem redigenda esse; ac id genus alia praestanda, quae nonnisi vel ipsemet, vel saltem aliquis non tam peritus homo, quam diligens, aequo animo praeditus et a partium studio alienus perficere valeret; in huius enim consuetudine vitae non rerum scientiam, sed morum probitatem spectandam esse, quae praestantior omni doctrina est. Ipsum autem neminem nosse, de quo prohi! nimium diffidendum non esset; qui enim aptiores videntur, plerumque rerum innovandarum cupidos, vel plausus aut gloriolam aucupantes suae magis adaugendae famae, quam publicae utilitati studere, nec quae vera sunt, sed quae magis novi speciem referunt non levi rei medicae detrimento plerumque sectari: omnes insuper medicinam facientes quo peritiores habentur, eo minus otium studiis suppeditare posse, quod vix sufficiat invisendis curandisque aegrotis; qui vero non satis periti, eos vel desidia, vel oblectamentis deditos haud ita facile ad laborem et vigilias revocari; demum quoscunque studio partium teneri; ideoque malle sua perpetuo delitescere, quam aut adulterata, aut turpiter mendosa in lucem prodire.“ Multo plura tum protulit memorabilia, quae veluti testamenti loco tradita excepi, alteque animo defixi. Interim ipse morbi vi ad interitum ruens diem supremum obiit. Mala avi potestas mihi data non est penes me retinendi memoratos fasciculos. Et enim statim a morte eius una cum ceteris scriptis ac libris in cubiculum coniecti fuere, cuius ostium sigillis obsignatum est, ut heredum iura sarta tecta-que seivarentur. Praeter omnem expectationem ac-

cidit, ut idem resignatum amplius non sit nisi maiore mense superioris anni MDCCLXXXVIII., quo tempore duntaxat e latebris eductae praelectiones sunt, mihiq[ue] concreditae, ut si fieri posset in vulgus emitterentur, satisq[ue] fieret nostratum aequae ac exterorum desiderio, qui omnes vel a me, vel ab aliis hoc quantum sciscitabantur volumen tanquam iure ad idem acquisito, postquam illud quam proxime proditum esse sponderat Ambrosiani monasterii typographus in epistola, quae III. Volumine edita est. Idipsum ego licet exoptarem (pudebat enim negligentiae redargui), redibant in mentem optimi parentis monita, a quibus si discessissem, mihi violatae erga eum pietatis reus esse videbar. Verum nonnulli amicorum non dubitabant asserere, me pie magis cum eo facturum, si ego ipse operi restituendo, ne infectae institutiones ad praxin manerent, manum sedulo admovissem; nec quidquam officere quod medicinae studiis addictus non essem; quin imo omnem inde amoveri suspicionem, quae suboriri forte posset de minus vera auctoris sententia, si ab aliquo artis medicae quantumvis eximio cultore id praestitum esse constaret; quoniam experientia comprobatum est, homines eandem artem exercentes suas merces sub alterius opificis nomine saepenumero venditasse, ut pluris venirent; quod sane de filio non medico iudicari a nemine posset. Etsi me pluribus ad id hortabantur, mihi tamen evolventi autographa auctoris exemplaria, et singula quaeque attentius perscrutanti nimis periculosum opus videbatur. Oportebat enim non modo ea diligentissime exscribi, quod absque Oedipo coniectore fieri interdum posse diffidebam, sed etiam partitionum rationem aliquando immutari, ne a suscepto priorum voluminum ordine hoc posthumum discreparet; notulas praeterea ad

rerum seriem qualibet paragrapho contentarum indicandam singillatim in spatio marginis apponi; multos quoque fontes, unde auctoritates scriptorum erant depromptae, innui; plurima adiici ad calcem paragraphorum latine reddenda, quae vel innumeris schedis hinc illinc inter paginas insertis adnotarat, vel in sua coniecerat auctor adversaria, quaeque ut opportunis in locis collocarem, coniectura uti debuissem; quandoque vero si qua occurrerent in antecedentibus loca observanda, eadem ob oculos legentium poni; et demum alia huiusmodi necessario perfici, ne vitio mihi vertendum esset totum discrimen, quod inter hoc et priora volumina intercedere videretur. Quibus omnibus perpensis parum absuit, quin omne de eodem evulgando consilium abiecerim. Verumtamen ne privatum meum commodum publicae utilitati (absit verbo invidia) anteferre, aut amicorum sollicitationes parvi pendere viderer, malui hunc subire laborem, et potius temeritatis notam, quam desidis ingratiq[ue] hominis incurrere. Libens itaque aggressus sum, brevique temporis intervallo perfeci, otio enim abundabam, quod nunquam absoluturum fore credideram. Utinam pari diligentia ac celeritate usus essem, atque hoc saltem nomine tum de patre desideratissimo, tum de re medica mereri mihi licuisset! Nollem in eorum reprehensionem incurrere, qui librorum inutilium numerum quotidie in immensum adaugent. Spes tamen allicit, aequiores in me indices fore, qui nullo partium studio ducti exploratas habere velint causas, quibus permotus id fecerim. Si quid vero, mi lector, utilitatis inde perceperis ex huius IV. Voluminis lectione, scito JOSEPHO GALEATIO, qui suis impensis edendum illud curavit, acceptum id esse referendum. Sin minus, omnem mihi culpam tribuito, quam tamen ut ignos-

cas, peto et rogo. Auctori tandem, quaeso, parcant omnes, ad cuius excusationem aptissime usurpari possunt OVIDII carmina;

Orba parente suo quicumque volumina tangis,

. ,

. . *faveas: non haec sunt edita ab ipso:
Sed quasi de domini funere rapta sui.*

Et alibi:

*Ablatum mediis opus est incudibus istud;
Defuit et scriptis ultima lima suis.*

Quoniam autem laudari a laudato viro eximiae laudi tributum semper fuit, fas mihi erit ultimo loco adiiungere versus¹⁾ Horatianam venustatem redolentes, quibus laudationem auctori perhonorificam in eius funere contexuit pro sua erga eum singulari humanitate amplissimus S. R. E. Cardinalis DURINIUS ordinis Mediolanensis, non tam splendore generis et romanae dibaphae, quam praeclaris legationibus functis, amore summo in scientias et artes earumque cultores, rara in omnes comitate et facilitate, doctis lucubrationibus editis, perspicacissimi ingenii vi, ac praestanti doctrina spectatissimus.

1) Post auctoris obitum eos edidit Cl. V. JOSEPH. AQUILA Volumine VIII. *Diarii italici litterarii Mediolanensis*, ab eodem docte eleganterque conscripti.

ANGELI CARD. DURINII

IN OBITUM

VIRI CLARISSIMI

JO. BAPTISTAE BURSERII

DE KANILFELD

ODE ALCAICA.

Ciere plectrum threicium tibi,
Boerhâve subrum mens iubet, inferos
Quo mulsit amnes, atque ab orco
Eurydicen repetebat Orpheus.

Imi sed orbis te semel incolam
Nulli reducent heu citharae soni,
Plutona quamvis ipse MOLLO¹)
Sollicitet prece blandus. Aulæ

Scit quippe scit Dis illacrimabili
Qui accessit hospes, te et toties necis
Tardare pennas imminentis
Non humili solitum triumpho.

Deserta ferme regna Proserpinae,
Atque otiosum viderat Aeacum,
Umbrasque raras, te medente,
Elysias penetrare valles.

Qua nempe doctam cumque dabas manum
 Funus sub ipsum cedit inefficax,
 Et pene victrix mors remittit
 Egregiae spolia ampla vitae.

Securus artis praesidio tuae
 Aeger nec aestus, signaque sirii
 Foecunda morbis, africanumque
 Corporibus metuit nocentem:

Non mortis ullum pertimuit gradum
 Mortale corpus, non tacito phthisis
 Peredit igni, non tumentis
 Dirus hydrops labefecit uuda.

Quocumque ferret dira febris pedem,
 Te mater omnis, te miserabilis
 Poscebat uxor, ne caducum
 Orba virum, puerosque ploret:

Seu confluentes forte timet notas
 Praeclara virgo, tu faciem eripis
 Periclitantem, protegisque
 Delicias iuvenum futuras.

Isthaec loquatur *Papia nobilis*
 Tuis medelis freta potentibus,
 Salubre numen quae colebat
 Te veluti, sobolemque Phoebi.

Te iure talem, te hinc meritis vehit
 Regina subrum laudibus. Invidae
 Voces recedant; nam medendi
 Cuncta tibi superasse virtus

Concessit. Alte tu physicae impiger
 Fontes perennes, tu penetralia
 Rimatus aspernaris unus
 Vulgus iners volitante penna.

Qualem ergo honorem, quam statuam ²) tibi
 Ponemus? O cui non alium parem
 In arte Phoebus, se remoto,
 Ant oriens videt, aut recumbens!

Fecere nec te multiscium scholae,
 Librique tantum; sed sapientia
 Cognata rebus, mensque facti
 Experiens, animusque felix:

Non mille plantae, mille vitra, et domi
 Ignesque centum, aut *hypothesis* placens
 Prosunt medenti, vel coërcent
 Saeva luis, mala saeva febris;

Ni pectus adsit consilii potens,
 Ni plena rugis experientia,
 Ususque naturam secutus,
 Quid potius moneant in aurem.

Haec *praxis* olim grande decus sacrae
 Adduxit arti. Sic veterum stetit
 Secura fama, sic praeivit
 HIPPOCRATES, meruitque coelum.

Te sic medendi munere nobilem
 Effluxit ardor vividus ingeni;
 Te mentis audax vis, sagaci
 Consilio bene temperata:

Te cura morbos tollere pertinax,
 Rerumque prudens experientia.
 Sed dum laboras recreare
 Instabiles hominum ruinas;

Dum perspicaci lumine conspicis
 Causas latentes, et vitia, et modos,
 Vicesque morborum, necisque
 Insidias retegis dolosae,

Aegris mederi te bene sedulum
 Incauta morbi vis subiti occupat,
 Et, te iacente, impune parcae
 Exitium insubribus minantur.

Frustra quot herbas terra parens alit
 Sumis salubres, quot chymia exprimit
 Sumis liquores, non caducam
 Arte potes retinere vitam.

Quod si domantem cuncta Proserpinam
 Usus medendi, aut paeonius labor
 Domare possent, non peritum
 Phoebigenam Iove fulminante

Mersisset orco dura necessitas;
 Non et batavae praesidium scholae
 Vidisset umbras, et lycei
 Lux potior SYDENHAMUS angli.

Nec te Italorum prime Machaonum,
 MORGAGNE, flectet te medicum cohors,
 Carmenque iam moestum pararem
 Ipse tuae, leve munus, umbrae;

Retro fugaces sed tibi Delius
 Donaret annos, sed stabili salus
 Vultu renidens, et iuventa
 Perpetuum renovaret aevum.

At sacra tellus reliquias licet
 Servet repostas; non simul occidit
 Praeclara virtus, nec silenti
 Splendidior series laborum

Iacet sepulcro; sed spatium bonis
 Extendit ultra, et rite docentibus
 Coelum recludit usque penna
 Fama volans metuente solvi.

VIR MAGNE vives tempus in ultimum,
 Dum volvet undas lubricus abdua;
 Hortoque docto dum Ticini
 Subsiliunt, medicamen, herbae:

Dum multa sylvae filia nobilis
 Pulchre explicatis erudiet comis,
 Succosque monstrabit scientes
 Aegram hominum relevare gentem.

VIR MAGNE vives tempus in ultimum,
 Vigiliarum qui bene prodigus
 Sepulcra molitus superba
 Pyramidum potiora mole.

Non marmor aequae, non ebur indicum,
 Aurumque spirans, nomen in alterum
 Demittat aevum, ut quae dicasti
 Scripta TUO nova FERDINANDO ³).

Et si peribit quod tibi stat lapis
Ferrariana ⁴⁾ clarus epigraphe,
 Non tu peribis, lux medentum.
 Vivitur ingenio; memorque

Gens docta fastis te historiae inseret;
 Tibique surgent templa perennia,
 Lauroque vernantes columnae
 Ad citharam properante saxo.

Dum multa pestis fraude Promethei
 Deducta coelo, dum febrium cohors
 Vexabit orbem, tu medenti,
 Tu pariter memorandus aegro.

Quin atque etrusci pectinis arbiter
 Te VILLA ⁵⁾ mnis charior aetheri
 Te sidus addet, te benignum
 Sidus, et insubribus salubre.

1) Illustris vir patricius Neapolitanus extemporaneus poeta percelebris.

2) Liberalitate JO. BAP. MANZONI Mediolanensis simulacrum marmoreum eidem decretum, in porticu medica ticinensis gymnasii collocandum, quod ad vivum effinxit exculpsitque JOSEPH. FRANCHIUS excellens in arte statuaria, et R. artium academiae Mediolanensis professor.

3) Volumen primum harum *institutionum*, quod usque ab anno 1781 editum est, numini maiestatique FERDINANDI AUSTRIACI Divi FRANCISCI I. ang. filii, et D. N. JOSEPHI II. patri consecravit auctor, qui eius archiatri munere fungebatur.

4) GUIDO FERRARIUS latinissimus scriptor, elogiis et inscriptionibus romano more editis inter insubres satis clarus.

5) ANGELUS THEODORUS VILLA, eloquentiae graecolatinae, et historiae insubricae professor in Ticinensi universitate, idemque inter poetas Insubriae nulli secundus.

INDEX CAPITUM.

PARS PRIOR.

	Pag.
Caput I.	
<i>De Tussi</i>	1
Caput II.	
<i>De cruenta exspuitione et speciatim de haemoptysi</i> . .	15
Caput III.	
<i>De phthisi pulmonari, praemissa phthiseos sive tabis universae cum eius differentiis explicatione</i> . . .	32
Caput IV.	
<i>De pulmonum pectorisque inflammationibus atque aliis affinibus aut succedentibus morbis</i>	85
Caput V.	
<i>De hydrope pectoris, pericardii et pulmonum</i>	132
IV.	**

Caput VI.

<i>De difficili respiratione et speciatim de asthmate . . .</i>	159
---	-----

Caput VII.

<i>De animi deliquiis, sive de lipothymia et syncope . . .</i>	173
--	-----

Caput VIII.

<i>De asphyxia duobusque ei proximis pulsum vitiiis . . .</i>	179
---	-----

Caput IX.

<i>De cordis palpitatione</i>	188
---	-----

Caput X.

<i>De cordis aortaeque polypo</i>	200
---	-----

Caput XI.

<i>De aneurysmatibus et varicibus praecordiorum . . .</i>	218
---	-----

PARS ALTERA.

Caput I.

<i>De dysphagia</i>	251
-------------------------------	-----

Caput II.

<i>De aucto ciborum desiderio et fastidio praeter naturam . . .</i>	266
---	-----

Caput III.

<i>De laesa alimentorum coctione</i>	276
--	-----

Caput IV.

<i>De nausea et vomitu</i>	281
--------------------------------------	-----

Caput V.

De alvi fluxibus sive alvi profluviiis 287

Caput VI.

De stomachi dolore sive gastrodynia et gastritide . . . 305

Caput VII.

De doloribus intestinorum aliarumque abdominis partium 311

Caput VIII.

De alvo adstricta ac ileo 343

Caput IX.

De haemorrhoidum vitiiis 354

Caput X.

De vermibus intestinorum 359

Caput XI.

De tympanite 372

Caput XII.

De obstructionibus et tumoribus viscerum abdominis . . 377

Caput XIII.

De morbo regio et de calculis felleis 386

Caput XIV.

De hepatis, lienis, pancreatis, omenti mesenterique inflammationibus. 402

Caput XV.

<i>De nephralgia sive dolore nephritico et de calculis urina- riis</i>	409
--	-----

Caput XVI.

<i>De mictu cruento et haemorrhagia penis</i>	419
---	-----

Caput XVII.

<i>De diabete</i>	423
-----------------------------	-----

Caput XVIII.

<i>De urinae incontinentia eiusque suppressione</i>	429
---	-----

DE MORBIS PECTORIS.

CAPUT I.

DE TUSSI.

§. I.

Involuntaria ¹⁾, plus minus vehemens, cita et brevissimis intervallis iterata aëris e pulmonibus cum sonitu aut clangore ad laryngem quodammodo arctatum allidentis explosio, quam magna plerumque inspiratio ²⁾ antecedit, peculiari communique nomine vocatur *tussis*. Videtur effici a *subita*, *Causa proxima*, *alternaque fibrarum musculorumque expirationi potissimum inservientium contractione*, quam excitat irritatio nervis, aut *Remotae causae*, fibris, aut musculis ad organa respirationis spectantibus illata, et praesertim laryngis, tracheae bronchiorumque sensibilissimam membranam internam proximè afficiens, vel remote ad hasce partes producta; nam haec vel in iis incipit et insidet, vel aliunde ad eas porrigitur. Neque ab eiusmodi *Sensibilitate et irritabilitate pulmones*, quia nervis et *tate pulmones praediti sunt*, *sensibilitate* non modo, verum *irritabilitate* etiam donari nuper a Cl. VARNIERIO ³⁾ demonstratum est. Hinc prima oritur tussis distinctio in *idiopathicam*, sive *pectoralem* et *Prima tussis differentia*, in *sympathicam*, sive per *consensum*.

1) Voluntate etsi inhiberi quandoque possit, sic ut HALLERO (*Elem. Physiolog. lib. VIII. sect. IV. §. 35.*) *voluntaria actio* habeatur, non tamen semper id in nostra potestate positum est.

2) HALLER. l. c.

3) *Mémoires de la Société Royale de Méd. vol. 3. p. 39.* VARNIERII *Mémoire sur l'irritabilité du poulmon*. Ubi auctor evidentis-
IV.

nes de pulmonum sensibilitate et irritabilitate.

sime ostendit, pulmones in vivis animalibus irritabiles ubique esse; eorum enim lobi tam interne, quam externe irritati contrahuntur, rubent, indurescunt, aërem retinent, alium non admittunt. In aspera arteria et bronchiis magis adhuc haec patent, quod fibras habent musculares evidentiores. Ibi quoque ostenditur, irritationem pulmonum ad alias partes etiam protendi, sed praecipue ad musculos abdominis, qui vehementius crebriusque tum moventur et convelluntur.

§. II.

Idiopathicae subdivisio. Sympathicae differentiae.

Idiopathica rursus dividitur in *primariam*, in *secundariam* et *sympathicam* ¹). Sympathicae pariter plures sunt differentiae pro locorum, a quibus originem ducit, diversitate, videlicet *stomachalis*, *hypochondriaca*, *hepatica*, *diaphragmatica*, *intestinalis*, *hysterica*, *inguinalis* etc. Imo a testium, renum, vesicae, capitis aliarumque partium affectionibus non raro etiam proficisci visa est. Hanc autem laryngis, asperae arteriae pulmonumque cum aliis partibus bene multis consensionem plerique magna veri specie explicare nituntur per *paris vagi* et *magni sympathici*, sive *intercostalis* potestatem, qua universo fere corpori dominantur.

1) *Secundariae* et *sympathicae* exempla persaepe occurrunt in acutis morbis, in febribus gastricis, in caehexia, scorbuto, catarrhis, variolis, morbillis, purpura scarlatina, morbo miliari, in metastasi materiae febrilis, scabiei, tineae, achorum, herpetum, ulcerum et denique in pulmonum morbis, peripneumonia, asthmate, tuberculis, vomitis, phthisi, empyemate, pleuritide, hydrothorace, praecordiorum vitiis organicis, hepatitide, thoracis contusionibus, vulneribus, costarum luxatione, fractura, vulneribus etc.

§. III.

Alteradivisio in humidam et siccam.

Altera tussis distinctio est in *humidam* et *siccam*, atque haec cuicumque tussis generi communis habetur. In magna siquidem pectoris concussionem aërisque repetita e pulmonibus explosione (§. I.) quidquid in vesiculis eorum, in bronchiis, in trachea et larynge haeret, excutitur, et quasi avellitur, aut iteratis ictibus e vasis glandulisque exprimitur, exscreaturque. Itaque, si humor aliquis tussi affertur, quicumque demum is sit, *tussim* tunc *humidam* dicimus, si vero nullus,

nullave materies, *siccam*. At plerumque ab initio *sicca* esse consuevit, progressu vero sensim fieri *humida* solet. *Fe-Ferina, lenis, rinam*, quando vehementior est, *lenem*, quando mitior, ap-^{*continua, in-*}pellant. Itemque *continuam*, aut *intermittentem*, aut perio-^{*termittens,*}
dicam, *nocturnam*, *catarrhalem*, *rheumaticam*, *epidemi-^{*epidemicam*}*
cam, pro diversa temporis quo insurgit, aut causae, quae eam gignit, ratione. ^{*etc.*}

§. IV.

Praeter hasce differentias, quae tamen praecipuae cen-^{*Tussis con-*}sentur, nuperi scriptores fere omnes de *convulsiva* etiam ^{*convulsiva.*} mentionem faciunt, novo usi vocabulo, quamquam morbus, quem eo comprehendunt, antiquus dici possit, fereque cum *tussi ferina* conveniat, cum eiusdem iam HIPPOCRATES, ut ^{*An veteribus*} refert FRID. HOFFMANNUS, meminisse videatur, ubi *tussim* ^{*nota.*}
ferinam, vel *delassantem*, vel *suffocantem* commemorat. Neque posterioribus ea ignota fuit. A SYDENHAMIO enim ^{*Synonyma.*} *pertussis* nomine donatur, atque a Gallis vernacula lingua *quinte* aut *coqueluche*, ab Italis *tosse canina* aut *asinina* vulgo appellatur. Primus fortasse, qui eam *convulsivam* vocavit, videtur fuisse WILLISIUS, neque inepte; non quod a convulso tantummodo thorace fiat, cum id cuilibet tussi prope commune sit, sed quod adeo saeviat ferociatque, ut ^{*Cur convul-*} non modo pectus pulmonesque vehementer constringat, eo-^{*siva dicatur.*} rumque cohibeat dilatationem, verum etiam universum ferme corpus convellat et quatiat. Hac enim correpti, quod ad intervalla contingit, pene suffocantur, facie tument et livent, ^{*Praecipua*} contremiscunt, sanguinem e naribus, oculis aut ore effun-^{*eius phaeno-*} dunt, ingesta evomunt, urinas alvique excrementa vel inviti, ^{*mena.*} aut inscii excernere coguntur, interdum mortui similes resolutique remanent, sic ut excuti et spiritu insufflato ad reviviscendum revocari debeant. Praeterea titillationis quendam sensum in larynge percipiunt, qui ad scrobiculum cordis videtur propagari, sonumque reddunt peculiarem, ac quasi ab imo prodeuntem. Sed illud imprimis notandum est, quod tussientes per aliquot minuta expirent tantum, nun-

quam inspirent, et si demum inspirationi facultas detur, sibilum, strepitum, clangorem et veluti eiulatum quendam edant, aëre nimirum, ut mihi videtur, arctatam glottidem ingrediente, difficulterque superante. Tussis haec plerumque infantes et pueros vexat, atque epidemice vagatur, ac saepe morbillos aut variolas praecurrit. Non tamen semper adultis parcat.

Qui huic tussi obnoxii.

§. V.

Causae generatim.

Causae, a quibus *coryza* aliaeque affectiones catarrhales profluunt ¹⁾, *tussi* quoque in universum gignendae valent; cuiusmodi imprimis sunt frigus subitaneum, venti boreales, item humidi et frigidi, repentinae tempestatum vicissitudines, pedum aut aliarum partium improvida refrigeratio, incautus a loco calido in frigidum transitus, acre epidemicum in aëre volitans et similia; quibus fit, ut retenta exspirabili materia, quae a pulmonibus emanare deberet, aut quae ab universa corporis superficie proditura esset, et ad spiritales partes delata, aut suscepto absorptoque epidemico miasmate, mucus laryngem tracheamque oblinire solitus vitium acrimoniamque capiat, aut lymphæ sanguisque uberior viscidiorque factus ad eas pulmonesque confluat congeraturque, et collectione irritationeque tussim moveat. Tussim quoque provocant glandularum bronchialium vitia, pulmonum cruda tubercula, scirrhi, vomicae, hydatides, acria in laryngem delapsa, inspirata, aut sponte ibidem genita. Haec igitur origo est tussis *idiopathicae*, et quidem *primariae*. De *secundariis* vero, et speciatim de scorbutica, venerea, scabiosa, herpetica reliquisque symptomaticis aut sympathicis rarioribus non est huius loci fasius disserere.

Secundariae tussis origo et causae.

1) Vid. vol 3. cap. XI. de gravedine, coryza etc.

D i a g n o s i s.

§. VI.

Tussis a causis modo (§. V.) descriptis exorta, quoniam cum catarrho et rheumate omnino convenit, *catarrhalis et rheumatica* passim nominatur, ut ab aliis tussis generibus distinguatur. Prout vero a tenui aut crasso humore efficitur, diversa etiam symptomata inducere solet, et diversam curandi rationem exposcit. Interest igitur signa utriusque causae accuratius indicare, ne error in diagnosi et curatione subrepat. Tenuem acremque humorem tussis causam esse, liquebit ex temperamento calido et sicco, habitu graciliori, oculorum lacrymatione et rubore, facie roseo colore suffusa, gravedine, narium pruritu, frequenti sternutatione, coryza humida, interdum nares et labium superius excoriante, continua faucium titillatione, crebroque ad tussendum incitamento, vesperi praesertim ingravescentibus, nulla aut pauca tenuioris lymphae aut salivae excretionem, spiritu aliquantulum difficili, pulsu plerumque celeriori et duriusculo, et demum ex morbis praegressis, acritudinem humorum denotantibus. Contra ubi crassus et viscidus humor tussim ciet, matutino magis tempore ea aegrum exercet, materia tenax, albicans vel subflava extusitur, pulmones et bronchia spumoso muco obstruuntur, et quodammodo opplentur, respiratio gravis et laboriosa aliquantum est, dumque aër inspiratur, strepitus et sibilus humoris intus veluti bullientis auditur.

Tussis catarrhalis et rheumatica qualis.

Signa tussis a tenui humore.

Signa tussis a crasso humore.

§. VII.

Ex his igitur tussis sedes et causa colligi potest, praesertim si ea antecesserint, quae spiritalia organa potissimum afficere solent. Certius *catarrhalem* tussim esse apparebit, si gravedo, coryza et faucium aliquis dolor non abfuerint ab initio; *idiopathicam* vero, potissimum si, praeter superenarrata, altius inspirare volentem, aut aliquanto diutius

Certius catarrhalis et idiopathica quomodo innotescant.

loquentem continuo tussis corripiat aut increbrescat, si superior pectoris pars humore quasi oppleta percipiatur, si vox simul rauca sit, si sputa e profundiori loco prodire sentiantur, si thorax et sternum punctiunculis hinc illinc quasi feriantur, si febricula nocturna et crebrae horripilationes accesserint, et cuncta vesperi exasperentur, quemadmodum de febris catarrhali alibi dictum est.

§. VIII.

An tussis convulsiva una sit eademque cum stomachali.

Argumenta affirmantia.

Quid iis reponi possit.

Non praetermittendum est, tussim *convulsivam*, de qua supra (§. IV.) retuli, a plerisque cum tussi *stomachali* (§. II.) confundi, deducique a ventriculo, saburra acri et mucosa obsesso et praegravato. Qui in huiusmodi sententia conquiescunt, his propemodum argumentis confidunt. ventriculum male affici in tussi convulsiva ex eo evinci, quod plerumque eam vomitus ingestorum et materiae mucosae subsequatur; quod titillationis sensus ad scrobiculum cordis pertingat, quod profundius resonet, et clangosa sit, ac si in ventre sedem haberet; quod oleosa semper noceant, prosint vero amara, stomachica et evacuantia tam ore sumta, quam in anum iniecta; quod similis tussis non raro invalescat in ipsis tertianarum quarundam accessionibus, quarum fomes in primis viis existere communiter creditur. Verum, si quid iudico, ostendant prius oportet, quod sane difficillimum erit, vomitum non esse sympathicum, sed idiopathicum; sensum pariter titillationis ad cordis scrobiculum esse revera idiopathicum, neque fallacem, certoque ad ventriculum pertinere, neque eo loci aliunde protendi. Deinde nihil certe videtur probare sonitus obscurior et profundior, quam tussis excitat, si vere talis est; cum sonitus ille non certe ad abdomen, sed ad pectoris pulmonisque cava omnino referendus sit. Falsum porro est, oleosa semper nocere, amara et evacuantia prodesse; nam saepe oleosa tussim hanc plurimum levant, quamquam interdum frustranea videantur, morbi vi superante. Nec amara, nec emetica, nec purgantia prosunt semper, uti pluries experientia didici. Et,

si quando aliquid boni praestant, an semper id praestant, quia stomacho amica sunt, quia saburram causamque ipsam educunt? Nonne etiam incidendo, attenuando, pulmones excutiendo, et sputum diaphoresinque provocando iuvant? Quamobrem integrum mihi erit ad HOMII sententiam probandam accedere, qui omne discrimen, quod inter tussim convulsivam et reliquas tusses idiopathicas intercedit, a maiore partium, quam in vulgari catarrho, affectarum irritatione, maioreque totius corporis irritabilitate repetere non ¹⁾ dubitavit.

HOMII sententia probabilior.

1) *Princip. Medic. l. 2. p. 3. sect. 5. §. 10.*

P r o g n o s i s.

§. IX.

Tussis ut plurimum levis morbus censetur, sed perpe-
ram, nam saepe in alios gravissimos morbos degenerat, atque
alia periculosissima mala advocat, uti peripneumoniam, pleu-
ritidem, anginam, haemoptysin, phthisin pulmonarem, tuber-
cula, vomicas, gibbositatem, sanguinis e naribus fluxum, her-
nias abdominis aut inguinis, abortum, uteri haemorrhagias,
organica praecordiorum vitia, capitis dolorem, vigilias, apo-
plexias lethales ex ruptione vasorum cerebri atque alia eius-
modi. Capiti certe atque oculis semper noxia est. Si tussi
catarrhali superveniant sputa crassa et concocta, aut striis
sanguineis remixta, plerumque morbum ¹⁾ solvunt. Inter-
dum sudor, interdum alvi fluxus contumacissimae tussi re-
medio fuit. *Convulsiva* tussis infantibus unius anni, atque
ante dentium caninorum eruptionem non raro exitium affert;
reliquis non item. Illi plerumque evadunt, qui sanguinem
e naribus fundunt ²⁾. Si diu trahitur, ut saepe accidit, nec
mitigari, nec compesci potest, abit in morbum scrophularem,
in rhachitidem, in ³⁾ phthisin ⁴⁾.

Prognostica.

Quot morbos periculosos neglecta inducat tussis.

Catarrhalis fausta signa.

Convulsivae prognosis fausta et infesta.

1) VAN SWIET. in BOERH. §. 830. n. 2.

2) BISSET *Medical Essays and observat. p. 173.*

3) *Id. ib. p. 178.*

G. BUTTERI
*singularis
opinio an
vera sit.*

4) Hanc ob causam potissimum GUILIELMUS BUTTERUS in peculiari tractatu *de tussi convulsiva* anglice scripto opinatur, hunc morbum suam sedem nequaquam in pulmonibus habere; additque se nunquam a *tussi pulmonari rhachitidem et scrophulas* profectas vidisse. Vid. *Comm. med. et philos. Soc. med. Edinb. T. 1. p. 4. n. VIII.* Sed pace eius dictum sit, viderunt alii; nec difficilis explicatu res est. Quid? nunquamne *phthisin pulmonarem* vidit ex *tussi convulsiva* natam, quod adeo frequens est?

C u r a t i o.

§. X.

*Curatio ge-
neralis.*

Quaelibet tussis (§. I. II.) oppugnanda iis est, quae causam efficientem emendant aut tollunt. In universum si lenior tussis est, longisque intervallis interrupta, sola saepe naturae ope, aut sola abstinencia, potu aqueo calenti et regimine diapnoico discutitur. At si vehementius et crebrius divexet, sanguinis missionem, etsi febris absit, interdum etiam repetitam exoptat, ut nimirum inflammationis initium, aut eius timor avertatur, aut imminens vasorum disruptio praecaveatur. Id imprimis in sanguineis plethoricisque, in proclivibus ad haemoptysin et phthisin, in tussi *sicca* (§. III.), itemque in ea, quam acer calidusque humor (§. VI) procreat. Nihil enim certius vasorum plenitudinem, congestiones, phlogosin, spasmos, quae cum tussi paulo molestiori iunguntur, tollit resolvitque, quam sanguinis missio; ex hac enim neglecta inter initia tussis et catarrhalium affectuum pedetentim ad phthisin transitum fieri, saepissime vident et queruntur clinici peritiores. Post haec maximum praesidium praebent diluentia et diaphoretica; blando enim et continuato sudore causa morbi educitur, avertiturque a pulmone.

*Sanguinis
missio.*

*Omissio re-
nae sectionis
saepe phthi-
seos causa.*

§. XI.

*Diluentia et
incrassantia.*

Acrem vero tenuemque humorem, qui tussim efficit, temperant atque obtundunt *diluentia* et *incrassantia*, uti decocta hordei, avenae, radicum althaeae, glycyrrhizae,

saleb¹), cynosorchidis, aut diluta foliorum theae, florum papaveris erratici, violarum, malvae, verbasci; item serum lactis, hydrogala, iura ranarum, testudinum nemorensium, caudarum cancrorum fluviatilium, emulsa ex seminibus oleosis et mucilaginosi, cremor oryzae, olea pingua recenter sine ignis opera expressa, sperma ceti candidissimum atque alia huius generis, utpote quae spasticas etiam contractiones laxant et mulcent. Valentius incrassant, acritatesque involvunt gummi arabicum lucidum et albicans, et tragacanthicum, ex quibus non modo mixturae et eclegmata, verum etiam cum succo glycyrrhizae aut saccharo parantur tabellae et rotulae, inter quas celebres admodum sunt illae, quibus *pasta althaeae*, sive *pâte de guimauve* nomen est. Ubi *Incidentia et* autem crassus et viscidus humor morbum facit, incidentia *attenuantia.* et attenuantia indicantur, qualia sunt mel, oxymel, radix helenii, thus, flores benzoës, sulphuris, decocta ex passulis, rapis, veronica, scabiosa, pulmonaria, marrubio albo, polygala vulgari aut virginiana, pareira brava et radice bardanae. Validiora adhuc sunt sapo venetus, gummi ammoniacum, kermes minerale, sulphur auratum antimonii, stibium diaphoreticum non ablutum aliaque huius census, a quibus illud etiam emolumenti exspectari licet, quod torpentem solidarum partium vim sollicitant eriguntque. Sunt tamen quaedam ex his, uti sapo venetus, gummi ammoniacum, marrubium etc., quae cautissime in usum vocari debent in temperamentis calidis et siccis, in diatesi sanguinis ad inflammationem prona, in sensibiliore corpore, ne acrimonia et caliditate noceant.

1) Radix saleb hodie magno in usu est, et quasi tota in mucilaginem solvitur. Ex indigenis ei substituitur radix cynosorchidis.

§. XII.

Revellentia quoque egregiam operam praestant, quo- *Revellentia.* rum praecipua sunt balnea pedum, epispastica et vesicantia. His enim interdum mirum in modum tussis minuitur, sen-

sinque depellitur, sputum facilius, et respiratio liberior redditur, brevique sanitas restituitur, advocata scilicet aliorum, atque evacuata morbifica, materie. Hoc etiam nomine commendanda sunt eccoprotica et clysmata, quibus alvo soluta non raro contumaciores tusses devictas novimus. Imo interdum solis catharticis paulo valentioribus cedere eas vidimus. Quo opportune spectat observatio PROSPERI ALPINI, qui multos narrat a diuturnis in pulmones distillationibus ita languidos, et quasi tabidos factos, ut de eorum salute vix ulla spes superesset, et nihil a vulgaribus alvum ducentibus levatos, tandem ab assumpta scammonia, vel colocynthide largissime purgatos extemplo ¹) convaluisse.

2) *De medic. Aegyptior. l. 4. c. 6.*

§. XIII.

Paregoricorum usus.

Tanta tamen est tussis vis interdum, ut his (§. X. XI. XII.) prope despectis, aegros neque ad quietem se componere, neque somno indulgere permittat. Hinc ad sedantia, anodyna et narcotica subinde confugere oportet, quibus ipsa conticescat, et quieti et somno locus detur. Leni atque innocua facultate valent aquae violarum, nymphaeae, lactucae, papaveris rhoeados, aut harum plantarum diluta aut conservae, ut vocant, et prae ceteris emulsa ex seminibus frigidis et *syrupus* papaveris albi, aut *de meconio* SYDENHAMII. Maiori vi agunt opium, *laudanum liquidum* SYDENHAMII, *laudanum nepenthes* QUERCETANI, *pilulae de styrace* SYLVII, de cynoglosso aliaque opium recipientia, quae ab auctoribus passim describuntur. Nonnulli ad sedandam acerrimam molestissimamque tussim proponunt vaporem aquae calidae, cui mollissimae plantae incoctae sint, ore infundibili ope hauriendum. Neque id quidem sua laude fraudari debet. In eius tamen usu cavendum est, ne vapor nimis calens sit, neque in iis usurpetur, qui ad sputum sanguinis propendere videntur, aut nimia pulmonum laxitate ac debilitate laborant.

Vapor aquae calidae quibus conveniat.

§. XIV.

Tussi porro *convulsivae* (§. IV.), quaecunque eius de- *Curatio tus-*
 mum causa sit, experientia edocuit, utilissimum esse sangui- *sis convulsi-*
 nem aliquanto largius protinus inter initia mittere, vomiti- *vae.*
 um blande et iterato etiam, ubi nihil contra obstat, ciere, *V. S. inter*
 alvum ducere manna, rhabarbaro, mercurio dulci, canthari- *initia.*
 dibus cutim exulcerare, ut mucosus acerque humor solvatur, *Emesis, alvi*
 extrorsumque avocetur, et simul demulcentibus, incrassan- *ductio, re-*
 tibus, absorbentibus paregoricisque *tussim* lenire. SYDEN- *vellentia.*
 HAMIUS *tussim* huiusmodi curari tantum sanguinis missione, *Paregorica.*
 epispasticis et cathartici lenioribus ¹⁾ auctor est. HUXHA- *Methodus*
 MIO mercurialia cathartici admiscere primum, deinde corti- *SYDENHAMII.*
 cem peruvianum dare ²⁾ maxime placuit. BISSETUM quo- *HUXHAMII et*
 que si audiamus, optimum praesidium est in leni emetico ex *BISSETI.*
 oxymelle scillitico, atque rhabarbari et mannae usu, deinde
 in cortice peruviano, praesertim morbo iam inclinante, et
 tussi longiora quietis intervalla ³⁾ relincente. Ex emeti-
 cis praeferuntur kermes minerale, ipecacuanha, tartarus eme-
 ticus oxymelque scilliticum ⁴⁾. His vero adversatur Cl. BUR- *BURTONI opi-*
 TONUS ⁵⁾; phlebotomiam, emesin et catharsin vituperans, *nio his con-*
 excepto aliquo graviore casu; laudat vero mixturam, in quam *traria irride-*
 cantharides ingrediuntur. Nec mirum, cum Angli aliique
 transalpini venenis et vehementioribus medicamentis pleri-
 que delectentur.

1) Epist. I. responsor.

2) *De morb. epid. T. 1. p. 75. T. 2. p. 26. 28. et p. 178.*

3) *Medical Essays and observat. p. 178.*

4) *Essays de médec. d'Edimb. T. 4. p. 26., et HUXHAM.*
l. c.

5) *Essays de méd. d'Edimb. T. 7. p. 120.*

§. XV.

Muscus arboreus, et speciatim querneus adversus hanc *Specifica.*
 tussim (§. XIV.) mirifice valere dicitur. Eius decoctum
 BAGLIVIIUS extollit. Ex eo etiam paratur syrupus, ut pue- *BAGLIVII de-*
 ris infantibusque dari possit ¹⁾. Quod autem ad musci huius *coctum.*
Non bene

METZGERUS decoctum, METZGERUS ²) *irrito successu* illud adhibuit; sed unico experimento id affirmat, nec iteravit, ut par fuisset, periclitationes. Muscum item ³) pyxioidem, sive lichenem pyxidatum contra *tussim convulsivam* (*coqueluche* vulgo dictam) uti specificum laudat VAN WOIENSEL ⁴). Dedit is utilissime decocti forma, syrupo menthae edulcatum. Eius pulverem pluries datum commendat DILLENIIUS ex auctoritate et fide GERARDI et WILLISII. Alii decoctum ex lacte saepe in die sorbillandum praecipiunt. Nonnulli ex superioribus extractum cicutae reliquis remediis anteferunt. BUTTERUS ⁵) viginti historias recenset, quibus ostendat praestantissimam huius medicamenti hoc in morbo facultatem. Ipse utebatur huiusmodi extracto in liquore quodam aquoso soluto et satis diluto; de quo parum primo, deinde plus propinabat. Infanti nondum sex menses nato dabat granum dimidium uno die partitis vicibus absumendum; aetati sex mensium ad biennium usque granum unum. A duobus annis usque ad vigesimum tot grana dimidia, quot anni, praebenda singulis diebus iubebat. Post vigesimum aetatis annum, decem grana primo die exhibuit, deinde dosin auxit, prout opus ei visum est. Si aeger hinc bis in die non deiecerit, suadet adici magnesiam aut salem polychrestum. Cuicumque non modo aetati, sed temperamento et sexui innocue dari asseverat. Si morbus complicetur cum *vermibus*, *dysenteria*, *dentitione*, *variolis*, *morbillisve* praeter cicutae extractum non omittit remedia hisce morbis accommodata. Nec timet eo uti in utero gerentibus sive gravidis foeminis, aut feбри laborantibus. Restat igitur, ut remedii huius laudes novis accuratisque periculis confirmentur. Non desunt etiam, qui moschum utiliter adhibuerint, praesertim in hystericis atque hypochondriacis mobilique nervorum systemate praeditis. Anodyna enim et diaphoretica virtute prodesse videtur. GORTERIUS ⁶) in quadam *epidemica tussis convulsivae constitutione* mixturae cuiusdam salinae et diaphoreticae utilitatem expertus est. Nec revera quidquam utilius est, quam diaphoresin promovere in morbo, quem

Extractum cicutae eiusque adhibendi modus iuxta BUTTERUM.

Monitum auctoris.

Moschi utilitas. Mixtura GORTERII.

plerumque acre perspirabile retentum parit. Ego non semel infantibus et pueris magno cum iuvamine dedi quoque butyrum recens, pluries aqua purissima subactum et lotum, *Butyri, seri lactis et lactis ipsius mira* atque in parvas pilas frigida redactum, quarum una vel altera, saccharo conspersa, subinde vorabatur. Serum quoque lactis defaecatum, imo lac ipsum aqua calenti dilutum non semel morbi vim fregit, eiusque progressum inlibuit, aut saltem tutiorem reddidit. *vis.*

1) Syrupi huius formula exstat in *Pharmacopoea Wirtembergensi*.

2) *Advers. medic. P. 2. p. 56.*

3) Muscus pyxioides sive lichen pyxidatus est *muscus pyxioides terrestris C. B.*, aut *lichen pyxidatus maior Instit. R. H. TOURNEFORT.*, sive *Lichenoides tubulosum pyxidatum cinereum DILLENII*.

4) *Hist. de la Sociét. Royal. de Méd. T. 2. p. 294.*

5) *Diar. med. Paris. T. 52. p. 523.*

6) *Dissert. de Tussi*, quae lectu dignissima est.

§. XVI.

Ceterum in omni tussi diuturniore, quando morbus ad finem inclinatur, et magna pars materiae expulsa per sputa est, aut diutius, quam oportet, et copiosius ad pulmones ob atoniae quandam speciem humor catarrhalis confluit, indeque sputorum copia corpus emacrescit, tunc leniter roborantibus et traumaticis tonicis fit locus. Amara huc spectant, praesertim si stomachi imbecillitas, pulmonum habitusque laxitas tussis causam fovere videatur. In his cortex peruvianus, quem memoravi, primas tenet. Egregie is etiam proficit, cum tussis periodum quandam prae se fert. Periodicam tussim hoc praestantissimo auxilio etiam HOMIUS celerissime abegit. Utiliter corticis huius decocto aut diluto adiicitur lactis asinini aut vaccini aliquantulum. Hodie ad tussim diuturnam phthisinque minitantem proponunt multi decoctum lichenis islandici, cui vis demulcens et incrassans tribuitur. Nonnullis etiam, resolvere atque incidere creditur. Praeter mucilaginosam naturam aliquid etiam acrimoniae habet, ut ostendit eius emetica aut cathartica virtus, *In fine cuiusvis tussis roborantia.* *Cortex peruvianus.* *Lac. Lichen islandicus in tussi diuturna phthisinque minitante.*

Aquae medicatae. si saturatius decoctum praebeatur. Nos diuturnas siccasque tusses interdum fugavimus copioso aquae *nucerinae*, aut *villensis* potu ieiuno stomacho adhibito et balneo tepido aquae dulcis. *Selleranam* aquam cum lactis asinini tertia parte nuptam, et mediocri quantitate ad aliquot hebdomadas mane sumendam praecipiunt alii, maxime Germani.

§. XVII.

Tussi senili incidentia et amara. Senes quoque tussi saepe vexantur; hinc tussiculosi vulgo dicuntur. In his tussim, quam plerumque copiosior mucus in ventriculis laryngis atque in folliculis, sive cryptis asperae arteriae bronchiorumque collectus facit, incidentibus, amaris et attenuantibus (§. II.) oppugnare ¹⁾ oportet; quia raucedines et gravedines in valde senibus, ut inquit HIPPOCRATES ²⁾, non coquuntur. Qui vero catarrhis rheumaticisque affectibus obnoxii maxime sunt, debent paulatim aëri assuescere, cubicula calefacta vitare, sensim indumenta nimia minuere, cubile frigidum ingredi, conclavia temperatissima incolere, frigidum cibum et potum sumere, multum exerceri, et si affectio inveteraverit, cortice peruviano et balneis frigidis firmari ³⁾. Qui salsis capitis defluxionibus instantur, non facile cathartica admittant, ne per cellularem textum ad pectus et pulmones humor noxius alliciatur. Utilius in iis sudor cietur decocto ligni santali et guaiaci et herbarum cephalicarum ⁴⁾. His quoque prodest verno tempore frigida caput et collum subinde aspergi. Sic enim fluxiones illarum partium, quae a nimia laxitate foveantur, saepe praecaveri possunt. Plurimum etiam boni efficiunt prophylaxeos causa fonticuli brachiis aut femoribus inusti.

Regimen frigidum quibus.

Salsae capitis fluxiones quid optent.

Aquae frigidae aspersio.

Fonticuli.

1) VAN SWIETEN in BOERH. §. 69. GORTER. *dissert. de Tussi.* §. 50.

2) Aphor. 40. sect. 2.

3) *Gazzett. d'Oltremonti* 1762. num. XXXII. edit. venet.

4) BONNET *Theatr. tabid. p.* 119.

§. XVIII.

Ad haec autem accedat diaeteticum regimen oportet. *Diaeta.* Cibi sint concocti faciles. Carnes et quaevis acris vitentur. A vino abstinere saluberrimum est, itemque a coena, cuius loco aut lac, aut ptisana hordeacea, aut pulmentum leve ex farina hordei nonnihil tosta esse poterit. Aëris quoque delectus necessarius est, quo solo interdum pertinacissimas tusses sublatas ferunt. In his potissimum vectio, equitatio, balnea, aquarum medicatarum potus, decocta lignorum et radicum purificantium et lactea diaeta tentari debent; ut cauteria praeteream, quae in humidiori habitu cacochoymoque corpore quantum proficere possint, nemo non videt.

§. XIX.

De tussibus secundariis, symptomaticis ac sympathicis *Tusses secundariae et sympathicae* nihil dicam. Ut enim hae omnes ab aliis morbis aliarumve partium vitiis ortum ducunt, sic non aliam curationem peromittuntur. quam quae morbis et causis, unde manant, accommodata est. Quare a *scorbuto*, a *lue venerea*, a *scrophulis*, a *mensibus retentis*, a *morbillis*, *febris*, *peripneumonia*, *pleuritide*, *asthmate*, *hydrothorace*, *phthisi*, *cacochylia primarum viarum*, *dyspepsia*, *vermibus*, *obstructionibus imi ventris*, *hysteria*, *hypochondriasi* et sic porro earum curatione desumi debet.

CAPUT II.

DE CRUENTA EXSPUITIONE ET SPECIATIM DE HAEMOPTYSI.

§. XX.

Sanguis, qui ex ore exspuitur, variis e locis profundi *Cruenta exspuitio.* potest, nempe e gingivis, e lingua, e palato, faucibus, columella, naribus, pharynge, oesophago, ventriculo, larynge,

aspera arteria et pulmonibus. Effunditur autem eisdem omnino modis, quos alibi ¹⁾, ubi *de narium haemorrhagia* disseruimus, oportuit explicare. Quocunque autem e loco erumpat, *cruenta exspuitio* est, sive *sanguinis sputum*, graece *αἱμοπτυσις*. At distinguendam a *cruenta exspuitione* sive sanguinis sputo *haemoptysin* putat RIVERIUS auctoritate ductus GALENI ²⁾. Cum RIVERIO FRID. HOFFMANNUS, LUDWIGIUS, PLATNERUS alique bene multi ex nuperioribus non sine causa consentiunt. Haemoptysin proprie et speciatim sanguinis puri et non pauci e pulmonibus prodeuntis per os excretioni tantummodo convenire aiunt, neque promiscue esse usurpandam hanc vocem. Si tamen quis voluerit sanguini etiam e larynge aut aspera arteria profluenti haemoptyseos nomen tribuere, per me quidem licebit, nec crimini id cuiquam dabo, cum levior saltem haemoptysis, aut quidam eius gradus haberi queat.

1) *T. 3. cap. XII.*

2) *De crisib. l. 1. cap. 1.*

§. XXI.

Sputum sanguinis qui differat ab haemoptysi.

Haemoptysis vera quae-nam.

Discrimen inter sanguinis sputum et fluorem.

Cum ea (§. XX.) tamen confundi nequaquam debet sputum subcruentum, aut striis sanguineis remixtum, quod pleuritici et peripneumonici emittunt, neque illud, si HOFFMANNUM audiri lubeat, quod causam externam et violentam, vulnus puta, contusionem, ictum vel graviolem casum subsequitur. Nam haemoptysis vera ea est partium spiritalium haemorrhagia, quae a causa interiore, puta sanguinis copia aut dyscrasia, aut laesa vasorum pulmonarium et compage et continuitate pronascitur. Video praeterea COELIUM AURELIANUM, NICOLAUM PISONEM aliosque *sanguinis sputum* ab eius *fluore* secernere, illud esse existimantes, quando sanguis paucus aut concretus cum pituita aut aliis humoribus effertur; hunc vero, nempe *sanguinis fluorem*, quando purus, rutilans, floridus et magna copia erumpit. Quae distinguendi loquendique ratio etsi hodie fere obsoleverit, non tamen inutile erit animadvertisse, quid veteres hisce

voca-

vocabulis intellexerint, ut omnis confusio obscuritasque, quae eorum scripta legentibus oboriri potest, procul arceatur. Discrimen enim, quod hodie inter *sanguinis sputum* et *veram hoemoptysin* intercedit, fere idem olim a quibusdam ponebatur inter sanguinis sputum et fluorem, ut dictum est.

D i a g n o s i s.

§. XXII.

Quoniam igitur tot modis (§. XX.) sanguis ore ex-
cerni potest, quaerendum modo est, quibus indiciis locus,
unde manat, recte cognoscatur. Itaque si e gingivis, lingua
aut palato exstillat, simplici exspuitione emittitur, et facile
inspecto ore, undenam prodeat, innotescit. Praeterea, qui
e gingivis manat, ut scorbuticis crebro accidit, serosior, di-
lutior aut quandoque etiam nigricantior est. Titillatio vero
aliqua circa palatum percipitur, si illinc scaturiat, et ple-
rumque capitis gravitas aut dolor, aut aurium tinnitus, aut
temporum et frontis pulsatio, aut somnus nocturnus prae-
cessit. Hic persaepe matutinis horis post somnum et de-
cubitus apparet. Qui vero e faucibus, gurgulione aut in-
terioribus naribus prosilit, solo excreatu et sine tussi edu-
citur. Interdum tamen tussiculam is movet, aut vomendi
voluntatem, prout vel in laryngem, vel in oesophagum
sanguinis aliquid deciderit. Insuper oculis locus patet, et
semper cruenti quid e naribus emungitur, si ab his in fau-
ces descenderit. Non tamen, quotiescunque sanguis e na-
ribus emungitur, illico statuendum est illum etiam, qui ore
prodierit, e faucibus et naribus exsilire. Nam saepenumero
sanguis e larynge tanto impetu profunditur, ut aliqua eius-
dem pars sursum in narium cava irrumpat, emungique an-
terius possit. Quo casu evidentissimum est, fallax eiusmodi
signum esse, neque eidem semper fidendum. Interdum quo-
que incidit (quod non semel a nobis observatum est), ut,

*Quibus indi-
ciis locus,
unde sanguis
effluit, inter-
nosci possit.
Quinam e
gingivis et
palato pro-
deat.*

*Signa san-
guinis e pa-
lato eru-
pentis.*

*Quomodo
cognoscatur
prodire e
faucibus aut
naribus in-
ternis.*

dum e pulmone sanguis fertur, eodem tempore narium vasa a vehementiore tussis nisu simul disrumpantur, sicque sanguis utraque ex parte, ore nimirum et naso erumpat. Cavere igitur oportet, ne utrumque sanguinem e solis naribus profluere temere credamus.

§. XXIII.

Ab oesophago aut ventriculo quando proficiscitur, crassus et niger sanguis plerumque est; quandoque etiam, sed rarissimum est, aquae, in qua caro lota est, speciem refert, et vomitu tantummodo eiicitur. Animadvertendum vero est, vomitu interdum expelli sanguinem, qui inter dormiendum e faucibus potissimum exstillans in oesophagum penetraverit. At quando in ventriculo eius scaturigo est, circa epigastrium et dolor et pondus et anxietas et ardor plerumque percipiuntur, absuntque affecti pulmonis aliarumque sedium indicia. Levi tussicula exiguoque motu extunditur sanguis e laryngis et asperae arteriae vasculis. Praeterea pruritus et calor aliquis in trachea ipsa percipitur, et quodammodo sursum ascendere videtur, antequam in ore sanguis se prodat. Si vero profundiore e loco pulmonibusque scaturiat, tussi validiore expelli solet, floridus et spumidus ab admixto aëre est, et murmuris strepitusque quoddam genus intus efficit. Hinc iure scripsit HIPPOCRATES: *qui sanguinem spumosum exspuunt, his ex pulmone talis reiectio est* ¹). Quod si tussis, aut clamor, aut aliud simile, quo pulmonibus vim inferri notum est, antecesserit, aut dolor ²) aut pondus in pectore sentiatur, aut aegre spiritus ducatur, aut cum punctationis divulsionisve alicubi, praesertim ad scapulas, sensu copuletur, aut maior aëris quantitas hauriri inspirarique nequeat, quin tussis et sanguinis sputum invalescat, aut excussetur, non licet amplius dubitare, num e pulmonibus sanguis effusus sit. Scire demum oportet, levi quandoque tussicula ac vix notabili sanguinem efferri, qui idcirco e superiore larynge exire videatur; cum tamen eius copia, et ea, quae consequuntur deinceps, saepe ostendant, fraudem

Quando ab oesophago aut ventriculo manet.

Quando e larynge et trachea.

Quando e pulmonibus.

Animadvertio ad fraudem et errorem vitandum.

subfuisse, et e pulmonibus, aut saltem e bronchiis eum prodiisse.

1) *Aphor. 13. sect. V. Coacar. n. 433.*

2) Olim credebant, sensu pulmones carere, quod nervis *Pulmones destituerentur, vel si qui ad eos pertingerent, in sola eorum sensu donan-* exteriori facie vagarentur a *sexta* deducti coniugatione, quam *tur.* hodie *octavam* vocamus. Quare plerique antiquiorum docuerunt, sputum sanguinis e pulmonibus sine dolore educi; quod etsi quandoque accidat, non tamen perpetuum et constans id est. Nam et nervis praeditos esse pulmones anatomicorum solertia demonstravit, et sensu etiam interius donari clinicae observationes evicerunt (§. I.). Veteres ipsi experientia didicerunt, sanguinem ab imo pectore interdum effundi cum doloris quodam sensu pectus occupante; quod ubi evenire videbant, ne praeconcepae de insensibilitate pulmonum opinioni valedicerent, e thorace, sive e pleura, quam sensibilissimam reputabant, tunc effundi dicebant, non e pulmonibus; nec norant, id anatomicis physiologicisque experimentis penitus adversari. Dum enim charybdim vitare volebant, se in scyllam incidere non animadvertabant. Nec satis obstat sensibilitati pulmonum auctoritas ANDREAE VESALII, anatomici alio- *Doloris a* quin celeberrimi, qui in compluribus, et potissimum in Co- *pulmonibus* mite DE BURA observavit magnas pulmonum suppurationes, *absentia ni-* quin dolorem perciperent; idque non rarum est. Sed tunc *hil officit, et* probabile est, sensum doloris non excitari, quia sensibilitas *quare.* infarctu, compressione aut alia quacunque ratione in nervis pulmonicis quodammodo obstupescit, ac quasi aboletur; aut etiam adeo lenta est eorum tensio, distractio et dilaceratio, ut nequaquam dolorem inferat. Praeterea si exempla non desint doloris absentis in pulmonum morbis, multo plura suppetunt doloris eos comitantis. Nuperrima item Cl. LORRYI capta in vivis pericula (*Expérienc. sur l'Irritabilité etc.*) confirmant, *pulmones*, et imprimis eorum interiores partes, uti *bronchia*, sensu reapse pollere, quod observatu dignissimum est.

§. XXIV.

Magni etiam refert nosse, *sanguinem*, qui e pulmone *Exceptio* effunditur, non semper floridum et rutilum et spumosum *circa sangui-* (§. XXIII.) esse, sed nonnunquam atrum, densum et coctum *nem e pul-* apparere. Talis enim cernitur, cum aut moram in pulmone, *monis ma-* eiusque vesiculis fecerit, substiteritque diutius immotus, aut e vasis varicosis aneurysmaticisque, in quibus congestus fere concreverit, repente dehiscitibus effluxerit. Niger quoque et porosus spongiae instar extussitur, BAGLIVIO ¹⁾ testante, si pars aliqua pulmonis sphacelo corrupta fuerit. Quas ob

res signa haec, qualia memoravi, una et coniunctim considerata sunt, ut sedem peculiarem, ex qua sanguis dimanat, tuto definire possimus; multaue prudentia et cautione opus est, ne in iudicando decipiamur. Secus enim et scorsum sumpta, neque ad rariora et minus frequentia collata, incertum fallaxque iudicium faciunt.

1) *Capit. de rar. affect. hepatis.*

§. XXV.

Causa proxima.

Quod ad proximam attinet haemoptyseos causam, ea est vel vasorum ruptura, quae graece dicitur ῥήξις et διαίρεσις, vel erosio, sive διάβρωσις, vel orificiorum osculorumque, quae intus hiant, dilatatio, sive ἀναστόμωσις. Frequentissima omnium putatur *rhexis* et *diueresis*, rara *diabrosis*, quae in phthisi atque ulcere pulmonum praecipue contingit. Plerumque tamen acritas humorum non diabrosin, sed *spasmodum* infert, quo vasa contracta aequabilem sanguinis circuitum subvertunt, vehementiusque in liberiora loca eum impellunt, unde, impetu quasi facto distenta, dissiliant rumpanturque, necesse est. Rarissima demum anastomosis habetur; sed tamen non ita in mulieribus ac viris, quibus consuetae evacuationes sanguinis deficiunt.

§. XXVI.

Causae proëguminae.

Remote ad haemoptysin iter parant corpus procerum, collum gracile et longum, pectus angustius, mala huius conformatio, imprimis gibbositas et depressio, tenella et laxa totius corporis, sed imprimis pulmonum compages, temperamentum cholericum, sanguineum, hereditaria labes, plethora, defectus consuetarum sanguinis e naribus, utero, haemorrhoidibus evacuationum, polyposae in vasis pulmonaribus aut in sinistris cordis sinibus concrectiones, eorundem compressio, infarctus aut dilatatio praeter naturam, viscerum abdominalium obstructions, abdominis arcta constrictio, spasmi, acritates variae, et praesertim scorbutica, sive hae irritent tantum, sive crasin sanguinis resolvant, sive etiam

vasa erodant. Potissimum vero ad haemoptysin pronior est adolescentia aetasque ab anno duodevigesimo usque ad trigesimum quintum. Hinc HIPPOCRATES scripsit: *Adolescentibus autem sanguinis spuitiones, tabes, febres acutae, morbus comitialis et alii, sed praecipue ante dicti* ¹⁾).

1) *Aphor. 29. Sect. III.*

§. XXVII.

Occasionem vero haemoptysi porrigunt vehementior *Procatarcti-* pectoris aut pulmonum nisus in attollendis ponderibus, in ^{cae.} saltu, cantu, tussi, vociferatione, tiliarum aut tubarum inflatione, in deponenda alvo, aut foetu edendo, colli, pectoris aut abdominis nimia coarctatio, aër calidus et siccus, vel nimium rarus et levis, uti est in montium cacuminibus, vel frigidior humidiorve, abusus vini liquorum quoruncunque fermentatorum, rerumque acrium et calefacientium, motus corporis concitator in cursu, lucta, lusu, venere, scalarum et locorum acclivium ascensus, ira, gaudium aliaque subita animi pathemata graviora.

P r o g n o s i s.

§. XXVIII.

Cruenta exspuitio, quae *gingivis, linguae, naribus, Prognostica.* *gurgulioni, faucibus* debetur, periculo fere vacat; non ita quae ab *oesophago et ventriculo* est, si copiosior. Sed de hac alibi ¹⁾). Alibi etiam de sputo cruento, quod *pleuritis* et *peripneumoniae* proprium est, quodque in morbi declinatione salutem promittit ²⁾). Nec magni aestimanda est levis sanguinis exspuitio, quando e *summo larynge* effertur ob hypochondriorum spasticas contractiones, a quibus sanguis illuc vehementius urgetur et protruditur.

1) *Cap. IV. Parte II. huius Volum IV. §. 46. et 50.*

2) *Cap. IV. §§. 105. 116. 117.*

§. XXIX.

*Vera haemoptysis
semper periculosa.*

Ceterum vera haemoptysis nunquam expers discriminis est. Id etiam HIPPOCRATES animadvertit, dicens: *sanguis sursum quidem, qualiscunque fuerit, malus* ¹). Malus quoque niger et coactus et porosus (§. XXIV.), quia aneurysmata, aut varices, aut sphacelum significat. Imprimis magna pericula affert copiosa e pulmonibus sanguinis profusio, quia vel potest hominem illico exanimare, vel nimia eius copia intra vesiculas cellulosumque textum, aut bronchia ipsa congesta praefocare, vel cor debito sanguinis influxu orbare, vel etiam mole aut pondere opprimere, ut subita lethalisque syneope sive asphyxia subsequatur. Quod si haec forte fortuna effugiantur, gravissima saltem ulcera et insanabilia in pulmonibus metuenda sunt, eoque magis, quo corpus impurius est, aut cacochymia aliove morbo ex pravitate humorum simul laboraverit. Quare iure dixit HIPPOCRATES: *a sanguinis sputo puris sputum, malum*. Id autem verissimum praecipue fit, si febricula etiam accesserit nunquam penitus desinens, quam lentam amphemerinam vocant. Tum enim phthisis in propinquo esse perhibetur.

1) *Aphor. 15. Sect. VII.*

§. XXX.

*Hereditaria
exitiosior.*

*Copiosius
sputum periculosius
etiam.*

*Item quod
diabrosis
efficit.*

Quae hereditario veluti iure in filios nepotesque propagatur, multo exitiosior est, difficiliorque curatu. Plus etiam periculi habet ea, quae erupto maiore vase, aut ex profundiori loco derivatur, quam quae e minoris alicuius vaseuli ruptione, aut superiori e loco originem ducit. Illa uberiores sanguinem largitur, haec parciores; sic ut copiosior et largior sanguinis exspuitio plus discriminis, parcius et minor minus indicet. In universum gravior et perniciosior reliquis censetur, videturque illa, quam *diabrosis* efficit. In hac ab initio paucus quidem sanguis eiicitur, et salsum saporem exhibet, paulatim vero uberiore rivo pro-

funditur, dilatato scilicet per erosionem vasis osculo. In- *Inveteratum*
 veterata et chronica haemoptysis, aut phthisi pulmonari su- *malum, aut*
 perveniens omnem fere medicinam contemnit. *ulceri pulmo-*
num accedens
sine spe est.

§. XXXI.

Nihilo tamen minus experientia saepe demonstravit, a *Multi tamen*
 vera haemoptysi, interdum etiam larga et recidiva non pau- *sanantur.*
 cos evadere, quibus mature auxilium feratur, neque grave
 sit diaetae legibus religiose se submittere. Ferendum vero
 illud esse iubet PLATNERUS primo triduo. Minus quoque *Quae facilius*
 negotii facessit haemoptysis, quae ab aëre rariore et leviori, *curetur.*
 aut a suppressis catameniis, aut alia evacuatione deficiente
 procedit, quia plerumque per *anastomosin*, aut *diapedesin*
 sive exsudationem fieri solet. Minorem quoque metum in-
 cutit illa, quae a clamore aut motu vehementiore inducta
 est praec ea, quam *diabrosis* effecerit. Generatim haemoptysi *Signa bona,*
 laborantibus sine febre et tussi et dolore leviter conflictari, *mala.*
 sputumque ad dies quatuordecim tenuari, spem salutis facit.
 At intense febricitare, et tussire, aut dolere, sanguinemque
 recentem semper spuere, ut habemus in *Coacis* ¹⁾, minime
 bonum.

1) N. 427.

C u r a t i o.

§. XXXII.

Curationem fere eandem exoptat haemoptysis, ac ea
 est, quam in capite *de narium haemorrhagia* ¹⁾ propo-
 suimus; et si quod interest discrimen, id vel a parte affecta,
 vel a causa, vel a morbo impendente enascitur. Itaque ubi
 sanguis e pulmonibus cum impetu exscreatur, protinus eius
 non parum pro virium, pulsus, aetatis, temperamenti habi-
 tusque ratione e vena detrahendum est, idque opportune *Quando ite-*
 iterandum, praesertim prosequente haemoptysi, si homo *randa V. S.*
 plenior sit, et calcet, et febricitet. De loco, e quo mitti

debeat, non valde plerumque disceptare oportet, dummodo cito mittatur. Multi tamen satius ducunt venas primum inferiores aperire, deinde superiores et proximas. Neque facile quis a copia sanguinis excreti a vena secunda deterretur, dummodo pulsus se sustineant, nec inanita vasa ostendant. Prudenter quidem, sed non timide ad summum hoc praesidii genus deveniendum est, nisi manifesta sanguinis liquatio, raritas, dissolutio aut corruptio aliter suadeat. Imminuitur enim nimius sanguinis ad pulmones appulsus et coacervatio, vasaque minus distenta se contrahere tunc possunt, ut coëant et glutinentur. In hoc etiam fere tota continetur prophylaxis eorum, qui in plithisin ex hereditaria labe ²⁾ propendent. Neque alia revulsionum genera, quorum saepius verba fecimus, uti cucurbitulae, ligaturae, clysteres omitti debent, ut optato fine potiamur.

Revellentia.

1) *Vol. III. cap. XII.*

2) Vid. *Dissert. de ratione venae sectionis in haemoptoicis*, quae exstat in *Adversar. med. pract.* LUDWIGII P. 1. p. 145. Item ERNESTI VALENTINI COHAUSENII *Dissertatio de noxa timiditatis in haemoptyseos curatione*, quae legi potest in *Act. N. C. T.* 1. p. 33.

§. XXXIII.

Decubitus erectus.

Quies et silentium.

Regimen frigidum.

Interea aeger capite et pectore elevato quasi lecto insidens decumbat, ab omni tum corporis, tum maxime pectoris atque animi motu absteineat, imo vel ab ipso sermone sibi caveat, et si quid loqui velit, id submissa tantum voce et brevissimis verbis faciat. In conclavi ad frigidum potius inclinante conquiescat, stragulis levibus corpus cooperiat, neque vestimentis nimium adstrictis sanguinis circuitum turbet, tussim quanta maxima potest cura, caloremque tam in potu quam in cibo devitet.

§. XXXIV.

Refrigerantia.

Intrinsecus danda ea sunt, quae cognitis praecipuis causis occurrunt. Nimius sanguinis fervor et nimia eius raritas tenuitasve compescatur refreneturque aqua frigida, emulsis

ex seminibus farinosis, nitro, absorbentibus terreis, acido aliquo vegetabili saturatis et demum spiritibus acidis, quos *minerales* vocant. Ex his variae comparantur remediorum *Acida*. formulae, prout res aegri eiusque gustus exigere videntur. Scire tamen licet, acida plerumque tussim non modo exas- *Cautio*. perare, sed etiam movere, qua nihil nocentius in haemoptysi. Quod ubi incidit, quod saepius vidi, statim ea dimittenda sunt. Evitari vero id incommodi quadantenus potest, si acida, quae adhibere volumus, diluta, et mucilagineis oleo- sive mitigata dentur, si absorbentibus additis retundantur, atque opii aliquid iis adliCIatur. Celebratur ideo, et iure, *Mixtura* ut puto, mixtura ab inventore *Sylviana* dicta, quae habet *Sylvii*. *aquae plantaginis uncias sex, aceti destillati unciam se- mis, coralliorum rubrorum et terrae sigillatae, singulo- rum drachmam dimidiam, opii grana duo, syrupi de me- conio unciam, de qua subinde cochlear dari consuevit.* Huius ope et sanguinis fervor comprimitur, et si quid san- guinis coacti in pulmonaribus vesiculis haeserit, dissolvi cre- ditur, tussis et spasmi sedantur avertunturque.

§. XXXV.

Sanguinis exspuitio, quam in hypochondriacis (§.XXXVIII.) *Quid con- veniat ex- spuitioni sanguinis hypochon- driacae.* atque hystericis spasmi imi ventris et thoracis non raro in- ducunt, opio prae ceteris, oleosis, emollientibus in alvum iniectis, balneis pedum tepidis aliisque spasmos laxantibus plerumque supprimitur. Inter remedia, quae ex opio pa- rantur, excellere hic dicuntur laudanum cydoniatum, aethiops vegetabilis, diascordium FRACASTOBII et pilulae ad sputum sanguinis DEKERSII, utpote quae aliqua etiam adstringendi facultate videntur donari. Acritati humorum, si in hanc *Haemoptysi ex acritate quid.* haemoptyseos causa cadat, obviam eundem est mucilaginosus, farinaceis, pinguibus, oleosis, gummi arabico, tragacantha, quae duo postrema etiam glutinandi vim habent. CLERCUS ¹) refert curatam haemoptysin, quae a tribus iam annis iden- tidem revertebatur cum tussi ferina, ope remedii, quod constabat ex decocti hordei libris duabus et uncia una gummi

Observatio.

arabici in eodem dissoluti, per aliquod tempus adhibiti. Ab haemoptysi ab acritate sanguinis genita, in quam adolescens inciderat, cl. medicinae professor Bononiensis, cuius per aliquot annos auditor fui, solo, sed liberaliori et diuturno pulveris gummi arabici usu se convaluisse in suis praelectionibus narrabat, pervenitque ad eam senectam, ad quam paucis datum est pervenire.

1) CLERC *Histoir. de l'homme malad. T. 2. p. 36.*

§. XXXVI.

Adstringentia.

Nulla in morbo magis, quam in haemoptysi periculi magnitudo metusque cum aegrotantis, tum assidentium cogit saepissime medicos vel invitos ad *adstringentia* properare. Verum haec, si vere talia fuerint, vel nullo modo videntur ad vasa disrupta aut quacunque alia ratione adaperita pertingere, vel si penetraverint, nequaquam tuta esse; quod ab iis congestiones, tubercula, vomicae et demum phthisis gigni possunt. Eorum enim vim tenerrima, irritabilisque textura ferre nequit, quin vasa corrugentur, spasticas contractiones subeant, liberumque sanguinis circuitui iter praepediant. Quamobrem Cl. COHAUSENIUS post complures alios artis scientia, atque usu percelebres prudentissime admonet, ne ad ea nimis propere et nimis temere ¹⁾ confugiatur.

Animadversio.

1) *Dissert. citat.*

§. XXXVII.

Adstringentia quaedam passim laudata.

Attamen quaedam, ubi sistendi sanguinis tempus videatur, hoc nomine celebrari universim solent. In his succus urticae, praesertim non pungentis, sive, ut aiunt, mortuae, plantaginis, consolidae atque hederæ terrestris primas tenet, cuius aliquot unciae in diem propinantur. Adstringant vero huiusmodi succi, an resolvant et temperent, similique alio modo agant, dubitant nonnulli. Fungus pariter melitensis adstringendi laude clarissimus est, diciturque a quibusdam non temere credulis viris, qui eius effecta in sanguinem experimentis indagarunt, nec tamen ausi sunt iactatam ubique

Fungus Melitensis.

eius facultatem denegare, dum venarum oscula connectit, et mutuo applicat, sanguinem in eo statu, in quo erat, intactum integrumque omnino ¹⁾ relinquare. Quod sane, ni fallor, argumento est, non esse adhuc eius sanguinis sistendi facultatem satis firmis innixam observationibus. Sanguinem *Haematites*. spuentibus dabat ALEXANDER TRALLIANUS in singulos dies lapidis haematitis scrupula quatuor, non modo ut sanguinis sputum praesens comprimeret, sed etiam futurum averteret. A GESNERO, ab FRASTO, a CRATONE, RIVERIO, ETTMÜLLERO aliisque extollitur quam maxime *Electuarium ad sputum sanguinis* HAELIDAEI PADUANI ²⁾, in quo tamen plus *Electuarium HAELIDAEI PADUANI*. eminet vis anodyna et tussim sedans, quam adstringens. Si quid tamen in eo est, quod minus quibusdam probandum videtur, est plane suspecta seminum hyoscyami virtus, qua cerebrum turbant, stuporemque, imo interdum etiam furorem inducere possunt. Ab aliquot annis ad omnes haemorrhagias adhiberi coepta est, magnisque laudibus efferri aqua quaedam vulneraria, quae a IULIANO LANDIO pharmacopola Romano venditur. Apud Mediolanenses tanti fit eiusmodi, *Aqua vulneraria LANDII*. ut vocant, specificum, ut in quavis haemorrhagia tam intrinsecus, quam extrinsecus magna confidentia usurpetur, sed praecipue in haemoptysi ipsa. Universim clinici nostrates testantur, remedium istud miros praestare effectus, sic ut nunquam eius usum in haemorrhagarum curatione omittant. Experientia, fateor, plus ponderis habet, quam quaevis probabilis mentis ratio. Verum quam difficile est ipsum experimentum! Quantum prudentiae, sagacitatis, cautelarum et solertiae requiritur in recte faciendis periculis, quanto mentis acumine, quanta iudicii aequitate opus est in causarum effectibus dignoscendis distinguendisque ab aliis, quos aliae interiectae causae ediderint, ne in errorem rapiamur, nostraque experimenta nos ipsos decipiant! Ne quid vero dissimulem, aquae vulnerariae romanae compositio ³⁾ plane est eiusmodi, ut si quis vires físicas mediasque singulorum omnium ingredientium noverit, teneatque probe, quid chemica enchiresis in ea praestare possit, facile eius laudibus *Aqua vulneraria nocet magis, quam prodest, inspectis chemicis ingredientium facultatibus*.

viribusque adstringentibus diffidere omnino debeat. Imo si quid enchiresis chemica adeo repetita faceret, impertiretque liquori distillato plantarum saliumque facultates, aqua ista tantum abesset ut in haemoptysi prodesset, ut potius noceret.

1) *Comm. Acad. Bon. T. I. p. 158.*

2) *Electuarium ad sputum Sanguinis HÆLIDÆI PADUANI.*
Rec. Semin. hyoscyami, papav. albi ana drachm. X. Ter-
rae sigillat., Corallior. rubror. an drachm. V. Sacchari ro-
sati antiqui q. s. M. f. c. s. q. syrup. rosar. simplic. electua-
rium, de quo detur drachma una bis in die.

3) *Aqua vulneraria Landii, sive Romana.*

Rec. Succ. rec. origani, sanicalae, betonicae, verbenae,
sedi sive sempervivi, pimpinellae, millefolii ana unc. VI.
Succi mari unc. III. Sal. Alkali, Gemm. an. unc. VI. Cre-
mor. Tart. pulv. unc. IV. Aceti stillati lib. I., in quo solv.
aloës unc. I. cum dimidia.

In succo betonicae solvatur sal gemmae. In sacco verbe-
nae et millefolii sal Alkali. In succo pimpinellae cremor
tartari.

Omnia ponantur in retorta, et digerantur per dies tres,
dein distilla s. a.

Caput mort. palverisetur in mortario, et superaffundatur
destillatum, denuo ponatur in digestionem per dies tres, et
destilletur ut supra. Repletur pro tertia vice digestio et
destillatio, et liquor a tertia destillatione obtentus servetur
in vasis bene obsignatis. Usus: in sputo sanguinis datur coch-
lear unum singulis ternis horis; interdum sufficit cochlear
unum mane et vespere. Sed in vulneribus adhibetur frequen-
tius, splenis aqua ista imbutis, aut iniectione ter quater in
die, ablata prius parte sauciata quavis vice per vinum ca-
lidam.

§. XXXVIII.

Tutiora, et simul usu et medicorum consensu probata

Probatiores saccharum rosatum, conserva rosarum rubrarum
saccharum rosatum, sy-
rupus de
symplyto
maiore. habentur antiqua, syrupus de symphyto maiore, de rosis siccis, mala cotonea et ex his miva parata. Cortex quoque peruvianus a MORTONO primum, deinde a quam plurimis aliis ut praestantissimum remedium commendatur, nec immerito. Ab

Cortex pe-
ruvianus.
Electuarium
FULLERI. eo omnem prope virtutem et laudem mutuatur usitatissimum *electuarium peruvianum adstringens FULLERI* ¹⁾ quod tamen, ut et reliqua tonica et adstringentia, in usum non vocari debet, nisi vasis per sanguinis missionem satis de-

pletis, refractoque febris, si est, impetu. Laudantur etiam a non paucis tincturae catechu, lapidis haematitis et coralliorum rubrorum HELVETII. THOMAS DICKSON ²⁾) nitrum parvis et crebro repetitis dosibus ad coërcendam haemoptoën aliasque interdum haemorrhagias ut certum remedium praedicat, et quamquam conserva de rosis rubris et spermate ceti exceptum adhibeat, tamen soli nitro hosce salubres effectus tribuendos existimat. Anodynum, refrigerans ac compescens ipse reputat. Pace vero auctoris, nitro saepe tussim excitari vidi, qua nihil nocentius in haemoptoë. Imo interdum post diuturnum largumque eius usum acritate sua, quae viribus vitae non subigitur, haemoptysiu ipsam induxisse visum est.

*Tinctura
Catechu,
Haematitis,
coralliorum.
Nitrum a
DICKSONO
commenda-
tum.*

*Animadver-
sio auctoris
de noxiis ni-
tri effectibus
in haemo-
ptysi.*

1) *Electuarium FULLERI.*

Rec. Cortic. peruvian. pulver. unc. I. Balsam. Tolutan., Terrae Japonicae pulv. ana drachm. I. Syr. de symphyto Boylei q. s. M. f. Elect. quod in decem part. aequales dividendum est, ut binae vel tres intra diem sumantur, et superbibatur haustus aquae idoneae.

2) Vid. LUDWIG. *Comment. T. 18. P. 3. p. 399.*

§. XXXIX.

Quod si evacuationes generales aliaque praesidia sanguinis sputum nequaquam inhibeant, aut tanta sanguinis copia erumpentis sit, ut citissime comprimi postulet, nihil aliud superest, quam ad aquae frigidae potum confestim procedere. In hoc summa salutis spes continetur, dummodo inflammationis signa absint, neque complicata sit haemoptysis cum vetere aliquo infarctu aut alio vitio pulmonum, quibus in casibus nec adeo tutum est remedium, nec adeo certum eiusdem emolumentum. De eius mira efficacitate in haemoptysi et quocunque sanguinis profluvio peculiarem dissertationem vulgavit Romae anno 1756 IGNATIUS GERVAISIUS a Monte Falisco ¹⁾), sed ante eum alii etiam, et praesertim MARTINUS GHISIUS ²⁾) eius laudes experimentis comprobaverunt. Ab aqua simplici naturaliter frigida inchoandum est, deinde ad frigidissimam et nivatam transeundum. Non-

Aquae gelidae usus.

*Methodus
utendi.*

nulli quovis horae quadrante scyphum hauriendum iubent. Ego singulis semihoris octo vel decem uncias praebere soleo, excluso quocunque alio alimento, continuarique eiusmodi potum suadeo die noctuque ad aliquot dies, interdum ad hebdomadam, aut certe donec sanguinis sputum cessaverit. Postea paulatim imminui eiusmodi aquae potus debet, et aliquid tenuioris alimenti concedi licet, de quo regimine consulantur LANZANIUS ³), CIRILLIUS ⁴) et VALLISNERIUS ⁵), alibi oppurtune a nobis nominati, ubi de *diaeta aquea in februm curatione* locuti sumus. Aquam frigidam tam intrinsecus datam, quam extrinsecus brachiis et poplitibus per lintea eadem madefacta impositam feliciter adhibuit hoc in gravissimo morbo nuperior scriptor MERTENSIUS ⁶). Addit autem idem auctor praeclarus, ea non proficiente, se amplum vesicatorium inter scapulas admovere solitum esse, huiusque remedii praestantiam tam in sedanda illico tussi, quam in sanguinis sputo supprimendo quatuor adductis observationibus illustrat. Tentatum id pluries a me est in contumaciore et recidiva haemoptysi, sed non ita prospere, ut MERTENSIO res cessit.

Vesicatorium.

1) IGNATHI GERVASII a Monte Falisco medici Romani de de usu aquae frigidae in haemoptysi et quocunque sanguinis profluvio mechanico-physica dissertatio. Romae 1756 apud Zenipel in 4. Vid. quoque ORTESCHI Giornale di Medic. T. 1. n. 34. ann. 1763. p. 270. et SWIETEN. §. 1200.

2) Lettere med. Lett. 1. p. 11.

3) Vero metodo di servirsi dell'acqua fredda etc.

4) De frigidae in febr. usu in not. ad ETTM.

5) Dell' uso ed abuso delle bevande, e bagni freddi etc.

6) Observ. med. P. 3. cap. 2. Vindobon. 1778.

§. XL.

*Curatio post
sanguinem
cohibitum.*

Postquam sanguinis sputum iam desiit omnino, omne prope auxilium in abstinencia, quiete et diaetetico regimine positum est. Inter remedia vero plurimum prodesse solet lac, imprimis asininum, aut lac defloratum, aut si hoc non feratur, aut acescat, serum lactis dulce HOFFMANNI, quod

nunquam acescit, et ab eius inventore persaepe praescribatur, vel iura ranarum, cancrorum fluviatilium, vel avenae vel, diaeta avenacea item cremor hordei, oryzae et similia. Diluta etiam aquosa, nec valde calentia veronicae, chaerophylli, scabiosae, hederæ terrestris, florum bellidis minoris, arnicæ egregie restitantis sanguinis grumos resolvunt, et blande ipsam pulmonum texturam, praesertim additis rosis rubris, confirmant. Lacte ex vacca, quæ furfure aqua subacto atque urtica urenti alebatur, hæmoptysicos plures quam viginti persanatos a CLERCO ¹) accepimus.

1) *Hist. de l'Homme. malad. T. 2. p. 31.*

§. XLI.

Sed prae omnibus aëris mutatio imperanda est. Ut *Aëris mutatio.*
 lissima etiam censetur vectio, equitatio, prudentis tamen *Exercitatio*
 medici consilio instituenda; non enim cuilibet casui oppor- *quaenam.*
 tuna est. Raro etiam locum habent *balsamica*, imprimis *Quid de bal-*
 acriora, quidquid aliis visum sit et videatur. Quod ad vi- *samicis.*
 ctum attinet, conveniunt pulculae ex farina hordei, ory- *Victus.*
 zae, avenae, sago, frumento turcico aut saracenico, vege-
 tabilia intubacea et mollia, gelatinae pedum vituli et cornu
 cervi succo citrei, aut medici mali acidulatae, ova recen-
 tia et sorbilia, fructus horaei tam recentes, quam siccati
 atque alia huius generis. Exulent vero carnes graviores,
 exceptis, quæ ex pullis gallinaceis, praesertim lacte enutri-
 tis, aut ex piscibus fluviatilibus et tenerioribus sumuntur;
 itemque vinum exulet, atque quodcunque acre et calefaciens.
 Alvus ut semper aperta et laxa servetur, curandum est, et *V.S. prophylactica.*
 quovis tertio ut plurimum mense imminuenda per venae se-
 ctionem sanguinis copia, prout aetas, temperamentum, regio
 et reliqua postulabunt.

CAPUT III.

DE PHTHISI PULMONARI, PRAEMISSA
PHTHISEOS SIVE TABIS UNIVERSAE
CUM EIUS DIFFERENTIIS EXPLICA-
TIONE.

§. XLII.

*Phthisis
generatim.*

Generatim *φθίσις*, Latinis *tabes*, quamcunque lentam diuturnamque corporis extenuationem nulla habita causae originisque ratione comprehendit: *lentam* inquam, et *diuturnam*, quam ab ea macie fortuita et cito desinente, quae morbum aliquem acutum, aut immodicam aliquam excretionem, aut insolitam cibi abstinendam subsequitur, facile distinguendam esse vides. De *phthisi* igitur sive *tabe* hac primum, deinde de ea speciatim, quae *pulmonibus* quomocunque vitiatis succedit, nunc breviter dicere operae pretium ducimus; nam etsi non omnis corporis marcor ad hanc pectoris sedem attineat, ut ad morbos huius classis referendus sit, tamen quia in utroque phthiseos genere symptoma, quod primum in oculos incurrit, est ipsa macies, uti commune utriusque phaenomenon, idcirco non alienum putamus de utroque hic morbo sermonem habere.

*De ea primum, deinde
de pulmone-
nari.*

§. XLIII.

*Duplici modo
considerari
potest phthi-
sis.*

Itaque omnis phthisis universim accepta duplici modo considerari potest, vel ut corporis extenuatio a toto eius habitu, vel ab alicuius visceris vitio, infarctu, abscessu, ulcere proficiscens. Quae a toto habitu est, nec ab ullius visceris laesione fit, vocatur graeca et peculiari voce *ἀτρεφία*, quae plerumque sine febre et sine calore hectico et sine tussi est, potestque triplici ratione oriri, videlicet vel ex ali-

alimenti defectu, vel ex eiusdem depravatione, vel e partium nutriendarum mala constitutione ¹).

1) Praeter hanc *atrophiā* totius corporis est etiam altera, quae in aliquam tantum partem cadit. Haec posterior, si magna adeo sit, ut membrum arescat, dicitur etiam *aridura*. *Quaenam atrophia dicta aridura.*

§. XLIV.

Alimentum deficiet, si a stomacho nullo modo, vel non ea, qua opus est, copia recipiatur, uti in laesa deglutendi facultate, in ieiunio, in fame atque inedia contingit, vel si materia nutriendo corpori non apta assumatur, vel in sanguinem non penetrare possit ob vias occlusas, uti in pylori, aut intestinorum, aut mesenterii, aut telae cellularis vasorumque lymphaticorum obstructione, aut laesa actione fieri notum est (quod antepenultimum vitii genus pueros maxime, et infantes corripit), vel si ad sanguinem perverit, corpori nutriendo nequaquam impendatur, sed eius fiat iactura per aliquam sanguinis ipsius aut cuiuslibet alius liquoris immodicam effusionem. *Quot modis alimentum deficiat.*

§. XLV.

Ex nimia autem sanguinis aliorumque liquorum effusione corpus contabescit in haemorrhagiis, in ptyalismo, in lactatione, in crebra nimis seminis emissionem tam spontanea, quam artificiosa, in gonorrhoea, in fluore albo, in alvi aut urinae profluviiis, in sudoribus, in ulceribus diu manantibus, in hydrope, praesertim ascitico et in quibuscunque effusionibus aut evacuationibus, si quae sunt aliae, etiam humorum, quos excrementitios inutilesque vocant; cum fieri non possit, quin semper aliquid boni utilisque succi, quo ali corpus debet, cum iis simul deperdatur. Huc proprie referri debet *tubes dorsalis* secundi libri *de morbis* ¹), qui inter Hippocratica scripta reperitur; nam in eam incidunt novi sponsi ex nimia venere et nimia idcirco liquoris seminalis iactura, et quoniam hinc medulla spinalis videtur detrimentum capere, a dorso nomen ei tributum est. *Quibus evacuationibus corpus contabescat.* *Tubes dorsalis prima.*

verba ipsa, quibus morbus ibi adamussim describitur: *Dorsalis tabes a medulla fit. Corripit autem maxime recentes sponso et veneri deditos. Sunt autem sine febre, et bene cibum capiunt, ac consumuntur. Et, si interrogas ita affectum, dicet sibi superne de capite in spinam velut formicas descendere videri, et ubi mingit, aut ventrem exonerat, prodit ipsi genitale semen multum ac liquidum, et genitura in utero non manet, et in somnis semen profundit, sive dormiat cum uxore, sive non. Et cum iter fecerit, aut cucurrerit, tum alias, tum ad acclivem locum, anhelatio et debilitas ipsum corripit, et capitis gravitas, et aures sonant. Hunc temporis progressu, ubi febres fortes ipsum corripuerint, perdunt febres lipyriae.*

1) N. 49.

§. XLVI.

Tabes dorsalis secunda.

Quandoquidem vero *de tabe dorsali* sermo incidit, non praetermittam alias eiusdem generis veluti species recensere, de quibus Hippocratica oracula aut alii scriptores medendi usu consummatissimi loquuntur. Et primum reperio in libro *de internis affectionibus* ¹⁾ aliam *tabem dorsalem*, quae quoniam etiam immodicae veneri interdum ortum debet, opportune ipsissimis verbis, quibus ibi, exponenda nobis esse videtur: *Resiccatur medulla spinalis maxime cum venulae ad medullam tendentes fuerint obturatae, itemque ex cerebro accessus. Propter corporis autem afflictionem haec patitur et aegrotat. Resiccatur etiam a venere. Haec igitur patitur: dolor acutus incidit ipsi in caput, et in collum, et lumbos, et in lumborum musculos, crurum, ut aliquando flectere non possit. Et stercus non secedit, sed sistitur. Et urinae difficultate vexatur. Hic in principio quidem morbi quietius degit. Quanto autem magis tempus morbo prolongatur, tanto magis omnia dolent. Et cum velut ab aqua inter cutem tument, et ulcera e lumbis emergunt, et alia quidem sanescunt, alia vero nascuntur. Haec tabes parum videtur a priore (§. XLV.)*

discrepare. Attamen in illa languere totum genus nervosum, verisimile est; in hac (§. XLVI.) irritari etiam, convelli et demum resolvi. In illa humorum utilium alibiliumque inopia; in hac etiam depravata natura et stagnatio et solidarum partium consequens atonia discrimen faciunt.

I) N. 13. vers. fin.

§. XLVII.

Aliam *tabis dorsalis* speciem, quae ad hunc locum *Tabes dorsalis tertia.* pertinet, commemorat WILLISIUS ¹). In hac non quidem semen, verum ichor sive putrilago quaedam e genitalibus profunditur. Quod profluvium quando ingens et continuum *Atrophia vocatur.* est, saepe totius corporis vires infringit, et materiam nutritiam subtrahendo et prodige ablegando, *atrophiam* sive *contabescientiam* inducit. Hoc imprimis liquet in gonorrhoea et fluore albo muliebri, sive affectus hi per impurum concubitum aut immodicam venerem, sive ob plagam et contusionem, aut nisum vehementiorem aliamque noxam lumbis inflictam oboriantur.

1) *Pharmac. ration. P. 2. Cap. V. de tab. dorsali.*

§. XLVIII.

Sed eo revertamur, unde *tabis dorsalis* consideratio *Qui alimentum depravari possit.* nos abduxit. Paulo ante (§§. XLIV. XLV.) quot modis alimentum deficiat, indicavimus. Nunc videndum, qua ratione eius depravatio contingat. Depravari igitur potest vel quod male atque imperfecte in ventriculo concoquitur, aut non bene in intestinis chyli naturam induit, non defaecatur, nec sanis humoribus rite assimilatur, vel quod inductum in sanguinem crudos, viscidos, acidos, salsos, acres, alcaliscentes, aut aliter a naturali crasi et bonitate devios offendit, ab iisque contaminatur, ut multis in morbis, et praesertim post febres male curatas imperfecteque solutas, quae interdum in hecticas abeunt, non raro evenit.

§. XLIX.

Prava partium constitutio.

Restat, ut malam partium constitutionem (§. XLIII.) contemplemur, qua interdum efficitur, ut alimentum nec praeparetur satis ad nutritionem, nec probe in animalem naturam convertatur, nec partibus alendis rite apponatur, aut appositum iis non adhaereat, nec retineatur, ut par esset. Partes autem male constitutae dicuntur, quando earum tono deperdito languent, et veluti enerves torpescunt. Quod cum magna et potissima parte a nervei succi inopia nervorumque laxitate atque inertia utplurimum eveniat, sic ut partes propemodum resolvantur; ideo hoc phthiseos sive tabis genus *atrophia nervosa* a MORTONO appellatur, quo nomine discriminatur ab ea tabe, a toto pariter habitu orta (§. XLV.), quam ipse simpliciter *atrophiam ab inanitione* vocare melius existimavit. Possunt vero non solum enervari partes, ut dictum est, verum etiam contrario vitio affici. Interdum enim fibrae omnes, vasa imprimis et universa tela cellulosa ita paulatim contrahuntur, rigent et consolidantur, ut alibili succu nec permeari, neque allui, neque extendi ac nutriri queant. Quo in casu corpus exsiccum et atrophicum evadet. Id mali genus hominibus praesertim siccioris temperamenti et calidae constitutionis accidit. Quando vero ex hac causa emaciantur senes, id quod iis frequentissimum est, *tabes senilis* proprie vocanda esset; quamquam id nominis tribui soleat senili extenuationi, quae tussi catarrhali diuturnae et copiosiori sputo succedit; dum alii hanc *phthisin pulmonarem pituitosam* rectius vocandam putant.

Atrophia nervosa MORTONI. Atrophia ab inanitione eiusdem.

Phthisis sive tabes senilis.

Phthisis pituitosa.

§. L.

Tabes quaedam falso dorsalis habita.

Ad *atrophiam nervosam* (§. XLIX.) vulgo refertur *tabes tertia*, quae in libro *de internis affectionibus* ¹) HIPPOCRATIS discipulis ab HALLERO adscripto, exponitur. Sed multo plures cum WILLISIO eam *tabis dorsalis* speciem esse aiunt; quo autem iure, non satis assequor. Nam in tota illius descriptione nihil saepe occurrit legenti, quod me-

dullam spinalem, aut dorsum, aut vertebralem columnam affici et laborare indicet. Num ideo quod priscus ille scriptor, quicumque demum fuerit, in causis aut sedibus morborum assignandis non hercle semper felicissimus, medullam spinalem in ista tabe sanguine oppleri arbitratur, protinus et quodam coeco impetu in eius sententiam est descendendum? At, inquires, MARINELLIUS in *commentariis* animadvertit, hanc sententiam confirmari clariusque exponi ab HIPPOCRATE libro *de locis in homine* ²⁾ hisce verbis: *cum in medullam fluxio contigerit, tabes occulta atque inconspicua oboritur*. Quo ex loco nihil aliud eruitur, nisi quam MARINELLI opinio reiicitur. HIPPOCRATEM credidisse, tabem interdum a fluxione in medullam spinalem fieri, quod alibi etiam apertius docuit, non vero confirmare voluisse id, quod in libro *de internis affectionibus* supra citato scriptum fuit; cum exploratissimum sit, neque illius libri auctorem esse HIPPOCRATEM, neque ibi de tabe, quae *occulta atque inconspicua* dici possit, mentionem ullam fieri. Nam eo in loco verba fiunt ab anonymo atque incerto auctore de tabe quadam, in qua homo niger statim et subtumidus evadit, et partes, quae sub oculis sunt, pallidas prae se fert, et vasa, quae in toto corpore sunt, partim pallida et distenta, partim valde rubra exhibet spectantibus et manifesta. Exspuit quaedam subalbida, et ita difficulter, ut interdum se suffocari sentiat; imo sub ipso extussendi conatu bilem acervatim evomit, aliquando pituitam, saepe etiam cibos, ubi comederit; nec sublevatur, nisi post alteram vomitionem et per brevissimum tantum tempus, quoniam cito in easdem aerumnas delabitur. Voce etiam acutiore est, quam cum sanus esset, *febre, rigoribus et sudoribus conflictatur, et sic per annos novem languescit, et rari sunt, qui ex hoc morbo evadunt*. Quaecumque autem sit huiusmodi affectio, an *occulta, atque inconspicua*? Nonne etiam pulmo in ea manifesto laborat?

1) N. 13. *sub initium*.

2) N. 18.

§. LI.

MARINELLIUS
magis magis-
queresellitur.

Neque quidquam proficit, mea quidem sententia, idem MARINELLIUS, dum pergit ex eodem libro *de locis in homine* ¹⁾ anniti ostendere, HIPPOCRATEM reapse *tabem dorsalem* ibi intellexisse, quia scripsit *aegro lumbos dolere, et anteriores corporis partes, et vacuas ipsi videri*. Nam haec fere communia esse possunt, nec satis perspicue *tabem dorsalem* significant, multoque ininus eam, quam auctor libri *de internis affectionibus* (§. L.) expressit; nisi quaecunque *tabem a toto habitu* velis *dorsalem* appellare, quod plane absurdum dixerim. Neque demum adduci possumus, ut RAULINIO ²⁾ assentiamur, cui *nervosae tabes* eadem omnino cum *dorsalibus* videntur; ex eo fortasse, quod ex locis veterum scriptorum, quae valde obscura et implexa invenit, nihil certi hac super re statui posse ipse deprehenderet, nisi *species* cum *genere* confundere lubeat.

1) N. 29.

2) *Observat. de médecine. P. 1. Remarq. sur la Phthisie en général. p. 2.*

§. LII.

Tabes dorsalis quarta.

Verius ad *tabem dorsalem* spectat alia species, quam ipsemet WILLISIUS ¹⁾ memorat, longe ab illa, quam ex libro *de internis affectionibus* (§. L.) adduxit, diversam, atque ab aliis speciebus supra descriptis (§§. XLV. XLVI. XLVII.) distinguendam. Vidit enim quosdam dolore circa lumbos, imo interdum in toto dorso miserrime vexatos, qui cum aliquandiu ita excruciatii essent, postea gibbi aut claudi evaserunt, ac tandem toto corpore, excepto capite, contabuerunt, quemadmodum *rhachitide* affectis contingit. Huius morbi causam in hoc consistere ipse opinatur, quod humor sive materia quaedam morbida cum succo nerveo per medullam spinalem descendens in nervorum vertebraliū origines aut truncos influat, eorumque fibris primum irritatis dolorem continuum excitet, deinde quibusdam etiam compressis aut intime labefactatis respondentes musculares fibrae

Rhachitidem plane refert.

resolvantur, dum interim antagonistae validius sese contrahentes, vertebrae, quibus affiguntur, e loco dimovent, trahunt, et aliorum distorquent, ac demum nervis fibrisque muscularibus aut resolutis aut debilitatis non modo aegri claudicent, verum etiam membra totumque corpus langueat, macieque exsiccetur; quod, si sola ligamenta ab alieno humore laxarentur, non contingeret. Neque id pueris tantum atque adolescentibus infestum ac familiare malum esse credas, verum etiam aetate iam proVectis. Nam egomet ipse plures vidi, quibus adulta in aetate hoc affectu correptis vertebrae intumuerant, e sua sede prociderant, et cariem contraxerant. Quare facile inducor, ut credam non modo nerveum succum, sed etiam osseum et synoviam ipsam lymphamque nutriendis ligamentis dicatam hoc in morbo interdum alterari corrumpique.

1) *L. c.*

§. LIII.

Non hic vero finem habent *tabes* sive *phthises a toto habitu corporis* (§. XLIII.) permanentes, aut ad *atrophias nervosas* (§. XLIX.) spectantes. Nam sunt etiam quaedam aliae, quae a *moerore*, a *nostalgia*, ab *amore*, aliisque animi aegritudinibus, ab *affectione hypochondriaca* aut *hysterica*, a *scorbuto*, a *lue venerea*, ab *arthritide* profluunt, de quibus utpote magna ex parte secundariis singillatim disserere vetat instituti ratio temporisque praefinita brevis. Referri autem fere omnes possunt vel ad inminutam nervorum vim, vel ad fibrarum omnium siccitatem, vel ad depravatam vitiatamque humorum naturam aut distributionem. Cuiusmodi *atrophiae a toto habitu* luculentissimum exemplum exstat apud DELISLIUM¹), quod non admodum infrequens est observatu clinicen exercentibus. In hac igitur specie contabescit universum corpus sine febre, sine tussi, sine ulla spirandi difficultate. Quicumque in hanc tabem inciderint, cibum praeter modum aversantur; nunquam famis sensum percipiunt, de ingenti femorum et cru-

Aliae tabes a toto habitu, vel ad nervosas atrophias spectantes.

Atrophia quaedam a toto habitu. Eius signa.

rum imbecillitate queruntur, atque evidenter macie in dies aucta deliquescunt. Alvo pigra adstrictaque sunt, ut enematis eam solvere cogantur. Linguam habent muco viscido et crasso obductam et saepe siccam. Interius calore quodam assiduo uruntur, quem nullo modo contemperare possunt. Urinas emittunt nunc rubras, nunc pallidas, nunc admodum paucas et saturatissimo colore praeditas. Stomachi regio, etsi nec renititur, nec tumet, pressa tamen acutissimo dolore afficitur. Musculi abdominis saepe praeter modum tenduntur. Nocte dieque pertinacissime evigilant, nec somno recreantur. Facie pallent et livent, et pustulis quandoque et varis eam foedatam referunt. Oculos ut plurimum lippitudine et levis palpebras glutinantibus sordidos exhibent, cutimque siccam, aridam et minime perspirantem. Pulsus deprehenduntur rari et aliquantoduriores. Quae omnia ostendere videntur, bilem in his parcius secerni, viscidam, amurcosam atque acrem circa praecordia coacervari, sanguinem acritatibus scatere, succo blando et nutritio carere, atque universum solidarum partium systema arescere et exsiccari. Huic potissimum malo obnoxios esse, qui alimentis calefacientibus, acribus, aromaticis potuque vini et liquorum ardentium abutuntur, idem laudatus DELISLIUS observavit. Qui hoc morbo tenentur, si tempestive opem medicam exquirunt, saepe restituuntur in pristinam valetudinem.

1) *Traité de la phthisie pulmon.* chap. 14. p. 156. et pag. 164.

§. LIV.

*Phthises
particulares.*

*A peculiari
viscerum labe de-
nominatio
earum est.*

Hactenus de phthisi ab universo corporis habitu. Reliquum est, ut alias nunc phthises enumerem, quas peculiare alicuius partis vitium gignit, uti tumores, abscessus et ulcera. Nihil vero antiquius frequentiusque est, quam a viscerum labe, puta hepatis, ventriculi, renum, lienis, pancreatis, mesenterii, intestinorum, uteri, vesicae obstructione, infarctu, scirrho, suppuratione, ulcere, phthisin *hepaticam, stomachalem, renalem, splenicam, pancreaticam, mesente-*

ricam, intestinale, uterinam, cysticam aliasque huiusmodi pronasci. Haec enim viscera vitio aliquo correpta et suis functionibus inepta reddita vel succum alibilem non rite elaborant, vel ichorem, vel pus, vel saniem, vel putridam quaecunque labem cum universo sanguinis fluento communicant, quo alendo corpori impar fiat, vel sanos utilesque humores profundentia corpus ipsum rore debito sensim orbant, quare macrescit et consumitur. Sed prae ceteris

PHTHISIS PULMONARIS.

Pulmones vitium istud incurrunt, frequentissimamque *A pulmonum labe eius causa.* phthiæos causam in se recondunt. Quæ igitur ex eorum culpa tabes corpus deterit consumitque, *pulmonaris* rite et proprie nominatur, ut ab aliis distinguatur; imo tanta est eius etiam apud vulgus cognitio, ut simplici phthiæos nomine non alia sæpe intelligatur, quam ea, cuius sedes in pulmonibus est. *Vera autem phthisis pulmonaris, quemad-* *Definitio phthiæos pulmonaris verae.* *est ea totius corporis lenta consumptio, quæ pulmonum ulcus assiduamque inde ortam febriculam consequitur.* Quando vero ex quacunque alia pulmonum affectione aut labe corpus contabescit, uti quando *atonia* ingenti, *flacciditate*, *marcore* ¹⁾, *tuberculis* ²⁾, *strumis*, *scirrhis*, *infarctibus*, *calculis* aliisque lapideis concretionibus, *vomicis* aut *empyemate* thoracis similique alio vitio pulmones laborant et contaminantur, tunc quoque *phthisin pulmonarem* adesse cum FRACASTORIO ⁴⁾ et WILLISIO ⁵⁾ credimus, non quidem illam *veram* et *exquisitam*, quam definivimus, sed quodammodo *notham* atque *imperfectam*. Nam etsi in hac deficiat vera pulmonum exulceratio, effecta tamen et symptomata adeo verae phthiæ sunt consentanea, ut quam maxime eam æmulentur, aut saltem expeditissimum in eam, quod IUNCKERUS etiam ⁶⁾ concedit, faciat transitum. *Haec in veram transit facile.*

1) GALEN. *Defin. med. n.* 260. 261. ARETAEUS *l. c. I.* 8. p. 52. AETIUS *Tetrab. 2. serm. 4. c.* 67. FERNEL. *Patholog. l. 5. c.* 10. p. 109. CAROL. PISO *de cognosc. et curand. morb.*

l. 2. c. 10. BOERHAAV. §. 1196. VAN SWIET. ib. in commentar. MORTON. Phthisiolog. l. 2. de Phthisi pulmon. p. 26. DUPRE' DE LISLE de la Phthisie pulmon. chap. 1. p. 5. etc.

*Purulenti
copiosique
sputi excre-
tio absque
ulcere pul-
monum.*

Exempla.

1) Tanta interdum est pulmonum laxitas sive *atonia*, ut non solum ad eos ingens humorum vis confluat, perque vasa exhalantia et fibrarum interstitia vasorumque poros, inconspicuos exsudent, ac sputorum copia et frequentia totum per corpus exhaustant, verum etiam pus ipsum ex universo sanguine peculiarem ob quandam eius diathesin pulmones secerant, aut, si mavis, conficiant, et sine ulla exulceratione effundant. Exempla pulmonum integrorum in iis, qui copiosa sputa purulenta diu excreverunt, et pro phthisicis ulcerosis habiti fuerant, apud BENETUM (*Theatr. Tab. p. 96.*), MORGAGNIUM (*de sed. et caus. Epist. 22. n. 28.*), LIEUTAUDIUM (*Hist. anatomi. med. l. 2. observ. 404.*), HAENIUM (*Rat. medend. Part. VII. cap. 6. p. 250.*, et alibi pluribus in locis.), CASIMIRUM MEDICUM (*collect. observ. med. pract. T. 1. p. 279. ad 230. et Comm. Lipsiens. Supplem. 2. ad Decad. 2. p. 214.*) aliosque videri possunt.

*Tubercula
in bronchiis
vel glandu-
larum bron-
chialium.*

3) *Tubercula* non modo in aspera arteria, in bronchiis pulmonibusque ipsis ex folliculis mucosis, cellulis, vesiculis aut vasis, imprimis lymphaticis obstructis fiunt, verum etiam extrinsecus bronchiis innascuntur, praesertim si quando glandulae conglobatae, quae, quia bronchiis fere ubique adiacent, bronchiales dici solent, vitium aliquod contrahant, aut indurescant, aut sabulo aspero, aut aliis cartilagineis, osseis lapideisque concrectionibus repleantur, aut abscessu turgeant; quas ob res *non infrequens lentissimae phthiseos causa* ab HALLERO aliisque reputantur. Disputatur, an huiusmodi glandulae cum systemate vasorum lymphatico solum communicent; num vero aliquid in bronchia ipsa infundant? MORGAGNIUS et FANTONIUS negant, SENACIUS vero, BERGENIUS et HALLERUS affirmant. Utrumque res sit; certum est, saltem in morbooso statu, si comprimantur, eas coeruleascentem aut nigricantem, quo scatere solent, humorem in bronchiorum cavum effundere, et mucosum pulmonari admiscere. Imo is etiam in sanorum sputis interdum cernitur. Ex bronchialibus ergo hisce glandulis suppuratis sputa quandoque purulenta educi poterunt. Vid. HALLER. *Elem. Physiolog. l. VIII sect. 2. §. XV.*

*An huius-
modi glandulae com-
municent
cum vasis
tantum lym-
phaticis.
Quid certo
definiendum.*

4) *De morb. contag. l. 2. cap. 9. ubi haec habet: Verum et illam quoque possumus phthisin satis proprie appellare, quae corruptis putrefactisque pituitis ita pulmonem affecit, ut si non ulceratus est, at flaccidus et putridus iam redditur, quippe factis dissectionibus quorundam vidimus, interdum partem pulmonis sinceram et nullatenus citiatam, partem nondum exacte putridam nondumque ulceratam, sed tamen flaccidam mollemque atque in marcorem tendentem, quandoque et totum pulmonem talem vidimus. Quare cum iam marcor ille in pulmonem serpit, phthisicam appellare merito hominem possumus.*

5) VVILKIS. *P. 2. sect. I. cap. 6.*, ubi definitur phthisis

totius corporis contabescentia a mala pulmonis conformatione orta.

6) *Medic. conspect. Tabul. 34.*

§. LV.

Utraque (§. LIV.), videlicet tam *vera* quam *notha* *Primaria et distingu* debet in *primariam* et *secundariam*, prout a pul *secundaria.*
monibus primario laborantibus sine ullo alio morbo antecedente initium duxit, vel alii morbo succedit, uti scorbuto, lui venereae, arthritidi, malo hypochondriaco aut hysterico, strumis sive scrophulis, variolis, morbillis, scabiei, herpeti, scirrho, cancro similibusque, unde etiam singulare nomen accipit, vocaturque phthisis *scorbutica, venerea, ar-* *Aliae differ-*
thritica, hypochondriaca aut *hysterica, strumosa* aut *scro-* *rentiac.*
phularis et sic deinceps. Ad has addit ut a se observatas
HAENIUS phthisin *cellularem, femoralem, coxariam* sive
ischiadicam aliasque eiusmodi. Ceterum MORTONO¹⁾, quam MORTONI
nos dicimus *primariam*, placuit appellare *originariam*; *se-* *distinctio in*
secundariam vero *symptomaticam*. Nobis tamen videtur, ut *originariam*
alias etiam docuimus, discrimen aliquod interdum esse posse *et sympto-*
maticam.
secundariam inter et *symptomaticam*. Existere enim potest *Discrimen*
secundaria, etiamsi morbus, exempli causa haemoptysis, *inter secun-*
pleuritis etc., a quo originem duxit, omnino cessaverit aut *dariam et*
desierit; nequaquam vero *symptomata*, uti venerea, scor- *symptoma-*
butica etc., cum morbi, qui abest, vel abierit, *ticam.*
esse non possit, si symptoma pro effectu causae praesentis *Symptoma*
et non praeteritae vere habendum est. Nulla porro est ta- *est effectus*
bes sive a toto corporis habitu, sive ab alicuius partis aut *causae non*
visceris labe oriunda, quae tandem in *phthisin pulmonarem* *praeteritae*
secundariam aut *symptomaticam* desinere nequeat. Nam *sed praesen-*
sanguis vel congruo deficiente alimento degenerans, vel alic- *tis.*
uiis noxiisque humoribus infectus, dum tenellam pulmonum *Tabes vel*
substantiam pervadit, nec ibi rite ob laxatum partium to- *a toto habi-*
num subigitur, facile ibidem haeret, et crudis, acerbis ero- *tu corporis,*
dentibusve liquoribus depositis, altiusque se insinuantibus, *vel ab aliqua*
spasmos, congestiones, tubercula inducit, quae primum tus- *eius parte*
orta in pul-
monarem se-
cundariam
aut sympto-
maticam
potest desi-
nere.

*Phthisis
acuta et
chronica.*

sim, respirandi difficultatem, pectoris dolorem, haemoptysin, aut inflammationem, demum suppurationem, sputum purulentum, ulcus et phthisin *veram* et confirmatam pulmonarem progenerant. Praeterea pro celeriore aut tardiore passu, quo suum cursum persolvit *phthisis*, *acuta* vel *chronica* etiam dici consuevit. Sunt enim phthisici, qui brevissimo tempore pereunt, et contra qui diutissime et praeter spem vitam protrahunt.

1) *Phthisiolog. l. 2.*

2) *Id. ib. cap. V., et HOMIUS Princip. med. l. 2. part. 3. cap. 9.*

§. LVI.

Itaque cum *phthisis pulmonaris* non semper eiusdem sit gravitatis, et plerumque ad ἀκμὴν ¹⁾ non perveniat, nisi gradatim et successive, in tres gradus a quibusdam dividi solet. *Primum* esse dicunt, quando pulmones infarctu laborare incipiunt, obstruuntur, et quasi hecticæ incalescunt.

Varii phthiseos gradus.

Secundum, ubi iam tuberculis ex cumulata, congesta contactaque lympa aut alia materia cruda sensim enatis replentur. Postquam vero tubercula eiusmodi inflammationem subierunt, factaque suppuratione, in abscessus atque ulcera

Phthisis pulmonaris non semper a tuberculis fit. Reiiicitur divisio trium graduum, de qua supra. Alia divisio recepta ab auctore.

pus et sanguinem interdum effundentia convertuntur, *tertius gradus* initium iam accessisse. Divisio tamen haec non videtur cuilibet phthisi pulmonari convenire posse, cum non omnis pulmonaris phthisis a tuberculis fiat, etsi ex his quidem frequentissime oriatur; ideoque nec eandem cum incipiendi, tum progrediendi rationem servet. Nam quae a sola haemoptysi, quae a pleuritide aut peripneumonia suppuratis, quae ab acri et rodenti humore aliisque similibus causis proveniunt, divisioni certe huic nequaquam accommodari possuunt. Quare cum causarum varietas differentiam non exiguam in phthisi ponat, rectius, ut ego quidem arbitror, dividitur in *incipientem* et in *confirmatam*. Incipienti respondent *spuria* atque *imperfecta*, itemque *tubercularis* et *scirrhusa* (§. LIV.); confirmatae *vera* et *exqui-*

Phthisis incipiens et confirmata.

sita, sive ulcerosa. Quoniam vero confirmata sive ulcerosa paulatim et ipsa sua stadia percurrit, donec ad extremum exitium perveniat, ideo aequiore iure, ut varius eius status ob oculos ponatur, in tres quoque gradus distinguitur, quos ulcerationis et maciei diversa ratio indicat. *Primus* dicitur, *Confirmatae tres gradus.* quando pulmo ulcerari quodammodo incipit, nec admodum corporis extenuatio in sensus incurrit. *Alter*, quando ulcus maciesque manifestius se produnt. *Tertius* denique, cum pus omnia inficit, ulcusque latius serpit, ut, liquatis quasi omnibus succis, ossa cute tantum tecta ¹⁾ appareant.

1) DUPRÉ DE LISLE *de la phthisie pulmonaire* p. 11. et p. 285. et seqq.

§. LVII.

Verum non omne pulmonum ulcus phthisin *veram* Non omne continuo procreat, nisi maciem et lentam febriculam (§. LIV.) *ulcus pulmonum veram* afferat aegrotanti; rarum enim minime est, quod clinici fere *phthisin parit.* omnes animadvertunt, dari quosdam, qui tussi sputa e pulmonibus nunc flava, nunc viscida et glutinosa, nunc purulenta et sanguine etiam conspersa eiiciunt, quique nec maciem magni momenti prae se ferunt, nec lente et assidue febricitant, nec ullo alio notabili incommodo, nisi ad longa intervalla, corripiuntur, ita ut vitam satis incolumem ducere *Ulcera callo obducta et chronica.* quodammodo videantur. Hos tamen verisimile est ulcus quoddam in pulmonibus recondere, sed *callo* circum aut *glutine* sic obductum, ut neque latius serpere queat, neque magnam hinc alimenti iacturam pariat, neque puris quidquam in sanguinem infundat. Fonticuli sive cauterii instar ulcus illud geri, probabile est. Ad quadraginta usque annos in quibusdam productum vidi, imo ad senium ipsum. Et quamvis aliquem phthisicum habitum in iis agnoscere viderer, tamen suis muniis obeundis satis commode parés erant. Cum his magnam habent similitudinem illi, *Discrimen inter chronicum promonum ulcus et phthisin chronicam.* quos *chronica phthisis* lentissime conficit. Sed hi, etsi lentissimo passu, quotidie tamen macrescunt, et lenta febricula non destituuntur. Sunt etiam qui existiment ¹⁾, *ulcera la-*

*Phthisis
trachealis
quae.*

ryngis atque *asperae arteriae*, quia pulmonibus non insident, a *phthisi* secludenda esse. Verum ab his quoque corpus saepe deperit, et lenta febricula cietur, qua omnis altrix materies absumitur. Plerumque enim pulmo una afficitur, vel brevi eadem labes ad eum propagatur. Quapropter hanc *phthisin*, nisi *pulmonariam*, *trachealem* certe appellandam esse, non inepte iudicaverim.

1) MORGAGN. *Epist. anat. med. XXII. num. 27.*

§. LVIII.

*Causa pro-
xima phthi-
seos.*

*Proëgume-
nae et pro-
catarticae.*

De differentiis satis. Nunc causas difficillimi et frequentissimi morbi investigare oportet. Proximae causae, qua late patet, ideam complectitur, ni valde fallimur, quidquid pulmones adnexasque partes obstruit, distendit, laxat, irritat, erodit, inflammat aut lacerat; unde demum ulcus purulentum consequatur. Id vero non ita facile consequitur, nisi causae proëgumenae et procatarcticae una conspirent. *Proëgumenarum* autem praecipue sunt aetas intra decimum octavum et trigesimum quintum annum speciatim ¹⁾ comprehensa, tenella pulmonum totiusque corporis constitutio, mala pectoris conformatio, temperamentum sanguineum et cholericum, plethora, cacochymia multiplex, variae humorum acritates atque hereditaria labes. *Procatarticas* exhibent graviora animi pathemata, studia immoderata, imprimis nocturna, vigiliae protractae, prava victus ratio, corporis tam nimia segnities, quam nimia exercitatio, venus praematura, aer densus, humidus et paluster, aut subitas vices subiens, aut nimis rarus, levis, montanus ²⁾, aestas sicca et aquilonia, subsequente autumno pluvioso et austrino ³⁾, frigus calori repente succedens, ictus, contusiones, vulnera, extranea in asperam arteriam delapsa aut inspirata, magna vocis contentio, vehemens nisus, spiritus diu cohibitus, venena, halitus noxii carbonum ⁴⁾, metallici, acidi, nitrosi et vitriolici ⁵⁾ tussis, rheuma, catarrhus, et frequentissima in his postremis venae sectionis omissio, haemoptysis ⁶⁾ pleuritis aut peripneumonia imperfecte solu-

*Venae sectionis omis-
sio in tussi,
rheumate,*

luta⁷) aut suppuratae, scorbutus, morbus scrophularis, *catarrho frequentissime phthisin* lues venerea, hypochondriaca et hysterica mala, metastases, *gignit.* consuetarum evacuationum suppressio⁸), scabies, herpes, variolae, morbilli aliaque cutis vitia retropulsa, ac demum contagium, si communiori sententiae standum⁹) sit.

1) HIPPOCRATES *Aph. 9. sect. V. et Aph. 7. sect. VIII.*

2) ROZIÈRE DE LA CHASSAGNE *Manuel des pulmoniques* pp. 282. 283.

3) HIPPOCRAT. *Aph. 13. sect. III., et aph. 22. sect. III.*

4) ROZIÈRE DE LA CHASSAGNE *Manuel des pulmoniques* p. 281.

5) HELMONTIUS *Oper. p. 200.*

6) HIPPOCR. *Aphor. 12. sect. VI.*

7) Idem *Aph. 15. sect. VII. et COAC. n. 438.*

8) Idem *Aph. 15. sect. V.*

9) CL. MORGAGNIUS *Epist. anatom. med. XXII.* pro iis *An phthisis* se declarat, qui *phthisin contagiosam* putant. SWIETENIUS *contagiosa.* eandem sententiam exemplis confirmat. ANTONIUS vero COCCHIUS et nuper CASTELLANIUS Mantuae clinices professor contrariam tueri conati sunt. In Etruria tamen, etsi medicorum Collegium *phthisin contagionis* expertem iudicaverit, lege tantum est, ut cubicula, vestimenta aliaque res, quae usui phthisicis fuerunt, detractis parietibus veteribus, novisque inductis, expiarentur, et igni reliqua traderentur cremanda.

D i a g n o s i s.

§. LIX.

Quoniam vero *praesens phthisis* vix amoveri potest, *Signa futurae phthiseos.* plurimum interest eam, antequam accesserit, praevidere, ut avertatur. Itaque futuram portendunt ortus a parentibus hac labe defunctis, pectus angustius et depressius, humeri elati, collum longum et tenue, statura procera, vox exilis aut clangosa, cutis pellucens, color valde candicans et ingenis amoene roseus, gracilis corporis habitus, praecox ingenium, spinae dorsi curvitas, gibber, copiosi phlegmatis matutina praesertim exscretio, crebri catarrhales affectus

Signa incipientis.

et denique morbi, qui antea antecesserunt ¹⁾). *Incipientem* autem phthisin generatim tria potissimum ostendunt: tussis diuturna, febris hectica a pastu invalescens, interdum matutinis horis intermittens, et musculosarum partium exte-

Tussis qualis.

Tussis saepe quidem ab initio mitis est, modo sicca, modo humida et catarrhali similis, deinde molestior, imprimis post epulas, ita ut eam vomitus ingestorum non raro subsequatur, sive hunc ab irritato simul oesophago, sive a ventriculo per vehementiores diaphragmatis et abdominis contractiones compresso repetendum volueris. Hoc peculiari symptomate tussim phthisicam a catarrhali distinguimus animadvertit MORTONUS, multoque certius eam phthisicam dixeris, si accesserit cibi fastidium, sitis, sputum viscidum, crassum et varii coloris, sanguine interdum conspersum, sapore salso, aut dulci, aut amaro, aut quocunque alio alieno praeditum, pondus in pectore, praesertim qua parte vitium insidet, insolita quaedam oppressio, difficilis in alterutro latere decubitus, tussim incitans, interdum obscurus alicubi dolor, respiratio aliquantum laboriosa, praesertim post citatiorem incessum aut ascensum scalarum, sudatiunculae nocturnae aut matutinae, hypochondria elevata et tensa et pondere quasi gravata, et demum facilis in iracundiam aut

Febris qualis.

moestitiam prolapsus. Febris autem ipsa inter initia vix celeriori arteriarum motu se prodit, postea paulatim crescit, quin tamen *lentae* sive *hecticae* modum excedat. Calore ad exteriora satis manifesto, imprimis ad volas manuum et pedum, vigiliis et genarum subinde rubore stipatur. Interea urina parcius redditur, et coloratior est, ac facile perturbatur. Macies a primo morbi ingressu plerumque exigua est, lenteque procedit, ut vix animadvertatur. Verum, ubi febris incrementa capit, deiicitur appetitus, digestio depravatur et succus, quo ali corpus debet, tunc sane celeriter aeger inacrescit, ut brevi ad sceleton prope accedat.

Macies.

1) HIPPOCR. *Aphor.* 15. *sect. V.*, et COAC. n. 17. 438. 444. 469.

§. LX.

Simulac vero febris (§. LIX.) lentae naturam amittit, *Signa phthiseos confirmatae.* acutiorque facta pleuriticam aut peripneumonicam imitatur, aut intermittentium accessiones, sed vagas atque anomalas ¹⁾ habet, quod suppurationibus proprium est, et pus verum excreari incipit, tum *confirmatam* iam *phthisin* esse, non est dubitandum. Nam brevi liquatio summa in toto corpore cum a vehementiore febris motu, tum a pure in venas resorpto oboritur. Hinc sudores, imprimis nocturni et matutini augentur, et fere perpetui fiunt, quos saepe excipit alvi fluxus mutuo alternans; urinae copiosius effluunt liquatam saepe pinguedinem in summa superficie ostendentes. *Liquatio.* Quare celerrimus virium lapsus atque extrema macies aegrotantem conficit. Quod ad puris sputum attinet, scire licet, ut supra (§. LIV.) iam animadversum est, non raro sputa purulenta copiosa diu excreata fuisse tussis ope molestae, quin tamen ulcere pulmones laborarent. Quod confirmatur a FRID. CASIMIRO MEDICO, qui cadaverum sectione rarissime post puris sputum invenit ulceratos pulmones, at saepe induratos; interdum sine ulla labe, licet quotidie aegri ingentem puris vim extussissent; dum contra in abdominis cavo liquidum pus fluctuare apprehendit. *Sudores aucti et alvi fluxus alternantes.* Cavere tamen oportet, ne pus credatur id, quod minime est, neque negligenter pulmones dissecentur; nam saepe ulcusculis et abscessibus parvis hic illic disseminatis et paene inconspicuis scatent, unde pus dimanare potuit, integra deinde et intacta pulmonum substantia apparente. Sed huiusmodi error in viros scientia medica et longo usu commendatissimos cadere haud dici potest. *Pus non semper ab ulcerato pulmone est iuxta observationes praesertim CASIMIRI MEDICI.* *Cautio circa puris diagnosis.*

1) *Collectio observationum medic. pract. Tom. 1. p. 279. ad 320.*

§. LXI.

Insuper morbo ad exitium properante aphthae in ore, *Extremum exitium.* palato faucibusque erumpunt, dolorem ardoremque deglutire volenti excitantes, vox rauca fit, imo interdum perit, foetor

non modo ex ore, verum ab universo corpore emanat, quandoque pustulae metacarpos deturpant, capilli defluunt, ungues incurvantur, tempora collabuntur, oculi incavantur, nares gracilescent, intumescunt pedes et manus, sola fere cuti ossa teguntur, sputum supprimitur, delira atque absona

In huiusmodi morbo, instante etiam morte, aegri non desperant, et inexpectato pereunt. effutiuntur¹), tussis conquiescit, sed spiritus difficillime anxieque trahitur, pulsus languent, tenuantur, vacillant, deficiunt, sicque mors (aegro spem adhuc aliquam alente, nam in nullo alio morbo magis sibi blanditur) pedetentim obrepit, finemque miserrimae vitae imponit. Mors vero saepissime nec cogitanti, dum vel corporis decubitus mutatur, vel repente aëris in austrinum aut borealem mutatio contingit, quasi clanculum supervenire consuevit. In eorum cadaveribus plerumque pulmones consumti, exesi, excavati vastisque cavernis foedati reperiuntur. Interdum pus etiam in cavum thoracis effusum cuncta corrodens corrumpensque offenditur. Interdum evenit, ut phthisicus dolore acutissimo lateris affecti corripiatur, nulli remedio obtemperans.

Unde oriatur dolor acutissimus interdum in affecto latere excitatus. Id ex pure pleuram penetrante et arrodente, nervosque desuper decurrentes musculosque adsitos vellicante fieri, non semel sectione cadaveris cognovimus.

1) COACAR. n. 437. HIPPOCR. *Aph.* 17. *sect.* VII.

§. LXII.

Diagnosis phthiseos trachealis.

Quae praecedunt et comitantur.

Sed alia est *phthiseos trachealis* ratio. Hanc, sive *ulcera* mavis *laryngis* et *tracheae* (§. LVII.), antecedunt destillatio humoris acris aut salsi, et quidem diuturna, herpetica aut scorbutica labes, exspuitio sanguinis cum signis (§. XXIII.) coniuncta, tussicula sublimis et titillatio laryngem maxime occupans. Comitantur vero tussis et titillatio eadem doloris aut ardoris ad asperae arteriae initium, sputum salivale paucum, spumosum, non coctum, interdum striis purulentis albisque, interdum filamentis sanguineis intermixtum, interdum vere purulentum aut saniosum, modo inodorum, modo foetidulum, sed peculiari puris foetore, raucitas, aphonia et aliqua corporis, maxime manuum

et digitorum, extenuatio. Adsunt praeterea phthiseos futurae indicia (§. LIX.); absunt vero pectoris oppressio, difficilis decubitus, spirandi difficultas, etiam in ascensu scalarum non percipienda, tussis profundior et febris assidua, aut si ulla est, exigua sane ita est, ut interdum deficere videatur. Eclegmata et pastilli, qui ore detinentur, et sensim deglutuntur, ardorem, punctiones et tussim leniunt, et mirifice levant. Tandem si malum progreditur, bronchia etiam, ipseque pulmo exulcerantur, in veramque phthisin pulmonarem desinit.

Praesentia et absentia quorundam symptomatum graviorum.
Quibus ardor, punctio, tussis leniuntur.
Transit in phthisin pulmonarem.

§. LXIII.

Phthisis praeterea, quam *scirrhi, tubercula cruda in-durationsque* pulmonum gignunt (§. LIV.), quaedam peculiariora et propria habet, quibus a reliquis discernatur. Tussis eam plerumque exercet sicca, permolesta nec oleosis, nec bechicis, nec paregoricis sublevanda. Si quid in ea, progrediente morbo, extussitur, id paucum est, spumosum, aquae, in qua sapo solutus sit, persimile, taleque ad morbi usque finem plerumque perseverat, nisi eiusmodi tussim, quod non raro evenit, subsequatur haemoptysis, cui deinde sputa purulenta superveniunt, cumque illis crudis et lymphaticis permiscuntur. Insuper qui hac phthisi laborant, non modo brevem et crebram inspirationem habent, sed etiam pectore ad anteriora inclinato spiritum ducere coguntur, crebrasque punctiones modo in hac, modo in illa thoracis parte percipiunt, febricula nec magna, nec vehementi, nec assidua ut plurimum vexati. Saepe in his glandulae colli, aut axillares aliarumque partium, uti inguinum, mesenterii, tumescunt, et strumosae cernuntur. Ex quibus coniecturam facere licet, similia in pulmonibus reperiri. Atque haec quidem de *scirrhis, strumosis induratisque* pulmonibus intelligantur. Est praeterea pulmonum *tuberculum*, de quo mentio fit ab auctoribus, non totos pulmones, ut in priore casu, sed aliquem tantum eius locum occupante, quod suppuracionis capax est. Qui hoc morbi genere afficiuntur

Phthisis orta a scirrhis et tuberculis pulmonis, quomodo cognoscatur.
Tussis ratio.
Quae sputa.
Quomodo spiritus ducatur.
Febris ratio.
Alia phaenomena frequentia.
Tuberculum proprie dictum quae signa denotent ex BAGLIVIO.

inquit BAGLIVIVS ¹⁾), *de cetero bene se habentes, difficulter spirare incipiunt, difficilis spiratio sensim augetur, inter spirandum non stertunt, et nihil exspunt, dolorem quoque in pectore sentiunt continuum, et dolentem in locum decumbere non possunt, tussi sicca laborant, tandem genae rubent, febricula supervenit, et, negotio ad suppurationem vergente, alia suppurationis symptomata accedunt.*

Signa pathognomonica duo ex eodem.

Duo tamen signa pathognomonica crudi et adhuc incipientis tuberculi sunt tussis sicca et dolor lenis in alterutro pectoris loco, cui arridet illud divini senis ²⁾): „et quamdiu quidem tuberculum adhuc crudius fuerit, dolorem eximem et tussim siccam inducit.“

1) *Prax. medic. lib. II. cap. 8.*

2) *Lib. I. de morbis, textu 63.*

§. LXIV.

Respiratio non semper laeditur, nec semper dolor phthisin comitatur.

Quamquam supra ostensum est, in phthisi tam incipiente, quam confirmata respirationem laedi, doloreque pectus alicubi plus minus affici, id tamen ita perpetuum non est, ut quandoque utrumque non deficiat. Hoc saepe occurrit in ea phthiseos specie, quam sola et simplex sine alio pulmonum vitio haemoptysis intulit. Praeter tussim, puris sputum, febriculam et maciem vix ullus unquam dolorem aut dyspnoeam queritur. Imo plerumque aegri, quia sibi bene respirare videntur, nec dolent ullibi, nec difficulter decumbunt, sibi persuaderi non permittunt, ulcus in pulmone vere existere. Neque rarum est, in reliquis quoque phthiseos speciebus dolorem deficere; inventa enim est in cadaveribus magna pars pulmonum corrupta, exesa, suppuratione, quin aegri unquam doluerint. Id vel a lenta eorum corruptione, vel a sensibilitate ob peculiare quoddam vitium

Phthiseos pituitosae facilius diagnosi.

imminuta aut deperdita derivandum videtur. Doloris ergo absentia ulcus pulmonum iure non excluditur. Quibus notis phthisis pituitosa ab aliis internosci possit, facile ex iis, quae alibi (§. XLIX.) explicata sunt, cognoscetur.

P r o g n o s i s.

§. LXV.

Si ulla salutis spes in pulmonari phthisi affulget, ea tantummodo in *incipiente* locum habere videtur, nam *confirmata* vix unquam curationem admittit. Etenim ulcus aëri perpetuo obiectum, in parte situm, ex qua non facilis est puris eductio, semper commota, et nunquam quiescente, atque a tussi ipsa crebro concussa, et tumoribus accitis scatens vix sanescere potest. Si tamen hoc recens sit, nec inveteratum, si pus album, leve, aequale, non foetidum facile prodeat, si nulla aut exigua febris teneat, tussis non valde divexet, appetitus vigeat cum corporis habitu adhuc laudabili, aut saltem mediocri amploque thorace, neque liquationis phthisicae signa adhuc se exserant; tunc bonum exitum aliquo modo sperare licet, praesertim si ulcus eiusmodi a pleuritide aut peripneumonia suppurata relictum ¹) fuerit. Phthises enim ex hac causa natas non semel clinici *Quando non.* consanescere observarunt. Contraria his, contrarium praesagium. In universum *hereditaria*, vel a mala pectoris conformatione, vel a contagione genita omnem utplurimum melius aspernatur. Evitari tamen interdum potest, si matre ars in auxilium vocata eius adventum arceat aut antevertat. Facilius curatur ea, quae a *toto corporis habitu* *Ex aliis'* est (§§. XLIII. LIII.), quam quae *originaria* sive *primaria* *phthisibus,* (§. LV.) dicitur. Item *originaria* periculosior est, quam *plus, quaece* *symptomata* (§. LV.), pariterque exitiosior, quae *minus exitii* *celius ad liquationis statum* (§. LX.) perducitur. *Haemoptysi* superveniens, nisi ab ictu aut nisu exspuitio sanguinis orta fuerit, plerumque lethalis ²). Deploratissima etiam quae a *calculis, lapidibus* aut *ossibus* inaequalibus pulmoni innatis (§. LIV.) provenit, quia ab his lacerantur, ut monet BENETUS ³), ipsi pulmones, nec coalescere possunt, nisi tussi, ut interdum evenit, expellantur. *Trachealis* (§. LVII.) *Trachealis*

*curandae
quaenam
spes.*

interdum curatur, si statim inter initia rite tractetur, aut a veneno syphilitico foveatur.

1) COAC. 402.

2) COAC. 438.

3) *Theatrum Tabidor.* p. 100.

§. LXVI.

*Cuicunque
tabi commu-
nia.*

Quae sequuntur, cuicunque tabi communia sunt. Tabidis nihil perniciosius est alvi profluvio ¹). Pessime quoque habent, si cruda multa expuant, spirandi difficultate haud imminuta ²). Autumno austrinisque constitutionibus magis periclitantur ³), quam aliis anni temporibus. Tabe consumptos rigoribus subinde corripitur, mortem prae foribus esse significat ⁴). Quibus ex longo intervallo alvus cum corporis macie diffluit, si repente subsistat, et praecordia extollantur, malum quoque praenuntiat ⁵). Lethale signum dixit HIPPOCRATES ⁶), si sputum phthisicorum graviter oleat, et simul capilli defluant, aut id ipsum ⁷) in aquam marinam sive salitam iniectum fundum petat. Hinc orta profecto est, teste CORNELIO CELSO, nonnullorum opinio, affirmantium ⁸), purulenta sputa duabus hisce notis a non purulentis discerni. Verum hisce notis prava tantum puris natura significatur, non pus ipsum, ut verba ipsa Hippocratica declarant, utque opportune Cl. MORGAGNIUS animadvertit. Id vero manifestius ex eo fit, quod alibi HIPPOCRATES boni puris notas recensens, album, inodorum, et leve ipsum esse debere docuerit. Praeterea si huiusmodi periculis puris natura detegenda esset, incertam profecto et fallacem eius cognoscendi rationem istam multa evincere videntur. Nam sputa scorbuticorum, etsi purulenta non sint, plerumque tamen foetent, eoque magis, si prunis imponantur; quidquid enim animale habet naturam, igni inditum graviter olet. Salsa item plerumque sunt, ideoque ponderosiora, et quaedam, si aëreis bullulis perquassationem priventur, ita gravia evadunt, ut in aquam marinam, nedum communem, imprimis calidam iniecta, quam-

*De puris
sputo anim-
adversiones.*

*Graveolentia
et pondus
sputorum
notae non
sunt veri
puris.*

quam non purulenta, in fundum facile descendant. *Puris Veri puris* igitur *veri* naturam nihil certius significat, quam plurimum ^{natura.} signorum coniunctio et concursus, contra quam alii opinantur ancipiti ARETAEI loco confisi ⁹). Haec autem sunt peculiaris sputorum habitus: cinereus aut flavescens color, certa cohaerendi ratio, qua lymphæ et pituita secedunt, atque in filamenta et floccos aqua affusa diffluunt, praegressae aut praesentis suppurationis phaenomena atque alia, quae expertum, doctum oculatumque clinicum neutiquam fugiunt. Neque quidquam obstat sputi levitas; nam verum pus leve esse potest, si bonum et laudabile fuerit, sic ut facile non modo aquae salsae et marinae, verum etiam communi et purae, quae levior est, innatet. Foetor ergo, pondus aut viror deteriore puris indolem et qualitatem, non naturam indicant. Neque quidquid ab ulcere emanat, statim pus dicendum esse existimo, cum et sanies et ichor varii generis ab eo saepe effundatur. Ideo saniosa atque ichorosa sputa a *Sputa puri-* purulentis probe distinguenda sunt. Neque tandem sputa, ^{formia qua-} ^{lia.} quae exteriori tantum habitu puris speciem referunt, pro purulentis habenda sunt; mucosi enim et coagulabiles humores mora et calore ita concoqui possunt, ut pus ipsum imitentur. Tunc sputa *puriformia* rectius appellantur.

1) HIPPOCR. *Aphor. XIV. sect. V.* COAC. n. 436.

2) COAC. n. 445.

3) *Aphor. X. sect. III.*

4) COAC. n. 443.

5) COAC. n. 287. 442.

6) *Aphor. 10. sect. V.* COAC. n. 434.

7) COAC. n. 435.

8) *Lib. III. cap. 22. n. 25.*

9) MORGAGN. *Epistola anat. med. XXII.* ROZIER DE LA CHASSAGNE *Maladies de la poitrine p. 255.*

§. LXVII.

Itaque phthisis cum morbus sit, qui, postquam adole- *Indicationes.* verit aut inveteraverit, difficillime vinci possit, mature ei occurrendum est. In tanta tamen causarum (§. LVIII.) et

phthisium varietate nulla statui potest curandi ratio adeo universalis, quae singulis causis phthisibusque, earumque diversis stadiis aut gradibus accommodari queat. Generatim vero oportet remove causam, quae *nutrimenti* praestat defectum aut depravationem, aut eiusdem impedit aptam partibus applicationem, morbos tollere, a quibus tabes sive phthisis originem ducit, sanguinis acritatem temperare, obstructions congestionisque avertere, aut praesentes discutere et resolvere, ne inde inflammatio, suppuratio atque ulcus sequatur, et denique totius corporis aut partium affectarum laxam compagem firmare.

C u r a t i o.

§. LXVIII.

Curatio tabis ab impedito alimenti itinere.

Quapropter tabes a causis (§§. XLIII. XLIV.) nata postulat ea artis adiumenta, quae oesophagi aut ventriculi tumores, fungos, scirrhos, ulcera, rigiditatem, callum, angustiam, paralytin aut alia vitia, a quibus oriri diximus *dysphagiam* ¹), removent aut tollunt, cibum uberiores aut alendo corpori magis idoneum, aperientia, saponacea, leniter alvum ducentia, imprimis rhabarbarina, et demum roborantia, aut quaecunque evacuationem nimiam opportune sistentia.

Aperientia, saponacea, alvum ducentia, roborantia.

1) Vid. *De morbis imi ventris cap. I. de dysphagia.*

§. LXIX.

Curatio tabis dorsalis primae.

Tabes dorsalis prima (§. XLV.) ubi curanda sit, continuo incunte morbo, si HIPPOCRATIS praecepta aliquid valent, ad ea, quae sursum et deorsum evacuant, confugiendum est, deinde sero lactis, aut lacte asiniuo, et tandem vaccino per dies quadraginta copiose utendum, dandaque pro coena alica, aut quae hodie magis in usu sunt, cremores oryzae hordeique, aut pulmenta ex avenae aut *sagou* farina et similia. Carnes quoque teneriores, et praesertim

Lactis usus.

Cibus et potus.

assatae, aves, ova recentia concedi possunt. Nec interea *Balnea*.
 fofus et tepida balnea negligenda sunt. Sed his nonnulli *Mars*.
 frigida balnea anteferunt, corticem peruvianum et ferrum,
 utpote quae languentibus laxisque fibris et toti nervorum
 systemati robur et firmitatem restituunt. His prae ceteris
 in huiusmodi morbi curatione potissimum confidit TISSO-
 TIUS ¹). Et quidem ferro tantam vim inesse GRAINGERUS
 asseverat ²), ut nullum se invenisse scribat remedium, quod
 cum eo comparari possit. Ferri pariter scobem in *tabe*
dorsali a nimia venere orta commendat FRID. CASIM. ME-
 DICUS ³), sed cum eo largiorem potum adhibendum prae-
 cipit. Praeterea per annum ab ebrietate, a venere, ab im-
 modicis laboribus abstinere oportet, exceptis deambulationi-
 bus, vectione atque moderata equitatione, dummodo in his
 sol et frigus evitentur.

1) *Onanism*.

2) LUDWIG. *Comment. de rebus in scient. natur. et med.*
gest. Vol. IV. p. 236.

3) *Id. ib. Suppl. ad Decad. 2. p. 223.*

§. LXX.

Nec valde differt curatio *tabis dorsalis secundae* *Curatio tabis*
 (§. XLVI.), in qua tamen et vinum album molle et obso- *dorsalis se-*
 nia et cibi, qui alvum molliunt, et lac cum melle ad dies *cundae.*
 XLV conceduntur, ut ex libro *de internis affectionibus* *Lac cum*
melle.
 habemus. Ibi pariter praecipitur, si corpus concreseat sive
 tumeat, ferro ignito cervici, dorso et lumbis pluribus in
 locis crustas inurendas esse; nam, illis bene succedentibus, *Ustiones cru-*
 sanitas redit. Hodie vero, ut obstructa viscera reserentur, *stas inferen-*
 et universum corpus, nervorum imprimis systema, firmetur, *tes.*
Sales neutri,
 sales neutri, uti mirabilis Glauberi, aut polychrestus, aut *Radic. vale-*
 tartarus vitriolatus cum diluto radice valerianae, aut eius *rianae dilu-*
 decocto, aut extracto, aut pulvere diutissime adhiberi pos- *tum, deco-*
 sunt, cum non pauci hac ratione ab huiusmodi tabe con- *ctum, ex-*
 valuisse visi fuerint, praesertim si veneris usus procul ab- *tracta, pul-*
 fuerit, et corporis exercitatio in eius locum successerit. *veres.*

Potui tam in hac, quam in praecedente dari potest aptissime, dum cortice peruviano utuntur, aut aliis tonicis, ptisana DALISBII, quae sic habet:

*Ptisana
DALISBII.*

Rec. *Mala citrea* n. ij.

Exciserentur, deinde cont. in mortar. marmor., et sensim affund. decoct. hord. lib. ij., panis tost. unc. ij., syrup. moror. unc. j., vin. ceter. optim. unc. vj.

§. LXXI.

Curatio tabis dorsalis tertiae.

Causis accommodetur.

Fluxui putrido mendendum.

Tabi dorsali tertiae (§. XLVII.) ea convenire videntur, quae primario morbo, *gonorrhoeae* scilicet aut *fluori albo* medentur. Quod si ab impura venere morbus sit, mercurius, decocta lignorum et lac opem ferunt. Si aliunde, ea curatione opus est, quae causarum, a quibus morbus illatus est, varietati respondet. Illud sane quaerendum est semper, ut fluxus putridus, quo corpus marcescit, emendetur, consistat et cesset. Alvi ductio, aquae medicatae et imprimis ferri participes, leniterque balsamica, et vulneraria usu quam maxime comprobantur. Neque hic praetereunda sunt etiam balnea frigida, quorum hodie plerique meminere.

§. LXXII.

Curatio atrophiae ab inanitione.

Victus ratio.

Quid, si a mala digestionem vel chylosi.

Si dyscrasia sanguinis, quid.

Quid, si ab atonia solidorum, atrophiam nervosam dicta a MORTONIO.

Quando *tabes* sive *atrophia* ab *inanitione* alias immodicas evacuationes (§. XLV.) pro causa habet morborum, a quibus fovetur, curatio instituenda est, alimentique defectui apta victus ratione prospiciendum. Si vero a mala atque imperfecta ciborum digestionem et chylicationem corpus contabescat (§. XLVIII.), amaris, incidentibus tonicisque stomacho dicatis remediis uti oportet. Quando autem sanguinis dyscrasia et prava eius indoles materiam alibilem pervertit aut corrumpit, noto per sua signa peculiari eius vitio occurrendum est. Demum quando *tabes* a mala solidorum partium affectione est, illudque morbi genus efficit, quod *atrophiam nervosam* MORTONIUS (§. XLIX.) appellavit, vis nervea et reliquarum solidarum partium erigenda imprimis

est cardiacis, leniter aromaticis, gummi ferulaceis, antiscorbuticis, viperinis, martialibus, fricationibus, exercitationibus, peregrinationibus longis, natatione et victu optimi succi et facilis coctionis. Huic praesertim malo obnoxii sunt Angli, a quo institutis longissimis in exterarum regiones itineribus saepe liberantur. De hac phthisi loqui SYDENHAMIIUM arbitror, quando asseverat, *tantum valere equitationem ad phthisin curandam, quantum chinamchinam ad febres intermittentes.* Contraria vero curandi ratio convenit *tabi senili* aut cuicunque a nimia solidarum partium rigiditate, et quasi dixerim *occallescentia*, ut emolliantur, laxentur, et pateant influentibus succis. Quare et balnea tepida, et inunctiones, et lenes fricationes, et iura ranarum et testudinum et avenae, et prae ceteris serum lactis, imo lac asininum, quod ad avertendam retardandamque senectam HOFFMANNUS alique proponunt, opportunissime in usum erunt vocanda.

§. LXXIII.

In *tabe* vero sive *atrophia nervosa* a toto habitu, quae perperam pro *dorsali* habita a quibusdam est (§. I.), quum potius *phthisis pulmonaris incipiens secundaria* dici mereatur, sive cum medulla spinali obstructa coniungatur, sive sine ea complicatione sit, tota curatio iis inniti debet, quae incidunt, aperiunt, resolvunt, et quosque humores liquidiore reddunt, roburque fibris impertiunt. Quare, ut auctor libri *de internis affectionibus* praecipit, vomitus primum aqua cum aceto hausta, et penna oleo illita atque in fauces immissa cieatur, deinde succus tum betae una cum melle, tum brassicae cum sale coctus per mensem propinetur. Interposito vero mense uno, quo carnibus vescatur aeger, et vinum potet, per alium mensem herbis odoriferis leniterque aromaticis et stimulantibus, uti ruta, anetho, mentha, coriandro, ocimo, apii radicibus similibusque utatur, utpote quae viscidos humores attenuant et solvunt, vasorum omnium excitant vium, nervosque quodammodo recreant. Subinde etiam fomenta adhibeat, aut balneum tepidum.

Huic Angli obnoxii, quomodo evadant.

Quando de ea locutus videatur SYDENHAMIIUS.

Quid tabi senili a solidorum rigiditate nimia.

Curatio atrophiae perperam pro tabe dorsali habitae.

Haec potius dicenda

phthisis pulmonaris incipiens secundaria.

Vomitum primum ciendus.

Tum succi betae et brassicae potandi.

Usus herbarum aromaticarum qui et quando conveniat.

Fomenta et balnea.

*Quotidiana
itineratio.*

*Potus et cibi
ratio.*

*Huic cura-
tioni, quae
RAULINIO
optima est,
alia medendi
ratio substi-
tui potest ae-
quo iure.*

pidum ingrediatur, ut perspiratione aucta totum corpus expurgetur. Sed cum primis iter quotidie stasis horis, paulatim augendum, ineat, donec tandem in singulos dies centum et quinquaginta stadia ¹⁾ conficiantur. Interea vinum bibat primum album et dulce, deinde nigrum atque austerum, et carnes comedat atque obsonia, sensim magis nutrientia, pinguis et cartilaginea. Hac enim ratione curatus sperare potest, se intra annum esse convalesciturum. Rationi consonam praestantissimamque huiusmodi curationem reperit RAULINIUS ²⁾, tamquam certis probatisque indicationibus innixam, quibus tamen hodie in tanta *materiae medicae* ubertate integrum cuique erit pharmacis aliis atque aliis, prout magis arriserit, satisfacere.

1) Stadium constat ex CXXV. passibus.

2) *Observations de médecine etc. Art. V. p. 61.*

§. LXXIV.

*Curatio tabis
dorsalis
quartae.*

*Similis omni-
no rhachitidi
aut rhachial-
giae morbus,
iisdemque
remediis op-
pugnandus.
Quaedam
remedia po-
tiora huius
morbi.*

*Spernit ple-
rumque
omnem me-
delam, etsi
mitigatus
interdum
vitae ad plu-
res annos
parcat.
Curatio*

Tabes demum *dorsalis quarta* (§. LII.), quae *rhachitidi* aut *rhachialgiae* recentium scriptorum, ut mea fert sententia, si minus respondet, simillima certe est, eandemque curationem exigit. Amaris igitur, antacidis, aperientibus, gummosis, sudoriferis, thermalibus aquis, martialibus, nervinis et roborantibus oppugnanda est. Nec alienum est frictionibus atque exercitationibus roborare corpus, aëre sicco et campestri, victu simplici, nutriente ac tenuiori quam maxime uti. Speciatim vero rhabarbarum cum sale tartari, tinctura antimonii, radix osmundae regalis, curcuma, rubiae tinctorum et valerianae sylvestris, gummi sagapenum, asâ foetida ¹⁾, ens veneris BOYLEI, aut flores salis ammoniaci martiati excellere hic creduntur. Sed malum plerumque omnem contemnit medicinam, et post diuturnos cruciatus, spasmos, pareses artuum, vesicae, ani aliave, quae lente ad *marasum* patientem redigunt, morte terminatur. Nunquam perfecte curatum vidi, interdum tamen mitigatum ita, ut vitae ad complures annos parceret. *Atrophia* porro *nervosa* (§. LIII.), quoniam dyscrasiam

acrem humorum, bilis inertiam et defectum fibrarumque rigiditatem pro causa habet, diluentibus, temperantibus, saponaceis, uti ptisana ex radicibus graminis, taraxaci, cichorei, agrimoniae, addito sale quodam neutro aut subacido, succis earundem plantarum cum sero lactis, aquis medicatis, acidulis, leniter ferratis, *aëre fixo* praegnantibus, emulsis anodynis, balneis tepidis et victu blando et vegetabili curari solet. Enemata hic quoque levia et mollientia, peregrinatio, hilaritas atque exercitatio summopere prosunt. Quae autem ab amore aut a *nostalgia* foveatur, postulat, ut voti compos homo fiat, aut rationis ope animus sedetur, et tranquillus fiat. *Secundaria* ab *hysterica* aut *hypochondriaca* affectione profecta curetur ut morbus primarius.

atrophiae nervosae. Diluentia, temperantia, saponacea.
Atrophiae ab amore et a nostalgia curatio. Curatio secundariae.

1) *Vid. dissert. de Asa foetida* IOANN. PUNDT. *Gotting.* 1778.

§. LXXV.

Iam vero de *phthisi pulmonari* (§. LIV.) curanda referendum est. In hac igitur omni ope eniti oportet, ut quaevis exulceratio praecaveatur, aut ubi iam pulmones exederit, quam citissime consanescat. Quorum alterum *incipienti* (§. LIV. LVI. LIX.), alterum *confirmatae* (§§. LVI. LX.) opportunissimum est. Quare ut omnis exulcerationis timor arceatur a *phthisi incipiente*, uberius ad pulmones humorum appulsus cohibendus, congestiones discutiendae, obstructa reseranda, resolvenda tubercula, omnis ad inflammationem suppurationemque proclivitas removenda, et quaecunque sanguinis acritas aut alia prava diathesis emendanda.

Curatio phthiseos pulmonaris.
Indicationes.
In phthisi incipiente.

§. LXXVI.

Itaque convenientissimum est alvum leniter ducere, idque pluries ad intervalla repetere ¹⁾, sanguinem parca manu, sed iteratis vicibus, praesertim quando suppurationis timor avertendus est, subinde detrudere (quod non solum *phthisi* futurae, aut *incipienti*, verum etiam in *confirmatam* migrare minanti remedio esse, experientia cl. viror. ²⁾ demon-

Alvi ductio. V. S.
Resolventia.

stravit), aliorum per epispastica, fonticulos, fots, balnea, diuretica et sudorifera materiam morbidam a pectore avocare, iis, quae diluunt, attenuant atque aperiunt, caute prudenterque uti, demulcentibus, oleosis, obvolventibus spasticas et convulsivas contractiones et tussis stimulum delinire, et demum nutrientibus blandissimis et roborantibus corpus pulmonesque firmare. Inter diluentia, attenuantia, aperiencia non ultimum obtinent locum aquae thermales atque acidulae. Sed cavendum est in earum usu, ne nimia copia pulmones magis magisque infirmentur, aut, si ulcerationem iam passi fuerint, eorum sensibilitas aut irritabilitas cum aegrotantis non levi detrimento incitetur, quod maxime ab acidulis fieri, interdum observatum est. Ideo lacte addito eas temperare student nonnulli. DESSAULTIUS tubercula,

Diluentia, involuentia, paregorica, incrassantia et roborantia.

Cautio.

Methodus DESSAULTII.

a quibus semper hanc phthisin gigni ipse putat, mercurio, ferro aut chalybe et millepedibus resolvere nititur, quibus superbibendum radice urticae decoctum et succi nasturtii aquatici et chaerifolii singulorum binas uncias iubet, et simul equitandum leniter horis medicis ³). Tubercula cruda etiam LANCISIUS mercurio dulci septies sublimato resolvere tentabat, sed parvis et diu repetitis dosibus. Imo BRILOU-ETIUS ⁴) foeminam et virum phthisi pulmonari confirmata laborantes plane restituit sublimato corrosivo methodo Swietenia, et succo nasturtii aquatici. Vires vero nasturtii aquatici adversus huiusmodi phthisin crebro usu optimisque pleurumque effectibus, quos in Lotharingia vulgo experiuntur, quam maxime ⁵) confirman-
tuntur.

Observatio BRILOUETH de viribus sublimaticorrosivi, sive Swietenia methodo, et nasturtii aquatici.

Formul. FERNELII.

1) FERNELII praestantissima compositio ad alvi ductionem haec est:

Rec. *Manne elect. unc. j.*
Solv. in s. q. aqu. comm., add.
Cassiae decoct. unc. j.
Olei amygd. dulc. unc. j.
M. in mortar. marmor. exacte.
Dos. cochl. j. singulis IV. horis, vel j. mane, et vesp. item.

2) DOVARIUS et COHAUSENIUS, *Essays de méd. d'Edimbourg T. IV. p. 523.*, SWIETENIUS in BOERHAAV. *aph. § 1210.*

LUDWIGIUS *Comm. de reb. in sc. nat. et med. gest. Vol. 2. p. 401.*, BISSETUS *ibid. Vol. V. p. 617.*

3) *Essays de méd. d'Edimbourg Vol. VII. p. 121.*

4) *Journ. de Méd. Novemb. 1777.*

5) CLERC *Histoir. natur. de l'homme. T. II. p. 35.*

§. LXXVII.

In *phthisi* vero *confirmata* (§. LVI. LX.), quando *Curatio* iam *ulcus pulmonem* exest, et *purulenta* labe inficit san- *phthiscos confirmatae.*
guinem, a *venae sectione* praestat abstinere; nisi eam *dolor* *An V. S.*
pleuriticus, *febris vehemens* et *difficilior respiratio*, novam
suppurationem indicans, requirat; *ulcus* vero *abstergere* mel-
litis, *saponaceis* et *sputum moventibus*, *corruptioni* obsistere *Ulcus ab-*
subacidis vulnerariisque antisepticis, et *denum excitantibus* *stergendum.*
mitissimisque balsamicis cicatricem inducere. *Sputum mo-* *Dulcamara.*
vendi laude non immerito celebratur *dulcamara*, sive *so-*
lanum scandens, cuius ex decocto WERLHOFIUS pulmo-
num *ulcere laborans* magnum emolumentum percepit, et be-
ne ¹⁾ habuit. Magnam enim vero *puris vim* expellunt aqua
decocti eius *stipites*, sicque *pulmonum ulcera* validissime
repurgant. Ad *exsiccantia* et *balsamica* referri debent suf- *Exsiccantia*
fitus ²⁾ grati et redolentes, *aër siccus* et *purus*, *saccharum* *et balsumica*
e *rosis rubris*, aqua *calcis* tam *simplex*, quam *composita*, *quae.*
plantae vulnerariae, uti *sanicula*, *millefolium*, *hedera ter-*
restris, *consolida*, *veronica*, *hyperici summitates*, *equisetum*,
agrimonia aliaeque id genus. Ad *rosas* quod attinet, CLE-
RICUS ³⁾ testatum facit, in *Hispania* *phthisin* et *febres len-*
tas curari solitas esse AVENZOARIS *methodo*, videlicet lar-
giori usu *conservae e rosis damascenis*, *lactea diaeta* et hy-
drogalacte potui dato. Dignum profecto esset *ornithogalon*, *Lac gallinae,*
vulgo *lac gallinae*, de quo *pericula a sagaci consummato-* *sive ornitho-*
que medico fierent. Nam a GEDEONE HARVEIO uti anta-
cidum, *abstergens* et *leniter siccans* ad *phthisin* *ulcero-*
sam ⁴⁾ mirifice commendatur. Traussylvanis in usu est he- *Dilutum he-*
lianthemii, sive *chamaecisti flore albo* aut *aureo dilutum*, quo *lianthemii.*
solo, ut CRAMERUS narrat ⁵⁾, *phthises* cum *sputo sangui-*

neo et purulento difficilique respiratione depellunt. Dilutum vero hoc, si fuerit saturatius, nauseam et vomitum movet.

1) CLERIC. *l. c. p. 35. 36.*

Sicci suffitus, quales et quando.

Quando humidi.

2) BENETUS, WILLISIUS, NICOL. PISO etc. memorant suffituum utilitatem in phthisi. BILLARDUS, referente LOUISIO (*Mém. de l'Acad. Royal. de Chirurg. T. V. 1774. p. 549.*), eorum excellentiam extollit, allatis observationibus. Humidos suffitus noxios censet ob pulmonum laxitatem. Balsamicos vapores utiles admodum esse testatur. Ipse sumit cerae flavae et recentis libram unam et par pondus resinae communis aut picis siccae, aut, quae praestat, terebinthinae, atque haec in terreo vase super ignem imponit in media cubiculi parte, ubi aeger degit, sicque medicatis vaporibus aër imbuitur. Addi etiam potest aliquid balsami canadensis albi, aut peruvianii, aut alius. Hisce vaporibus ipse multum confidit, experimentis felicibus edoctus. *Humidos* autem et *vapores* etiam non damnat in *tussi pectorali sicca*, phthiseos veluti prodromo, in *asthmate sicco* aut *convulsivo*, aut in *comica*. *Ex sched. auct.*

3) *Id. ibid.*

4) *De art. curand. morbos expectatione p. 230.*

5) *Commerc Norimb. ann. 1732. p. 19. et ann. 1738. hebd. 3.*

§. LXXVIII.

Lactis usus utilissimus.

Quibus noxium lac.

Nihil vero utilius, nihil praestantius ex omnium ferme sententia reputatur lacte ipso cum ad acritates obtundendas alendunque corpus, tum ad glutinandas ulcerum oras. Id iam perspexerat vetustissimus medicinae parens HIPPOCRATES, cum memoriae proditum reliquerit: *lac tabidis dandum esse* ¹⁾, dummodo tamen non valde febricitent, nec capite doleant, ut ego interpretor, ex stomachi quidem imbecillitate, nec hypochondria elevata, scilicet, obstructa, aut a flatibus distenta habeant, nec admodum sitiant, nec quidquam aliud adversetur. Arcendos pariter ab eius usu monet eos, qui febre acuta torrentur, qui biliosa deiciunt, aut ob sanguinis egestionem in summo omnium facultatum languore versantur sic, ut metuendum sit, ne digeri queat, sed corrumpatur.

1) *Aphor. LXIV. sect. V.*

§. LXXIX.

§. LXXIX.

Lac autem *muliebre* reliquis antecellere universim creditur, quod ab imbecillo quovis viribusque destituto, ut-
 pote tenue et minus caseosum, digeratur, nec ita facile *Lac muliebre ceteris anteferendum, et quare.*
 acescat, cum ob victum animale, quo homines utuntur, natura quodammodo sua ad *alcalescendum* aequè pronum existat. Hoc igitur tum potissimum convenientius est, cum acrimonia acida vel iam praesto est, vel imminens metuitur, ut in pueris debilibusque corporibus. Cumque tenuius, serosius atque etiam nostris humoribus magis affine videatur, facilius et promptius in succum animale et alibilem converti potest. Exsugere vero debet e mammis ipsis mulieris, *E mammis exsugendum mulieris,*
 ne quidquam tenuioris halitus volatilisque principii amittatur. Mulier etiam, quae lac praebet, iuvenis et sana sit *quae sana et iuvenis sit oportet.*
 oportet, et cibo salubri atque aegrotantis rebus accommodato nutriatur. Post muliebre a nostris commendari solet *Lac asininum.*
asininum, neque a nobis dissentit FRID. HOFFMANNUS ¹), qui id serosius et maiori *salis essentialis* copia praeditum invenit; ideoque ad diluendum, resolvendum abstergendumque paratissimum iudicavit. Asinino succedit ordine *caprillum.*
caprillum, deinde *vaccinum*; illud tenuitate et vulneraria virtute *Vaccinum.*
 praestare, hoc crassitudine et nutriendi facultate, quia plus butyri et casei continet, certis compertum est observationibus atque experimentis. His *ovillum* nonnulli adiiciunt, *Ovillum et equinum.*
 quod crassius et caseosius minusque butyri habens passim reputatur. *Equinum* propius ad asininum accedere, communior opinio est. Seligendum ergo est illud, quod indicationibus rebusque circumstantibus idoneum videatur.

1) *Dissertat. de lacte asinino.*

§. LXXX.

Plerique arbitrantur, imo iubent ab asinino incipendum esse, deinde ad caprillum progrediendum, tandemque ad vaccinum. Neque statim largiter dari illud oportet, sed paulatim ascendere, quasi tentando, ad eam, qua opus est,

quantitatem. Si propinatum hae ratione rite digeratur, non acescat, non corrumpatur, non nauseam creet, neu vomitum, non tormina, non alvi fluxum moveat, non febrim augeat, licet largiori manu et repetitis haustibus lac ita dare, ut ex

Auxilia, quibus lactis usus facilius tutiusque feratur ab aegris.

eo solo vivat aeger per aliquot hebdomadas. Quo vero facilius et certius feratur, expiandae primum leni medicamento viae sunt, deinde crebris enematibus alvus aperta servanda, nec omittenda ea ex alcalicis atque absorbentibus, quae tutiora existimantur, minusque ventriculum atque intestina gravare posse creduntur. His enim acoris causa, si qua est, quoad fieri potest, prudenter et provide antevertitur. Id saponis tantillo praestare conantur alii, quo illud etiam assequuntur, ut alvus blandissime ad egerendum sollicitetur.

§. LXXXI.

Medicatio lactis.

Neque desunt, qui arte serosius lac reddere student, aut additionibus quibusdam medicantur. Defloratum hinc nonnulli propinant, alii aqua Nuceriae dilutum, decoctis vulnerariis alii, aut saccharo aut melli admixtum. Duplici vero nomine aquae calcis adiectio celebratur; quod hac non modo lac a coagulatione atque aciditate arceatur, verum etiam blandam abstergendi exsiccandique sordida ac impura ulcera facultatem sortiatur. Sed prae ceteris cum aquis thermalibus aut acidulis verno aestivoque tempore ut plurimum copulari consuevit, qua de re consuli possunt practi-
corum fere omnium non infrequentia pericula. In unum vero collectas *lactis* laudes, praesertim ad phthiseos curationem, eiusque adhibendi methodum spectantes, qui rescire cupit, pervolvat is eruditissimam *dissertationem*, quam non multis abhinc annis edidit IO. MICHAEL GALLUS ¹), medicus plane non ignobilis. Praeterea legi merentur, quae passim in *consultationibus* FRANCISCI REDII, IOSEPHI DELPAPII, NICOLAI CYRILLII, IAC. BARTHOL. BECCARII, FRID. HOFFMANNI aliorumque de lactis usu eiusque varia administratione doctissime traduntur ²).

Qui libri legendi de laudibus lactis et eius sumendi ratione.

1) *Dissertatione del vero e sicuro metodo dell' uso del latte, e suo abuso nella medicina di GIAMMICHELE GALLO.*

NOTA HISTORICA.

2) Intimam vero lactis naturam medicasque facultates illustrarunt non pauci, inter quos (ut Cl. BECCARII opusculum *de lacte meamque analysin* ¹⁾) praeteream) non infirmum locum obtinent THOMAS YOUNGIUS, A. M. Britannus artis obstetriciae P., et FRANC. XAVER. DE VVASSERBERG Germanus. Illius exstat *dissertatio medica inauguralis de lacte, quam pro gradu Doctoris eruditorum exumini subiecit Edimburgi* 30. Novembris 1763. Reperire eam poteris in *Thesauro dissertationum, programmatum aliorumque opusculorum selectissimorum* etc. collectorum ab EDUARDO SANDIFORTIO Vol. II. Art. XXIII. Roterodami 1769. Huius vero *Examen chemicum lactis* insertum legitur fasciculo secundo operum minorum medicorum et dissertationum Vinulobonae edito anno MDCCLXXV.

1) Anno 1772. Pupiae editum ab auctore.

§. LXXXII.

Etsi vero lac phthisicis, et praesertim iis, qui ex hae-
moptysi in phthisin inciderint, opportunissimum videatur,
non tamen indiscriminatim cuilibet ea laboranti, nec quo-
cunque tempore promiscue dandum est. Nam praeter ea,
quae ex HIPPOCRATIS monito (§. LXXVIII.) considerata
primum docuimus, magni interest diligenti examine disqui-
rere, an pulmonum ulcus cum obstructione viscerum abdo-
minalium, vel cum tuberculis crudis, strumis scirrhisve com-
plicetur, aut ex illis suppuratis ortum fuerit. Tunc enim
a caseosa lactis parte, quae glutine et mucagine abundat,
augeri malum potest, et fieri deterius. Interdum etiam tanta
puris copia ulcus scatet, ut non omne excerni per sputa
possit, aut ita alte latet, ut minime cum bronchiis commu-
nicet. Utroque casu sanguis resorpto pure inficitur, caco-
chymia purulenta colliquescit, sicque depravatus lac ipsum
citissime corrumpit, novumque ex hoc fomitem suppeditari
malo non pauci perhibent ¹⁾). Plerumque alvi fluxus, qui
liquationem huiusmodi aut consequi aut comitari solet, im-
modice, si iam praesens fuerit, increscit augeturque, vel, si
nondum accesserit, celerrime provocatur. Nec iuvat tum

*Lac, nisi ratione habita
causae proximae, non
praebendum in omni
phthisi.*

*Si a scirrhis,
strumis, ob-
structionibus
ulcus oriatur,
vel cum iis
complicetur,
tunc lac no-
xium. Item,
si ulcus ni-
mio pure sca-
tens, vel ita
profundum
sit, ut minime
cum bron-
chiis commu-
nicet.*

Alvi fluxum

adstringentia lacte remixta rarissime sistunt.

Quando eccoprotica et amara prosint.

Quae lacti substitui possint utilia.

lacti incoqui rosas rubras, aut chalybe ignito aquam alteratam admisceri, aut alia adstringentia adiici, ut nonnulli praecipiunt. Rarum enim est per huiusmodi praesidia lactis corruptionem alvique profluvium, quo vires prosternuntur, satis averti aut praecaveri. Attamen si acida aut putrida saburra in primis viis causam praebet lacti, qua corrumpatur, interdum eccoprotica, amara et absorbentia eam remonent, unde lac porro bene cedat. Inter amara post lenia purgantia cortex peruvianus excellit. DELISLIUS etiam prudentem emetici usum admittit²). Satis tunc est ad diaetam avenaceam, ad cremores hordei aut oryzae, ad serum lactis dulce HOFFMANNI, ad panis albi decocta aliaque huiusce generis confugere. Lacti etiam substitui solent iura ex ranis, caudis cancerorum fluviatilium et carne testudinum nemorensium parata, quae ni morbum tollant, saltem efficiunt, ut quam minimum afferat detrimenti.

1) RAULINIUS *Observat. de médec. sect. III. Artic. 3. et 4.* ROZIER DE LA CHASSAGNE *l. c. p. 308.* DELISLIUS *l. c. P. III. Cap. 3. p. 287.*

2) *De la Phthisie pulmonaire. P. 3. chap. 1. p. 225.*

§. LXXXIII.

Phthisis scrophularis et scorbuticae supradictae alia remedia indicantur.

Pilulae balsamicae MORTONI.

Reformatae ab auct.

Sapo venetus. Succus untiscorbut.

Cum hoc in casu (§. LXXXII.), tum in phthisi scorbutica aut scrophulari, ut vocant, in qua febris vel omnino abest, vel exigua, vel non continua est, sputumque glutinosum atque asthmaticorum simile eiicitur, curationem non modo ab initio, sed morbo etiam provento, mirifice promovent adiuvantque pilulae balsamicae MORTONI¹), quae incidendo et resolvendo causam morbi proximam subigunt²) extirpantque. Quoniam vero earum vis irritans aut tussim, aut phlogosin, aut febrim quandoque exasperare potest, idcirco reformari, prout res postulat, opportune possunt. Mihi in usu est, eas ex gummi ammoniaco et millepedum pulvere succoque concreto hederæ terrestris aut scabiosae subactis componere, omissis reliquis, quae nimium calefaciunt, et motum sanguinis concitant. Interdum sapone veneto utilissime usus sum. Hic etiam locum merentur succi

recenter expressi ex plantis antiscorbuticis temperatioribus *plantar. recentium.*
et decocta leniter aperientia ex iis, quae pectori potissimum
accommodata existimantur.

Formula pilular. MORTONI.

1) Rec. *Pulv. milleped. pp. drachmas iij. Gumm. ammon. optim. depurat. drach. j. semis. Florum benzoës scrup. ij., vel drachm. j. Extract. croc. Balsam. Peruv. an. scr. j. semis. Balsami sulphur. terebinth., vel anisat. q. s. M. f. pil. mediocr. deaurandae.*

2) MORTON. *Phthisiolog. l. 2. c. 8. p. 63. GEOFFROYIUS mater. med. T. I. p. 100.*

§. LXXXIV.

In ea vero phthisi, quae a pulmonum atonia et laxitate proficisci videtur (§§. LIV. LX.) cortex peruvianus egregiam opem saepe praestitit. LOESEKIUS in se ipso ita prospere eo usus est, ut neque pus, neque sanguinem amplius extussiret ¹). Non semel puris et sanguinis sputum, quo imminens phthisis pulmonaris non obscure significabatur, in iis, qui ex hypochondriaca passione in id mali genus inciderant, et macie iam confici coeperant, paulatim diluto corticis peruviani, modo sine lactis additione, modo cum lacte adiecto compressum exsiccatumque feliciter vidimus. Sed multo certius eius mirifica virtus elucet in illis, qui a pueritia strumosis affectibus laborarunt, si quando ad phthisin pulmonarem inclinare observentur. Imminens enim malum divino hoc auxilio ab eisdem arceri, auctor est MEADIUS ²)

Corticis peruviani usus prodest in phthisi pulmonari, quae ab atonia est. Quibus praesertim conveniat modo solus, modo lacte mixtus.

1) Vid. *Comment. de reb. in Sc. N. et M. gest. Vol. V. p. 116. GEOFFROY. l. c. T. I. p. 282.*

2) *Monit. et praecept. medic. cap. I. sect. X.*

§. LXXXV.

Neque in phthisi confirmata tutum est emeticis.¹) aut catharticis acrioribusque diureticis uti. Vires enim, quae iam propemodum fractae sunt, facile his penitusque exsolvuntur; corpus vero, quod undique diffluit atque arcscit, magis magisque liquatur atque emungitur. Hac ipsa de causa

In phthisi confirmata ab emeticis et a diureticis acrioribus abstinendum.

sudorifera proprie dicta suspecta esse debent, et iure merito reprobantur. Novi quidem, decocta ligni guaiaci, sassafras, radicis sarsaparillae aliorumque ad resolvendas con-
Nec tuta sudorifera proprie dicta, etsi a multis commendentur. gestionem, et cacochymiam serosam aut lymphaticam repurgandam, sanguinemque purificandum a compluribus commendari, imo ad ulcera ipsa pulmonum cum detergenda, tum exsiccanda, ubi a malo totius corporis habitu pravaque humorum colluvie permanere videntur, magna emolumenti spe adhiberi solita esse. Verum haec humores nimium exagitant, corpus magis siccant, maciem augent, et febrim exasperant, praesertim in calido et sicco temperamento praeditis, et habitu gracilioribus, aut iam morbo emaciatis. Quapropter, si unquam, incipiente tantummodo phthisica affectione, et nondum corporis habitu destructo, et in hominibus succosioribus et prope pituitosis locum habeant, potiusque ad antevertendam, quam curandam phthisin in usum veniant.

1) HIPPOCR. *Aphor. VIII. sect. IV.*

§. LXXXVI.

Mitiora proponuntur.

Quae tamen mitius agunt, quaeque ex radice chinae, smilacis asperae, arundinis montanae aut lappae maioris, quam *bardanam* vulgo vocant, hordeo, carne vitulina, ranis similibusque parantur, atque addita boragine, soncho, cichoreo quodammodo contemperantur, aut cum lacte remiscuntur, non penitus improbantur. Acritates enim diluunt, solvunt, mitigant, et per urinae ac diaphoreseos vias tutissime propellunt. Nil vero antiquius frequentiusque est, quam in phthisi ulcerosa aut eius appropinquantis metu balsamica medicamenta nedum a medicis, verum etiam ab imperitis quibusque et passim proponi et temere usurpari. At plerumque apud nos ab exercitioribus sapientioribusque reiciuntur, quippe quae ventriculo nocent, febrim adaugent, calorem intendunt, et oras ulcerum inflammant. Nec a nobis dissident aliarum regionum clinici prudentiores¹), cum

Balsamica improbata et merito reiecta.

crebra nimium viderint exempla tristium effectuum, quos genuit eorum propria imprudensque administratio.

1) GEOFFROY. *Mat. med. T. I. p. 444.* FOTHERGILLIUS *Comm. de reb. in Sc. N. et M. gest. Vol. XVIII. Par. 3. p. 400.*

§. LXXXVII.

Attamen ulcera pulmonum ita quandoque pure scatent, *Balsamicis* sordibusque obducta atque oppleta videntur, ut balsamicis *(si quando conveniunt)* detergi et mundificari debeant. Tanta item non raro est *quibus uti liceat.* cacochymiae purulentae diffusio, ut eidem coërcendae balsamicorum adiumento opus sit. Itaque si quando iis uti hisce de causis liceat, tutiora tantum adhibeantur, nempe mitissima, uti balsamum tolutanum, syrupus balsamicus pharmacopoeae Londinensis, aut terebinthinae, terebinthina veneta leviter aquae incocta, itemque aqua thedae, sive de *goudron*, vel de *catrame* vulgo dicta, quae etiam acore quodam mitissimo putridae dissolutioni obsistit. Sed nihil fere ulceribus mundandis claudendisque, aut corruptioni cohibendae et praepediendae aptius valentiusque putaverim, quam camphoram liberali manu diuque intrinsecus datam, a qua vix noxa, quam balsama afferre possunt, metuenda est.

§. LXXXVIII.

Non possunt hic silentio praeteriri duo medicamenta, *Lichen Islandicus et elixir vitrioli* quibus hodie video passim tribui antiphthisicam nescio quam facultatem, muscum nempe, sive *lichenem islandicum*, atque *elixirium vitrioli anglicum*. Quo iure ea celebrentur, *anglic. a nuperis laudata. Lichenis Island. examen.* non definiverim. Temporis potius atque iteratae experientiae iudicium esto. Quod attinet ad muscum, de eius vi purgante iam BORRICHIVS mentionem aliquam fecit ¹⁾. Sed de ipsius *antiphthisica* virtute qui aliquid dixerit ante LINNEUM, non novi. Succos enim ex lichene islandico cum lacte pulmentum non ingrati saporis parare, quo adversus phthisin utuntur, ex eius dissertatione *de usu muscorum* anno 1760 publice propugnata intelleximus ²⁾. Primam

vero coctionis aquam abiciunt, ne alvum ducat. Verum id beneficii non lacti potius acceptum referamus? Deinde eo non modo sues, equos et boves intra breve tempus saginari, sed etiam cum lacte decocto egregios in phthisi, rha-chitide, cachexia praestitos effectus fuisse in *anno secundo historico naturali Lipsiae edito ann. 1769* narrat SCOPULUS, et pluribus observationibus confirmare nititur. Vim ergo ei tribuit nutrientem et roborantem ³⁾. At peculiarrem atque insignem in eo medicam facultatem insidere adversus morbos pectoris, quando omnis inflammatio et febris abest, repetitis periculis patuit IOANN. HENRICO SCHOENHEYDERO ⁴⁾. Is enim duodecim pueros, qui ex *morbillis in tussim purulentam* cum dolore et oppressione pectoris et macie, appetitu tamen integro, inciderant (oxymelle scillitico, kermes minerali, vesicatoriis pectori admotis, linimentis oleosis, theriaca *Andromachi*, et cortice peruviano frustra usus), tandem *musco islandico* ⁵⁾ pristinae sanitati restituit. Iuitio statim dolor immixtus est, deinde post unam vel alteram hebdomadam omnia in melius vertebantur, donec intra quinque hebdomadarum spatium omnino convaluerint. Quibus diarrhoea movebatur (nam ab eo alvum solvi monuimus) emulsione arabica compressa fuit. Animadvertendum vero est, tusses huiusmodi, etsi sputis purulentis stipatas, post quoddam temporis spatium, quod percurrere solent, plerumque sine ulla aut certe communi artis ope sponte desinere; idque monitum velim, ne remedio plus quam par est virtutis inesse, ab eiusmodi observationibus concludatur. Ceterum remedium acre est atque irritans, videturque hac proprietate et alvum ducere, et obstructa reserare, et urinas ciere. An hinc vires antiphthisicae?

1) *Act. Havniens. ann. 1674.*

2) LINN. *Amoenit. acad. Vol. VII. n. 145.*

3) *Ann. II. Hist. nat. pag. 107.*

4) *Collect. Soc. med. Havniens. Vol. I. p. 126.*

5) Formula, qua utebatur, erat haec: Rec. *Musci islandic. unc. j. Decoq. in aqu. communis uncis XVI ad remanentiam*

SCHOENHEYDERI observatio de curatione eodem praestita.

Auctoris monitio, ne nimium tribuatur laudatae observationi.

unc. XII. Colaturae adde syrupi scillitici unciam dimidium.
Detur unc. j. quovis trihorio. Vid. Cap. I. de Tussi §. XVI.

§. LXXXIX.

Laudatur in Anglia, inquit Cl. HAENIUS ¹), elixir Vires elixirii
vitriolicum in dyspnoea et suppuratoriis pulmonum morbis. *vitriol. ex-*
Exstat in pharmacopoea Londinensi eius descriptio ²), quae *penduntur.*
 tincturam quandam aromaticam exhibet, acido vitriolico
 quodammodo temperatam. Hinc aromatica vis, quae suspe-
 cta esse potest, acido vitriolico infringitur, et vicissim vi-
 trioli acidum a spiritu vini aromatico, ne praevaleat, egre-
 gie edulcatur. Pericula in *phthisicis purulentis* facta adeo *Pericula in*
 prospere cesserunt, ut Cl. PATE clinicus Londinensis do- *aegris a PATE*
 ctissimus, qui nec remedium ab initio admittere audebat, *instituta, et*
eius laudes.
 nec curationibus eodem praestitis fidem adhibebat, expe-
 rientia tandem victus eius strenuus laudator evaserit. Fre-
 quentissimus autem usus huius *elixirii* fieri perhibetur in
phthisi, quae *dinturniores febres insequatur*, quae *linguae*
sorditiem, quae *virium collapsum nocturnosque sudores ha-*
beat coniunctos, praestantiaque ipsius aliquorum annorum
spatio in aliquot centenis aegrotis orbi universo innotuisse ³).
 Datur autem istud remedium *a guttis duodecim ad quin-*
que et viginti semel, bis, vel ter in die in ea aquae co-
pia, quae acidum saporem vix reliquum faciat. Pueris
 ex *melle et aqua propinatur.* In his sensim a *parca dosi*
ad guttas XL. in singulos dies ascendi potest. Sed in re-
 medii usu ad duos, tres et ultra menses persistere oportet,
 imo etiam ad annos, si morbus non omnino cesserit, et
 tantum iuvinutus sit. Angli eodem tempore adhibent *de-*
coctum chinae-chinae cum lacte remixtum, nec ullam no-
xam inde oriri asserunt, uti timeri potest a lactis coagula-
tione. Testatur HAENIUS pluribus *annosioribus* etiam *phthi-* *Laudes eius*
sicis id remedii dedisse *cum emendatione omni spe maiori,* *aliis HAENII*
sputorum autem tussisque multa imminutione, sed imprimis *periculis con-*
firmitate.
 in ea *phthisi*, in qua *inflammatoria et suppuratoria mate-*
ries universi corporis in integros pulmones colligitur (§. LX.)

sputorumque forma eiicitur, plurimum prodesse, hancque sanguinis diathesin potenter elixirio huiusmodi emendari, multiplici exemplo comperisse ⁴⁾).

1) *Rat. med. P. XII. cap. VI. pag. 239.*

*Formulae
elix. citri-
oli pharma-
cop. Londin.
et tinct.
aromat.*

2) *Rec. Tinctur. aromat. M. lib. j. Spirit. vitriol. fortis, olei dicti P. unc. IV. M. gradatim, et postquam faeces subsederint, per chartam cola. Tinctura vero aromatica sic paratur.*

Rec. Cinnamom. drachm. vj. Semin. cardamom. minor. decorticat. drachm. iij. Piper. longi, Zingib. singulor. drachm. ij. Spirit. vini tenuioris m. lib. ij. Digere sine calore, et cola.

3) *HAEN. ibid. d. 243.*

4) *Id. ib. p. 250.*

§. XC.

*Iura et car-
nes vipera-
rum com-
mendantur,
et defenditur
eorum usus
auctoritate
et ratione.*

Nec deficiunt suae laudes iuribus et carnibus viperarum peculiari artificio paratis ¹⁾), quidquid non experti de earum medicis viribus contra sentiant nonnulli vel celeberrimi ²⁾). Pluris enim faciendam ducimus GALENI ³⁾), ARETAEI ⁴⁾), ANTONII MUSAE ⁵⁾), COELII AURELIANI ⁶⁾), MEADII ⁷⁾), MORGAGNII ⁸⁾), HAENII ⁹⁾) aliorumque complurium auctoritatem atque experientiam, quam derisorum quorundam ineptias. Neque in *phthisi* solum *incipiente*, quam *cachexia*, aut *cutanei ulcerosique morbi* foverint, sed in *confirmata* etiam atque in *abscessibus internis viperarum* usus mira praestat, ut observationibus luculentissimis, praesertim MORGAGNII ¹⁰⁾) et HAENII ¹¹⁾) edocemur. Vis enim iisdem inest analeptica, nutriens, roborans, lenissime diaphoretica, qua et vires, et color et nutritio redintegrantur, sanguinisque vitia atque acritates tolluntur.

*Methodus
veterum
utendi vipe-
ris.*

*Methodus
nuperorum.
Iuris et car-
nium usus
praestans.*

1) GALENUS vel *vinum*, in quo *viperæ maceratae* essent, vel *viperas in olla coctas* anguillarum in modum adhibebat. ARETAEUS *coctas et sale oleoque conditas* in coena obsonii loco dabat. Edendas pariter (fortasse piscium instar coctas) ad ulcera persananda iubebat ANTONIUS MUSA, qui in Italia AUGUSTI medicus degebat, quique id remedii a CRATERO, cuius forte discipulus fuit, ut putat MEADII, didicisse videtur. *Pulverem nostri et iura* conficiunt. Sed in pulvere vix ulla vis superest. Non ita in *iure et carne* ex viperis recentibus. Decoquitur *viperæ dimidium*, vel tota cum pulli aut vi-

tuli carnibus vase clauso in balneo maris cum ea, quae par est, aquae quantitate, et ius inde factum propinatur mane vel vespere; vel utroque tempore ad longum tempus. Addunt alii ranas vel testudinis terrestres carnem, vel plantas morbo accommodatas; sed etiam sine his suas exserunt vires viperarum. Carnes vero coneiduntur, et coneisae cum pane trito, carnibus tenerioribus minutim dissectis et ovi albumine commiscuntur, pulmentique in modum coquuntur, et esui dantur. MOR-GAGNIUS, quem imitatus est HAENIUS, viperarum carnes a decocto reliquas cum saccharo, quod vocant, rosato veteri subigi et dari curabat, eique superbibi ius, quod decoctae suppeditaverant.

2) Vide *notam* I. ad §. CXLII. *Vol. III.*; in hac enim auctor contra vituperatores huius remedii, inter quos etiam Cl. TISSOTIUS, eius praestantiam et vim pluribus persequitur ac defendit.

3) *De simpl. medicam. facultat. lib. II. cap. 1.*

4) *De curation. morb. chronic. lib. II. cap. 13.*

5) PLINIUS *Histor. natur. lib. XXX. cap. 13.*

6) *Morb. chronic. lib. IV. cap. 1.*

7) *De venen. Tentam. 1.*

8) *Epist. anat. med. LV. n. 14. et seqq.*

9) *Rat. med. Part. XIII. cap. VII. pag. 227. et seqq.*

10) *L. c.*

11) *L. c.*

§. XCI.

Denique ad symptomata etiam, quamquam primarius *Symptomatum mitigatio.* morbus incurabilis videatur, lenienda animus convertatur. Tussis molestior noctesque insomnes efficiens opium, et quae *Ad tussim et evacuationes nimias.* opium habent, remedia postulat. His enim eius impetus infringitur, et aliquot horas conquiescit. Opio pariter evacuationis cuiusque excessus refrænatur et sistitur. Tussis quoque feritatem syrupus papaveris albi, emulsa ex seminibus frigidis, pulvis *Italy Abbatís* recens paratus ¹⁾ aliaque, de quibus alibi (§. X. usque ad XV.) monuimus, demulcent et continent. Alvi fluxum comprimunt absorbentia et roborantia; sed diascordium FRACASTORII et theriaca ANDROMACHI primas tenent, quia opium habent. Sudoribus *Ad sudores colliquativos.* vero, speciatim quando a solidarum partium laxitate profluunt aut foveantur (foventur autem ab huiusmodi causa

saepissime), aliquod fraenum iniicit corticis peruviani aut foliorum salviae decoctum frigide potui datum. Nec alienum est eidem instillare guttas aliquot spiritus vitrioli dulcis aut elixirii vitriolici, imprimis si putrida corruptione omnia liquari suspicio non desit. Colliquativos huiusmodi sudores certo reprimi aqua calcis, si detur ad libram unam singulis diebus cum lactis recens mulcti tantillo admixtam, experientia compertum est ²⁾). Sputa etiam purulenta, quando non facile prodeunt, aut suppressa pulmones materiae copia gravant, expectorantibus elicienda sunt. Apti ad hoc iam pluries alibi a nobis recensita fuere. Modo etiam *solanum scandentis* sive *dulcamarae stipites* aqua decoctos ³⁾ proponimus, quibus saepe vidimus magnam puris vim e pulmonibus exscreatam prolectamque. Ulcerato etiam pulmone eos mederi ferunt. Exemplum WERLHOFFII supra §. LXXVII. allatum, qui pulmonis ulcere laborans ab huiusmodi remedio bene habuit, feliciterque convaluit, ut narrat CLERICUS, nostrae favet sententiae. Interdum dolor peculiari thoracis loco infixus phthisicos torquet, cui auferendo sedandoque nihil praestantius esse quam *setaceum* dolenti loco insertum, PRINGLIUS ⁴⁾ et LIEUTAUDIUS ⁵⁾ tradunt. Ut plurimum dolor hic a pulmone exeso pureque pleuram et musculos intercostales arrodente proficiscitur. Tunc quid mirum, si exitu per setaceum puri reserato dolor evanescat? Interdum, quin revera evanescat, a maiori extrinsecus ad cutim excitato veluti obliterated videtur, quia huius intensior gradus alterius gradum vix sensibilem reddit ⁶⁾).

1) Vide descriptionem in *Antidotario Bononiensi*.

2) Formulae, quibus *dulcamara* praescribi solet, huiusmodi sunt:

Formulae ex CLERICO. Rec. *Solanum scandentis sive stipitum dulcamarae in frustula sectorum unciam dimidiam. Decoque in libris tribus aquae fontanae ad unius librae remanentiam. Colaturae adde sacchari parum ad gratum saporem. Dentur singulis horis duo cochlearia. Ex CLERICO.*

Vel ex eodem CLERICO alia.

Rec. *Stipit. dulcamar. sciss. et leviter contus. drachm. ij. Infunde in s. qu. aqu. ferventis per horam dimidiam, deinde*

*momento ebulliant. Colaturae lib. j. et semis adde oxymel-
lis simplicis, syrupi florum papaveris rhoeados ana unciam j.
Misce. Dentur omni bihorio unciae ij., vel. iij.*

3) PRINGLIUS *Osservaz. interno alle malattie d'armata*
P. III. cap. 3. p. 218.

4) *Synops. univers. prax. med. lib. I. sect. 3. p. 165. edit.*
Venet. Vid. etiam BRENDÉLII dissertationem de phthis. et
hectic. discrimine, et setaceorum utrobique usu. Gotting. 1754.
et Cl. LE ROY sur l'écorce de Garou pag. 123.

5) *Fas sit historiam ex diario italico anni 1783. cl. au-* *Observatio*
ctoris de promptam hic transcribere, ut pateat in phthisi pul- *auctoris.*
monari tam caleis aquam, tum balsamica et setacea, aliaque
validiora remedia, nisi parca et prudenti manu administren-
tur, interdum nocere potius quam prodesse, et naturam ipsam
in eius curatione simplici magis quam composita medendi
ratione delectari. En historica narratio sancte et fideliter
ex autographo ad verbum latine reddita.

„Maio mense huius anni iacentem puellam ESTHER CASSIAM
duos et viginti annos natam conveni, quae *phthisi pulmonari*
ulcerosa cum tussi molesta, sputis purulentis, febris hectica
symptomata et macie summa laborabat. Iam ab anno supe-
riore eius menstrua, quae tunc fluebant, nec posthac amplius
redire, terrore quodam repente substituerant. Hinc morbi origo.
Nam paulo post sicca tussi puella corripitur, quam duobus in-
tegris mensibus ut catarrhalem plane despexit. Ast accedente
febris magnaeque tum spirandi, tum decumbendi difficultate (me-
dico accito) pluries ei sanguis e vena mittitur, aliaque gene-
rosiora artis adiumenta absque ullo emolumento in usum vo-
cantur. Decies nimirum vena secta, quater applicita vesican-
tia (quinto etiam inter omoplatas adiecto), setaceum sub
axillam insertum, tum pilulae balsamicae MORTONII et aqua
caleis saturatissima (quotidie ad uncias triginta sumenda), quae
prope ad interitum aegram impulit, aliaque huius census plura
exhibita sunt. Sed diu multumque misera puella incassum
vexata. Quam ob rem hisce nimis validisque remediis exu-
lare iussis, sola diaeta lactea instituitur. Eius ope omnia
symptomata remittunt. Tussis imminuta, facilius expectoratio,
sputa parciore, minus foetentia meliorisque notae, spiritus li-
berior, commodus in quocumque lato decubitus, febris quo-
que minor. Ex quibus, ni fallor, simplicioris medicinae, quae
in hac potissimum pulmonum labe anteferenda sane composi-
tae ac multiplici est, praestantia apparet. Nonnulla ego ro-
gatus, aëremque imprimis apricum ruris suasi, licet vix ab
arte curatio ulla exspectanda videretur. Quoniam vero ad
ἀκμὴν, sive tertium, ut vocant, gradum nondum pervenisse
morbus videbatur (nulli enim sudores nocturni, nulla diar-
rhoea, nullae urinae oleaginosae adhuc aderant), de salute pe-
nitens desperandum non erat. Hanc ego historiam refero, ut
ostendam, vehementem nimis efficaciorisque medicinam inter
nos quoque germanico more adhiberi, sive quod nonnulli in
transalpinis scholis instituti sint, sive quod poliatros transalpi-

nos imitari, servum pecus, incaute nimis velint.“ *Hactenus auctor. Nolim vero quis putet ab eo unquam transalpinos medicos fuisse despectos; quinimo multorum doctrinam atque in arte excellentiam sicut optime norat, ideo magno in pretio habuit, habendosque semper ab omnibus iure ac merito contendebat. Id unum a recentiorum quibusdam exposcebat, ne nimia medicaminum copia aut vehementia, longe a maiorum exemplis recedendo, in morbis curandis quandoque abuterentur, neve plus quam par est hisce incertis fallacibusque auxiliis confiderent; in quam sane reprehensionem Gallorum aeque ac Germanorum complures eorumque vestigiis inhaerentes quosdam etiam Italos cadere interdum, non sine artis medicae et aegrotantium iactura, querebatur. Videtis eius monita saluberrima in adnotatis ad §. L. Voluminis I. de Febris, quaeque ubique hac de re consulta ipse animadvertit.*

§. XCII.

Curatio secundariae phthiseos et symptomaticae.

Haec de *phthisi primaria*. In *secundaria* autem et *symptomata* (§. LV.) omne studium dirigi debet ad morbum, a quo permanavit prius, vel a quo adhuc perseverante dependet. Namque nisi is propulsetur, neutiquam ipsa poterit ullis vel efficacissimis medicamentis superari.

Scorbuticae, hypochondriacae, scabiosae, herpeticae quae medentur.

Quapropter cuique primario morbo opponenda curatio est. Si exempli causa a scorbutico phthiseos origo sit, aut ab affectione hypochondriaca, tunc ea profecto in usum vocanda, quae in hisce morbis primum tollendis conveniunt. Sic, si a scabiosa, herpetica aut alia eiusmodi labe phthisis processerit, succi taraxaci, fumariae, cichorei, lapathi, oxalidis, aut harum plantarum decocta, serum lactis, balneum aquae dulcis, tum sulphureae et medicatae, atque alia

Antimonium crudum pulveris. ceteris praestat.

huiusce census curationem pollicentur. Sed prae ceteris convenientissimum est antimonium crudum in subtilissimum pollinem redactum, et super porphyritum, ut appellant, praeparatum. Hoc enim acre illud peculiare emendat, crassos humores attenuat, vitiatos diaphoresi aucta expellit, corpusque ad pinguescendum reddit paratius. Antivenerea opem ferunt ei, quae lueni veneream subsequitur. Huiusmodi phthisin cum ulceribus faucium, doloribus nocturnis, macie, febre lenta, tussi et puris sputo devicit Cl. CLEMENS

Curatio venerea.

Sublim. corrosivum
SWIETENII

TODIUS *mercurio sublimato* methodo *Swietenia* ¹⁾ adhi-

bito, duosque menses continuato; sed toto eo tempore da-
 bat etiam intrinsecus *dilutum corticis peruviani* et *sarsae-*
parillae et *iura carniū teneriorum*, musco sive *lichene*
islandico alterata, et praeterea *lac* cuiusvis alius alimenti
 loco. Interim ulcera detergi curabat solutione aquosa eius-
 dem *sublimati corrosivi*, adiecta mellis idonea portione ²).
 Similem curationem *sublimato corrosivo* perfecit etiam Cl.
 CHRISTIANOPULUS, exemplumque edidit in opusculo, quod
 de morbis SWIETENII *medicamento curatis* vulgavit. Ad
 hanc quoque phthisin adhiberi utiliter *mercurium gummo-*
sū PLENCKII ³), non dubitat affirmare Cl. BOURRU ⁴).
 Alii litus mercuriales parca et prudenti manu administratos
 praeferunt. Sed ubi iam ulcere pulmones exeduntur, mer-
 curium quocunque modo adhibitum vix sine noxa ferunt.
 Tutius satiusque est ad decocta lignorum confugere, qui-
 bus non raro phthisin pulmonarem veneream depulsam vidi,
 febremque hecticam discussam. In his principem fere lo-
 cum tenet *decoctum SEPTALAE* ⁵). Reliquae phthises ex
 aliorum viscerum vitiis (§. LIII.) cum eandem paene postu-
 lent curationem, quae phthisi pulmonari accommodata est,
 ex hac ideo earum quoque curatio desumenda erit.

*una cum aliis
antivenereis
et antiphthi-
sics reme-
diis.*

*Mercurius
gummosus
PLENCK. Li-
tus mercu-
riales.
Decocta
lignorum tu-
tius reme-
dium quam
mercurialia.
Praecipue
illud SEPTA-
LAE.
Curatio
phthiseos ex
vitiis aliorum
viscerum.*

1) Methodus *Swietenia*, qualem ipse cl. auctor anno 1755. SWIETENII
 cum Cl. IOSEPHO BENVENUTO Lucensi medico per binas epi-
 stolas communicavit, est haec: „*Mercurii* usum magni facio;
 sed multa hic prudentia opus est, imprimis dum crudus da-
 tur, vel affricatur cuti. Non omnibus bene cessisse haec ten-
 tamina scio. Si *mercurius sublimatus corrosivus* solvatur
 in spiritu frumenti rectificato, hac lege, ut in singulis unciiis
 spiritus haereat medium granum, et deinde huius detur mane
 ac vespere cochlear adultis, vel ad summum duo cochlearia,
 potando simul largam copiam decocti hordei, vel alterius cu-
 iuscunque emollientis, mira efficacia observatur in lue vene-
 rea et aliis morbis difficillimis. Usus remedii tamdiu pro-
 trahitur, quamdiu aliquid de luis symptomatibus superest.
 Tuto sumitur etiam diu A pinguibus, sale vel fumo in-
 duratis, lardo imprimis abstinendum iubeo; iuscula, olera mol-
 lia, carnes paucas concedo facile. Ptisanam hordei cum quarta
 parte lactis copiosam do, vel aliud quodcunque decoctum emol-
 liens.“ Nos spiritui frumenti substituimus spiritum vini dilu-
 tum, et solutionem deinde syrupo violarum edulcandam cura-
 mus. *Ex sched. auct.*

2) *Collect. Soc. med. Havniens. Vol. I. p. 171.*

3) *Descript. histor. quorundam morbor.* Hist. XII.

4) *Pilulae mercuriales gummosae* PLECKII.

Formula pil.
PLECKII.

Rec. *Mercur. vivi* drach. j. *Gummi arabici* drachm. ij. *Terantur incicem, addito dimid. cochleari aquae in mucum; huic bene subacto add. extract. cicutae* drachm. j., *pulver. liquirit.* q. s. *M. f. pil. gr.* ij. *Dentur n. sex pro dosi mane et vesp.* Videatur nova et facilis methodus argentum vivum aegris venerea labe infectis exhibendi, quam Vindobonae ann 1776. edidit IOS. IAC. PLECK. *Ex sch. auct.*

5) Vid. MICHAELIS FRID. BOEHM. dissertatio: *Varia Syphilidis Therapia. Argentorati* 1781. §. XXI.

Form. decocti SEPTALAE.

6) *Decoctum SEPTALAE.* Rec. *Rad. sarsaparillae* minut. incis. unc. VI. *hordei excortic.* unc. IV. *Infund. per hor.* XXIV. in aq. calent. lib. XV., vase clauso. Deinde lento igne decoq., donec quinque librae consumtae sint. Tunc extrahatur sarsaparilla, et tundatur in mortario marmoreo, mox in eandem aquam immittatur, et add. *carnis vitulin. macr.* lib. ij., *sem. coriandr.* unc. j., *vel ligni sancti ras. tantundem, vel santal. citrin.* drachm. ij., et operto vase iterum decoq. lento igne, donec remaneant lib. V., et in fine aromatisentur drachm. tribus *cinnam. electi.* Colentur cum forti expressione. *Dentur summo mane unc. VI. vel VII. quatuor horis ante cibum, vesp.* autem unc. IV. vel V. ante coenam. Assumatur per quam plurimos dies, quandoque usque ad centum. LUD. SEPTAL. *Animadvers. med.* l. VII. n. 214. *Ex sch. auct.*

§. XCIII.

Curatio
phthiseos
trachealis.

Observatio-
nes curatio-
num MOR-
GAGNII.
Hist. I.

Ulcerum demum laryngis et tracheae, sive phthisis trachealis (§. LVII.), quando ab acri in laryngem illabente humore oritur (quod frequentissimum est), postulant, ut destillatio a laryngis ostio avertatur, acerbique humor emendetur, quo facilius ulcera consanescant. Hac laboranti CL. MORGAGNIUS auctor fuit ¹⁾, ut, quoad fieri magis posset, sileret, decumberet capite denisso et humiliori, in conclavi amplo, sed tepido (nam hiems erat) degeret, ventum et solem, ut praecipit HIPPOCRATES ²⁾, vitaret, lac mane e mammis mulieris sanae, optimoque victu utentis exsugeret, et pulmenta ex *ferculo SAXONIAE* sine saccharo lacti incocta in coenam sumeret, hisque praeter spem multorum eum restituit. Aliam idem cl. Vir *phthisin trachealem*, quae iam ad *pulmonarem* vergebat, cum ab herpetica et scorbutica acrimonia videretur orta et fota, curavit sequenti

Hist. II.

ratione: Quotidie dabatur pauxillum resinae terebinthinae, qua fauces pectusque non leviter iuvare affirmabat aeger. Post id diebus viginti primis (nam aestas tum erat) potabatur aqua, ut vocant lactis, in qua erant fuerantque antea anagallis aquatica, hederæ terrestris, hyperici flores et pauxillum corticis sassafras macerata, cuius aquae potio semper quinta a prandio hora etiam iterata est. Sed matutinae post dies illos XX. substituta potio est iuris viperini cum ranis et caudis fluviatilium cancrorum parati. Quo postquam uti coepit, maculae pruriginosae eruperunt, color faciei melior factus, vires auctae, corporis habitus paulo minus macilentus, rarior tussis, levior rauco, sputa pauciora fuere. Cibus erat ex solis pullis gallinaceis foeminis, qui ventre herbis supra memoratis farcto elixabantur, et ex pulte, quae ex oryza aut avena cum amygdalis conficiebatur. Potio in mensa aquae semper radice chinae et cortice sassafras quam levissime medicatae, extra mensam aquae Brandulae, quae aestivo calore et siti urgente paulo etiam largius propinabatur. Cum autem sub initium septembris adhuc tamen tussis, sputa, macies pergerent, nam macilentior post tot remedia videbatur, quam debuisset, sputa, matutina praesertim, etsi non uti olim cruenta et corrupta, tamen nondum colorem ex subflavo cinereum, saporem autem subsalsum amiserant. Tussis denique molesta adhuc erat vespertinis et matutinis horis, et paulo profundiori e loco, quam larynx est, videbatur oriri. Quare etiam atque etiam admonito aegro, ut a frigida aëris regionisque inclementia se tueretur diligentissime, lac asininum ad mensem, quo sputa ferme ad naturalem modum redierunt, deinde vaccinum, in quo ad extremum usque decembrem perseveratum est, sumendum iussit. Quibus factum est, ut sputa, tussis omniaque symptomata evanescerent, pristinusque vigor, color et habitus omnino cum integra valetudine redirent³). At non omnis phthisis trachealis, neque omne ulcus huiusmodi ita facile artis auxiliis obtemperant. Plerumque Transit

saepe in veram phthisin pulmonarem in veram phthisin pulmonarem desinunt, morteque finiuntur, aut suffocatione interimunt.

1) *Epist. anatom. med. XXII. n. 27.*

2) *De morbis lib. 2.*

3) MORGAGN. laud. *Epist. n. 31.*

§. XCIV.

Vitae regimen.

Fictus ratio.

Olera.

Pisces fluviatiles.

Quibus uti carnibus liceat.

Ferculum SAXON. quomodo et quando possit prodesse.

Demum aliquid dicendum de vitae regimine. Irritus inanisque erit quicumque medici labor, nisi causae, quae malo originem aut occasionem dedere, diligentissime arceantur, et simul recta non naturalium rerum instituatur ratio. Imprimis victum esse oportet tenuem, temperantissimum facilisque coctionis. Olera recentia et tenella, fructus maturi et non facile putrescentes, ova sorbilia, pisciculi fluviatiles lacti incocti parca et prudenti manu carnibus praeferuntur. Carnes vero, si concedi debent, sint e pullis galinaceis hordeo, oryza, aut frumento turcico, quae lacti incocta fuerint, enutritis. Sed evitanda est omnis repletio. Crassa, glutinosa, nimium nutrientia, aut nimia copia sumta, iuscula pingua, *gelatinosa*, pulmenta farinacea atque alia huiusmodi, quae vulgo, vix audito phthiseos nomine, sine delectu ut plurimum, solent in cibum dari, iure a Cl. SWIETENIO uti noxia damnantur ¹). Languente enim ventriculi actione digeri haud bene possunt, chylumque suppeditant viscidum, inertem, glutinosum, qui in sanguinem receptus pulmonem ipsum iam infarctum, aut atonia laborantem, magis magisque obstruit, aut opplet obruitque. Non tamen negaverim interdum *ferculum* SAXONIAE, polentamque ex farina frumenti turcici, sive *maïs*, aut saracenici, quod *fagopyrum* dicunt botanici, aut etiam tritici et secalis ²), unde pulcillas aqua vel lacte parant, mirifice quibusdam phthisicis profuisse; dummodo quae narrantur facta pericula, de phthisi tantum incipiente et a tenuitate nimia humorum vel acritate summa proficiscente intelligantur.

1) *Commentar. in BOERHAAV. §. 1200. n. 3. et §. 1208. n. 3.*

2) Apud *Brunsvicenses pulmentem ex farina secalina, Brunsvicen-*
aqua pura et butyro insulso coctione paratur, quod vel solum, sium pul-
vel lacti admixtum ieiuno stomacho mane per longum tempus mentum.
datur phthisicis, quos saepe, ni confirmati fuerint, levare asse-
rit LANGEUS *Miscell. verit. Fascic. I. p. 33. Ex sch. auct.*

§. XCV.

Facilius a ventriculo subiguntur cremores, non valde *Cremores*
condensati, hordei, avenae aut oryzae, neque gluten lar- *hordei, ave-*
giuntur viribus vitae non superandum. Farina etiam hor- *nae, oryzae*
dei, si clibano leviter torreatur, multum amittit glutinis, *etc. magis*
quo ventriculo reliquisque visceribus noxia esse posset. Pul- *conveniunt.*
tes ex ea in iure carnis aut lacte decocta conficiuntur, quae *Pultes fari-*
optime feruntur nutriuntque. Alii farinae eius loco panem *nae hordei*
subtiliter contritum adhibent, atque ex lacte, pauxillo sac- *torrefactae.*
chari et farinae triticeae addito, decoquunt, ut molle, iu-
cundum leveque edulium praestent. Hodie maximo in pre- *Pulmentum*
tio, praesertim apud Germanos habetur illud edulii genus, *ex sagou.*
quod *sago* aut *sagou* appellatur. Defertur ad nos ex India
orientali, diciturque esse medulla palmae cuiusdam farinife-
rae in grana quaedam conformata. De *sagou* autem iam
ann. 1645 Parisiis peculiarem habuit dissertationem IACOB.
MALLOVINIUS, tamquam *summo optimoque remedio adver-*
sus *phthisin*. In eo CL. LANGEUS ¹⁾ agnoscit *partium* *Eius vires*
lubricarum praesentiam, earumque utilitatem in pulmonum *et laudes ex*
morbis levandis constare, ac frequenti experientia evinci LANGEO.
asseverat. Praeterea concoctu, inquit, facillimum est sa-
gou, ideoque bonum lautumque praebet nutrimentum, fe-
reque totum in succum et sanguinem convertitur. Deco-
quendum autem docet cum duabus partibus aquae unaque
lactis in pulticulae modum, neque ab eiusmodi alimento
timendum esse aut glandularum aut viscerum infarctum
nullum.

1) *Miscell. verit. fasc. I. p. 109.*

§. XCVI.

His accenseri meretur aliud pulmenti genus, quod CLE- *Aliud pul-*

menti genus, quod cibum album vocat CLERICUS. RICUS vocat *cibum album* *), quodque magnis laudibus extollit. Principem foeminam, quae ex haemoptysi in phthisin confirmatam inciderat, lactis, quo diu alta fuerat, tandem fastidio captam, solo hoc pulmento tres menses cum dimidio adhibito, atque hinc pruriginosis pustulis universo corpore erumpentibus, feliciter a se curatam ipse gloriatur ¹). Sed longum esset omnia, quae alimenti et medicamenti simul loco ab auctoribus laudantur, sumique utiliter interdum ab aegrotantibus possunt, singillatim persequi. His igitur missis, ad reliqua diaetae praecepta progrediar. Vinum, dum lacte utuntur, interdicendum est. Coena levissima esto. Mature cubitum petant. Somnum nimium, non secus ac nimias vigilias vitent, exerceantur moderate, atque venerem omnino fugiant. Aëris demum exercitationisque prudens fiat delectus. Pessimum enim coelum, in quo morbus exorsus est. Aër temperatissimus eligatur, et, si fieri possit, campester; hic enim purior est, quia vegetabilia putridum aut phlogisticatum, ut vocant, aërem mirifice defaecare dicuntur. Neque cuique eadem motus atque exercitii mensura convenit, neque omnibus, ut fere consuevit, equitatio aut vectio imperanda est, sed iis solum, qui solidarum partium atonia laborant, et fluidarum crudo inertique muco obruuntur, neque adhuc ad phthisin *confirmatam* ²) pervenerint. Navigatio plerisque vel infirmioribus accommodatior est. CICERO ipse ³), ut phthisin, in quam eum proniorem natura fecerat, a se averteret, longa navigatione usus est. PLINIUS vero iunior non frustra suasit liberto haemoptysi obnoxio, ut in Aegyptum navi proficisceretur. Sed quid veterum exempla memorem in tanta nostrorum et paene domesticorum frequentia? Unum addam, aegros in regiones hieme temperatissimas, ut Neapolitana et Pisana est, transferendos esse, ut ibi hiemale tempus transigant.

1) CLERC *Histoir. naturelle de l'homme* T. II. p. 33.

2) Ita etiam observavit RAULINIUS loco supra (§. LXXXII.) laudato

3) *De cluris Oratoribus.*

*) *Alba comestio.* Sumito carnem albam caponis aut gal- *Confectio*
linae assatae sine pelle et pinguedine, semunciam amygdala- *albae come-*
rum dulcium mundatarum, quatuor amygdalas amaras, sex *stionis* CLE-
drachmas seminum papaveris albi, et omnia contundito in RIGI.
mortario marmoreo, ut redigantur in pastam, quam humecta-
bis subinde et paulatim affusis duabus libris lactis recentis.
Deinde in linteum excepta exprimantur, ut emulsum habeatur,
in quo dissolves semunciam aut sex drachmas farinae oryzae.
Admoveatur huiusmodi mixtum igni leni, semper miscendo,
ne coniburatur, donec cremoris formam acquirat. Adice sac-
chari rosacei vel violacei quantum satis ad aegrotantis volupta-
tem. Remoto deinde ab igne vase, addi potest aqua florum
aurantii, aut totius citri, alteriusve aromaticae. Ex hoc pul-
mento potest aeger ter vel quater in die congruam quanti-
tatem assumere.

Conferantur *Phthisiologia* RICHARD. MORTON., *Theatrum*
tabidor. BENETI, RAULINII *Observat. de médecine*, DUPRE'
DE LISLE *De la phthisie pulmonaire etc.*

CAPUT IV.

DE PULMONUM PECTORISQUE INFLAM-
MATIONIBUS ATQUE ALIIS AFFINI-
BUS AUT SUCCEDENTIBUS MORBIS.

§. XCVII.

Pulmonum inflammatio duplex est, altera περιπνευμονία, ¹⁾ Utriusque
πλευρίτις altera. Hae, mea quidem sententia, non sedis differentia
versitate, non natura differunt, sed symptomatum tantum a symptomatibus tantum
ratione. Id anatome, ratione atque auctoritate celeberrimo peti potest,
rum scriptorum videtur potissimum comprobari. Neque me non vero a
ab hac sententia deficiunt ea, quae alios probe novi contra sedis natura.
afferre solitos esse. Neque quidquam me movent loca quae Vera HIPPO-
dam ex spuris operibus HIPPOCRATIS a viris alioquin do-
ctissimis contra huiusmodi opinionem prolata, cum idem CRATIS sen-
auctor in germano libro de locis in homine ²⁾ scriptum tentia.

reliquerit, *utraque pulmonis parte inflammata fieri peripneumoniam*, si vero altera tantum pars inflammetur, *pleuritidem esse*.

1) *Peripneumonia, peripleumonia, pneumonia etc. pneumonia synonyma sunt.*

2) *Num. 24.*

§. XCVIII.

Peripneumoniae etymologia.

Eiusdem signa diagnostica.

Peripneumonia, si etymon tantum spectetur, inflammationem pulmones circum ambientem significat. Sed si laxiori sensu sumatur, ut plerisque hodie mos est, eam *pulmonum inflammationem* complectitur, quae acuti et pungentis doloris expers sit, aut si quem inferat, obscurus hic, aut omnino profundus, potiusque gravans percipiatur. Notae eius praecipuae sunt hae: febris acuta continua, quam plerumque rigor praeivit, ingens respirationis difficultas, paene suffocans, cum aegros saepe cogat erecta cervice spiritum ducere, creber et calidus anhelitus, tussis primum sicca cum expuitione pauca, spumosa, tenui, cruda, flavente, aut sanguine tincta, deinde humida cum uberiori et faciliiori materiae magis crassae et coctae excretionem, praecordiorum totiusque pectoris pondus, gravitas ac distentio, nullus dolor, aut qualis descriptus modo est, atque ad sternum ut plurimum et spinam propensus, imo tunc solum saepe se prodens, cum tussis vehementius concutit pectus. Praeterea genae tument rubentque, subinde igneo quasi fervore incalescunt, temporum et colli venae turgent, oculi protuberant, caput dolet, lingua arescit, et primum flavo quodam colore inficitur, postea viscido obducitur muco, nigricat demum, et quandoque in sulcos dehiscit. His accedunt cibi fastidia, frigidi potus atque aëris desiderium, pulsus plerumque magnus, interdum undosus et mollis, saepe vero durus et vehemens (quidquid alii ex hypothesi, nulla experientia suffulti, contra docuerint), quandoque dicrotus aut intermittens, vel parvus et celer, decubitus in dorsum commodior, in latera vix possibilis ob maius suffocationis peri-

culum, virium languor, urinae modo tenues et aquosae, modo rubrae, crassae et subiugales.

§. XCIX.

Si gravius malum est, aut in deterius ruit, spiritus *Symptomata*
aegerrime trahitur, continua vexat vigilia, aut soporosus *graviora.*
somnia, licet brevissimus, obrepit, mens aberrat, sputum
admodum cruentum ac floridum extussitur, quod demum
repente suppressitur, intus ebullit et strepit, extrema fri-
gent, labia unguisque livent, frons et collum frigido su-
dore madent, animi defectiones instant, oculi languent, illa-
crymant et quasi velo obtenebrantur, nares pulverulentae
fiunt, et pinnis diductis moventur, pulsus obscuri, verni-
culares, formicantes, aliaque teterrima symptomata agmen
claudunt.

§. C.

Similia propemodum patitur is, qui *pleuritide* corre- *Pleuritis et*
ptus fuerit. Nam a GALENI usque temporibus ¹⁾ haec in *cuius notae.*
pleuritide concurrere crediderunt, febrem acutam continuam,
difficilem respirationem, tussim molestant, sputum crudeum,
interdum cruentum, aut striis sanguineis variegatum, pul-
sum durum et *serratum*, et dolorem non profundum nec
obtusum, uti in peripneumonia, sed acutiorem et saepe pun-
gentem in aliqua thoracis parte, aut in alterutro latere,
quavis inspiratione et tussis concussione ita exacerbantem,
ut inspirationem et tussim aegrotantes prae dolore cohibere
cogantur. Qui dolor modo febrim antecedit, modo subse-
quitur, prout nimirum *pleuritis* primaria est, aut secunda-
ria. Hinc *pleuritidis* peculiaria symptomata, quibus, si mi-
nus definiiri, describi certe potest, a CULLENIO sic enume-
rantur: *pyrexia, dolor lateris pungens, inspiratio dolens,*
decubitus plerumque in latus affectum molestus, tussis *Pathogno-*
dolentissima, initio sicca, postea humida, saepe cruenta ²⁾. *monicum si-*
Dolor ergo vehementior et semper praesens differentiam, si *gnum dolor*
nullam, facit inter *peripneumoniam* et *pleuritidem*. *acutus et*
vehemens.

1) RIVERIUS *Prax. med. lib. VII. cap. 3.*

2) *Gen. morb. Ord. II. Phlegmas. gen. 12.*

§. CI.

*De sede
pleuritidis
dissensus.*

*Pleura non
est sedes do-
loris acutio-
ris in pleu-
ritide.*

*Unde atro-
citas doloris
oriatur, pro-
babilior con-
iectura.*

*Vana hypo-
thesis, bron-
chiale in
pleuritide, in
bronchiale
peripneumo-
nia vero pul-
monarem ar-
teriam magis
inflammari.*

Pleuritis tamen lateris aut pleurae costas succingentis inflammatio habita a plerisque fuit, ut eam a *peripneumonia*, quam in pulmonibus inflammatis locabant, apposite distinguerent. Alii vero, cum utramque *pulmonum* esse morbum dissectione cadaverum ¹⁾ cognovissent, causam quaerentes, cur in altera dolor nullus aut obscurus tantum esset, in altera vero atrocissimus saeviret, sibi eam visi sunt convenisse in loci affecti diversitate. In exteriori enim pulmonis ambitu, quem a *pleurae* involucro sensibiliorem putabant, *pleuritidem* collocandam duxerunt ²⁾, *peripneumoniā* vero in interioribus pulmonum recessibus, quos obtusiori sensu praeditos ob pleurae ibidem defectum credebant. Verum nec *pleura* tanti doloris sedes esse potest, cum paucos aut nullos nervos habeat, nec a pleura ideo pulmo sensibilior est, neque interiores eius partes, quas nervi copiosius perreptant, obtusiori sensu donantur. Discrimen igitur omne inter *peripneumoniā* et *pleuritidem* cum doloris atrocitas faciat, verosimillimum cum MICHAELE SARCONE arbitramur, in illa plerasque pulmonum partes minus sentientes lentiusque ab inflammationis causa affici, in hac vero aliquam ex illis, quae exquisitiori sensu donantur, nervisque insignioribus instruuntur, quales interiores esse videntur, aut proximius vehementiusque ab acri inflammatorio nervos ipsos attingi et vexari. Quid ergo opus est, ut nonnullis placet, sibi confugere, in *pleuritide* arteriam bronchiale magis, in *peripneumonia pulmonarem* potius inflammatione tentari? An ita distinctae sunt harum artiarum distributiones, ut sciunctim procedant? ut nullibi inter se communicent? ut nullibi sibi mutuo iungantur?

1) Vid. ZECCH. *l. II. de corp. human. structur.*, atque *Append. consult. med.* 26., LINDESTOLP *de scenen. p.* 314., quibus accedit MORGAGNIUS cum plerisque recentiorum.

2) Invictissima vero argumenta, quibus demonstratur, *pul-*

monem esse pleuritidis sedem, legantur apud TISSOTIUM in Epistola ad Cl. HIRTZELIUM pag. 28. et seqq., Ex sch. auct.

§. CII.

Non tamen inde inficiamur, *pleuram* interdum rubescere, *Pleurae inflammatio.* et quaquaversum inflamniari, quod sane ex innumeris cadaverum sectionibus comprobari facile potest; sed solum contendimus, eam ob fere nullum, aut plane modicum, quod donatur, sensum tanto dolori excitando, quantus in pleuritidis (§. XCVIII.) esse consuevit, ineptam prorsus esse, nec tantam spirandi difficultatem, nec tussim, nec sputum copiosum et cruentum efficere posse, nisi simul pulmo aut nervi per posteriora cellularia spatia decurrentes, aut musculi intercostales una afficiantur. *Inepta per se acutissimo pleuritico dolori excitando.* Compertum enim est iteratis observationibus, quando *pleura* sola inflammatione corripitur, nec dolorem adeo acutum esse, nec inspiratione (quia inspirando ipsa potius laxatur) exacerbari, nec tussim adeo frequentem et molestam excitari, imo saepe eam abesse ¹). Imo non desunt cadaverum sectiones a viris celebrioribus institutae, ex quibus patuit, inflamniatam quidem *pleuram* fuisse, quin tamen ullum dolorem questi fuerint aegrotantes ²). *Inflammatio pleurae absque dolore.* Hanc *pleurae* inflammationem multi cum veterum, *An haec verum nuperiorum aperte docent, veram proprie pleuritidem pleuritis.* esse, quod *pleurae*, a qua nomen eam accipere arbitrantur, reapse insideat. Rarissimum esse morbum ultro quidem fatentur, neque mirum videri aiunt, si sectio cadaverum ostenderit, raro in *pleuritide* *pleuram* inflamniatam reperiri. At in *pleuritide* hac cunctane *pleuritidi* propria symptomata (§. XCVIII.) occurrunt? An tanta doloris acerbitas, an tanta spiritus difficultas, an tussis sanguinisque exspuitio, ut vera *pleuritis*, qualem clinici describunt (§. C.), dici possit?

1) ZEVIAN. *Della parapleuritide cap. III. p. 30. 31.*

2) FRID. MEDICUS *Collect. observat. med. T. I.*

§. CIII.

Interdum *mediastinum* seorsum inflammationi subiicitur, morbusque *pleuritidis* instar affligit. *Mediastini inflammatio.* Eo inflamniato,

*eiusque
symptomata.*

*Signa eius-
dem a P.
SALIO DI-
VERSO de-
prompta.*

*Pericardii
et cordis in-
flammati-
o eiusque si-
gna.*

*Interdum a
pulmone ad
reliquas par-
tes, et ab his
ad pulmonem
inflammatio
propagatur.*

plerique affirmant dolorem cum reliquis pleuritidis sympto-
matibus (§. XCVIII.) mediani fere atque anteriorem pecto-
ris regionem excruciare, si videlicet anterior *mediastini* pars,
qua sterno adnectitur, inflammatione correpta sit, postero-
rem vero, si posterior spinaeque proxima, vel utrumque
locum, si utraque pars afficiatur. PETRUS vero SALIUS DI-
VERSUS ¹), qui in huiusce morbi signa plurimum inquisivit,
animadvertit, *angustiam et offendiculum quoddam ad ster-
num*, dum aegri inspirant, *potius percipi, quam dolorem*
(quod sane exiguae mediastini sensibilitati rite respondet),
atque *ubi dolor* reapse affligit, neque insignem, neque ve-
hementem esse, *spirationem vero frequentem admodum et
celerem*, non tamen difficilem aut anhelosam. Praeterea as-
serit, se vidisse, eiusmodi aegros *febri acuta detineri*, ad
quam accedebat magna iactatio atque ingens sitis et *cetera,*
*quae febres ardentes comitari solent, in thorace maximum
incendium* conqueri, *unde et frigidum aërem inspirare de-
siderarent, et calidum spiritum resflarent*, tussi omnes ve-
xari, sicca in principio plerumque, deinde humida, qua
excernebantur *colorata*, vel *rubra*, vel *flava*, *plurima flavi
coloris, paucissima rubri*, pulsumque eos prae se ferre,
qualis pleuriticorum esse solet. Remque peculiari obser-
vatione cuiusdam aegrotantis, cuius sectionem affert, illu-
stravit, addens, syncopen tum concurrere, cum *inflamma-
tio mediastini* ad pericardium se diffuderit. *Pericardium*
etiam, imo *cor ipsum* per se et seiunctim inflammatur in-
terdum. Quod ubi incidit, praeter dolorem et anxietatem,
aeger patitur frequentes lipothymias atque ingentes aestua-
tiones, febrem acutissimam, sitim ardentem, imo ardentio-
rem, quam in pleuritide et peripneumonia ²). Pulsus sunt
vehementes, celerrimi, inaequales et quandoque intermit-
tentes ³). Neque rarum est, *pulmonum inflammationem*
ob partium contiguitatem aut connexionem ad *pleuram,*
diaphragma, mediastinum, pericardium atque ad *cor* pro-
pagari; et contra ab his ad pulmones protendi, et pro lo-
corum et partium, quae afficiuntur, ratione magnam dolo-

ris atrocitatem, tussim assiduam ac vehementem, orthopnoeam, delirium, singultum, convulsionem, miras pulsum perturbationes summamque anxietatem subsequi. Id mali genus, quando tot partes simul occupantur, a quibusdam appellatur *pleuro-peripneumonia* ⁴⁾, sensu nimirum latiori, quam passim (§. CXII.) hoc nomen accipi soleat. *Tunc pleuro-peripneumonia a nonnullis dicta.*

1) *De affect. particular. cap. VI.*

2) *Ibid.*

3) RIOLAN. *Enchirid. anatom. med. l. 3. p. 206.*

4) HALLERUS *Opusc. patholog. obs. 13.* MORGAGNIUS *de sedib. et causs. morb. epist. anat. med. XX. et XXI.* HAENIUS *Ratio medendi.*

§. CIV.

Etsi autem multa cum peripneumonia communia habeat *pleuritis*, in hac tamen, ut supra dictum est, acutus et lancinans dolor urget, imprimis si sinistrum latus laboret, isque modo sursum ad iugulum, modo ad claviculam, modo ad omoplatam, modo deorsum ad praecordia sive hypochondria procurrit, modo in utroque latere sedem figit. Interdum tunc solum se exserit, cum aeger in dextrum vel sinistrum latus reclinatus fortiter inspirare aut tussire iubeatur. Eum enim ut inspiratio et tussis praesentem adauget, sic abditum et latentem excitat detegitque. Quando id evenit, *occultam* dicunt *pleuritidem*. Causa vero, cur dolor ad varia loca percipitur aut propagatur, secundum HIPPOCRATIS mentem in *Coacis praenotionibus* ¹⁾ hisce verbis assertur: Quibus ad unam claviculam dolor subit, iis una superior pulmonis ala laborat; quibus vero ad ambas claviculas dolor extenditur, ambae superiores pulmonis alae laborant; quibus ad mediam costam, media; quibus vero, ad quam partem pulmo extenditur, dolor permeat, inferna ala laborat; quibus una tota ala laborat, quae ei parti respondent, omnia aegrotant. *Signa pleuritidis reliqua.*
Varia doloris ratio.
Causae varietatum doloris ab HIPPOCRATE assignatae.

1) N. 400. et alibi.

§. CV.

Alia symptomata explicantur.

In ipsa febris accessione, quam saepe horror et rigor antecedit, subsequiturque calor et sitis, quandoque vomitus aut vomendi conatus infestat, atque urinae tenues, multae, postea paucae luturae et rubrae redduntur. Respiratio est frequens et parva, imo difficilis, sed non semper ita, uti in

Cur difficilis in latus sanum decubitus.

peripneumonia. Difficilis quoque ut plurimum in sanum latus decubitus; tunc enim difficilior redditur inspiratio, incrementum tussis atque anxietas, et saepe etiam dolor recrudescit. Quod facile explicatu est. Pulmo enim inflammatione affectus tumet et distenditur, et ob congestionem solidior graviorque est. Si in sanum latus reclinatur, mediastinum urget, impellit contra pulmonem liberum, eum comprimit, coarctat, irritat, sic ut respirationi minus inservire possit. Hinc difficilior sanguinis per pulmones traectio, a qua tussis atque anxietatis augmentum. Quando vero dolor simul inualescit in huiusmodi decubitu, probabile est, id evenire ob aliquam pulmonis cum ipsa pleura adhaesionem, pondere enim suo pulmo, dum ad latus sanum reclinatur, qua pleurae adhaeret, distractus et quasi discerptus magis etiam doleat oportet, eoque vehementius, si pleura et musculi intercostales, quibuscum concrevit, inflammatione una affecti sint. Pulsus vero, ut supra posui, plerumque durus et serratus est, nunc magnus et vehemens, nunc parvus, debilis et inaequalis, nunc etiam mollis, undosus et bis feriens.

Pulsuum natura.

§. CVI.

Sputorum varietas secundum varios morbi gradus.

Initio vel nihil, vel tenuis tantum pituita, vel crassum quid et tenax et rotundum extussitur, sanguine tamen plerumque tinctum. Procedente morbo sputum facilius et copiosius educitur, atque ex liquido crassius, ex cruento albidius fieri incipit. In stadio, cui *status* nomen est, concoctum, album, aequale, levans evadit. In declinatione denique dolor, febris, tussis et spirandi difficultas sensim evanescent, signis coctionis in omnibus excretis apparentibus.

Quando pleuritis in

Contra vero si inflammatio (nequidquam natura atque arte

reluctantibus) ingravescat, latiusque pulmones occupet, aut *peripneumonia* ex pleura et latere thoracis, quo insederit, ad pulmones *transire* metastasi feratur, tunc *pleuritis* in *peripneumonia* migrare *dicatur*. Infarctis enim glutine inflammatorio pulmonibus, *Pessini congestionis effectus*. Plerumque non solum dolor sensu quodammodo obruto ac retuso se remittit, et respiratio brevis, sublimis, orthopnoica evadit, pectus opprimitur ac ebullit et stertit, verum etiam sanguis in ventriculo auriculaque cordis dextra et venae cavae trunco resitare et congeri coactus obicem refluenti ex quacunque pectoris plaga humori opponit. Vi autem cordis in vasa pulmonaria sic oppressa adactus ea dilatat, ex poris inorganicis aut ex lateralibus vasis mucosum gluten exprimit, loca omnia obstruit ac replet, unde vesiculae aëreae compressae nec dilatari possunt, nec circuitum per pulmones adjuvare et promovere. Hinc interrupto vitali sanguinis circuitu vitam subita suffocatio et mors excipit, antequam suppuratio aut gangraena consequatur. Praeterea in tanta pectoris anxietate et viarum interceptione mucosus humor undique per exhalantia vascula copiosius exstillat, non vero ab absorbentibus recipi potest, cum plenissima sint; *Post mortem circa praecordia concretiones*. quo fit, ut circa pulmones, mediastinum, pleuram, pericardium et cor collectus, frigefacto post mortem cadavere, concreseat, et dissectoribus deinde sub muci cuiusdam puriformis specie, quo partes illae plus minus obducuntur, sese exhibeat. Imo quandoque ob circuitum sanguinis sic retardatum, et quasi cohibitum serosa eius pars a reliquis secedens in cavum thoracis exsudat, hydrothoracem ¹⁾ peripneumoniae adiiciens (*hydropneumonia* vocant), et pressis undique iam laborantibus organis spiritum et vitam elidit. Quod ubi evenit, urinae parcius fluunt aut supprimuntur, inexpectata supervenit anxietas atque tanta spirandi difficultas, quae intra paucas horas suffocet aegrotantem. Quod vero ad sanguinem e vena eductum attinet, is tam in *pleuritide*, quam in *peripneumonia* postquam refrixit, concrescit in massam duram, cohaerentem et paucio sero circumdatam. Plerumque si non in prima venae sectione, sane in altera *Crusta san-*

guinis inflammatoria.

aut tertia ad summam superficiem apparet mucosa albida quaedam crusta, quam vocant *inflammatoriam*, interdum ita coriacea, compacta et concreta, ut vix dividi aut pertundi possit, et in medio concava, circum retorta sursum et reflexa videatur. Interdum non alba est, sed flava et subviridis; interdum coccinea, aut ex albo et coccineo colore permixtis coalita. Rubent quoque malae rosea quadam macula, et multo frequentius ex eo latere, in quo inflam-

Malarum rubor.

Linguae albedo et asperitas.

matus pulmo est. Nec linguae inspectio est negligenda; nam praeter siccitatem et sitim, quae acutos morbos comitari solet, eius albedo et asperitas animadversionem meren-

Hippocratis aphorismi.

tur. In *Hippocraticis* quippe oraculis scriptum est: *In pulmonis inflammatione, si lingua tota alba fiat et áspera, ambae pulmonis partes inflammatione vexantur; quibus vero dimidiata lingua, qua parte id apparet, inflammatio affligit* ¹).

1) COACAR. n. 400.

2) STÖRCKIUS, MONROUS, SCHÖLLINGERUS et ZIMMERMANUS (*Tom. II. p. 31.*) tradunt, saepe *peripneumoniae* accedere *hydrothoracem*, et vicissim huic *peripneumoniam*. *Exsch. auct.*

§. CVII.

Causae remotae peripneumoniae et pleuritidis.

Causae, quae utramque (§. XCVII.) gignunt, sunt illae ipsae a nobis alias recensitae, a quibus reliquae oriuntur inflammationes; sed imprimis vehemens corporis, pectoris pulmonumque exercitatio, tempestate potissimum rigente aut aestuante, aut aëre ventis exagitato, potus frigidissimus excalesfacto corpori ingestus, repentinae austrinarum constitutionum in boreales mutationes, catarrhi et rheumata graviora neglecta, hiemale et vernale tempus ¹), venenati, caustici, adstringentis, coagulantis vel cuiusvis incogniti principii acris, miasmatis, vaporis, halitus inspiratio aut ingestio, metastases, morbificae materiae, morbi pectoris praegressi tum acuti, tum chronici, phthisis, asthma, hydrothorax, respiratio diutius compressa aut cohibita, prava thoracis et pulmonum constitutio, ac demum peculiaris sanguinis

diathesis, quam inflammatoriam vocant, licet haec quandoque non causa, sed inflammationis effectus esse possit.

1) *Vernales et hiemales* multum inter se differre, pluribus demonstratur in *Comm. de reb. in Sc. nat. et Med. gest. Vol. VII. P. I. p. 155. Videsis. Ex sch. auct.*

§. CVIII.

Peripneumonia et pleuritis, quas hactenus descripsimus, *Peripneumonia et pleuritis vera.*
rae, exquisitae et legitimae appellantur. Exstant vero etiam *Notha sive spuria.*
nothae sive *spuriae*, ex eo ita nuncupatae, quod nec gradu, nec symptomatum numero illarum adaequent gravitatem. Interdum tenuis et acer humor, sive lymphæ tenuis et acris confertim in pulmones illabitur, et catarrhi instar ardorem præter naturam excitat, aestum et febrim inferens. Tunc et tussi et spirandi difficultate et lenta febre conficitur aeger sine cruenta exspuitione, sine abscessu aut ulcere. Hanc cum veterum plerisque *peripneumoniam spuriam* esse tradit NICO-
 LAUS PISO ¹⁾, ab *exquisita* sive *vera* tum ratione causae, tum symptomatum medioeritate plane diversam. *Peripneumonia spuria veterum.*

1) *De cognoscend. et curand. morb.*

§. CIX.

Est alia *peripneumoniae nothae* sive *spuriae species*, *Peripneumoniae nothae species, pituitosae dictae.*
 quam cum RIVERO ¹⁾ et SENNERTO ²⁾ *pituitosam* licet appellare, quia a crassa, viscida et lenta pituita in pulmones ruente, eosque inferciente videtur oriri. Senes verno ut plurimum tempore corripit frigidos, pituitosos, vino de-
 ditos, aëremque palustrem incolentes, cachecticos praesertim, qui hieme minori perspiratione usi sunt. Haec exor-
 ditur a tussi catarrhali, non tamen assidua, raucedine, frigore et calore se mutuo excipientibus, febre quidem manifesta, sed mitiori leniorique, quam in *peripneumonia vera* esse solet. Pectoris oppressio, pondus, obscurus et gravis
 titivus dolor, sputum album, viscidum, spumosum, raro cruore
 conspersum, pulsus mollis, non valde creber, saepe parvus *Quinam magis ei obnoxii.*
Eiusdem notae.

et debilis, sitis exigua, lingua muco albo obducta sunt eius reliqua symptomata, quibus plerumque adiungitur soporo-

Peripneumonia notha
SYDENHAMII.

sus somnus. Hanc credo observatam esse a SYDENHAMIO ³⁾, seduloque sub *peripneumoniae nothae* nomine descriptam. Sed ipse animadvertit monetque, aegrotantem in ea vertigine etiam tentari, caput ei inter tussendum dissilire videri, doloribus toto pectore passim vexari, vomitu omnia, quae libuntur, reiicere, et sanguinem e vena missum crusta pleuritica contegi. *Peripneumoniae nothae* nomen a BOERHAAVIO ei quoque tribuitur pulmonum infarctui, qui plerumque morborum finis esse consuevit, mortemque communiter antecedit. At SYDENHAMII ut incertum et dubium morbum reiicit LIEUTAUDIUS ⁴⁾, et BOERHAAVII opinioni non subscribit, nemini, ubi occasio tulerit, parcere solitus.

Alia BOERHAAVII.

Utraque a
LIEUTAUDIO
reiecta.

1) *Prax. med. Cent. I. Obs. 98.*

2) *Pract. l. II. P. II. cap. 16.*

3) *Obs. circa morb. acut. Hist. Sect. VI. cap. 4.*

4) *Synops. T. I.*

§. CX.

Pleuritis vera et spuria quorundam.

Qui *pleuritidem* in pleurae et lateris inflammatione (§. CI.) consistere docent, hi ¹⁾ *veram* repetunt a pleura et musculis intercostalibus externis inflammatis, *spuriam* vero habent eam, quae a musculis intercostalibus externis inflammatione correptis pendeat. Verum tanta est earum partium propinquitas et connexio, ut vix seorsum inflammari possint, aut certe si id acciderit, non facile singularum morbus distinguui. *Pleuritidem* igitur *notham* vocabimus eam inflammationem, quae latus ipsum occupat, musculos imprimis intercostales eorumque involucra; neque multum interest quac-

Pleuritis notha qualis auctori.

Diagnosis.

Decubitus difficilis. Externus tumor.

rere, an simul pleura ipsa, quod probabile est et interdum accidit, afficiatur. A *vera* enim *pleuritide* (§. XCVIII. ad §. CVIII.) longissime abest *spuria* haec, quod in hac dolor tactu pressioneque ingravescit, aeger in latus affectum ob doloris incrementum nequit decumbere, commodius in sanum convertitur, interdum exteriora tument, calent, et

non

non raro ruborem etiam aliquem exhibent. Febris et spi- *Febris ratio.*
 randi difficultas minor est, quam in pleuritide vera, neque *Respiratio*
 pulsus adeo durus est et *serratus*. Tussis vel nulla, vel *qualis.*
 exigua et sicca, nisi una concurrat pulmonum labes, esse *Tussis quae.*
 consuevit. Imo ZEVIANUS *tussim et sputum abesse a pleu-* *Interdum*
ritide pleuram occupante affirmat ²⁾, quod ego quoque *nulla tussis.*
 non semel observavi.

1) Inter hos primi veniunt RIVERIUS, LOMMIUS, NICOLAUS PISO et SENNERTUS.

2) *L. cit.*

§. CXI.

Quibusdam ¹⁾ *pleuritis notha* est etiam *dolor lateris* *Aliae pleuri-*
rheumaticus, quem plerumque aliarum partium, ut cervicis *tidis spuriae*
 scapularumque, dolores vagi antecedunt, nullaue, aut certe *species.*
 exigua atque ex lymphaticarum genere febris adesse solet. *Rheumatica.*
 Dolor hic pressione, inspiratione profundiori et trunci mo-
 tibus recrudescit quidem et crescit, non tamen tussim mo-
 vet, nisi cum tussi catarrhalis morbus copuletur, aut tus-
 sim siccam movet tantum, et sine sanguinis sputo. Quo *Scorbutica,*
 spectant *dolores laterales scorbutici, venerei, aut hypo-* *venerea, hy-*
chondriaci, aut flatulenti, sub costis spuriis defixi, qui febre *pochondria-*
ca, flatulenta.
 carent, et saepe vagi ac incertae sunt sedis. Iluc quoque *Gastrica.*
 refertur illa lateris affectio, sive *notha pleuritis*, quae ex
 cruditatibus primarum viarum, cibis crassis et pituitosis, fun-
 gis, bulbis aliisque similibus, ventriculum et intestina irri-
 tantibus, ac per consensum loca superiora afficientibus ori-
 untur ²⁾. *Pleuritis* quoque *verminosa*, nempe a vermibus *Verminosa.*
 orta, huc spectat, quae profundius hypochondria excruciat,
 sympathiceque pectus, et quandoque pulmones affligit. Nec
 desunt, qui *pleuritidem spuriam* vocant quemcunque dolo-
 rem, qui costas spurias tenet divexatque; quia illuc neque
 pleura, neque pulmo perveniunt.

1) Haec est *pleuritis notha* PLATNERI, LIEUTAUDII alio-
 rumque.

2) Vid. NIC. PISO *de cognosc. et curand. morb. lib. II.*
p. 186.

§. CXII.

*Pleuroperi-
pneumonia*
BARONII.

*Pleuritidis
differentiae.*

*Sicca et hu-
mida iuxta*
HIPPOCRA-
TEM.

*Primaria,
secundaria
et sympto-
matica.*

*Quae secun-
dariae.*

*Biliosa pleu-
ritis inter-
dum prima-
ria est.*

Eius signa a
GUIDETTIO
descripta.

Fieri etiam potest, ut *pleuritis* (§. CX. CXI.) cum ipsa peripneumonia tum a principio, tum in progressu coniungatur, conficiatque morbum, quem VINCENTIUS BARONIUS ¹⁾ speciatim et pressius *pleuroperipneumoniam* vocavit. *Pleuritis* porro ratione loci, quem dolor tenet, dividitur in *ascendentem* et *descendentem* ²⁾, item in *posterio-rem* sive *dorsalem* ³⁾ et *anteriorem*. HIPPOCRATES ⁴⁾ aliam etiam proponit pleuritidis differentiam, qua in *siccam* et *humidam* distinguitur. *Pleuritis* praeterea aeque ac *peripneumonia* vel est *primaria*, vel *secundaria*, vel *symptomatica*. In secundariis aut symptomaticis principes sunt *putridae*, *biliosae* ⁵⁾, *gastricae*, *arthriticae*, *phthisicae*, *exanthematicae* ⁶⁾, *miliares*, *variolosae*, *morbillosae*, *ardentes*, *convulsivae*, *catarrhales* ⁷⁾, *periodicae*, *metastaticae*, *hydrothoracicae*, *lacteae*, *lochiales* et sic porro. Quamquam vero ex his, quae *biliosae* dicuntur, ut plurimum sint *secundariae* et *symptomaticae*, interdum tamen *primariae* sunt, et cum ipsa febre incipiunt. Talem descriptam legere est apud CL. GUIDETTIIUM ⁸⁾, qui animadvertit, in eiusmodi *biliosis pleuritidibus* dolores fuisse vagos, tusses siccas et molestas cum pauco sputo seroso, vel subflavo, vel subcruento et spumoso, difficillime et nonnisi per magnum tussiendi conatum eiiciendo, pulsus valde celeres et frequentes, calorem intensum, genarum ruborem roseum, anxietatem vehementem, sitim permolestam, vigilias et iactationes assiduas. Sanguis in his missus semel iterumque eleganter rubellus remanebat, et aegri post sanguinis missionem in deterius ruebant. Quinta autem peribant. Non secta vena, septimo, nono aut undecimo moriebantur. Sola emesis remedio erat. Hiems frigida praecesserat, et ver austrinum successerat. *Erysipelatodes* fuisse auctor laudatus arbitratur ⁹⁾.

1) *De pleuroperipneumonia etc.*, HUXHAMIIUS *de pleuride etc.* p. 305. DEPLAIGNE *Recueil d'observations de médecine etc.* Juillet 1757. T. 7. p. 168.

2) HIPPOCR. *II. acutor.*

3) *Id. III. de morb.*

4) *Id. I. acutor.*

5) *De pleuritide et peripneumonia biliosa* vid. TISSOT. *Epist. ad ZIMMERMANNUM, MORGAGNIUM de sed., et caus. morbor., MANETTI consulto con annotaz. e giuu.; ANGELUM GALLI adversaria medica; DALLARMUM saggi di med. pratic., ALOYSIUM saggi di med. pratic.; ALOYSIUM TARGIONIUM gazetta salutar. n. 12. 13. 14. etc. a. 1783. praeter BAGLIVIUM, LANCISIUM, SYDENHAMIUM, laudatum GUIDETTIUM aliosque bene multos. Ex sch. auct.*

6) *De secundariis exanthematicis* suis locis noster auctor opportune disserit. Videsis *de morbillosa Vol. II. §§. 135. 146. De variolosa ibid. §§. 249. 254. 276. etc.* Item *de miliari* nonnulla *eod. vol. §§. 403. 405. 408.* Omnia huc transferre licet, utpote *primariae* etiam accommodata. *Editor.*

7) Vid. *Vol. I. de Febr. §§. 346. 356.* et alibi, ubi de *intermittentibus* eodem volumine sermo est.

8) *De pleuritide biliosa dissertat. II.*

9) *Id. ibid.* Vide etiam DEPLAIGNIUM *l. c.,* a quo tum symptomata, tum curatio morbi describuntur. *Ex sch. auct.*

§. CXIII.

Aliae item dici possunt *benignae*, aliae *malignae*, prout signis malignitatis carent aut stipantur. Ad malignas referuntur peripneumoniae genus, quam ob celerem in gangraenam transitum *gangraenosam* ¹⁾ vocant. Plerumque epidemica est, interdum uni tantum hominum generi, aut loco, aut domui, aut coenobio peculiari infesta, et saepissime lethalis. Haec a miasmate venenato, aut putrido, aut a caustico quodam acri et siderante principio, pulmonibus inspirato ac adhaerente, aut sanguini primum infuso, et postea per febrim moto, et ad pulmones delato, quod eos celerrime sensibilitate atque irritabilitate exuit, oriri videtur. Saepe a bile corrupta, aut a primis viis adeo infestum et necroticum principium suppeditatur. Sed plerumque tunc *symptoma* est febris *gastricae* aut *biliosae*. Aegri ea correpti queruntur de immenso pectoris pondere, difficillime respirant, tussunt, plerumque nihil exspuunt, aut tantum biliosa, sincera, admodum liquida, spumosa, minime cocta, interdum etiam saniem fere subatram. Nonnulli vix tussunt, suspiria tamen

Benignae et malignae. Peripneumonia gangraenosa. Signa eius.

Interdum symptoma febris gastricae aut biliosae.

Quando ir-

*irritabilitas
ac sensibili-
tas deleri
videntur.*

*Exanthe-
mata inter-
dum appa-
rent.
Virium lan-
guor.*

trahunt, ut anxietatem et pondus, quo opprimitur pectus, quodammodo sublevent, luctum facie atque oculis prae se ferentes. Pulmones tunc videntur, sensibilitate iam atque irritabilitate destructa, propemodum emori, et vitam enit-tere. Pulsus insuper habent initio validos, sed mox debi-les, languidos, interdum raros ac inaequales. Non raro ex-anthemata superveniunt maligna et peticulae violaceae. Quod communius est omnibus malignis morbis, huic etiam non deest, nimirum virium languor.

1) Vid. GALENUM, BARTHOLETTUM, TRILLERUM, HUXHAMMUM *Essai sur les fievers, dissert. sur les pleurésies et péripneumon. chap. 2. p. 239.; et observat. de aëre Vol. II. mens. Ian. Feb. Mart. 1746.* Vid. etiam *Saggi di med. prat. di P. P. DALL'ARMI P. 3 p. 235. usque ad p. 241.*

§. CXIV.

*Sanguinis
e vena missi
phaenomena
in hac gan-
graenosa pe-
ripneumonia.*

Sanguis in his e vena primum missus apparet cocci-neus, et diu seri tenax, sed mollis, tener parumque cohaerens. Altera vice detractus *crassamentum* lividum exhibet, maxime laxum, plurimo flavo, turbido aut subviridi aut subrubicundo innatans sero. Tertia vero nigrum fere, saniosum, dissolutum. Si qua contegitur inflammatoria pellicula, flava haec est et mucosa, ac tardissime concreescens. Sic se res habet plerumque. Vidi vero non semel in quibusdam huiusmodi *peripneumoniae malignae* et *gangraenosae constitutionibus* sanguinem crusta phlogistica densissima tectum, fortasse quia venenatum miasma nondum sanguinis texturam corruperat. Neque perpetuum est in huiusmodi malo vires sub initium, ut in reliquis malignis, deficere, saepe enim ante morbum, eoque incipiente satis valent; etsi progressu orta gangraena, ut par est, resolvuntur.

*Observatio
auctoris.*

*Virium lan-
guor an per-
petuum sym-
ptoma.*

§. CXV.

*Erysipelas
pulmonum.
A LIEUTAU-
DIO an iure
negetur.*

Erysipelate interdum prehendi pulmones, auctor est HIPPOCRATES¹), et post eum BALLONIUS, BAGLIVIVS alique non pauci²). LIEUTAUDIVS negat id fieri posse, quod erysipelas cutis morbus tantum esse videatur, non in-

teriorum partium. Sed tanti eius auctoritas a nobis fieri non debet, ut ceteris magnis viris fidem denegemus ³). *Pleuritides* enim et *peripneumonias erysipelatodes* dari, nos quoque compertum habemus, *siccas* plerumque, quas, ut ait BALLONIUS ⁴), serum acre, subtile, malignum, efferum, coctionem atque anacatharsin eludens efficit, et id phlogosin potius vagantem, quam phlegmonem fixam excitat, a qua pulmones repente quasi siderantur. Morbum praesentem ostendunt rubores genarum fugaces, tussis inanis, magna linguae ariditas, interior viscerum ardor, assidua anxietas et iactatio, virium subitus lapsus et exiguus dolor. HIPPOCRATES ⁵) vero addit dolores acutos, pungentes, modo ad spinam dorsi, modo ad sternum excurrentes, sed vagos et transitorios, quales egomet ipse non raro observavi. GORTERIUS ⁶) praeterea his accenset pulsum velocem, non valde durum, urinas flammeas, facilem metastasin et crustae pleuriticae in sanguine e vena misso absentiam. Sectio cadaverum ostendit pulmones vehementer rubros aut nigricantes et gangraena affectos, sed molles et flaccidos, non duros et infarctos, ut in *vera pleuritide* et *peripneumonia*. Nec rarum est, febrem ardentissimam esse, pulsum vehementem et velocissimum, et spiritum ore praecalidum exire; neque haec, sanguine pluries etsi emisso, qui ruberrimus et spumossissimus plerumque est, quidquam de suo vigore remittere. Qui hoc morbo corripiuntur, brevissimo tempore pereunt, imo repente nec cogitantes, testante BAGLIVIO ⁷), iugulantur; quod sane nostra experientia confirmamus. An haec *varietas* est *peripneumoniae gangraenosae* (§. CXIII.)? Nonnulli, inter quos SAUVAGESIUS ⁸), cum hac *pleuritides biliosas* confundunt, quae saepe gangraenae sunt et *symptomaticae*. *Biliosas* quoque *erysipelatodes* fuisse credit GUIDETTIUS ⁹).

Signa morbi praesentis.

Dolores ad dorsi spinam et sternum quandoque, teste HIPPOCRATE, decurrentes.

Ex GORTERIO alia signa.

Quid ex cadaverum sectionibus.

Mors cita et fere repentina.

Quaestio.

Pro biliosa pleuritide a quibusdam hic morbus habitus.

1) *Lib. de intern. affection. n. 8.*

2) SCHENCKIUS *peripneumoniā erysipelatōsam* recenset observet. 46. in scholio.

3) MORGAGNIUS (*de sedib. et caus. morb. Epist. XX.*

n. 12.) pulmonis inflammationem in *rubore fugace* aliquando consistere non negat, quando nimirum est de genere *legitimi erysipelatis*. HAENIUS quoque eandem sententiam tuetur (*Part. IX. cap. IV. p. 125.*), cum inflammatos quidem pulmonum infimos lobos observavit, non tamen ut in reliquis peripneumoniis aut pleuritidibus duos.

4) *Epid. I. p. 83. et III. p. 20.*

5) *L. c.*

6) *Prax. med.*

7) *Append. de pleuritide.*

8) *Nosologie T. I. 466.*

9) *Dissertat. 2. cit.*

P r o g n o s i s.

§. CXVI.

*Signa fuusta
et prava.*

Peripneumonia semper plus habet periculi, quam doloris, et tunc potissimum fere mortifera est, cum ad summam spirandi difficultatem delirium etiam accedat, aut quando ex angina nascitur, aut acuto alicui morbo supervenit; nam vel intra *septimum* diem occidit, aut in abscessum et talem abit. Interdum sub graviore casu, si sanguis e naribus ubertim fluat, et venter biblosa multa et spumosa deponat, spes aliqua salutis affulget; contra *quarto* die aut, quod

*Urinae notae
vel bonae, vel
males.*

longissimum est, *septimo* morte finitur. *Malum autem est*, *phrenitidem* ¹⁾, aut *nervorum rigorem* ²⁾, aut *alvi profluvium* ³⁾, quod sputum supprimat, supervenire, aut *aegrum residere velle* ⁴⁾, aut *urinam celeriter post potionem prodire* ⁵⁾, aut quae ab initio *cocta* erat, post *quartum* diem

*Si levis inflammatio
est, quomodo
solentur.*

tenuem evadere ⁶⁾. Saepe ubi levis inflammatio est, neque multum diffusa, solvitur solo sputo copioso, facili, leviter sanguineis filamentis distincto, interdum urina multum sedimenti habente, non raro solo sudore, rarius diarrhoea mucosa cum struis sanguineis commixta, aut biliosa. Sed illud frequentissimum est, quod, cum inflammatoria congestio resolvitur, pars quaedam in bronchia sibi viam parat, ut per sputa expelli possit, pars vero alia in venas traducta et cir-

cum acta variis excretoriis se applicat, ut excernatur. Renes vero saepius eam recipiunt, atque excernunt urinis crassis, turbidis et copiosius emissis, quae sedimentum rubrum et lateritium deponunt. Futuram autem huiusmodi inflammationis resolutionem plerumque indicant urinae saturiores et inmentosae, quae ad latera vitrei vasis, quo continentur et refrigescunt, albam, adhaerentem mucosamque materiem demittunt, cuticulamque in superficie exhibent eiusdem naturae, circulum quasi formantem, qui vasi adhaerescit. Nec rarum est, *peripneumoniam* et *pleuritidem* quarto vel septimo die, vel paulo tardius, erumpentibus pustulis miliaribus ⁷⁾ *critice iudicari* et solvi; quod saepius vidimus.

1) *Aphor. XII. sect. VII.*

2) *L. c.*

3) *Aphor. XVI. sect. VI.*

4) *COAC. PRAENOT. n. 497.*

5) *COAC. n. 579.*

6) *COAC. n. 415. 580.*

7) Vide *Saggi di med. pratic. di PIETRO PAOLO DALL'ARMI* *Observatio P. 2. Giunta all' osservaz. XXXI. Cl. LE ROY* vidit pleuritidem cum sputo sanguinis, difficultate cubandi in latus sanum et sudoribus multis et frequentibus, non tamen foetidis, iudicatam die quinto eruptione pustularum miliarium rubrarum, multarum et prurientium. (*Mélang. de physique et de médecine. Prém. mém. sur les fièvres aiguës. p. 209.*). *Ex sched. auct.*

§. CXVII.

Sputa optimae notae esse consueverunt, quae alba, lactea atque inodora sunt, quae quarta die maturescunt ¹⁾, atque alba et subcitrina fiunt, quaeque facile et copiose prodeunt. Si tertia die appareant, brevem morbum, si tardius, longum futurum significant. Neque inter initia terere debent sputa rufo colore et sanguineo tincta, dummodo facile excernantur, respirationem levent, et mitiorem habeant febrim comitem. Quae die septima non maturescunt, fere lethalia, aut certe ancipitem exitum reddunt. Liquida et salivae instar morbi longitudinem indicant; mala sunt spu-

Sputum bonae notae.

*Sub initium morbi an-
rufus sangui-
neusque color
malus.*

Sputum male notae.

mosa, viscida aut aquosa, quia inutilia; deteriora, si cruenta et sincera. Liquida, viridia, nigra aut putrida *gangraenam* ut plurimum et mortem imminuentem praenuntiant ²).

1) Sputum concoctum est puri simile non claro, non viscido, nec nimium flavo, nec nimium cruento, nec viridi, nec livido, ut ait HIPPOCRATES de vict. acutor. sect. IV.

2) Vid. COAC. PRAENOT. n. 13. 14. 15. 16. 17.

§. CXVIII.

*Alia fausti
infaustique
exitus signa.*

Lingua biliosa, si inter initia appareat, malum septem diebus desitutum, si vero *tertio* aut *quarto* talis fiat, ad *nonum* perventurum esse portendit. Quibus autem dolores ab initio leves sunt, et *quinto* et *sexto* intenduntur, hi plerumque ad *duodecimum* producuntur, raroque servantur; praecipue septimo et duodecimo periculum subeunt. Quod si *decimum quartum* evaserint, sani fiunt. Sani quoque fiunt illi, quibus ad *interiora auris dolor* et *abscessus oboritur*, et *pus inde dimanat*, ut BAGLIVIVS testatur. Plerumque etiam non infausti exitus est, si sanguine emisso morbus levetur, etsi deinde iterum recrudescat. Spes enim est, repetitis venae sectionibus cessurum esse.

*Auris dolor
et abscessus
ad interiora
quid.*

§. CXIX.

*Sequuntur
prognostica
signa tam
prava quam
bona.*

Siccae, sine videlicet sputo, *pleuritides* certam perniciem plerumque minantur, nisi urinae profluvium eis superveniat. Metuendae quoque sunt ad superiora aut posteriora tendentes, nisi hae spuriae sint, et musculis exterioribus insideant (§§. CIX. CX.). Quae vero *quatuordecim* diebus non repurgantur ¹), saepe suppurationem subeunt, nisi suffocent. Discipuli vero HIPPOCRATIS ²) tempus hoc extendunt ad *duos et viginti* dies usque, quibus si non repurgentur, suppuratio imminet. Senibus atque utero gerentibus plerumque perniciosae sunt, aut abortum et partum sollicitant; nec minus periculi asferre iis consueverunt, qui in illas recidunt, aut pluries eodem morbo laborarunt, quamquam ex his quoque complures evadere non rarum sit.

*Quid de se-
nibus et utero
gerentibus.
Quid in re-
cidivis.*

1) HIPPOCR. *sect. V. aphor. VIII.*2) *Lib. I. de morb. n. 24.*

§. CXX.

Nec tutum est, dolorem prius evanescere, quam fe- *Metastascos*
brim. Eo enim desinente, si febris persistat, neque ab alia *aut suppura-*
causa pendeat, aut quod peius est, subinde ingravescat, atque *tionis notae.*
aliae partes novis gravibusque symptomatibus affici incipiant,
alterutrum fieri solet, nimirum aut *suppuratio*, qua dolor
fuit, aut tetra ad eas *metastasis*. Si vero pulsus fiat par- *Signa gan-*
vus, frequens atque intermittens cum sudore frigido, et post *graenae.*
duodecim horas delirium subsequatur, inflammationem *gan-*
graena excipi et terminari perspicuum est. Si demum fe-
bris, quae adhuc pergit, cum horrore circuitus quosdam
habeat, aut vespere ut plurimum recrudescat, dolorque sub-
inde, praesertim in accessionibus, iterumque delitescat, *sup-* *Certiora*
puratio certe in suspicionem venit, quam certius praedixe- *suppuratio-*
ris, si strangulatus se hisce adiungat, et febris iam a multo *nis indicia.*
tempore teneat, et sputorum sapor subdulcis percipiatur.

§. CXXI.

Malam *pleuritis* in *peripneumoniam* mutationem dixit *Malus pleu-*
HIPPOCRATES ¹), et iure profecto; nam latius inflammatio- *ritidis in pe-*
nem per pulmonem diffundi id ipsum significat. Inflamma- *ripneumo-*
tione autem latius diffusa, cellulosus textus, quo vesiculae *niam transi-*
pulmonum colligantur, et vasa eorum minima inflammatorio *tus et quare*
glutine tenaci et polyposo ita replentur et inferciuntur, ut
ipsa aërea spatia et vesiculae compressae aërem ad inspiran-
dum non amplius admittere possint; quo fit, ut non solum,
quia pulmones nequeunt expandi, sanguis per minutas ar-
terias traïci non possit, atque adeo pulmonum infarctum
augeat, verum etiam nervis ubique fortius sive distractis,
sive dilaceratis, sive quasi praelo contusis et pressis, omnis
doloris sensus pereat, eique mortalis succedat anxietas. Et
reapse pulmones e flaccidis et mollibus duri et compacti
fiunt, hepatis substantiam omnino acmulantes, uti eorum, qui

Stillae sanguinis e naribus, vel nimia copia malum. Pessimum signum quale.

obierunt, cadavera ostenderunt. Mala quoque est sanguinis e naribus stillatio, si pauca sit, aut si uberior vires infringat. Pessimum denique signum erit, si multum materiae in pulmonibus strepat, facies moerentem referat, atque oculi aurigine suffundantur.

1) *Aphor. XI. sect. 2.*

§. CXXII.

Pulsui bono non fidentum, et cur.

Pulsui vero, qui varius, ut supra monitum est, esse potest, etsi magno et valido ac aequali, non temere fidentum est; potest enim ad ultimum usque vitae momentum spem alere, et repente nec opinanti deficere. Interdum enim ex duro, inaequali et parvo fit mollis, aequalis et magnus, qualis esse solet, qui *criticus* appellatur. Interim tamen, aucta magis magisque spirandi difficultate, aeger fere interloquendum, aut dum loci mutationem parat moliturque, extemplo animam efflat. Itaque ad respirationem magis respiciendum est, quam ad reliqua signa. Illa quo facilius, eo prosperiorem eventum spondet, et vicissim.

Difficilior respiratio in prognosi maxime attendenda.

§. CXXIII.

Crusta phlogistica deficiens ex BAGLIVIO, LANCISIO et BOERHAAVIO quid portendat. Cur eorum opinio improbetur.

Exitiosum quoque censet BAGLIVIVS, LANCISIUS et BOERHAAVIUS, si sanguis e vena missus floridus sit, et crusta albida sive *pleuritica* careat; materiem enim crassam, tenacem, concrescentem, quae prodire deberet, pulmonibus inhaerere credunt, graviusque malum inde reddi. At si quid ego iudicem, non semper huiusmodi crusta phlogistica absens peiorem morbum portendit, quia saepe altera, aut tertia, imo quarta venae sectione demum apparet, et quia multa sunt, ut demonstravit imprimis SYDENHAMIUS et HAENIUS, quae glutinis inflammatorii concretionem quominus in conspectum veniat impedire possunt. Nec ubi ab eius defectu (§. CXIV.) periculum imminet, id eidem intus retentae tribuendum forte est; a tenui enim atque acri humore, eoque ad dissolvendum idoneo tunc inflammatio

Periculum ex defectu crustae phlogisticae non pendet ab eadem intus retenta.

erysipelatis instar pulmones occupat, et cito ad *necrosin* perducit.

§. CXXIV.

Multa ex his accommodari etiam possunt diversis multiplicibusque horum morborum complicationibus, hoc tantum discrimine, quod si *simplices peripneumoniae et pleuritides* ingens periculum continent, tanto maius inerit *pleuro-peripneumoniae*, quocunque sensu accipiatur (§§. CIII. CXII.), aut inflammationibus utrumque pulmonem infestantibus. De *mediastini* vero et *pericardii* (§. CIII.) inflammationibus par erit ratio. Utraque enim iisdem obnoxia est vicissitudinibus, sed praeterea sputorum caret atque exscreationis auxilio. Altera vero etiam ob cordis viciniam et complicationem multo deterior est.

Prognosis complicatarum, uti pleuroperipneumoniae et inflammationis mediastini et pericardii.

C u r a t i o.

Quod vero attinet ad curationem, singulae fere eandem exposcunt, quam *peripneumonia* (§§. XCVIII. IX.) et *pleuritis* (§. C. et seq.). Cumque ea iisdem indicationibus, quae cuiuslibet inflammationis propriae sunt ¹⁾, inniti debeat, protinus ab initio larga sanguinis missio imperanda est, et parvis interiectis aliquot horarum intervallis eo usque repetenda, donec pulsuum durities ac impetus et symptomatum inflammationisque furor atque acerbitas se remittant, eorumque loco resolutionis et coctionis signa (§. CV.) appareant. Remitti autem inflammationem novimus, quando dolor plurimum imminuitur, respiratio liberior redditur, tussis mitior fit, pulsus ad pristinam mollitudinem redit, aequalior rariorque evadit, febrisque mitigatur, et simul sputum facilius excernitur, et urinae crassae subsidunt, aut universa cutis sudore madet. Itaque mature et liberaliter, praesertim in *pleuritide*, quae largiorem sanguinis missionem prae *peripneumonia* requirere et ferre existimatur, sanguis detrahen-

Indicationes.

V. S.

Iteranda usque quo.

Coctionis signa.

Quantitas sanguinis mittendi.

duſ eſt, modo vires, aetas, temperamentum, habitus corporis, anni tempus et conſtitutio non repugnent. Ad uncias XII. vel XV. vel etiam XX. *prima* venae ſectione educere non dubitant clinici exercitatiores; imo aliqui interiecto exiguo temporis intervallo eandem quantitatem effluere ex eodem vulnere ſinunt ²), teſtanturque, ſic conſeſtim

Cautio.

morbum iugulari. Virium autem habenda potiſſimum ratio eſt, utpote quae ad coctionem atque excretionem, quae per ſputa plerumque in morbi *ſtatu* et declinatione fieri debet, neceſſaria ſunt. Praeſtat autem ex loco parti affectae proximiori, ſive ex latere dolori reſpondente ſanguinem mitti, cum certior promptiorque hinc ſequatur *revulſio*, uti omnium ferme clinicorum experientia ³) compertum eſt, atque ea repeti poſteſt, donec doloris acerbitas, reſpirationis anguſtia et pulſus durities expoſcere videntur.

V. S. e loco parti affectae proximiori.

1) Vide *Commentarium de inflammatione Vol. I. et alibi.*

2) SIMSIUS *Malad. Epidem. chap. V. p. 123.*

Monitum et exceptio regulae circa ſanguinis miſſionem.

3) Eſi ſanguis ab affecto latere emiſſus communiter magis proſit, id. vero non ita perpetuum eſt, ut quidam ſibi perſuadent. ROZIERIUS enim (*Traité des maladies de la poitrine p. 65.*) monet, GESNERUM obſervare, in *pleuritis epidemicae* et *malignae* ſpecie ſanguinis miſſionem e brachio inutilem, e pede vero plurimum ſalutarem fuiſſe. *Ex ſch. auct.*

§. CXXV.

Iugularium quoque ſectio, quando opportuna.

Quod ſi tanta videatur pulmonum repletio, ut non ſolum *inſpiratio* multum laboret, verum etiam ſanguinis e capite reſitus retardetur inhiſceaturve, ideoque venae iugulares turgeant, facies cum livore rubeat, inexplicabilis anxietas cum pulſu obſcuro et depreſſo delirioque accedat, non ſuppetit praeſtantius auxilium, quam alteram ex *iugularibus* incidere ac aperire. Sectio haec quam citiſſime caput relevat, et propius a *pulmone revellit* ¹), venam *azygam* atque adeo venam *bronchiale*m exonerando.

An revulſio in morbis pectoris fieri poſſit.

1) *Revulſionem* in pectoris morbis nullam haberi poſſe contendunt plerique. At falluntur. Nam *arteria bronchialis* vel ab aorta ſub arcu eius, vel a prima intercoſtalium inferiorum, vel ab intercoſtali ſuperiori oritur. Sanguinis reſluxus

per venam bronchialem et venas intercostales ad venam azygam fertur. Depletis autem axillaribus bronchialibusque per basilicam sectam venis, sanguis uberius in respondentes arterias derivatur. Hinc minus in intercostales, atque adeo in bronchialem arteriam influunt. En *reculsionem* ab ipso *pulmone*, quam nonnulli negant. Sed et *vena cava*, aliquantum hac ratione detumescente, dat venae azygae spatium, in quod se citius exoneret, facitque, ut possit ab arteriis, quae in eam desinunt, maiorem sanguinis copiam et recipere et absorbere. En quomodo inflammatus cum pulmo, tum thorax a vena sive *brachii* sive *colli* secta sublevetur; demum *bronchialis* communicat ubique cum arteriae *pulmonaris* ramusculis. Ergo etiam ab his fiat *revulsio* necesse est. Sic animadvertit Cl. PLACENTINUS in libro *de venae sectionis usu* p. 88. et 89.

§. CXXVI.

Si vero id auxiliū nequaquam iuverit, aut nimia colli *V. S. syn-*
pinguitudo, quominus administretur impedimento fuerit, non- *chrona in*
nulli cum ARETAEO et HUXHAMIO suadent, sanguinem *utroque*
uno eodemque tempore ex utroque brachio mittendum esse, *brachio.*
simulque aërem frigidiorem inspirandum expirandumque,
quo facilius humor e pulmone exentiatur ¹). Nec inutile *Aër frigidus*
est, vaporem aceti aqua calida temperati per os haurire, *et vapores*
fomentis abdomen laxare, pedes et manus in balneum te- *inspirandi.*
pidum demittere, ligaturis frictionibusque artus quodam- *Revellentia.*
modo irritare.

1) *Arteriotomiam* a nonnullis hic proponi, posseque eam *Arteriotomo-*
emolumento esse, animadvertit Cl. ROZIERIUS loco citato. Sed *nia quo lo-*
monet, hanc vix sine periculo, nisi in *arteria temporali* fieri. *co facienda.*
Non enim imitandum censet AVENZOAREM, qui pectoris in-
flammatione laborans, sibi *radialem* arteriam bono eventu se-
cuit. *Ex sch. auct.*

§. CXXVII.

Interdum accidit ob celerem virium vitalium lapsum, *Cautio circa*
qui sanguinis missionem in malignis praesertim subsequitur, *venaesectionem,*
ut vena, quousque opus esset, secari non possit, aut pecu- *si vi-*
liaris aut epidemicae constitutionis conditio eam non ferat. *rium lapsus*
Tunc post primam, vel alteram levio rem sanguinis missio- *adsit.*
nem, vel etiam continuo ab initio expedit, cucurbitulas tam *Cucurbitulae*
siccas, quam scarificatas dorso et pectori admove re, aut hi- *tam siccas,*
quam scarifi-
catae.
Hirudinum

*applicatio
haemorrhoi-
dibus.*

*Cautio cir-
ca sanguinis
missionem in
peripneumo-
nia a meta-
stasi.*

*An V. S. post
quartum
diem.*

*Non semper
fit coctio
morbi intra 4.
diem.*

*Sanguis mitti
potest recru-
descente
morbo, etiam
post VII.
XIX. XX.
et ultiores
dies.*

*V. S. ad prae-
cavendum
peripneumo-
niam.*

*Abstinendum
a venae se-
ctione, quan-
do natura
suis viribus
opus salutis
perficiat.*

rudines haemorrhoidibus, in iis praecipue, qui earum fluxui assueti sunt, applicare, et tantum sanguinis haurire, quantum vires ferant, et urgens morbi vis requirat. Cautissime etiam sanguis mittendus est in ea, quae a *metastasi* oritur, *peripneumonia*, si vires iam fuerint fractae, et pulsuum magnitudo et totius habitus bonitas animum non faciant. Sunt etiam qui non ultra diem *quartum* secundam venam praecipiant, metuentes coctionem sputorumque, quibus morbus solvi solet, excretionem impedire. At quamvis intra diem *quartum* saepe morbus ad coctionem perveniat, id tamen non omnibus commune est. Non raro hosce limites excedit morbi vis, et longius producit eius cruditas. Quando id incidit, quovis tempore (dummodo gravia symptomata inflammationis crudae et saevientis, praesertim dolor, difficilis respiratio, febris magna et pulsus vehementes atque duri perseverent) detrahendus sanguis est, quemadmodum expertissimi clinicorum facere consueverunt. Imo id omitti haud debet etiam tum, cum inflammatio, postquam iam conquieverat, iterum recrudescat, quaecunque demum fuerit dies, *septima* nimirum, *quartadecima* et *vigesima*, aut alia ulterior.

§. CXXVIII.

Sanguinis igitur missio cum inflammationibus habeatur auxilium longe praestantissimum, sic ut in ea maxime confidendum sit, et sine ea vix aliquid boni praestent cuncta alia artis adiumenta, sequitur, ut vel in ipso *peripneumoniae* imminenti metu locum habere debeat ad hanc videlicet praecavendam. Interdum tamen morbus adeo levis est, febris ita exigua et moderata, respiratio vix laborat, sputum protinus ab initio flavum et striis sanguineis intermixtum libere prodit, aut urina hypostasim albam copiosamque deponit, aut biliosa multa alvo egeruntur, et cutis universa sudore perfunditur, atque hinc pectoris gravitas aut dolor ita remittitur, ut inflammationem resolvi pateat; quo in casu sanguinis missionem praetermitti posse plerique au-

tumant, ne utile ipsius naturae opus inopportune interturbetur. Idque eo magis tenendum est, quominus resolutioni se opponere videatur laxa solidarum et fluidarum partium constitutio et corporis benigna temperies.

Quo in casu id maxime attendendum.

§. CXXIX.

Alienum quoque est in eo casu (§. CXXVIII.) quamcunque aliam evacuationem moliri. Id unum tunc curandum est, ut salubres naturae motus conatusque perficiantur. Quod praestant aëris tepor eiusque iterata renovatio, aquae calidae vapor inspiratus, potus diluens, saponaceus, temperans calide haustus, blandi clysteres in anum inmissi, abdomini admota fomenta quae molliunt, animi et corporis quies, victus tenuis atque omnia alia, quae meatus laxant et reserant, humores temperant, mulcent et solvunt, et materiae haerentis aut corruptae per sputa, urinas, sudores, excretionem promovent atque adiuvant.

Tunc inutilis quaelibet alia evacuatio ab arte promota. Quid ars praestare debeat.

§. CXXX.

Dolori autem pleuritico leniendo valent extrinsecus admota quae molliunt et discutiunt, aut reprimunt, spongia nempe ex decocto malvae, chamaemeli, meliloti, florum sambuci (aceti tantillo adiecto) expressa, vesica oleo aut lacte semiplena, cataplasmata ex radicibus althaeae, foliis malvae, seminibus lini et foenugraeci lege artis parata, linimenta ex unguento populeo, aut oleo violarum, nymphaeae, hyoscyami similibusque, et si valentius discutere velimus quam relaxare, his camphoram et crocum adicere oportet. SWIETENIUS pannos laneos decocto emollienti, cui sapo adiectus sit, aut lacte aqua diluto imbutos admoveri iubebat, renovarique saepe, ne frigescendo nocerent. Imo lateres calentes desuper dabat hunc in finem. Dosis saponis est semuncia pro qualibet libra decocti. Si vero per haec dolor non remittat, nec cedat, dolenti loco, cute profunde incisa, admoveri cucurbitula debet, et quantum fieri potest sanguinis detrahi. Sic enim quam proxime et sine virium dispendio

Quae dolori leniendo convenient.

Emollientia et discutiuntia.

Camphora, crocus, sapo etc.

Cucurbitulae, cuti profunde incidendae applicatio.

Cantharides. inflammatae parti, sive ea sit interior, sive exterior, succurritur. Utilissime etiam, ut iamdiu notissimum est, emplastrum ex *cantharidibus* imponitur, quod egregie cum discutit et resolvit, tum ulcere inducto extrorsum humorum allicit cursum. Sed haec utilius adhiberi in ea *pleuritide*, quae continentibus thoracis partibus insidet (§§. C. et CX.), et praesertim, quae a dolore *rheumatico* (§. CXI.) fit, et a frigore suscepto orta est, quam in ea, quae *pulmones* solum tenet, verosimillimum est, quamquam negari haud possit, aliqua revellendi laude praestare in hac etiam, atque in ipsa *pleuroperipneumonia* (§§. CIII. CXII.), quod avocata fortasse ad thoracica exteriora vasa maiori sanguinis copia, tanto minor fiat eius ad interiora, et speciatim ad arteriam bronchiale, ideoque ad pulmonem appulsus. At quacunque demum id ratione contingat, illud experientia comperitissimum est, huiusmodi praesidia citissime atque incantamenti instar dolorem interdum fugare. At si cantharides nulla praemissa venae sectione, aut post sanguinem semel tantummodo missum applicitae extemplo dolorem discusserint, nec sudore aut alia critica excretionem morbida materies e corpore prodierit, prudentis medici erit, venam iterum aperire, ne metastasi malum alias partes corripiat ¹).

Animadversio.

1) ROZIER. *l. c.*

§. CXXXI.

Probatoria. Quod si dolor atrocius excrucians perpetuas vigilas inferat, aut nervorum consensu cor spasmodice, ut aiunt, lacessi ita incipiat, ut pulsus parvi, celeres, profundi evadant, respiratioque praecludi videatur, necesse est, ut ad *παρεγογικά* confugiatur. Ex his opium crudum, aut landanum liquidum SYDENHAMII, aut pilulae de cynoglosso, aut diascordium FRACASTORII, aut syrupus de meconio tamquam usu et nostra etiam observatione saepius comprobata imprimis excellunt; eoque erunt opportuniora, si tussis quoque molestior compesci debeat. Tanta enim est interdum inflammatoriae causae acritudo, et tanta partium laborantium irritabilitas,

bilitas, ut perpetuum ad tussim siccam incitamentum percipiatur, omnemque pectori atque aegrotanti adimat quietem. Quo in casu utendum est praeterea demulcentibus, *Decocta.* anodynis atque oleosis. Decocta igitur radices althaeae, aut hordei, aut saleb, mucilagines gummi tragacanthae, aut aragummi. *Gummi.* bici, aut seminum psyllii, foenugraeci, bismalvae, emulsiones *Emulsa.* ex amygdalis dulcibus et seminibus papaveris albi, linctus ex *Linctus.* oleo lini, aut amygdalino recenti et syrupo papaveris erratici, vel althaeae in usum veniant. Ubi vero magnus pulmonum infarctus est, a quo, si somnus vi accersatur, suffocationis periculum instare possit, aut ubi coctionis signa ad sunt, facilisque sputorum excretio est, cavendum est ab iis, quae opium habent, aut certe iis cautissime utendum. Sputa enim supprimi, et aeger suffocari opio possunt ¹).

1) *Opio vis narcotica adimitur, si methodo utaris a Cl. BOUQUETO tradita, quam describit auctor noster in adnotatis ad §. 232. C. VII. Vol. III.*

§. CXXXII.

Post unam vel alteram sanguinis missionem, si amarus oris sapor, lingua viscido muco obducta, nausea aliaque cruditudinis aut putridae in primis viis saburrae adsint indicia, aut alvus compressa sit, lenienti aliquo medicamento eam solvere oportet. Inanis autem timor est quorundam, ne per alvi ductionem exspuitio in hisce morbis pernecessaria inhibeatur, dummodo alvus in principio et morbi cruditate mitioribus medicamentis, quae nec exagitent, nec valentius agant, subducatur. Oleum ex seminibus lini, olivis aut amygdalis dulcibus sine ignis ope expressum, manna, cassia, passulae praeparatae, sal mirabile *Glauberi*, serum lactis cremori tartari aut tamarindis incoctis alteratum, syrupus aureus *solutivus* commodissime adhibentur, et tunc praesertim, cum coacervata et stagnans in duodeno vicinisque locis biliosa colluvies deturbanda sit. Tutissima vero omnium etiam in morbi progressu omnibusque eius stadiis sunt enemata. Haec innoxie alvum servant apertam, et clausam opportunè aperiunt non sine magno morbi levamine.

§. CXXXIII.

Temperantia, demulcentia et resolventia.

Praeter sanguinis iteratam detractorem¹⁾, quousque refracta sit inflammationis vis, et praeter alvi ductionem, qua a sordibus primae viae liberentur, humorumque fluxus ad inferiora provocetur, illud quoque sedulo curandum est, ut solidis partibus laxitas quaedam inducatur, sanguinis fervor temperetur, acritudo obtundatur, lentor, si quis est, diluatur solvaturque ptisana ex hordeo, vel avena affatim et calide potui data, dilutis florum violarum, papaveris rhoeados, bellidis minoris, sanibuci, verbasci, decoctis radicum graminis, glycyrrhizae, malvae, althaeae, passularum, iuiubarum, emulsis ex seminibus frigidis, quibus pro re nata adiicienda sunt, quae leniter attenuant, incidunt, et saponacea virtute resolvunt, uti nitrum purificatum aut stibiatum mel, oxymel simplex, roob baccarum sambuci, syrupus ex aceto et succo mali medici, violarum, ribesiorum, berberum aliorumque similium fructuum, quibus non solum facilius haerens inflammatoria materies discutitur, verum etiam sanguinis serique ad concrendum proclivitas emendatur.

Decocta et diluta.

Incidentia et attenuantia.

Monitum de sanguinis mittendi quantitate.

1) Quantitas sanguinis, quae detrahi debet, varianda sane est pro diversa aetatis, temperamenti, habitus corporis, tempestatis, constitutionis ratione. In adultis SYDENHAMII XL. uncias non excedebat. Sed nostris in regionibus, quando *exquisita* et *legitima* est *pleuritis* aut *peripneumonia*, et pertinacior perstat, et vires satis firmae et validae, temperamentumque sanguineum concurrant, saepe ad LX., LXXX. et ultra ascendere solent. Neque pueritia ab eiusmodi evacuatione secludenda est. Pueris enim, servata proportionem, non semel tantum, sed iterum, et tertio vena similiter secari debet, secarique solet maximo cum emolumento.

§. CXXXIV.

Alia incidentia et resolventia.

Caleguala.

Polygala.

Carduus benedictus

aliaque diaphoretica

Eo etiam spectant antimonium diaphoreticum non ablutum, camphora, spiritus MINDERERI, radix calegualae, polygalae virginianae vel nostratis¹⁾, filicis maris ex aqua decocta, diluta summitatum cardui benedicti²⁾, genepi Taurinensium, herbae scabiosae, veronicae etc., quibus illud etiam conficitur, ut sudor leniter motus a centro ad cir-

cumferentiam vim morbi utiliter avertat expellatque. Quod *quando uti-*
 praecipue proficuum est, quando coctionis signa iam in uri-
 nis saltem appareant. Neque omnino hic excludendae vi-
 dentur *gelatinae* c. c. acido succo citrei aut mali medici im- *C. C. gelat-*
 butae, et in longiori aquei potus copia solutae, utpote quae *inae.*
 diaphoresin promovere dicuntur. Laudantur passim oculi *Futilia quae-*
 cancrorum, dens apri, sanguis hircinus, quae hodie uti vana *dam anti-*
 et futilia antipleuritica iure a sanioribus medicis flocci fiunt. *pleuritica.*
 Hisce addunt nonnulli sperma ceti, de cuius tamen molliendi *Quid de*
 resolvendique facultate exstant apud clinicos documenta non *spermate*
 levia. *ceti.*

1) *Polygala* utraque tam *virginiana*, quam *nostras* inci-
 dens et expectorans est. Eius laudes celebrant D. TENNENT
Mém. de la Société Roy. ann. 1739 et magis adhuc D. BOU-
 VART *ibid. ann. 1744*. Imprimis laudatur in enuratione pleuri-
 tidis *siccae*, videturque quidpiam continere *specifici*. Vomi-
 tum prima vice excitare solet, deinde alvum movet, sputa eli-
 cit, citoque etiam urinas eiet. Modus eam adhibendi huius-
 modi est. Rec. *Polygalae virginianae unc. unam. Decoq. in*
aq. comm. pinta j. ad medietat. consumption. Coletur. den-
tur ij. vel iij. cochlearia singulis horis. Etiam D. PAUL eam
 plurimum commendat in suo *de peripneumon. tractatu*. Vid.
Extract. litterat. Europ. T. III. ann. 1762. Ex sch. auct.

2) „In gravissima pleuritide, praemissa larga sanguinis
 missione (*inquit* LANGEUS *Miscell. veritat. fascicul. I. 75. 76.*),
 ac pro circumstantiarum ratione repetita in latere dolente, non
 obstante fato, senectute, diaetae vitio, aut contagione virulenta
solo extracto cardui benedicti ad minimum in dies singulos
 ad *scrup. IV.* dato sanitatem millies reddidi. Id vero iam
 GEOFFROYO notum fuit, qui huius plantae necessitatem Pari-
 siis in *pleuritide* observavit.“ *Ex sched. auct.*

CXXXV.

Sputum, quo solvi saepe morbus debet, non raro *Expectoran-*
 ob nimiam visciditatem et cohaerentiam vix educi potest, *tiapraecipua.*
 imo difficillime exscreatur. Interdum etiam *irritabilitate*
 aut *sensibilitate* fatiscentibus omnino supprimitur. Tunc,
 praeter saturatius *polygalae* aut *dulcamarae* decoctum,
 cuius aliquot *cochlearia* subinde danda sunt, ad oxy-
 mel scilliticum, syrupum *nicotianae*, de *crysimo Lobelii*,
 ad spiritum *fuliginis*, salis *ammoniaci*, ad *kermes mi-*

Vesicantia. nerale, radicem helenii aut iridis florentinae prudenter confugiendum est. Nonnulli tincturam cantharidum intrinsecus etiam dare non reformidant ¹). Verum tutius est cantharides cuti admoveere, ut vesicas excitent. Sic enim non modo extrorsus malum avocant, et languentem solidarum partium vim sollicitant, sed lentos quoque humores immissio sale caustico dissolvunt, atque ad excretionem organa omnia incitant ²).

1) FANTILI *Breve istoria di due mediche osservazioni ec. Faenza 1777.*

2) Usum vesicatoriorum in *pleuritide* commendat D. MARETA (*Mém. de l'Acad. de Dijon. T. I. p. 93.*) Monet tamen in *spuria* adhiberi posse, quin praemissa sit venae sectio, quam in *vera* necessario requirit. *Ex sch. auct.*

§. CXXXVI.

Quo loco applicanda, et quando.

Quam ob rem pectori, brachiis, femoribus, suris, plantis pedum apponi possunt etiam in morbi principio, ubi venae sectioni minor locus sit (§. CXXXI.), aut ubi sputa aegre prodeant (§. CXXXIV.), aut dolor atrocius urgeat. Tanta enim iis vires sunt, ut quamplurimos ab orci faucibus eripuisse pluries visae sint. Non parum vero constitutio et temporum, et regionum, et aegrotantium confert, ut haec beneficia praestent. Nam interdum his nihil omnino proficitur, nisi etiam velis noxam afferri. Scire autem licet, sputa quandoque alia de causa, nempe recrudescente inflammationis acerbitate, supprimi. Quod ubi accidit, febris et dolor, et spirandi difficultas, et reliqua symptomata excalescunt. Tunc si pulsus sint validi, duri aut magni, viresque non deficient, nihil praestantius sputo revocando est, quam sanguinem iterum detrahere, deinde ad ea properare, quae supra (§. XXX. et seqq.) proposuimus.

Quando sputa supprimuntur, quomodo revocanda.

§. CXXXVII.

Curatio peripneumoniae spuriae veterum.

Huc usque de *verae* peripneumoniae et pleuritidis curatione. At non omnia semper praesidia, quae recensui, in usum trahi opus est. Saepe sola venae sectio et copiosus

aquae diluens potus sufficiunt. *Peripneumonia* vero spuria *Parcior s. m. veterum* (§. CVIII.), quam NIC. PISO descripsit, parcam *Demulcentia, involventia, etc.* et repetitam sanguinis missionem, demulcentia et involventia, sive inerassantia, lenia eecoprotica ex cassia et manna, *Revellentia et temperantia.* epispastica, revellentia atque attemperantia, uti serum lactis *Curatio pituitosae RIVERII, sive nothae SYDENHAMII.* et lac ipsum videtur requirere. *Peripneumoniae* autem pariter spuriae, quam *pituitosam* RIVERIUS et *notham* SYDENHAMIIUS vocavit, conveniunt quidem sanguinis missiones, sed non ita repetitae, veluti etiam lenia cathartica, aut certe mitia emetica, et omne genus revellentium incidentiumque (§§. CXXXIII. CXXXIV. CXXXV.). *Maligna Revellentia.* et *gangraenosa* (§§. CXIII. CXIV.) vix unicam fert sanguinis missionem, et quidem statim ab exordiis administrandam. Repetita enim vires plerumque prosternit, anxietatem adauget, vigilias deliriumque mox affert, tremores item, sudores frigidos ac mortem denique inter gemitus et colloquia inopinatum. Interdum tamen constitutiones quaedam epidemicae observantur, quae magis favent sanguinis missioni. Sed hic quoque summa prudentia opus est. Ceterum post sanguinem illico inter initia missum, vomitus tartaro emetico magna aquae copia diluto, et partitis vicibus propinato, vel oxymelle scillitico, vel ipecacuanha semel iterumque eieatur. Deinde *alexipharmaca* et *antiseptica* *Alexipharmaca, antiseptica.* usurpentur. Camphora, chinachina, scordium, chamaemelum hic excellunt. Vapor praeterea ex aqua spiritu salis ammoniaci imbuta, ex resinis leviter crematis assidue inspiratur. *Qui vapores inspirandi.* Mature autem cantharidibus pectori et cruribus admotis vis morbi extrorsum elicienda est. In his etiam gangraenosis malignisque pectoris morbis paulo largius nutriri aegros expedit, et vino etiam dato recreare. *Vesicantia.* *Victus et potus ratio.*

§. CXXXVIII.

Ita vero variant huiusmodi morbi (§. CXXXVII.) peculiare *constitutiones* ab auctoribus in lucem editae, ut singulas recensere longissimum esset¹). Et quod caput est, saepe vel praestantissimam medendi rationem eludunt, imo *Multiplices morbi constitutiones epidemicae.* *Fallax me-*

*dendi ratio
plerumque
est.
Quid agen-
dum.*

illud, quod olim profuit, in alia novaque epidemia nequaquam bene vertit. Hinc medicus, licet peritissimus, saepe haeret dubius, hoc potius, an illo utatur artis auxilio. Itaque inquirat necesse est in peculiarem morbi grassantis indolem *epidemicumque characterem*, et quasi tentando naturam ipsam interroget, ut aptum possit invenire et seligere curationis genus.

1) In laudato *Recueil d'observations de médec.* saepe occurrunt *epidemicæ constitutiones* legendæ. Praeter supra allatam a DEPLAIGNIO l. c., describitur *ibid. Octobr. 1757. p. 295.* alia, quæ observata Telone est. Vide *ibid. Ex sched. auct.*

§. CXXXIX.

*Erysipelatis
pulmonum
curatio.
V. S. saepe
noxia.
Item in bi-
liosis tam
primariis,
quam secun-
dariis.
Cur noxia
V. S.*

Nunc venio ad eam speciem, quam *erysipelas pulmonum* (§. CXV.) vocant. In hac cautissime sanguis educi debet; saepe enim nocet. Nocet quoque in *biliosis* pleuritidibus tam *primariis*, quam *secundariis*, in quibus emetica et eccoprotica praestant. Cum enim summa humorum tenuitas et *calida acritudo* morbum faciat, non gluten illud phlogisticum, quo sanguis ad concrescendum cohaerendumque pronus est, reperitur, nec viscera defunctorum mucosa membrana (§. CVI.) obducuntur, ut calore opus sit, quo diffluat. Praeter parciolem igitur sanguinis missionem, tunc frigidis potionibus ¹⁾ uti praesertim licet, quandoquidem regio, temperamentum, aetas, anni tempus vehementer fervent, vel solidæ partes ita languent, ut ad pristinum robur nisi frigido potu redire nequeant. Tunc etiam eccoprotica diluentibus interponenda sunt, subacida imprimis, ut biliosa sive fervens colluvies alvo deturbetur. In his tamarindi, cremor tartari, serum lactis acidulatum primas tenent.

*Frigidus
potus.*

*Eccoprotica
et subacida.*

1) Aqua frigida usus est in pleuritide (fortasse *erysipellate*) BERTINIUS feliciter. MAR. GHISI *lett. med. Lett. I. p. 33. Ex sch. auct.* Videsis DEPLAIGNII methodum. *Recueil d'observations de médec. T. VII. Juillet p. 168.*

§. CXL.

*Acida fossi-
lia tam in
erysipellate*

Interdum non modo in *erysipellate pulmonum*, sed etiam in *peripneumoniis* et *pleuritidibus biliosis* et ardenti-

bus quibuscunque febris adeo vehemens est, ut sanguine *pulmonis,*
etiam pluries detracto, parum aut nihil remittat, et arteriae *quam in bi-*
creberrimis validissimisque micatibus tangentis medici digi- *lios arden-*
tos repellere pergant. Ad hunc febris concitatio- *tibusque*
rem motum compescendum aptissimum credo spiritum sulphuris sex- *pleuritidibus.*
tuplo syrupi violarum edulcatum, et singulis horis ad coch- *Edulcanda*
lear unum sumendum, longa semper aquae copia desuper *et aqua su-*
hausta; quod remedii genus a TISSOTIO etiam propositum *perbibenda.*
video. Acida enimvero omnia vim cordis irritabilem poten- *Vis acidorum*
ter imminuunt, acritatem alcaliscentem emendant, sangui- *irritabilitati*
nisque fervorem egregie refracuant ¹). Quare ubi immo- *officit.*
deratus motus excedit, facile hisce refringi poterit. Verum *Cautio circa*
acida acriora tussim exasperant, et quae e fossilibus depro- *usum acido-*
muntur etiam sanguinem cogunt, aut ad concrendum red- *rum fossi-*
dunt proniorem ²). Cautissimus igitur eorum usus sit, ne- *lium.*
que sine prudentis hominis examine indiscriminatim propo-
nendus.

1) Vid. *Vol. I. de Febr. §. CCXCV. et Vol. II. §. CCLXXI.*
in nota 4. ibi apposita.

2) Vid. *Vol. IV. de morb. pector. §. XXXIV. et l. c. Vol. I.*
et Vol. II. §. CXXX.

§. CXLI.

Pleuritidi a nobis *nothae* dictae (§. CX.) fere eadem *Curatio pleu-*
conveniunt, quae adversus *veram* iam §. CXXIV. et se- *ritidum no-*
quentibus commendavimus. At nisi haec resolvatur, facile *tharum.*
in abscessum abit, qui ad exteriora prorumpens molli tu-
more saepe se prodit, et ferro tunc aperiri debet ad citam
paris evacuationem ¹). *Notha* vero, quae *rheumatica* etiam *Rheumati-*
dici potest (§. CXI.), ut *rheumaticae* affectiones curanda *cae.*
est, nempe una vel altera sanguinis missione, cucurbitulis
tam siccis, quam scarificatis, fomentis emollientibus, lenibus
eccoproticis et demum diluentibus ac blande diaphoresin
promoventibus. *Dolores* porro fixi, et sine febre, qui *scor-*
buticos, venereos atque *hypochondriacos* (§. CXI.) affligunt, *Dolores scor-*
cum alterius morbi effectus sint, a morbo primario cura- *butici, vene-*
tionem expectant. Hinc medicus antiscorbuticis, antivene- *rei et hypo-*
chondriaci
qui curentur.

reis, antihypochondriacis, carminativis atque alvum lenientibus eos oppugnet. Quandoque dolor lateris etiam sine febre adeo acerbus est, adeoque defixas radices habet, ut illinc amoveri non possit, nisi applicitis (§. CXXX.) et praesertim cantharidibus, ulcereque inducto diutiusque manante.

Si sine febre dolor. Id auxilii genus etiam profuit, quando dolor nervis costalibus insederit, *convulsivusque* videretur. Ceterum *convulsivus* emollientia, anthysterica atque anodyna expostulat. Emeticis et alvum lenientibus atque anthelminthicis praecipue locus est, cum a cacochylia, a bile, a vermibus (§. CXI.) malum oritur. Si a febre intermittente gignitur, et periodicè recurrit, post sanguinis missionem expiatisque primas vias audacter ad corticem peruvianum deveniendum est ²).

Supervenientis morbillis et variolis. *Variolis* et *morbillis* (§. CXII.) superveniens secta quam citissime vena profligari debet, ne dilatata ope subitanea morte negligentia mulctetur. Reliquae *secundariae* et *symptomatae* (§. CXII.) sic tractandae sunt, tamquam a febre *putrida* aut *biliosa* aut *gastrica*, ab *arthritide* aut *rheumatismo*, a *phthisi pulmonari*, a *miasmate miliari*, a *cattarrho*, a *metastasi*, ab *hydrothorace*, a *lacte* aut *lochiis suppressis* aliisque morbis pendentes. Hic vero opportunum videtur animadvertere, non satis diligentes accuratosque medicos, cum in *pleuritides putridas biliosasque* incidunt, quae a primarum viarum *putrida saburra* originem ducunt, aut febrium biliosarum symptomata sunt, saepe eas pro *primario* morbo et sumere et curare, neminem fere servantes. Id in *epidemicis* quibusdam *constitutionibus* praesertim evenit, in quibus, qui morbi naturam assequuntur, parciori et cauta manu sanguinem fundunt, aut emeticis aut eccoproticis magis confidunt, sicque plerosque ab exitio praeservant.

1) Vide nostram additionem, sive — *Giunta alla osservazione XXVIII. della Part. 2. de Saggi di medicina pratica di PIER-PAOLO DALL'ARMI.*

2) Vide item aliam — *Giunta al consulto 3. Part. III. eiusdem operis Faventiae editi in 4.*

DE VOMICA, EMPYEMATE, SCIRRHO
ET GANGRAENA.

§. CXLII.

Quaecunque tamen adhibita fuerit curandi ratio, in- *Morbi trans-*
terdum tanta vis morbi est, ut vel brevi occidat, vel in *itus in alios*
lenta alia mala transitum faciat. Itaque pulmonum aut tho- *morbos*
racis inflammatio, quando intra dies *quatuordecim* aut *vi-*
ginti duos non resolvitur, nec per expuitionem repur-
gatur, HIPPOCRATE monente ¹⁾ in *suppurationem* abit.
Si pus inde confectum non exscreetur simulac conficitur, *Suppuratio.*
sed intra pulmones peculiari in loco, quasi in cystide qua-
dam coacervetur, *vomica* is abscessus dicitur ²⁾; quemad- *Vomica.*
modum *vomica* etiam appellari solet similis puris collectio,
quae *tubercula* pulmonaria, aut catarrhalem congestionem
suppuratam, vulnus, contusionem, haemoptysin subsequitur,
aut quocunque alio in viscere fit. Si vero pus in thoracis
cavum e pulmonibus aut pleura delabatur, spatiumque illud
vacuum oppleat, morbus fit, quem *ἐμπύημα* vocamus; quam-
quam *empyematis* quoque nomen obtineat pus in cavo tho-
racis collectum, undecunque profluxerit, sive a *mediastino*,
sive a *pericardio*, sive a *diaphragmate*, aut *hepate*, aut
liene ipso, sive ab effusis in cavum pectoris humoribus, ibi-
que putrescentibus pronascatur. *Empyema* ex suppurato *Observatio-*
atque exeso *pericardio* vidit FRID. CASIMIRUS MEDICUS ³⁾, *nes.*
a pure ex *hepatis* abscessu per arrosam diaphragma in ca- *Suppurati*
vum thoracis effuso refert MORGAGNIUS ⁴⁾, ex *liene* simili *pericardii,*
modo pus in sinistrum pectoris cavum per erosum perfora- *hepatis et*
tumque diaphragma eructante vidi egomet ipse, et sectione *lienis.*
cadaveris confirmavi. Cognovi vero ex tumore *lienís*, qui *Observatio*
dolore inflammatorio laboraverat, repente evanescente, et *auctoris.*
inde aucta difficili respiratione, maioreque puris copia ex *Quomodo*
foramine, quod in latere thoracis sinistro ob *suppuratam* *cognoscatur.*
pleuritidem apertum fuerat, profluente.

- 1) *Lib. I. de morb. n. 24.*
- 2) *Observat. med. T. II. p. 648.*
- 3) *De sed. et caus. morb. Epist. 26. n. 4.*

RICHAE ob-
servaciones
de vomica-
rum natura.

4) CAROLUS RICHAE (*Constit. epid. Taurin. alter.*) describit pleuritides et peripneumonias, quae erysipelata epidemice vagantia subsecutae sunt, facile in vomicas transeunt. Ibi §. LXI. narrat, monialem quandam *folliculum vomicae* etiam expulisse. Vocat vomicas *folliculatas* eas, quae ex aliqua pulmonari vesicula expansa et pure plena constant. Putat vasa circum vesiculas ludentia effundere posse sanguinem in ipsarum aliquam, ibique collectum pus conficere. 1) Et §. LXIII. pus fieri inquit vel a sanguine, vel a lymphâ, et pro varia materie, unde fit, varium quoque esse. Distinguit etiam verum pus a purulento. *Ex sch. auct.*

5) Etiam in pericardio effundi sanguinem posse sine ulla ruptura, patet ex *observatione* GUIL. THOMPSON, quae exstat in *Comm. Lips. Vol. XVIII. P. 3. p. 404.* *Ex sch. auct.*

§. CXLIII.

Suppurationis indicia.

Fieri autem suppurationem (§. CXLII.) indicium est, si dolore, qui prius torquebat, cessante, febris non desinat, quinimo sine manifesta causa inordinate exacerbetur, interdum mitior, vesperi gravior rigoribusque interdum, genarum deinde rubore stipetur, demum doloris loco, qua antea erat, pondus percipiatur. Praeterea si sputum, quod exigua quidem copia eiicitur, iam ab initio magna tussi exscreetur, et salsum sit, deinde dulcius videatur, atque anima foeteat, respirationisque difficultas perseveret. Facto iam pure sive suppuratione absoluta, sudores multi et tenues circa pectus aut collum et cervicem erumpunt, tussis et tussendi cupiditas sine notabili exspuitione vexat, oculi cavi atque ungues adunci fiunt, malae rubent, summi digiti praeter modum calent, appetitus prosternitur et deficit, alvus quandoque liquescit, et passim pustulae toto corpore erumpunt. Quod si in alterutro tantum latere suppuratio contigerit, aegrotans, quando in sanum se convertit, percipit quasi desuper suspensi ac impendentis ponderis sensum; latus etiam, in quo suppuratio facta est, et pondus insidet, altero calidius esse consuevit, et saepe dolet, exteriusque intumescit. Effusum porro in thoracis cavum pus fluctuatione aut strepitu,

Puris facti.

Empyematis signa.

dum corpus vel concutitur, vel circumvolvitur, se prodit, nisi plenissima omnia sint; quo casu nulla fluctuatio nullusque strepitus percipi posse videtur. Sed tum summa saltem inspirandi difficultas et febris lenta perpetuo tenet, diaphragma deprimitur, depressumque hypochondriorum atque epigastrii regionem cum ponderis sensu attollit, extrorsumque propellit, ut obstructions aut asciten ¹⁾ mentiatur, quod saepe observare mihi contigit, pedes et saepe etiam facies tument, urinae aliquid sedimenti albi, foetentis aut visceri deponunt, sapor quidam putridus os inficit, similisque halitus inde emanat, macie corpus contabescit, atque alia fiunt, quae tabidis propria sunt. Difficilem vero respirationem, quae *empyematis* indivisibile signum quibusdam ^{*An difficultis respiratio pathognomonicum signum.*} visa est, interdum abesse, facilemque in utrumque latus decubitus in huiusmodi morbo fuisse testantur cel. virorum observationes ²⁾. Denique, si AUENBRUGGERO ³⁾ fides habenda est, thorax in *empyemate*, inferiori et postica parte percussus, obscurum et mutum sonitum reddit.

1) SWIETENIUS §. 302. 303.

2) PANAROLII nimirum, MARCHETTI, DRANII, MORGAGNII aliorumque. Vid. *Giornal. medic. veneto* T. II. p. 350.

3) p. 79.

§. CXLIV.

Vomicae plerumque rumpuntur *vigesimo* die, ex quo ^{*Vomica quando rumpatur.*} primum dolorem aut gravitatem aeger sensit, aut febricitavit, aut rigore prehensus est; interdum *quadragesimo*, imo etiam *sexagesimo*, uti ex *Coacis praenotionibus* habemus. Multo etiam tardius eas nos dirumpi vidimus, nimirum *tertio* usque a morbi principio *mense*, aegro deinde perfecte restituto. Illi autem servari solent, qui statim post vomicae ruptionem a febre liberi evadunt, pus album, odoris ^{*Boni exitus signa.*} expers, leve, non variegatum, coctum facile et cito exscreant, nec alvi fluxu corripiuntur. Secus, quibus contraria accidunt.

§. CXLV.

Vomica latens et a nulla causa manifesta genita.

Huius notae ab HOFFMANNO descriptae.

Non tamen certa eius signa sunt.

Quae sensim et sine manifesta causa, sive sponte gignitur *vomica*, ita interdum latet, ut, monente TULPIO, vix ulla sui proferat indicia. Ceterum primum tussicula sissa, deinde humida eam comitatur. Postea spiritus difficilius trahitur, deficit anima, atque emarcescit corpus, licet interim nec pus, nec sanguinem sputa prae se ferant. HOFFMANNUS vero ¹⁾ hisce notis eam significari scribit, diuturno fixo et comprimente spiritus dolore, qui nec per sputa, nec per sectionem venae, nec per alia remedia resolventia mitescit, nec tollitur, sed cum tussi sicca, pulsu celeri, halitus foetore, marcore corporis, virium languore, appetitu deiecto, largo sudore persistit. Magnitudo vomicae ex maiori spiritus angustia, ingenti anxietate, pulsu duro, quandoque erecto corpore intermittente dignoscitur. Verum Cl. UNZERUS ²⁾ signa *vomicae* incerta omnino esse, multiplici experientia demonstravit. Illud tamen fere constantissimum est, rigorem et febrim accedere, quando ruptioni propior est.

1) *Med. systematic.*

2) *Promptuar. Hamburg. T. IX. p. 309. Vide Comment. Lipsiens. Vol. II. p. 3. p. 480.*

§. CXLVI.

Disruptae vomicae effectus tam boni, quam mali.

Quomodo resolvetur empyema.

Rupta vero vomica vel subito pereunt suffocati, dum copiosum pus repente impellit, obstruitque aërea pulmonis vasa, vel si primum hoc discrimen effugerint, paulo post, illico prostratis omnibus vitae viribus, deficiunt ¹⁾, aut lenta ²⁾ tabe pereunt. Constat tamen testimonio ac observatione celvirorum, longe plures evadere ex *vomica*, quae *peripneumoniae* aut *pleuritidi* succedit, licet ingens puris copia simul et semel erumpat, quam ubi pus ex minoribus abscessibus effundatur ³⁾. *Empyema* raro absorptione et diadoche solvi visum est; rarissime per exesos pulmones sibi viam parat, expuiturque; saepius pleuram musculosque intercostales traiecit, forasque sensim producit.

1) SWIETENIUS §. 1204. 1205.

2) HIPPOCRAT. MEADII, SWIETENII aliorum et nostra quoque experientia. Vid. SWIETEN. §. 2106.

2) Vid. DALLARMIIUM *Saggi di med. pratic.* P. 3. p. 262. *Vomicae et 263.* VILLISIUS observavit quandam speciem vomicarum, *chronicae* quae *callosae* sunt, et fundunt pus per plures annos. *exempla.*

4) Vid. RICHIA §. LXII. cit. *Constitut. epidem. Taurinens.* *Ex sch. auct.*

§. CXLVII.

Cognita per suas notas (§§. CXLII. CXLIII. et seqq.) *Curatio vomicae, eius disruptio beccicis, lubricantibus, emollientibus, vapore aceti vel vini calidi inspirato, cantu, concussione corporis, scalarum ascensu, sternutamentis, quin imo vomitu promoveri a nonnullis consuevit. Verum cautissime se gerat medicus in tribus ultimis praesidiis administrandis, viresque aegri et reliqua symptomata prudenter prius expendat. Puris evacuatio, ubi iam inceperit, adiuvanda iis est, quae alibi, ubi de tussi (cap. I.), aut phthysi (cap. III.) pulmonari actum est, proposuimus. Purgato probe vomicae cavo vulnerariis, victu vegetabili, lacte et peruviano cortice utendum est, ut coeat ¹). Aqua etiam calcis vivae, ubi vomica diutius pus amandat, exsiccarique non facile potest, vel sola, vel lacti mixta ab auctoribus non infimae notae celebratur. Ad id ipsum, ut detergens et simul consolidans medicamentum, commendat nicotianam ETTMUELLERUS ²).*

Curatio vomicae disruptae.

Cautio in quorundam remedium usu.

Quae sanent vulnus.

Exsiccantia.

1) Vid. DALLARMIIUM *Saggi di med. prat. p. 2. osservaz. XXVII.* et quae sequuntur; item *osserv. XXVIII.*

2) In Schröderi *Dilucidat. phytolog.*

§. CXLVIII.

Empyemati autem paracentesi, quae interdum feliciter *Curatio empyematis.* accessit, succurrendum mature est ¹). Haec in dorso intra *Paracentesis.* *nonam et decimam costam* quinque vel sex digitis a spina *sis.* instituitur. Veteres vero intra *sextam et septimam costam* e latere genus hoc chirurgiae adhibebant. Interdum etiam eo in loco fit, quo latus tumet et prominet. HIPPOCRATES diaphysin alicuius costae perforari praecipiebat. Suppurata pleuritide laboranti perforatum est latus affectum,

*Prosperae
paracentesis
observatio-
nes.*

*Quando
improspere
cedat.*

*Quando
punctione
praestet se-
ctio lateris.
Ustio.*

*Methodus
Aegyptio-
rum in ustio-
ne peragen-
da.*

*Puris dia-
gnosis ex
HIPPOCRATE.*

*Quaenam
intrinsicus
et extrinse-
cus adhi-
benda.*

et perbelle convaluit, vixitque plures annos ²). Nec minus prospere huiusmodi punctionem pluries cessisse, observatum a nobis est ³). Sed accidit quandoque, ut nihil ea profuerit. In aegro quodam *pleuritide biliosa*, quam saepe *hydrothorax* excipiebat, chirurgus paracentesi eduxit magnam seri copiam, sed die postera mors eum abstulit ⁴). Id potissimum evenit, quando pulmo magnam partem corruptus exesusque est. Paracentesin vero nonnulli vituperant reiciuntque ex eo, quod cum saepe pleura pulmoni adhaereat, ea vulnerari pulmo possit. Quo casu non punctione quidem, sed incisione latus aperiatur, deinde digitis aut manubrio scalpelli leniter removendus pulmo est ⁵). WILLISIUS fonticulo, qua thorax pertundi consuevit, inusto ac diu manante nonnullos restituit ⁶). Veteres ustione idipsum praestabant. Apud Aegyptios, ut narrat ALPINUS ⁷), ustio sic peragitur. Gossypii pyramidem linteo lineo involvunt. Basin eius loco inurendo imponunt atque affigunt. Deinde apici flammam admovent, sinentque comburi, donec cutis subiecta, quantum opus est, inuratur. Quale demum pus ex sectione vel ustione prodire debeat, ut prosit, docuit HIPPOCRATES, quando dixit ⁸): *Qui suppurati uruntur aut secantur, si quidem purum exeat pus et album, evadunt; si vero subcruentum et coenosum et graveolens, pereunt.* Sed dum haec aguntur, intrinsicus danda profecto sunt antiseptica et blandissima balsamica, et simul extrinsecus iniicienda quae abstergenti ac vulneraria virtute pollent. Nec aliter ferme tractandi, qui suppurationem in *mediastino* aut *pericardio* (§. CIII.) subierunt. Pus enim sub sterno collectum educitur *perforato sterno*, vel *pyulco* exhaustur ⁹). Qua vero ratione e pericardio educi debeat, tradetur *capite* sequenti (§§. CXCI. CXCII.)

1) SWIETENIUS, LUDWIGIUS, BAYROTUS DE JONQUERES *Thes. Paris. a. 1762*; ORTESCHIUS *giornal. di Medic. t. 11. p. 350.*

2) GUIDETTIUS *dissert. 11. p. 187.*

3) DALLARMIUS *Saggi di Med. prat., ubi a BURSERIO in additionibus exempla afferuntur.*

4) GUIDETTI *l. c. §. 12. p. 187.*

5) IOSEPH. WERNERUS curavit *empyema incisione* in dextro *Observatio* thoracis latere instituta. Nam inter *decimam* et *undecimam* WERNERI. costam quatuor circiter digitis procul a vertebis ita scalpellum infixit, ut secundum costarum directionem, et propius a margine superiori *undecimae* costae, ne *intercostalis arteria* laederetur, incisionem perageret. Statim ac musculos intercostales dissecuit, XX. puris unciae effluerunt. Digito vero intra thoracis cavum immisso, nullibi pulmones pleurae adhaerentes detexit. Illico ab emissio pure symptomata remiserunt, nec multo post aeger convaleuit. *Vid. Comm. Lipsiens. Vol. III. P. 1. p. 45. Ex sched. auct.*

6) *Pharm. rat. sect. I. cap. XI. p. 120.*

7) *De medic. Aegyptior. lib. III. cap. 12., ORTESCHIUS l. c. an. 1764. n. 44. p. 350.*

8) *Aphor. 44. sect. VII.*

9) RIOLANUS *Enchirid. anatom. lib. III. cap. IV. p. 206. Consulatur quoque si libet Cl. LOURDIUS, cuius doctrina de paracentesi optimo effectum et exitum exponitur sequenti capite ad calcem §. 191. Vide ibi.*

§. CIL.

Cum vero inflammatio (§. CVIII.) neque resolvatur, *Quando in* neque in suppurationem (§. CXLII.) desinat, neque illico, *scirrhum* aut intra paucos dies vitam et spiritum (§§. XCIX. CXV. *vel gangrae-* nam desinat. CXVI.) intercipiat, tum vel *scirrhus*, vel *gangraena* sive *necrosis* inflammationi finem imponit. Illud ubi evenit, len- *Diagnosis* tum et diuturnum malum relinquitur, praesertim si indu- *scirrhi tam* rata pars non exiguo spatio contineatur. Ibi enim ponde- *grandis,* ris cuiusdam sensus percipitur, difficilis respiratio est, quae, *quam par-* dum corpus movetur, redditur difficilior, decubitus vel in *vae molis.* alterutro tantum latere, vel in dorso possibilis, quia aut dolore, aut tussi, aut spiritus oppressione aegri corripuntur. Si vero parvi et sparsi sint per pulmonum varia loca scirrhusi tumores, qui ab inflammatione relictis sunt, tunc potius tussi sicca, frequenti, ad quemvis motum aut longiorem sermonem ingravescente, quam aliis signis dignoscuntur. Saepe etiam in his pulsus parvus est, inaequalis et iusto celerior. Sed malum plerumque id est, cui *neque* *Prognosis.* *gummi, neque sapo, neque cicuta, neque alia vel ab ipso* *Curatio nul-* *la ferme.* *mercurio deprompta tollendo plerumque valent¹).* Si alte- *Gangraenae* rum vero, nempe *gangraena* contigerit, lethale est. Id *prognosis et* *causae.*

*Diagnosis
gangraenae.*

accidit, quando inflammatio vehemens in initio aut neglecta fuit, aut calefacientibus remediis exasperata. Ubi igitur gangraena incipit, iam dolor evanescit sine manifesta causa, eius loco pondus in pectore percipitur, viresque summopere deiciuntur, pulsus fit omnino parvus, debilis, celer, inaequalis, facies pallida, tetra, interdum rubrocoerulea, extrema frigent, sputa livescunt, nigricant, saepe etiam foetent, latus interdum, quod dolor vexavit, macula nigra aut livida foedatur, mens movetur, et brevi mors scenam complet. Imminens huiusmodi malum vix praecaveri potest. Non tamen omittenda sunt pleraque antiseptica et cardiaca, de quibus mentio (§. CXXXVII.) iam facta est.

*Quid praecavendae
conducat.*

1) Hic in mentem revocentur, quae ab auctore tradita sunt §. 78. *Comm. de inflam.*, vol. 3. §. 389. et alibi.

PARAPLEURITIS.

§. CL.

*Historia
morbi.*

Interdum *pleuritis notha* (§. CX.) (quae vera quidem inflammatio est, sed *pleuram exterioresque* thoracis partes afficiens) neque in *abscessum*, neque in *gangraenam*, ne-

*Eius propria
symptomata.*

que in legitimum *scirrhum* terminatur, neque demum ex toto resolvitur; verum plerisque symptomatibus remissis aeger ita videtur restitui, ut nihil aliud eidem supersit, quam dolor, qui cum diu tenet vexatque modo levior, modo gra-

Dolor.

vior. Sed interim huiusmodi lateris dolore angitur, et vires

Febris ratio.

vix potest pristinas acquirere. Deinde non multo post tempore circa vesperam de insolito quodam et molesto calore queritur, qui paulatim in continuam febriculam degenerat,

*Sudoris
ratio.*

horis pomeridianis quotidie invalescentem. *Amphimerinam* dicunt. In eius augmento sudor emanat, viribus valde offi-

*Differt a
phthisico sudore.*

ciens. In remissione vero, quae circa matutinum tempus accedit, nullus erumpit, contra ac phthisicis evenire solet.

§. CLI.

§. CLI.

Praeterea qui hoc affectu laborant vix in affectum latus possunt decumbere, spiritumque ita moderantur, ut quam-
 minimum fieri potest pectus moveant attollantque, ne vide-
 licet dolorem, qui inspiratione pleniore exacerbatur, inter-
 costalibus musculis agentibus, ut costas elevent, reddant
 multo acerbiores. Fieri tamen non potest, ut in tanta
 pectoris compressione pulmones non satis expansi sanguine
 congesto turgeant, et suspiriis aut oscitationibus frequen-
 tibus egeant, ut quodammodo ab anxietate liberentur. Nulla
 iis raucitas est, sed longo sermone si velint uti, defatigan-
 tur, anhelantque. Pulsus, quacunque hora explorentur,
 crebri et parvi sunt. Sanguis e vena missus arcte coit, in-
 duratur, crustaque pleuritica contegitur. Atque haec sunt
 propria et quasi perpetua huiusce morbi phaenomena.

*Quomodo
aeger decum-
bat et spiri-
tum ducat.*

Qui pulsus.

*Crusta pleu-
ritica in san-
guine.*

§. CLII.

His (§. CLI.) interdum adiunguntur tussis inanis, aut
 sputa plerumque tenuia, pauca et striis quandoque sanguinis
 tincta, ob difficilem nempe per pulmones compressos hu-
 morum circuitum, dolor capitis, oscitandi frequens necessi-
 tas, et demum aliqua macies, quae tamen tardissimo passu
 supervenit, et tunc solummodo, cum morbus ita processe-
 rit, ut sputa purulenta et sanguinea uberius excreari coe-
 perint.

*Alia signa
minus pro-
pria et fre-
quentia.*

*Macies
quando.*

§. CLIII.

Hanc pectoris affectionem ZEVIANUS Veronensis non
 incelebris in opusculo, quod de eadem divulgavit anno 1766,
 novo quodam vocabulo nuncupavit *parapleuritidem*, quae
 tamen, ut ipse animadvertit, saepius consistit in solo lateris
 dolore a *pleuritide notha* relicto nunc continuo, nunc in-
 termittente, nunc ad tempestatum mutationes tantum, aut
 ad validiorem corporis motum sensibili. Is non raro post
 aliquod temporis spatium per se solvitur et omnino cessat;
 nonnunquam vero plures menses eo ipso, quem supra ex-

*Qui primus
hunc morbum
parapleuriti-
dem vocave-
rit.*

*In quo saepe
ex ZEVIANO
consistat pa-
rapleuritis.*

*Periodus
morbi et
exitus.*

posuimus, circuitu miseros aegrotantes excruciat, donec in pectoris interiore pariete, aut in ipsis pulmonibus lethalia ulcera induxerit.

§. CLIV.

*Differt a
phthisi se-
cundaria
incipiente.*

Nec cuiquam in mentem veniat, huiusmodi morbum phthisin pulmonarem incipientem secundariam esse. Nam differre eam a phthisi contendit Cl. ZEVIANUS; quod in *phthisi* pulsus debilis et mollis plerumque est, sudor aut noctu, aut post somnum, praesertim matutino tempore oboritur, facilius in latus affectum decumbitur, sputa crassa et purulenta prodeunt, dolor obtusior et interior (si ullus est) videtur, maciesque celeriter progreditur. In *parapleuritide* vero pulsus subdurus et validior est, et omnia reliqua symptomata (§§. CL. CLI. CLII.) contrario pene modo se habent, ut praenotavimus.

§. CLV.

*Curatio.
V. S. iterata.*

Quoniam igitur a congesto haerentique inflammatorio glutine in latere, quod pleuritis invaserat, proficisci ea (§. CL.) videtur, ideo venae sectione prudenter iterata potissimum discutienda est. Sanguis enim e vena missus crustam pleuriticam prae se fert. Neque metuendum est, ne per eam vires magis magisque elidantur, cum experientia ostenderit, id auxilii et optime ferri, et feliciter administrari. Praeterea, ut malum penitus extirpetur, ea quoque in usum vocanda sunt, quae attenuant, incidunt et resolvunt, et praesertim quae contra pleuritidem (§§. CXXXIII.

*Remedia
temperantia,
incidentia et
resolventia.*

*Quae prae-
stantiora
sint.*

CXXXIV.) commendata fuerunt. Quandoque etiam in pertinaciori casu properandum erit ad saponem venetum, mil-lepedes, gummi ammoniacum, lignum sassafras, radices bardanae, snilacis, chinae, arundinis montanae, ad diluta foliorum absinthii alpini, *genipi* vulgo dicti, cardui benedicti similiumque. Saepe enim haec a nobis adhibita magno cum

*Quaestio de
parapleuriti-
de.*

aegrotantium emolumento fuisse testamur. An *parapleuritis* illa phthiseos incipientis species est, quam iuxta cel.

auctores expugnant parvae, sed repetitae sanguinis missiones?

INFLAMMATIO DIAPHRAGMATIS.

§. CLVI.

In *pleuritide* non raro *diaphragma* simul inflammatione occupari, alibi (§. CIII.) monuimus. At *diaphragma* etiam solum inflammari, et quidem primario verosimile omnino est. Id rarum esse passim asserunt; HUXHAMIUS vero saepius huiusmodi morbum offendi, quam vulgo creditur, auctor est. LIEUTAUDIO autem non videtur a *pleuritide* prorsus differre. Illud sane certum est, quaedam peculiariora, cum *diaphragma* inflammatione correptum est, symptomata observari, quae a *pleuritide* sive *vera*, sive *notha* longissime absunt. *Diaphragmatis* igitur inflammationem, quam proprie *paraphrenitidem* nonnulli appellandam volunt, indicant acutissima febris, dolor inmanis circa costas spurias ad lumbos dorsumque se extendens, et quasi cingulo circumambiens, tussis sicca, dolorem exacerbans, respiratio ut plurimum parva et frequens, rarissime magna et minus frequens, interdum inaequalis ac inordinata, genarum rubor, palpitatio in hypochondriis, hypochondria distenta, dolentia, sursum introrsumque ¹) saepe retracta, suspiria aut suspirii desiderium, pulsus celerrimus, exilis, durus, tandem tremor, tendinum subsultus, convulsio, risus sardonicus, anhelatio, singultus, et non raro delirium et furor. BOERHAAVIUS ²) delirium cum inflammatione *diaphragmatis* semper copulari censet. At MORGAGNII observationes aliorumque BOERHAAVII sententiae adversantur ³). MICH. SARCONUS ⁴) opportune animadvertit, *diaphragmatis* inflammationem neque delirium perpetuum, neque risum sardonicum, nec alia attulisse, quae cum BOERHAAVIO docuit SWIETENIUS ⁵). Ego etiam observavi, haec a vera *diaphragmatis* inflammatione abfuisse ⁶). Iure igitur MORGAGNIUS con-

Diaphragmatis inflammatione.

An rara sit, vel frequens. Opinio LIEUTAUDII.

Paraphrenitis BOERHAAVIO est aliisque. Signa eius diagnostica.

An delirium semper comes paraphrenitidis.

cludit, modo delirium ab ea abesse, modo cum eadem reperiri⁷).

1) Introrsum *hypochondria* trahuntur tum a *diaphragmate* contracto costasque spurias intro adducente, tum a *peritonaeo*, quo inferius *diaphragma* et ipsa *hypochondria* obvestiuntur, inflammato crispato et attracto; quod *RIOLANUS* existimavit. *Encheirid. anatom. lib. III. cap. V.*

2) *Aphor. de cognosc. et curand. morb. §. 909.*

3) *De sedib. et caus. morbor. epist. VII. n. 14.*

4) *Part. I. p. 209. Istoria ragionata de mali etc.*

5) *In BOERHAAVII aphorism. §. 909.*

6) *De morb. capit. vol. III. §. CCXIV. et seqq.*

7) *L. c.*

§. CLVII.

*Prognosis
et curatio.
V. S. largior,
fotus, clysmata et antiphlogistica
remedia.
HUXHAMII
observatio.*

Exitiosum lethiferumque malum efficacissimis statim praesidiis oppugnandum est. Quo enim vehementiores causae intulerint, quo maior sanguinis acritudo concurrerit, eo maius periculum. Tota fere spes in venae sectione, in clysmatibus, in fotibus atque antiphlogisticis remediis posita est et locata¹). At *HUXHAMIUS* sanguinis unciis ferme centum intra quatrimum detractis, multisque aliis adhibitis artis adiumentis non potuit quempiam *diaphragmatis inflammatione* laborantem servare²). En quantum morbi magnitudo quamcunque artis et medici praestantiam eludit!

1) Vid. vol. III. de morbis capitis harum institutionum §. CCXV. et seqq.

2) *Epid. T. II. p. 11.*

CAPUT V.

DE HYDROPE PECTORIS, PERICARDII ET PULMONUM.

§. CLVIII.

*Definitio
hydropis:*

Uerior serosi lymphaticique humoris in aliquod corporis cavum effusio, atque in eodem congestio et stagnatio

proprie ὕδρωψς appellatur. Hinc si in cava *capitis, thoracis, pericardii, abdominis, uteri, omenti* ¹⁾, *tunicae vaginalis testium* serosus humor confluat et coacervetur, ὕδρωκέφαλον, hydrops pectoris, sive ὕδρωθώραξ, hydrops pericardii, sive ὕδρωκαρδία, Ασκίτης, ὕδρωκήλη proveniunt, de quibus partim alibi ²⁾, partim in praesentiarum.

1) Hydropes *omentum* corripitur, qui solus interdum et *Ex PORTA-* sine *ascite* reperitur. Initio fluctuatio tantum in eo percipitur, cum laminae fuerint induratae per aquarum pressionem. *LIO observa-* tur, cum laminae fuerint induratae per aquarum pressionem. *tio de hy-* PORTALIUS *Mém. de l'Acadèm. Roy. ann. 1770 et 1771 p. 541. drope omenti* Disrupto autem omento, quod fit etiam emeticis, oritur *sine ascite.* *tes. Idem ibid.* Exemplum pariter hydropis *peritonaei* legitur in *actis Helveticis T. VI. p. 186.* Similia habentur apud LITTRIUM (*Mém de l'Acad. Roy. T. VII. p. 142. edit. venet.*) et apud CHOMELIUM *ibid. p. 170. Ex sch. auct.*

2) Vid, *Vol. III. cap. II. de hydrocephalo et spina bifida etc.*

§. CLIX.

Sunt vero quidam veluti gradus ad *hydropem* proprie dictum, quos noscere oportet, quosque cum hydropes ipso nonnulli confundunt. Si enim vasa quaecunque sero turgeant, ut totum corpus candicet, morbum pariunt, qui λευκοφλεγματία dicitur. Hanc alii ad καχεξίαν tantum, alii ad Ἀνασάρκα referunt. *Cachexia* autem est malus totius corporis habitus, et depravatus eiusdem color et nitor. *Quid cachexia.* *Anasarca* vero fit, ut quibusdam videtur, si humor viscidior non tantum in vasis, praesertim lymphaticis, haereat, verum etiam per cellulosaе telae spatia diffundatur, tumen- *Anasarca quid.* temque corporis habitum ita reddat, ut digito alicubi pressa cutis non tam facile cedat, nec impressum vestigium sive foveam diu retineat; quamquam fatendum est, de hoc inter omnes non convenire. LUDWIGIUS enim in *leucophlegmatia* duriores tactui tumores, in *anasarca* molliorem existimat, qua in re consentientem habet Cl. SWIETENIUM ¹⁾. Hic enim in *leucophlegmatia* scribit *pituitosum* magis humorem, in *anasarca* *tenuiorem* et *aquosior* peccare; in *leucophlegmatia* magis aequabiliter totum corpus intumescere, ideoque laxius esse et pastae instar mollius; in *ana-*

Tumores varii ad hydropem disponentes.

Quid cachexia.

Anasarca quid.

LUDWIGII et SWIETENII opinio.

sarca ab inferioribus incipere tumorem, et sensim ascendere.

1) In BOERHAAV. *aphor.* §. 72.

§. CLX.

*Oedema
quid sit et
quotuplex.*

*Divisio.
Hydrops
particularis
et universalis.*

Quod si *vasa* pleraque et *cellulosae telae* intercapedines *humore aqueo* in aliqua tantum corporis parte, veluti in *pedibus, manibus, capite, facie, palpebris, genis, faucibus, scroto* aliisque locis repleantur et tument, tumorque sit mollis, frigidus, albus, impressi digiti vestigium retinens, *oedematis* obtinet nomen, estque *hydropis* quoddam initium. Itaque pro varia partium ratione, quas serosa occupat colluvies, varia etiam *hydropis* genera oriuntur, et speciatim si totum corpus afficiatur, *universalis*, si pars, *particularis* hydrops exsurgit.

§. CLXI.

*Causa et
origo morbi
duplex.
Sanguinis
vitia quae et
quot.*

*Quae et
quot solide-
rum vitia.*

Duplex autem cuiusque *hydropis* origo et causa est, vel ab *universi* sanguinis vitio, vel a solidarum partium mala constitutione. Ab *universi sanguinis* vitio: si serosa eius pars supra ceteras immodice excrescat, aut a reliquarum mixtione secedat exuberetque, ut vel e vasorum tunicis per poros, quos vocant inorganicos, exsudet, vel vasa lymphatica praeter modum oppleat urgeatque, vel per arteriolas exhalantes in cellulas cavaque corporis transfluat, ibique congesta consistat, aut si acritudine tanta peccet, ut minima erodat vascula, atque inde in vacua spatia exstillet. *Solidarum* vero *partium* culpa: si vasa minima ita laxentur, ut nimiam serosi humoris vim admittant, tantumque eiusdem in cava effundant, quantum nec recipere, nec revellere venae inhalantes possint, aut ita repleantur extendanturque, ut in hydatides paene expansa et conversa demum lacerentur, liquoremque continenter eructent.

§. CLXII.

*Aliae causae
hydropis ge-
neratim
sunt.*

Effusus autem humor a venis inhalantibus resorberi haud poterit, si crassus et viscidus ille sit, si ostiola earum

obstructa aut contracta viam ingressuro denegent, si atonia atque inertia laborent, ideoque eius propulsionem non adiuvent, si aliquod impedimentum in venis maioribus harumque truncis reperiatur, *obstructio* nimirum, *tumor*, *polypus*, *compressio*, *magna organica vitia* atque alia, quibus *reditus sanguinis ad cor*, adeoque venarum absorbentium in venas maiores exoneratio retardetur, aut penitus inhibeatur. *Vitia venarum maiorum, quibus sanguinis re- ditus ad cor retardatur.*

Id profecto saepissime patet ex cadaverum dissectionibus, in quibus frequentissime detectum est, causam *hydropis*, praecipue *pectoris* et *pericardii*, de quibus hic potissimum agimus, aliquod in venis maioribus circa praecordia vitium, quo liber humorum in cor refluxus cohiberetur, exstitisse. *Frequentior causa hydrothoracis et hydrocardiae ex anatome.*

§. CLXIII.

Ex his (§. CLXI. et CLXII.) facile intelligitur, quam multiplices remotae *hydropis* causae universim esse queant, uti febres intermittentes aliique diuturniores morbi, immodicae, sanguinis praesertim, evacuationes, hepatis, lienis, pancreatis et ceterorum abdominis viscerum labes atque obstructio, suppressae perspirationis atque urinae excretiones, nimius potus, praesertim frigidus calente corpore¹), scabies retropulsa, asthma, tumores varii, praesertim glandulae induratae, aneurysmata, varices, polyposae concretiones, mala thoracis conformatio aliaque sanguinis liberum cursum aut congruam eiusdem in pulmonibus et corde miscelam et elaborationem pervertentia, et imprimis pulmonum inflammatio, scorbutus etc. *Causae remotae hydropis.*

1) MORGAGNIUS *Epist. XVI.* et HIPPOCRATES *Epidem.*

§. CLXIV.

His generatim praemissis, propius ad *hydrothoracem*, *Hydrothoracem* sive *hydropem pectoris* progredimur. Hic etiam ὕδρωρ *Hydrothorax HIPPOCRATI dictus est*. Serosus autem sive aqueus humor *hyderos.* aut in *alterutra*, aut in *utroque pectoris cavea* continetur, *Quo loco humor colligitur.* vel in *cystide* quadam sive *sacco* includitur, quando nimium *Duplex est.* cellulosa quaedam interstitia pone pleuram, aut circa

pulmones et pericardium, aut in ipso *mediastino* ita expanduntur, aqueumque humorem sic recipiunt, ut vesicas sacculosque utris in modum aqua pleni referant. Prior *hydrothorax* simpliciter, sive non *ἐγκύστικος*, id est non *saccatus*, posterior *hydrodrops ἐγκύστικος*, sive *saccatus* nominatur. Uterque quidem cognitu difficilis, sed *encysticus* multo difficilior est.

§. CLXV.

Signa hydrothoracis non saccati ex DUVERNEYO.

Nonnulla ab aliis adiecta.

Hydrothoracis tamen *non saccati* signa haec recenset DUVERNEYUS ¹), nempe summam spirandi difficultatem, facilem in latus affectum, si unum tantummodo latus aegrotet, decubitus, in latus sanum paene intolerabilem, respirationem erecta cervice, aut incurvato ad anteriora corpore minus impeditam, demumque faciem hippocraticam. His alii adiiciunt pedum oedemata, sitim inextinguibilem aut saltem faucium siccitatem, superiorum artuum extenuationem, urinam assumptorum quantitati non respondentem, paucam videlicet plerumque, rubram, crassam et lixiviam, anhelationem in ascensu locorum acclivium, vel in decubitu, vel inter dormiendum, noctu praesertim, ita ingravescentem, ut aegrotantes e lecto prosilire, ad fenestras se conferre, et liberiores auras quaerere cogantur, tussiculam siccam, quae nocturnam illam *orthopnoeam* praecipue commitari solet, pulsum parvum et crebrum, fluctuationis sensum in pectore, dum decubitus mutant, aut concutuntur, cordis palpitationem et reliqua.

1) *Mém. de l'Acad. des Scienc. Edition. Venet. T. VII. p. 121.*

§. CLXVI.

Incerta haec signa initio morbi praesertim.

Animadvertendum est tamen, signa haec vix, nisi morbus iam adoleverit, se prodere, et ubi se produnt incerta valde esse et dubia, uti Cl. HAENIUS post MORGAGNIUM demonstravit ¹); imo respirationem ipsam inter initia non valde affici, quod etiam ZIMMERMANNUS ²) notavit. HAENIO consentit FEBURIUS, qui in nota quadam ad illum ZIM-

MERMANNI locum aperte profitetur ³⁾), nullis interdum indiciis *hydrothoracem* significari, nisi cum morti iam proximi fiant aegrotantes, miraturque in huiusmodi casu nullam spirandi difficultatem insurrexisse, nisi paulo ante mortem. Verum etsi id fieri interdum multis de causis posse ultro concedam, saepe tamen incompertum est, nuni *hydrops thoracis* antea adfuerit, an vero paulo ante mortem supervenerit. Quamobrem non semper fortasse credendum est, eos, in quibus liberum et facilem quemcunque decubitus facilemque respirationem fuisse narrant historiae medicae, vere tum hydropicos exstitisse; sed potius postremo tantum vitae tempore in *hydrothoracem* incidisse, ideoque eorum pectus aqua repletum prosectoribus apparuisse.

Facilis decubitus facilisque respiratio cur signum fallax.

1) *Rat. medend.*

2) *Traité de l'expérience T. II. p. 31.*

3) *Ibid.*

§. CLXVII.

Pulsum vero parvum atque humilem tussimque siccam aut fere siccam, et nisi aliquid catarrhale expellentem, quando simul concurrunt, indicia esse Cl. MORGAGNIUS existimat ¹⁾) non *hydrothoracis*, sed potius alicuius alius vitii, quod cum pectoris hydrope coniungatur. Neque ipse iis assentitur, qui repentinam somni interruptionem cum suffocationis metu pro signo pathognomonico ²⁾) habent; nam HELVICHIIUS ³⁾) et Cl. HAENIUS ⁴⁾) adductis in medium exemplis evicerunt, saepe eam quidem cum aliis *hydrothoracis* signis reperiri, saepe etiam abesse. Subditque cl. vir, huiusmodi symptoma aliis etiam pectoris morbis, pulmonum nempe, cordis, aortae, pericardii atque imprimis spasticis earum partium affectionibus esse commune, et, si quando pathognomonicum *hydrothoracis* signum haberi possit, tunc solum posse, Io. IACOBO VICARIO monente, cum pedum oedemata antecesserint, non vero cum subsequantur ⁵⁾).

MORGAGNI monita circa diagnosis.

An symptomata suffocationis vere pathognomonica sint.

1) *De sed. et caus. morb. epist. XVI. n. 9. et seqq.*

2) RIVER. *Prax. med. l. VIII. cap. V.* CAROL. PISO, *De morb. a seros. colluc. ort. De hydrop. pector.*

3) *Ephem. N. C. cent. 10. observat. 32.*

4) *Rat. med. P. V. p. 44. et P. VI. p. 125.*

5) *L. c. n. XI.*

§. CLXVIII.

*Cur quando-
que in sano
latere decum-
bant aegri.*

Quamquam vero, ubi altera solum pectoris cavea aqua oppletur, decumbere aeger in latus sanum nequeat, ut Cl. DUVERNEYUS (§. CLXV.) tradidit, interdum tamen accidit, ut in sano tantum latere conquiescere et respirare possit. Id autem tum potissimum fieri videtur, cum pulmo, qui lateri ab aqua immuni respondet, vitium contraxerit, et ita labefactatus sit, ut respirationi obeundae impar ferme evaserit, pulmo vero in latere aqua oppleto sanus existat, et solus fere respirationem absolvat perficiatque. Nil igitur mirum, si hydrope laborans tunc facilius feliciusque lateri ab aqua libero incumbat, cum aqua mediastinum versus maximam partem revoluta, pulmo aquae innatans minus prematur, ideoque commodius ad aërem inspirandum explicetur.

§. CLXIX.

*Quando id
non contin-
gat.*

*Paucum se-
rum, sed
acre magnam
parit spiran-
di difficulta-
tem.*

At, si in utroque pectoris latere aqua confluerit, uberior tamen in altero, in altero parcius, illud, quod modo indicavi, haudquaquam contingit. Commodior enim est, ut patet, in affectum magis pleniusque latus decubitus. Quandoque etiam magna spirandi difficultas esse potest, licet serum, quod thorace continetur, paucum omnino fuerit; modo id salibus scateat, aut quacunque alia acritudinis specie contaminetur. Eo namque sic pulmo vellicatur et pungitur, ut in spasticas constrictiones adigantur respirationis organa, et pari ferme modo respiratio laedatur, quo ab aqua uberiore et comprimente laederetur.

§. CLXX.

*Certiora hy-
drothoracis
signa.*

Ceterum, quoniam nulla pathognomonica signa *hydrothoracis* vere habentur, nemo tamen velim credat, morbum hunc ita latere, ut praesens nequaquam dignosci queat. Ego

quidem, siquid iudicem, neque uno, neque altero signo confidendum esse arbitror, sed singula cautissime primum, deinde omnia simul expendantur oportet, antequam de eo feratur sententia. Itaque si, diligenti inito examine, multa simul copulentur ex iis, quae pro diagnosticis signis supra (§. CLXV.) *Exemplum.* enumeravimus, quid hydrothoracem adesse dubitaveris? Si, exempli causa, empyematis causae defuerint, fuerint vero, quae hydropi inducendo aptae noscuntur, si respiratio difficilis iam sit, aut a quovis corporis motu fiat anhelosa, aut erecta cervice duci debeat, si ob suffocationis metum somnos repente interrumpat, si decubitus in alterutrum latus difficilior evadat, si fluctuatio quaedam in pectoris cavea, procul tamen a cordis regione percipiatur, si artuum imprimis inferiorum, aut scroti ¹⁾ oedemata, tussis, praesertim sicca, sitis, urinae parvitas concurrant, si latus affectum oedema exterius ostendat, quod interdum ²⁾ evenit, aut scapula et brachium respondens tumeat et torpeat ³⁾, quod frequentius est; profecto non erit, cur certiora de *hydrothorace* *Difficilior est* signa desideres. Multo difficilior vero est *hydropis encystici* *diagnosis hydropis encystici, ut ex* (§. CLXIV.) diagnosis, quem sine siti, sine urinarum par- *observatione* citate, sine oedemate pedum et sine magna spirandi difficul- *TONINII pa-* tate observavit CAROLUS TONINIUS ⁴⁾. *tet.*

1) RIVERIUS *De hydrop. pect. cap. I. Histor. Vratish. morb.* 1699. 1700. HOFFMANN. *De hydrop. observat. VII.*

2) WILLISIUS *Pharmac. ration. cap. XVII. p. 2.* FONTAN. *obs. anat. med.* 30. 38. BUECHNERUS *act. N. C. t. VI. observ.* 30. MORGAGNIUS *l. c. lib. 2. De morb. thorac.*

3) MORGAGN. *l. c.* CAROL. PISO *l. c.*

4) *Atti dell' Accad. de' Fisiocrit. di Siena T. II. p. 232.* Vide observationem, quam habet Cl. MALOETIUS *Mém. de l'acad. royal. de Paris T. VII. p. 171. edit. venet.* In milite *hydrope cystico pulmonum* laborante anxietas summa erat spirandi, febris lenta, brachia, manus, crura et pedes tumida, urinae perturbatae et flavae, tussis molesta, nullus decubitus, nam sedere semper cogebatur, nulla fluctuatio. *Ex sch. auct.*

§. CLXXI.

Neque facilius patet *hydrocardia*, sive *pericardii hy-* *Hydrocar-* *dia, sive hy-* *drops peri-* *cardii.* drops. Oritur ut plurimum, quando pericardii liquor, quo

Vel aqueus, vel purulentus humor.

In quo differat uterque humor.

Signa a BARRERIO tradita.

Hisce non fidendum est signis.

alluitur cor, ita increscit exuberatque, ut cordis motum actionemque turbare atque impedire possit. Interdum vero non aqueus humor, sed purulentus in pericardio deprehenditur, qui eundem propemodum parit effectum. Hinc duplex *pericardii hydrops* ab AUENBRUGGERO ¹⁾ constituitur, *aquosus* et *purulentus*. Purulentum ab aquoso differre monet cl. auctor, quod in purulento aqua turbidi seri lactis speciem referat, et cordi id, quod purulentum esse creditur, fimbriarum instar adhaereat. Negant autem alii, purulentam hanc vere esse materiem, cum puris tantum similitudinem habeat. Uterque tamen sive *aquosus*, sive *purulentus* sit hydrops, iisdem notis se prodit. BARRERIUS in suis *anatomicis observationibus*, etsi credat et ipse, arduum esse, hunc morbum ab hydrope pectoris internoscere, quaedam tamen tradit eum comitari signa, quibus significari certo possit. Huiusmodi sunt pressio et angustiae sensus circa anteriorem thoracis partem, qua pericardium locatur, respiratio a tumente pericardio difficilior reddita, tussis plerumque sicca et molesta, motus cordis perturbatus, palpitatio, syncope, quam praefocatio interdum antecedit, oedemata pedum, pallor faciei, pulsus parvus et celer, saepe inaequalis, difficilis in lecto decubitus, et suffocationis metus subinde recurrens. Sed quam parum hisce fidendum sit, ex MORGAGNII observationibus animadversionibusque mox referendis fiet manifestum.

1) *Inventum novum ex percussione thoracis humani interni pectoris morbos detegendi. Vindob. 1761. 8.*

§. CLXXII.

Alia signa ex aliis deprompta addenda praefatis.
An undulationis sensus in hydrocardia sit (ut SENACIUS

Signis vero a BARRERIO (§. CLXXI.) prolatis adiungendus videtur, ut certior diagnosi evadat, sensus quidam cordis quasi in aqua submersi et natantis, de quo aegrotantes conqueri solitos esse, viri expertissimi testantur ¹⁾. Rem confirmat Cl. SENACIUS ²⁾, dum scribit, non certius hydrocardiae signum sibi occurrisset, quam motum quendam inter tertiam, quartam quintamque costam undulatorium, atque

aquae quasi fluctuantis in modum, tunc imprimis aegroti *tradit) si-*
 sensui aut medici manui sensibilem, cum cor movetur, et *gnum evidens*
 palpitat. Undulationem vero hanc obscuriorem valde esse, *et constans.*
 monet SWIETENIUS, ubi plenum omnino fuerit pericardium.
 At huiusmodi *palpitationem* cum undulationis fluctuationis-
 que sensu nec DIEMERBROECKIUS ³⁾ in suis, nec BARRE-
 RIUS in quinque *hydrocardia* implicatis hominibus depre-
 hendit aut notavit.

1) Id observarunt in veneto homine HERCULES SAXONIA
 (*Med. pract. l. 2. cap. 8.*), et in sexagenario quodam RAYM.
 IO. FORTIS (*Consil. cent. 2. consil. 46.*)

2) *Du coeur lib. IV. cap. V. Tom. II. p. 356.*

3) *Anatom. lib. II. cap. V.*

§. CLXXIII.

Cordis palpitationem inter hydrocardiae signa ex BAR- *An inter*
 RERII auctoritate et fide supra (§. CLXXI.) recensuimus. *signa hydro-*
 At negat Cl. MORGAGNIUS ¹⁾, eam esse constans et perpe- *cardiae me-*
 tuum huiusce hydropis symptoma, et, si aliquando visa sit, *rito recen-*
 tunc fuisse, cum liquor, quo scatet pericardium, acrimonia *senda cordis*
 peccet, corque irritet et vellicet, aut cum hydrope pericar- *palpitatio.*
 dii *polypus cordis* complicetur. Cordis ergo palpitatio, cum *MORGAGNII*
 saepe ab hydrocardia absit, eiusdem pathognomonicum signum *animadver-*
 esse nequit. Praeterea quando aqueus humor intra pericar- *sio.*
 dium non sensim, sed repente et celeriter effunditur, idque *An dolor*
 immaniter distendit, tum mole sua ita urget deorsum dia- *lumborum*
 phragma, ut eius appendices protrusae et distractae atrocem *item patho-*
 in *lumbis dolorem* excitent. Hic igitur dolor ad hydrocar- *gnomonicus.*
 diam spectare videri posset. Sed neque dolor hic perpetuo
 hydrocardiam comitatur, ut peculiari observatione ostendit
 idem Cl. MORGAGNIUS ²⁾. Demum vir iste doctissimus, col- *An alia si-*
 latis plurium medicorum de *hydrocardia* observationibus, *gna constan-*
 et rite ad trutinam expensis, concludit, neque *animi deli-* *ter in hydro-*
cardia repe-
riantur.
quia, neque tussim, neque spirandi difficultatem perpe-
 tuo et constanter cum ea reperiri ³⁾. Saepe enim, dum
 aegrotantes silent aut quiescunt, optime et tranquille de-
 cumbunt quocunque positu, sed praesertim demisso capite,

quae FRANC. HIPPOLYTI ALBERTINII singularis observatio est.

1) *Epist. anat. med. XVI. n. 23.*

2) *Ibid. n. 45.*

3) *Ibid. n. 46.*

§. CLXXIV.

*Quid sentien-
dum de siti.*

*Quid de
oedemate pe-
dum.*

*De fluctua-
tione quid.*

Sitis quoque, quae hydropicos vexare solet, ab *hydrocardia* plerumque abest. At per eam absentem *pericardii hydrops* ab *hydrothorace* distingui nequit, quia in hoc interdum sitim defuisse, compertissimum est. Neque *pedum oedemata* ita propria sunt *hydrothoraci*, ut hoc signo ab *hydrocardia* discerni certo possit. Nam licet in *hydrocardia* rarissime pedes tumeant, non ita tamen rarus tumor in ea est, ut rara tussis aut sitis fertur ¹⁾. *Fluctuatio* autem si usquam percipitur, ut reapse quandoque percipi potest, non spernendum quidem signum praebet. Sed minus haec in *hydrocardia*, quam in *hydrothorace* se exserit. Itaque diligentissime cavendum est, ne quid fallax nobis illudat, aut *empyematis signa* communia imponant ²⁾.

1) MORGAGNIUS *l. c. n. 46.*

2) *Idem l. c. n. 24. et 36.*

§. CLXXV.

*Quaedam
alia signa et
ipsa reiiciun-
tur uti aliis
citiis com-
munia vel
non semper
praesentia.*

Non pauci magni nominis scriptores sibi per suaserunt, *hydrocardiam macie, tristitia, febre lenta, faciei pallore, oculorum languore, refrigeratione extremorum* indicari, hisque notis non parum ipsi tribuunt; sed haec plerumque utrique hydropi communia observantur. VIEUSSENIUS pro signo maximi momenti in *hydrocardia* habet *palpebrarum labiorumque colorem plumbeum*, cum tamen non semper is *pericardii hydropem* sequatur, nec semper ab aliis pectoris morbis seiungatur ¹⁾. Neque itidem MORGAGNIO videntur hydropis huius indicia *pondus cor praegravans et constringens, aut cordis pondus, et praecordiorum anxietas* a GRAETZIO, ALBERTINIO, LANCISIO, HOFFMANNO,

FANTONIO patre, SCHREIBERO et FISCHERO commemorata; primum quod haec in accuratis VIEUSSENSII observationibus non annotantur, imo ab OLAO BORRICHIO palam excluduntur; deinde quod penitus defuerunt in iis, quos ex VALSALVAE historiis depromsit, aut ipse recensuit, et si quando observata fuerunt, uti in GERBEZIO, BONETO, KELLERO, REIMANNO videre est, non solus tunc *pericardii hydrops*, sed alia aderant quoque vitia, a quibus ea symptomata poterant derivari ²).

1) MORGAGNIUS *l. c. n. 47.*

2) *Idem ibid.*

§. CLXXVI.

Quoniam igitur *hydrocardia* saepe cum aliis praecordiorum vitiis coniungitur, necessario consequitur, ut vix ullis ipsa indicibus distinguere possit, confusis nimirum utriusque mali, imo quandoque plurium malorum symptomatibus, atque inter se pugnantibus, quemadmodum propriis observationibus edoctus ALBERTINIUS ¹) apposite et candide fatetur. Ipse nihilominus quasdam animadversiones longo et multiplici usu comprobatas in hanc rem opportunissime profert, quas utilissimum erit ob oculos ponere. *Si pericardii hydrops*, inquit, *sit solitarius et purus simplexque, aliqua saltem ex parte indicari potest pulsu comparate molli, potius frequenti et plerumque parvo* ²), *qualem edere solet cor, si flaccidum et laxum sit, humorque, qui pericardio continetur, viscidus, iners, aqueus, insipidus. Si vero humor ille acer fuerit et salinus, parvitati et frequentiae pulsuum accedit et vibratio et tensio quaedam. Si vero copia idem excedat, corque quodammodo opprimat, tunc pulsus exilis, celerior et deficiens evadit plerumque. Intermittens autem atque inaequalis non valde est, nisi cum hydrocardia alia praecordiorum vitia complicantur. Tussim (addit) vel nullam esse, vel modicam et siccam, vel sputa tantum lymphatica expellentem, quae a tumente pericardio pulmonesque comprimente videtur de-*

Signa hydrocardiae cum symptomatibus aliorum morborum confunduntur.

ALBERTINII de hoc morbo observatio- nes.

ducenda; difficilem porro decubitum et crebram residendi necessitatem vix unquam in huiusmodi malo incidere, nisi a cibo, a potu, ab animi aut corporis motu, quando etiam in lecto aeger tantummodo moveatur. Et licet motus cordis a mediocri quacunque loci mutatione aut incessu increbescat, et fere ad tremoris quendam sensum accedat, atque una spirandi difficultas, sive potius apnoea et sterni oppressio cum doloris specie et iactatione concurrat; haec tamen maxima ex parte, si non omnino, conquiescere et cessare, aegro ad quietem composito, modo humor pericardii non ita acer sit, ut perpetuo cordis irritabilitatem sollicitet, aut eius superficiem iam arroserit. Demum animadvertit, similia fere symptomata excitari, quando pericardium alicubi crassius, aut quasi membraneo vinculo cordi laxè colligatum sit.

1) *Commentar. acad. scient. vol. I. p. 389.*

*Observatio
auctoris.*

2) Talem revera pulsum saepius in *hydrocardia* mihi contigit observare.

§. CLXXVII.

*Qua in re
dissideat ab
ALBERTINIO
DAIGNANUS.
Molestus de-
cubitus qua-
quaversum.
Syncope.*

Dissimulandum vero non est, ab ALBERTINIO nonnihil dissidere DAIGNANUM, qui *hydrocardia* laborantes asserit locum, in quo commode et diu iaceant, invenire non posse, ideoque alium atque alium saepe experiri. Quod quidem credibile est evenire, quando non purus, nec simplex pericardii hydrops infestat. Syncope etiam eos crebrius aut rarius pro diversa decubitus ratione corripitur, idem cl. vir animadvertit, atque in hoc non dissentientem habet ALBERTINUM, qui id ipsum iam antea, ut a se aliquando observatum, indicaverat. Quod si ad haec accesserit *undulatio* illa, cuius SENACIUS meminit, atque ille aegrotantium *sensus*, quo sibi cor aqua submergi dicere consueverunt, non dubitat, *hydrocardiam* ut certam arguere.

*Undulatio
SENACII, et
submersionis
sensus in
corde aegro-
tantium.*

§. CLXXVIII.

*Diagnosis
probabilior
ex collectio-*

At Cl. MORGAGNIUS, quem cum summa rerum medicarum peritia, tum prudentissima in iis iudicandis circum-
spectio

spectio commendat, multo plura considerata atque atten- *ne plurimum*
denda praecipit. Itaque ne ab eius monitis cautionibusque *signorum.*
discedamus, si aliorum pectoris morborum, et speciatim
hydrothoracis notae, uti sensus fluctuationis a cordis sede
procul dissitae, spiritus difficultas somnum abrumpens, de-
cubitus in alterutrum latus molestus et fere intolerabilis de-
ficiant, neque artuum oedemata, neque tussis, neque sitis
adsint, vel levissima haec fuerint, contra pondus quoddam
ad cordis regionem persentiat, corque ipsum ad motum
corporis opprimatur, et veluti constringi videatur, spiritu
quadantenus interrupto, atque haec, restituto quieti cor-
pore, mox cessent, vel minuantur leventurque, et commo-
dius spiritus ducatur decumbentis demisso capite, si inquam,
haec omnia aut complura consociantur, probabile reputatur,
hydropem pericardii subesse ¹⁾). Tantoque probabilius id
erit, si praeterea ex iis aeger sit, qui sibi cor quasi in aqua
natantem sentiunt, aut sensum habent aquae in pericardio, non
alibi, fluctuantis. Neque insuper spernenda erunt alia, quae
supra (§. CLXXVII.) adducta fuere, quaeque si non sem-
per, interdum certe cum hydrocardia coniungi visa sunt.

*Interdum
aegri sibi
veluti cor in
aqua natans
persentire
videntur,
quod signum,
si adsit, cer-
tius diagno-
seos est.*

1) *L. c. n. 48.*

§. CLXXIX.

Praeter *hydrothoracem* atque *hydrocardiam* simili etiam *Oedema pul-*
monum. affectui obnoxius est pulmo. Serum enim aut lymphæ quando
in celluloso textu, quo vasa pulmonum colligantur, conge-
ritur stagnatque, *hydropem* sive *oedema pulmonum* ¹⁾) con-
stituit. Interdum cellulae quaedam aut vasa secundum alios
quaedam lymphatica aqueo humore ita turgent, atque in
molem tantam excrescunt, ut cystides quasdam sive *hydati-* *Hydatides.*
des, quibus pulmo deinde comprimitur, pellucidas, aut va-
riegato plenas liquore exhibeant. Utrumque malum respi-
rationis functionem non leviter laedit.

1) *Oedema pulmonum* sectione anatomica comprobatum
refertur a Cl. MALOETIO in *Commentar. acad. scientiar. Pa-*
ris. ann. 1732. p. 350.; item a BARRERIO Observ. anatom.
IV.

p. 109.; a TARGIONIO TOZZETTIO *Osservazioni* p. 83.; a LUCA TOZZIO aliisque. *Ex sch. auct.*

§. CLXXX.

Causae oedematis pulmonum.

Signa eius diagnostica.

Non aliae illud inferunt causae, quam quae reliqua hydropis genera (§§. CLXI. CLXII. CLXIII.), potissimum vero in pueris, qui magis morbo huic subiiciuntur, errores in victu, suppressa scabies, morbilli et purpura scarlatina non penitus iudicata, et in adultis immoderata et praepropera equitatio, chlorosis, pedum oedemata retrocedentia etc. *Pulmonum hydropem* suspicaberis, si statim ac partes exteriores corporis omnes aut aliquae oedematoso tumore corripri incipiunt, accesserit etiam difficilis respiratio. Nam exigua seri in pulmonum cellulis collecti quantitas magis respirationi officit, quam maior eius copia in cavum thoracis effusa. Suspicio vertetur in solidius iudicium, si facies sine signis *hydrothoracis* et *hydrocardiae* tumida fiat, si pedes leviter oedematosi cernantur, si pulsus quodammodo suppressi sint, uti ex ALBERTINII et SIMSONIS observationibus habemus. Scire etiam licet, tussim, quandamque loquendi difficultatem interdum ab huiusmodi aegrotatione non abesse ¹).

1) His adiicienda videntur, quae ex MALOETIO adnotavimus ad calcem §. CLXX. post notam 4), quaeque hanc diagnosis illustrare queunt.

P r o g n o s i s.

§. CLXXXI.

A causis eruenda prognosis.

Quid si ab organico vitio sit.

Si a disruptis vasis aut hydatidibus oritur.

Ex causarum consideratione, si tamen hae innotescant, prognosis eruenda potissimum est. Si hydropi organicum vitium originem dederit, nullo modo, aut certe difficillime discutitur, et si discussus forte fortuna fuerit, sine dubio reverti consuevit. Incurabilis quoque est, qui a laceratis vasis lymphaticis, aut a ramo aliquo ductus thoracici, aut ab hydatidibus disruptis proficiscitur. Quando a postrema hac

causa oritur, solet repente corripere, et saepe cum aliquo aquae guttatum stillantis, aut alicuius disruptionis sensu ¹⁾).

Quo parcius urinae fluunt, eo minor salutis spes affulget.

Interdum tamen urinae copia fallax et decipiens signum salutis est, quando nimirum cetera symptomata non dissipantur, aut respiratio brevi iterum opprimitur. A febre aut *Urinae copia quando fallax signum salutis.*

ab immodicis evacuationibus procedens non aeque periculosus habetur, ac qui nullam evidentem causam agnoscit. *Si hydrops sit a febre aut evacuationibus nimis minus periculi im-*

Item *oedema*, quod quasi per febrilem materiam depositam oritur, non valde timendum, SYDENHAMIO ²⁾ iudice est. *pendet.*

Oedemata atque *anasarca* plerumque a causis non multum, *Prognosis oedematum et anasarca.*

nec ita pervicacibus fiunt. Quandoque vero vitii alicuius, quod interiora altius occupat, quodque tolli aut vinci nequit, effecta esse possunt. Sanguinis sputa *hydrothoraci* *Hydrothoracis.*

supervenientia exitium fere praenunciant; pulmones enim aut exesos, aut enormiter compressos, aut vasa eorum magna

ex parte obstructa subsequuntur. Quod ad *hydrocardiam* *Hydrocardiae.*

attinet, non modo haec periculi plena est, sed etiam diuturna curatuque difficilis. Contra *pulmonum oedema*, si *Pulmonis oedema.*

cito cognoscatur, facilius resolvitur alvi fluxu, urinarum copia atque anacatharsi.

1) Similes casus referunt LOWERIUS, WILLISIUS et TARGIONIUS TOZZETTIUS.

2) *Tract. de hydrope.*

C u r a t i o.

§. CLXXXII.

Curandi hydropem ratio multiplex, nec una eadem- *Non una eademque*
que cuique hydropis speciei opportuna est. Saepe quae *medendi ratio, sed varia pro varia hydro-*
unam speciem tollit, alteri noceret, et perniciosa foret. Ex- *pum specie.*
perientia enim compertum est, *hydropes* curatos interdum esse, quod BECHERUS ¹⁾ etiam confirmat, aperientibus, diureticis, sudoriferis, tonicis, purgantibus, emeticis, hydragogis, drasticis, mercurio et ptyalismo, aëre sicco et insola-

tione, balneis siccis et spirituosiss, victu sicco et abstinentia a potu, potu copioso, hypnoticis, incrassantibus, antiscorbuticis, inunctionibus et frictionibus oleosis, balneis, vaporibus, enematibus, cataplasmatibus ex emollientibus, sanguinis missionibus, punctione, sive paracentesi, scarificationibus, vesicatoriis aliisque irritantibus remediis, cauterio actuali, scabiei insitione, et demum solis naturae viribus. Universim tamen ad *hydropem* curandum aggredienti qua-

*Indicationes
quatuor.*

*Quando
alvus ducen-
da.*

tuor indicationes, quibus faciat satis, se sistunt: serosi et lymphatici humoris copiam excedentem evacuare, impedimenta, quae aequabili circuitui opponuntur, remove, crassin debitam sanguini restituere, et demum solidas partes firmare. Quare in *leucophlegmatia*, *anasarca*, *oedematibus* alvum primo ducere opertet mitiore aliquo medicamento, rhabarbaro videlicet, diluto foliorum sennae, sale anglico, mutinensi, mirabili *Glauberi*, tartaro solubili, cremore tartari ²⁾, ialappa, scammonia, syrupo de spina cervina, manna, quibus non modo primarum viarum sordes expurgantur, verum etiam serosa colluvies potenter educitur. Atque haec subinde iteranda prudenti manu aptaque dosi sunt, donec partium tumor penitus subsidere videatur.

1) *Recherches sur l'hydropisie p. 3.*

2) MENGINIUS in *Comm. acad. Bononiens.* plures historias hydropum refert, quos longo usu cremoris tartari plane curavit. *Ex sch. auct.*

§. CLXXXIII.

*Incidentia
et aperientia
quae et quan-
do conveni-
ant.*

Sales qui.

*Gummi fe-
rulacea et
resinosa.*

Sed si cum serosa colluvie lentor etiam et visciditas humorum conspiret, atque obstructionibus viscera et vasa praepediantur, interponenda alvum ducentibus sunt ea, quae incidunt, aperiunt, et leniter urinas cient. Huius census praecipue sunt sales lixiviales absinthii, stipitum fabarum, centaurei minoris, genistae, item neutri, uti tartarus vitriolatus, sal polychrestus, ammoniacus, nitrum, arcanum duplicatum, terra foliata tartari, ac denique gummi ferulacea, ammoniacum quippe, sagapenum, galbanum, et resinosa, imprimis terebinthina veneta, quae posteriora tum maxime

excellunt, cum solidarum partium languida vis lenem et aromaticum stimulum, quo excitetur, requirat. His adii- *Decocta aperientia et diaphoretica.*
 cienda decocta quinque radicum aperientium, rubiae tinctorum, curcumae, eryngii, ononidis, polygalae tam virginianae, quam nostratis, contrayervae, pareirae bravae, ligni sassafras, iuniperi, lentisci et similium; quorum novissima speciatim locum habere possunt, ubi morbus a cohibita transpiratione originem duxerit. Quod si scabies retropulsa, *Antimonii sulphuris viperaeque praeparationes.*
 aut aliorum morborum, qui cutim obtinent, suppressio antecesserit, remedia ex antimonio, sulphure et viperis parata *Revellentia. Antiscorbutica etc.*
 apprime conveniunt, item scabiei insitio aut communicatio, *Diuretica non raro noxia.*
 vesicantia, foniculi et huiusmodi. Neque antiscorbutica aut antivenerea omittenda demum sunt, si a scorbutico, aut a venerea labe malum foveatur. Animadvertendum tamen est, diureticorum usui, quo *anasarca* sublatus est, non raro paulo post peripneumoniam succedere, quae hominem cito enecat; quemadmodum saepius inexpectato vidimus.

§. CLXXXIV.

In illa vero *cachexiae* aut *hydropis* specie, quae nimias sanguinis aut cuiusque humoris evacuationes subsequitur, amaris, stomachicis et roborantibus remediis utendum est. In his praestant absinthium, marrubium album, chamaedrys, eupatorium Mesuaci, abrotanum, cortex mali aurantii, cascarillae, chinae, lignum quassiae; e quibus decocta, extracta, vina, tincturae, pulveres, electuaria, pilulae parantur. Prae ceteris vero chalybs sive mars celebratur, cuius tamen usum suspectum habet GEOFFROYUS. Haec quoque opportuna videntur, cum menstrua, aut haemorrhoidum fluxus substituerint, morbique principium fecerint. *Amara, stomachica et roborantia quae et quando.* *Mars.*

§. CLXXXV.

In casu autem (§. CLXI.), ubi serosa pars reliquas *Hydragoga et diuretica non tuta remedia.*
 superat, aut a reliquarum mixtione secedit et supereminet, cautissime hydragoga et diuretica adhibeantur, ne eorum dissolvente facultate quod reliquum est sanguinis rubri magis

magisque colliquescat. Laxantia, resolventia ac stimulantia ut plurimum reprobant Cl. CASIMIRUS MEDICUS ¹). Ubi vero pulsus et sanguis inflammatorius sit, venae sectionem adhibendam docet, nec antispasmodica spernenda ²). In *anasarca* sine febre sudorem laconico et vapore spiritus vini, aut vesicis aromatico decocto plenis corpori utrinque admotis proliciendum praecipit BAGLIVIVS ³). Applicationem vero calidorum cinerum et fricationes ex oleo et sale communi, dum interne cremor tartari exhibetur, commendat laudatus CASIMIRUS MEDICUS; sic enim serum in vasa resorbetur, et ad vias urinae ducitur ⁴). Alii vesicantia cruribus imponi ⁵) iubent, nec mali quidquam ab iis verentur. Haec ipsa proponi video in eo *anasarca*, qui gravidis supervenit ⁶); quod in his diuretica fere inutilia, si non noxia aestimantur, periculosa vero ob abortum, quem provocant, cathartica. A tumente enim utero sic venae premuntur, ut per eas sanguinis reditus retardetur, aut etiam impediatur, atque hinc aut seri effusio in adiposas cellulas contingat, aut ab iis debita resorptio (§. CLXII.) non peragatur ⁷).

1) *Comm. Lipsiens. suppl. 2. ad decad. 2. p. 221.*

2) *Id. ibid.*

3) *Praxis medica lib. I. cap. 13.*

4) *Observation. medic. T. II. p. 696.*

5) TARGIONI TOZZETTI *Osservazioni* p. 83.

6) *Commentar. Lipsiens. de reb. in S. N. et M. gestis Vol. V. P. IV. p. 648.*

7) *Quaedam leguntur de anasarca, ascite et leucophlegmatia ab auctore proposita Vol. II. §. XCII. et CII., quae videsis.*

§. CLXXXVI.

Incisiones in cute supra talum.

Praeter vesicantia, ut scroso humori paretur exitus, etiam incisionibus cutis est pertundenda. His autem pars tibiae inferior duobus supra talum digitis conciditur, ut qui-

Quomodo inflammatio et gangraena

dem ad cellulosa usque membranam penetrent, non vero ultra pertingant. Sed vulnuscula saepe inflammatio, dolor

et quandoque etiam gangraena consequitur. Ne id mali obveniat, fovenda sunt, ut passim praecipitur, decocto plantarum emollientium, addito spiritu vini, cui aliquid camphorae admixtum sit; vel si gangraena magis timeatur, antiseptici et simul vim vitae excitantibus eiusmodi metus anteverteendus plane est. Incisionibus utpote tutiorem et minus huic incommodo obnoxiam FOTHERGILLIUS ¹⁾ praefert scarificationem ope illius instrumenti, quo ad cucurbitulas scarificandas utimur. Hac ipsa multo ante, quam FOTHERGILLIUS eam proposuit, pluries ego usus sum, sicque graviora symptomata, quae ab incisionibus fiunt, studui evitare. Quoniam tamen non omnis inflammationis et gangraenae metus scarificatione avertitur, aliud auxilii genus exco- gitavit THOMAS LAWRENCEUS, nimirum unicam incisionem prope talum, minutam quidem, sed profundam, quacum prae- ceptis humorum profluvium, tum sphacelus praecaveatur ²⁾. Haec evacuatio etiam in ascite locum habere potest ³⁾. Nam saepe natura eam per se ipsam moliri visa est ⁴⁾. Sed, educta sic serosa colluvie, pendulae, flaccidae et laxae partes circumductis fasciis firmentur, ne iterum novus hu- mor in eas irruat et confluat, ut apposite monet SWIETE- NIUS ⁵⁾.

*ab incisioni-
bus timenda
antevertatur.*

*Sacrificatio-
nes.*

*Unica et
minima
prope talum
incisio tu-
tior, quae
in ascite
etiam pro-
dest.
Crura fa-
sciis fir-
manda.*

1) *Comm. de reb. in S. N. et M. gest. Tom. XVIII. p. 396.*

2) *Dissert. de hydrope p. 49. et 57.*

3) *MEAD. Monit. et praecept. med. cap. 8.*

4) *Hic addenda videtur Cl. TISSOTII methodus, quam iuxta auctoris schedas invenimus.* Cantharides primum, quae ab aliis laudantur, applicitas improbat; quoniam acris laedunt. Acris enim humor effluens cutim irritat, inflamat etc. Hinc gangraenae metus. Tum etiam scarificationes veluti eidem vitio obnoxias, in corpore imprimis cacoehymico. Idcirco radicem *bryoniae* in taleolos sectam, deinde leniter contusam et calefactam applicat cruribus; quae serum leviter irritando educere valet. Prima applicatio nihil educit, at post XII. horas renovatur, et denuo nova apponitur, donec fluxus duratio certa videatur. *Epist. var. argum. p. 144. 145.*

*Radix bryo-
niae secta,
contusa, ca-
lefacta cru-
ribus appli-
canda.*

5) §. 28.

§. CLXXXVII.

*Succus iridis
palustris.*

Interdum cathartica (§. CLXXXII.), vel acriora vix quidquam alvum movent. Tunc succus iridis palustris ad guttas LXXX. ex aliquo syrupo altera quaque hora propinatus magnam serosi humoris vim eduxisse, et postea mi-

*Succus bac-
carum ebuli.*

nori dosi datus aegrum restituisse ¹⁾ fertur. Baccarum ebuli succus inspissatus sine acritatis et caloris vitio excretiones omnes exsuscitando pluribus item profuisse dicitur ²⁾. *Ana-*

*Oedematis
pulmonum
cum anasar-
ca ex ALBER-
TINIO curatio.*

sarca cum difficili respiratione, quae *pulmonum oedema* *) simul indicabat, coniunctum, victus aut dietae erroribus, aut scabiei retropulsae, aut nimio motui atque equitationi, aut suppressis mēstruis succedentem curavit non raro ALBERTINIUS ³⁾ lenibus hydragogis, diureticis, chalybe, iure viperino, et aliquando, quod mirum quibusdam videbitur,

*An sanguinis
missio con-
venire un-
quam possit.*

sanguinis detractio. Et quod ad sanguinis missionem pertinet, haec, ubi plethora in suspicionem venit, et alioquin bonus habitus non desideratur, initio morbi saepe necessaria est, praesertim in *pedum oedemate*, aut recenti *ana-*

*Quaenam
tutissima.*

sarca. Omnium tutissima ea est, quae e venis ani per hirudines instituitur.

1) *Essays d'Edimbourg. vol. V. p. 107.*

2) *TISSOT. cit. epist. p. 138. Additio ex sch. auct.*

3) *Comment. ac. sc. Bonon. vol. I. l. c.*

*Pedilucia in
oedemate
pulmonum.*

*) LIEBERKUEHNIIUS aquam in *cellulari pulmonum* congestam ad crura pediluvii descendere per cellulosa telam coegbat, deinde roborantia adhibebat. (TISSOTIUS *l. c. p. 146.*)
Ex sched. auct.

§. CLXXXVIII.

*Extrinsecus
adhibenda.*

Fricationes.

*Farinae cale-
factae alia-
que resollen-
tia et robo-
rancia.*

*Bardanae
folia cruri-
bus circum-
data.*

Extrinsecus etiam quaedam curationem adjuvant. Fricatio lenis, continuata et sensim aucta tumentibus partibus saepe profuit. *Oedemati*, quod non ab interiori vitio pendet, sed potius a vasorum et telae cellularis laxitate fovetur, farinae resolventes clibano calefactae, arena maris, pulveres ex herbis discutientibus, roborantibus applicentur calide. Folia etiam bardanae cruribus circumdata magnam sericopiam extrorsum alliciunt. Sed id ipsum fortasse validius

praestat radix raphani rustici contusa, et plantis pedum alligata, LUDWIGIO referente. Tibialibus quoque ex tela *Tibialia*. linea validiori crura firmentur, ut tumori non pateat aditus. Cavendum tamen ab iis, quae tumores pedum valide *Cautio*. discutiunt, aut reprimunt, si *oedemata hydropis pectoris, abdominis* vel cuiusvis alius internae affectionis symptomata videantur. Prævus enim aut exuberans humor malo eventu ad interiora propellitur. Hinc *pedum* et *coxarum oedema*, *Spiritus cochleariae intus datus* quod febribus supervenit, spiritu cochleariae intrinsecus dato *quibus oedematum speciebus conveniat.* oppugnandum rebatur HAMILTONUS ¹). Dabat autem XX. aut XXX. guttas huiusce spiritus vehiculo idoneo exceptas, atque iis subinde interponebat alvi purgationem. LAN- *Sal tartari.* GEUS ²) laudat salem tartari ad grana XV., et quandoque ad scrupulum unum singulis diebus mane ad hebdomadam datum, cum desuper hausto infuso baccarum iuniperi con- tusarum. Salubre monitum nobis reliquit Cl. SWIETE- *Purgantia interdum noxia.* NIUS ³), purgantia scilicet nocere, quando *oedema* febri- bus intermittentibus nondum devictis supervenit, prodesse *Fricationes et vina medicata pro-* vero fricationem *) et vina ex amaris et aromaticis medi- *sunt.* cata. Qua in re ab eo non dissentit LUDWIGIUS ⁴).

- 1) *De febr. miliar. cap. IX.*
- 2) *Miscell. verit. fascic. I. p. 68.*
- 3) §. 753.
- 4) *Instit. clin. §. 96.*

*) Cl. TISSOTIUS laudata *epistola p. 139. asciticos*, inquit, *Fricationes oleo fricare, res nova non est. Abdomen per horam mane oleosis factae.* et vespere fricatur cum manu oleo olivarum madida, et post aliquot dies profuse mingens aeger detumescit. Ex sch. auct.

§. CLXXXIX.

Multa ex his, quae supra (§§. CLXXXII. et sequent.) *Curatio hydrothoracis et hydrocardiae.* enumeravimus, in *hydrothorace* etiam atque *hydrocardia* non reprobantur. In his tamen magis extolluntur diuretica, *Diuretica.* inter quae primas tenent pulvis asellorum aut succus ex his expressus, terebinthina, balsamum *Copaivae* aut peruvianum, spiritus salis dulcis nitrive, radix scillae, vinum oxymelque scilliticum, liquor terrae foliatae tartari, sal volatile succini,

lac gummi ammoniaci aliaque huius generis. Scire vero *Radix scillae* oportet, radicem scillae, cum caustico quodam principio agat, tenellam pulmonum compagem saepe nimium irritare et quasi inflammare. Quam ob rem WAGNERUS eam quodammodo cicurire tentat, addito nitro in hunc modum. Rec. *radic. scillae s. p. gr. jv. ad gr. x., nitri purissimi*

Qua ratione eius vis caustica corrigatur.

gr. viij. ad gr. x. ¹⁾). Corrigitur etiam, teste LANGEO ²⁾), floribus cassiae cinnamomeae cum nitro admixtis. Alii venenatam acremque eius indolem ut temperent, eidem adii-
ciunt vincetoxici radicem, idque praesertim HEISTERUS,

Oxymel colchicum.

RAHNIUS et CATTANEUS faciunt ³⁾). Ad quemcunque hydropem, et praecipue *hydrothoracem* aliosque serosos morbos a Cl. STÖRCKIO laudatur oxymel colchicum, et variae eodem praestitae curationes narrantur. De eo autem intra diem non amplius quam drachma una vel altera, vel ad summum semuncia, sed partitis dosibus, praeberi solet. Oxymelle hoc narrat SCOPULUS ⁴⁾) curatam vetulam quinque et sexaginta annorum, quae in hydropem inciderat, frustra vero istud ipsum duobus aliis hydropicis datum fuisse. Inter diuretica non infimum locum meretur vinum medicatum SYDENHAMII, quod sic paratur. Rec. *Ciner. genist. lib. j. Infund. frigid. in vini rhenan. libr. iv. Add. fol. absinth. vulgaris m. j. Deinde filtrat. liq. unc. iiij. dentur bis vel ter in die horis medicis.* Hoc enim complures hydropici sanati dicuntur. Sed asciticis magis convenire videtur.

REGNAUDOTII form.

1) WAGNERI formulae similem proponit REGNAUDOTIUS (*Histoir. de la Société Roy. de médec. T. II. p. 226.*) adversus *anasarca* aliasque *hydropis* species, quae sic habet: Rec. *radic. scillae recent. p. j. v. gr. scrup. jv. Salis de duob. part. iiij. v. g. drachm. jv. In mortario marmoreo subigantur rite simul, donec fiat massa aequalis. Ex hac f. pil. gran. xij., et siccare sinantur. Dosis n. jv. bis in die. Superbibenda infusio plantar. aperient. cum vin. alb. q. s. Serum luctis cum antiscorbuticis interdum detur. Ex sch. auct.*

Cassia cinnamomea.

2) LANGEUS *miscell. verit. fascic. I. p. 66.* Fructus exsiccati lauri zeylanicae baccis calyculatis novissime ad nos ad-
vecti, flores cassiae cinnamomeae dicuntur. Ex sch. auct.

Animadversiones Cl. TISSOTII de

3) Cl. TISSOTIUS citata epistola ait, *scillum in hydrope esse magnum remedium datum dosi, qua per renes agat* (p. 114.). Ceterum nocet, et enervat ventriculum, cui me-

*detur postea cortex. Secundo: acre est remedium, et dolo- viribus scil-
res ubique excitat, imo nervos concellit, cui malo avertendo lae in hy-
addita camphora valet. Tertio: sanguinem dissolvit et eiicit; drope.
igitur ubi humores soluti, caute adhibenda. Hinc saepe sub-
iungendus illico cortex. Nocet, ubi est vetus scirrhus cum
febricala; facilis enim exulceratio (p. 135. 136.). Scilla
pura sive cruda anteponeunda. Duo vel tria scillae grana cum
saccharo tritae summo opere prosunt in hydrope pectoris.
Torrefacta perdit multum virium. Igitur maiori dosi tunc
danda Aromatis additis ventriculi noxae avertantur.
Acetum scilliticum intolerabile. Vinum potentius remedium,
sed non omnes ferunt. Oxy-mel apta dosi nulli praeparati-
oni secundum, imprimis nitro aut sali medio nuptum. p. 137.
138. Ex sch. auct.*

4) *Flora Carniol. T. I. p. 266.*

§. CXC.

De *hydero pulmonis* et *hydrothorace* luculenter loqui- A P. SALIO
tur PETRUS SALIUS DIVERSUS ¹); et quamquam cathartica *laudantur*
vehementiora in iis passim reprobari soleant, ipse tamen *elaterium et*
ad evacuandos serosos humores felicissime se adhibuisse te- *succus radi-*
statur *elaterium et succum radicum sambuci, fortasse ebuli.*
Illud dabat ad quatuor grana, quae maxima dosis ei erat,
hunc ad sesquiunciam. Repetenda autem haec remedia esse,
auctor est, quia *unica evacuatione universam materiam*
educere non possunt. Educta porro materia, monet, cau-
sam generationis materiae inquirendam esse, ut, si fieri
potest, tollatur. Generatim cauteria brachiis et femoribus *Cauteria in*
inurenda proponit, quibus relapsus praecaveatur ²). *brachiis et*
femoribus.

1) *De affect. partic. cap. V.*

2) *Ibid. p. 223.*

§. CXCI.

Sed praestat aquas statim, praesertim si recens aut post *Paracentesis*
hydatidum ruptionem confluxerint, paracentesi educere ¹). *in hydrotho-*
In hydrothorace punctio intra *nonam* et *decimam* costam *race.*
quinque aut sex digitis a spina communiter instituitur. HIP-
POCRATES diaphysin, ut superiori *capite* innuimus, id est
corpus ipsum alicuius costae perforabat modiollo. At Cl. *Juxta SHAR-*
SHARPIUS strenuus chirurgus anglus eam rectius institui *PIUM quo in*
loco insti-
tuenda.

putat intra *sextam* et *septimam* costam, quod olim fieri solebat, supputatione ab infima facta, distantia a sternum et vertebrae aequali; quem locum video etiam praeferrari ab OLAO ACRELIO ²). Sed is parum confidit huic auxilio, nisi exundantis seri fons obturari possit. Ubi vero boni exitus spes affulget, mature ad paracentesin properandum esse docet. Foemina gravida (rem narrat WILLIAMUS MORELANDIUS) hydrope laborabat. Huic intra *sextam* et *septimam* costam incisione facta extractae sunt librae septem aquae limpidae. Animi deliquium hinc passa est, sed postea bene habuit, vulnusque intra mensem clausum est. Peperit iusto tempore feliciter ³).

*Observatio
MORELANDII.*

*Observationes de bono
paracentesis eventu
ex LOURDIO.*

*Methodus
Lourdiana.*

1) Cl. LOURDIUS (*Journ. de médecine mens. Maii anni 1782. p. 408.*) paracentesin in *hydrothorace*, utpote utilem et nulli obnoxiam periculo proponit, modo propere et antequam laesio in pulmone fiat, instituatur. Instituendam autem putat potius acu triquetra (*troiquart*), quam cultro illo, quem *bistouri* gallice appellant; si tamen ea circumspectione introducta sit, ut, statim ac vacuum ingreditur, nullaue amplius percipitur resistentia, inde retrahatur. Fatetur quidem inutilem evadere, si pulmone pleura adhaerescat; ast non idcirco utilius incisionem fieri, quoniam non tam facile est, ut fortasse contendunt, a pulmone eandem pleuram disiungere. Bono et felici omine sic pluries in utroque pectoris latere institutam fuisse narrat. Ratione vero sequenti peragitur. Punctio fit *quatuor digitis transversis sub angulo inferiore omoplatae*, et *quinque digitis pariter transversis maioribus procul a spina dorsi*, qui locus respondet intervallo, quod est inter *tertiam* et *quartam* costam spuriam, enumerando ab infernis ad superiora. Ibi fit etiam *empyematis* operatio. Neque syncope, quae post punctiorem interdum supervenit, ab eadem absterreat, nam levioribus adiuventis paulo post omnino cessat. *Ibid. T. LVII. p. 303. sched. auct.* Paracentesin feliciter adhibuerunt HIPPOCRATES, WILLISIUS, LOWERUS, BOURDELINUS, BARGERONUS, MORANDIUS, DUVERNEYUS, SENACIUS alique. *Ex sch. auct.*

2) *Comment. de reb. in Sc. n. et M. gest. vol. XV. p. 425.*

3) *Transaction. philosoph. vol. LVI. p. 302.* Paracentesin lanceola potius, quam acu triquetra instituendam vul MARTINIUS. Vid. *Comment. Lipsiens. vol. XV. p. 31.*

§. CXCH.

*Paracentesis
in hydrocardia.
RIOLANI metho-
dus.*

Utinam id genus chirurgiae ut in *hydrothorace*, sic in *hydrocardia* locum haberet. Saepe, inquit RIOLANUS ¹).

in eo (pericardio) copiosus humor colligitur, qui suffocationem adfert, et cor obruit. Si non possis exhaurire istud serum per hydragoga, licetne terebra sternum aperire, intervallo pollicis a cartilagine xyphoide, quia pericardium ibi adnexum ad suspensionem cordis? Dubia salus certa desperatione potior etc. Post RIOLANUM ea- *Alia SENACII.*
dem propemodum aquam e pericardio educendi ratio suadet-
tur a Cl. SENACIO ²⁾), sed hic neque terebram, neque lo-
cum indicatum adprobat. Ipse enim acum *triquetram* inter
tertiam et *quartam* costam prope sternum sic adigendam
iubet, ut oblique versus mucronatam cartilaginem feratur.
Hac ratione evitantur vasa sanguinea maiora, aliaeque par- *Cur tutior*
tes, quas sauciare periculosum esset. An vero unquam haec *haec metho-*
punctio tentata sit, et quem habuerit exitum, non mihi *odus SENACII.*
profecto perspectum est. Optandum tamen esset, ut pri- *Quid prae-*
mum in cadaveribus, deinde in vivis a docto et exercitato *standum ve-*
chirurgo eius periculum fieret. Nec aliter curanda esset *lit auctor.*
hydrocardia purulenta, quae pericardii aut cordis supp-
urationem (§. CLXXI.) subsequitur.

1) *Encheirid. anatom. lib. III. cap. IV. p. 206.*

2) *Du coeur. l. c.*

§. CXCI.

Quacunque demum via punctiois ope extrahatur aqua *Curationis*
(§§. CXCI. CXCI.), summa quies et tenuissimus victus *ratio post*
per aliquot dies imperetur, ut, humorum motu placidissimo *eductas*
reddito, oscula vasorum facilius se contrahere possint. Deinde *aquas in hy-*
ad roborantia transitus fiat, quorum usus etiam necessarius *drope.*
est, ubi hydrops aliter fuerit discussus. Tum crasis debita *Quies.*
sanguini restituenda est, et solidis partibus debitum robur *Tonica ad*
(§. CLXXXII.). Quo spectant cortex peruvianus et au- *crasin san-*
rantiorum, cascarilla, blanda aromatica, vinum absinthites, *guini red-*
rhenanum, burgundicum, rubrum de monte politiano, et *dendam et*
prae ceteris praeparata martialia. Quorum actio vectione, *solidis parti-*
equitatione, frictione, aëris mutatione, peregrinatione, ru- *bus robur.*
Auxilia
quaedam
externa.

sticatione, animi hilaritate aliisque huiusmodi praesidiis adiuvanda est.

§. CXCIV.

Diacta.

Victus ratio generatim ad exsiccantem vergat; hinc carnes assae potius, quam elixae concedantur. Panis sit biscoctus. Olera, quae diuresin movent, non debent excludi, uti turiones asparagi, lupuli, foeniculum, apiuni, pastinaca,

Abstinencia a potu.

tragopogon, cinarae, rapae, cepae, porra. Abstinendum quantum fieri potest a largiori potu est; sola enim a potu abstinencia hydropes contumacissimos curatos novimus. Interdum tamen negari haud potest, potum etsi largiorem

mirifice profuisse; cum scilicet humores nimia densitate nimioque lentore cohaeserint. BACHERUS laudat copiosum potum ¹⁾ et suas pilulas tonicas. Vinum, si eius aliquid dandum est, absinthio pontico, aut baccis iuniperi, aut millepedibus infusis alteretur. Ad fallendam sitim, quando urentissima urget, os et fauces aqua cum aceto remixta colluantur. Cerasa acida, pruna acidodulcia, limonii aut citrei mali

frustula saccharo conspersa ore detineantur. Aër sit purus, siccus, elasticus. Motus corporis in simplici *anasarca* atque

oedemate, imprimis quando vita deses et nimia quies in causa fuit, non erit reprobandus. Noxius vero est in *pectoris* aut *pericardii hydropes*. Navigatio tamen nemini

officit, et bene fertur.

1) FRANCISCUS MILMANNUS (*Animadversion. de nat. hydrop., eiusq. curatione. Lond. et Vienn. ann. 1779.*) BACHERI sententiam de largioris potus usu in hydropes tuctur, quam sane HIPPOCRATIS doctrinae conformem esse nititur demonstrare. Excludit omnem subtilitatem aqueam ab hydropis causis, et semper atoniam et obstructionem in causa esse contendit. Dubitat, an impediendo fluxui humorum in abdomen post paracentesin externae sufficiant arctatae compressiones, sibi que persuadet, earum opem utiliore evadere, si qua pars aquae prementis, paulatim postea educendae, in cavo relinquatur. Hinc methodum partite aquas extrahendi approbat commendatque, et nonnullas obiectiones resolvit. Eius curandi ratio est haec. Si aeger non sit debilis admodum, aquas purgantibus alternis diebus, vel bis in hebdomada datis dispellere nititur. Dat *pulverem ex radice iuloppae drachma semis et*

MILMANNI
opinio de
causis hydro-
pis, curan-
dique me-
thodus.

calomelanos granis septem compositum (p. 114.); diebus intermediis haustum salinum, qui sic habet: Aq. menth. simplic. unc. j., aquae purae. unc. β. sal. tartar. gr. XV., acet. destillat. drachmas vj., vel quant. satis ad salis saturationem; aq. piperis iamaicens. drachm. j., syrup. simpl. unc. j., m. f. haust. Huic haustui adiciebat *acet. scillit. gutt. XL., vel drachm. j., et repetebatur sexta quaque hora.* Cum purgantibus dabat decoctum avenae et iuscula humectantia (p. 115.). Sed purgantia non respondent semper, vires nimis deiciendo. Tunc ad diuretica confugit. Omissis purgantibus dat salinum haustum cum aceto scillitico et magnam aquae copiam cum pauxillo salis diuretici, et saepe intra spatium *quadragiuta* horarum urinae copiosae profluunt (p. 116.). Potum etiam laudat ex *cremor. tartar. unc. semis in aq. hord. lib. ij. solutae, cui syrup. ad grat. dulced. et spirit. vini gallici unc. j. vel ij. adiectae sint.* Hoc modo datum, et simul haustum salinum, brevi urinas ciere, quod alias non facit, nisi post longum tempus (p. 118.). Decoctum senegae sedes et urinas movet satis bene. Rec. *rad. senegae unc. semis, Aq. sesquilib. Decoq. ad lib. j. Cola. Dentur unc. iiij. bis, vel ter in die.* Purgantia initio, progressu diuretica laudat (p. 120.). *Ex ital. sched. auctoris haec omnia adiicienda huius morbi curationi non dubitavimus, quae, etsi fortasse non necessaria, inutilia tamen omnino legenti non erunt.*

CAPUT VI.

DE DIFFICILI RESPIRATIONE ET SPECIATIM DE ASTHMA.

§. CXCIV.

Naturalis respiratio ea profecto est, quae solo paene *Respiratio* diaphragmate et thoracis motu vix adspectabili facile et com- *naturalis.* mode perficitur; contra laesa aut difficilis, quae ab ea modo aliquo deflectit. Deflectit vero aut raritate, aut frequentia, *Laesa et* aut magnitudine, aut parvitate, aut vi, aut inaequali cum *difficilis.* inspirationis tum expirationis ordine, numero, velocitate, duratione. Hinc vitium in ea esse dicitur, quando maior *Vitiosa quot* aut minor est, longior aut brevior, tardior aut velocior, *modis.*

frequentior aut ravior, vehementior aut languidior, itemque quando inaequalis, inordinata, interrupta et sic porro.

§. CXCVI.

Quatuor gradus difficilis respirationis. Verum hisce (§. CXCIV.) differentiis, quae plerumque aut morbi non sunt, aut morborum tantum symptomata, praetermissis, de illis spirandi laesionibus agemus, quae difficilem respirationem reddunt, quaeque per se gravis morbi speciem referunt. Haec in quatuor veluti gradus distinguitur, quorum singulis peculiare quoddam nomen a medicis inditum est. Sunt autem *dyspnoea*, *asthma*, *orthopnoea*, *apnoea*. *Dyspnoeam* dicunt, quando respiratio leviter tantum laeditur aut depravatur. Quando vero spiritus difficilius adducitur educiturque, pro vario difficultatis modo et varia gravitate id vitii vel *asthma* est vel *orthopnoea*. In illo scilicet respiratio frequens cum anhelitu, sibito et quadam pectoris oppressione aut molestia coniungitur; sed plerumque *asthma* debet esse recurrens et chronicum. In hac respiratio ita difficilis est, ut aeger non modo residere, et magno conatu erectaque cervice inspirare debeat, sed etiam *orthopnoea*. *rhonchos* ducere et stertere. Si demum spiritus prope videatur compressus aut ablatus cum vocis sono ferme amputato, pulsu parvo, inaequali, tardo, anxietate, pectoris pondere atque interdum dolore, tunc *apnoea* et *catarrhus suffocativus* nominatur.

§. CXCVII.

An inspiratio sola laedatur. In hisce affectibus (§. CXCVI.) quidam volunt *inspirationem* tantum laborare, non *expirationem*, ideoque perperam ad *respirationem*, quae ex utraque earum coalescit, eosdem transferri. At si quid ego iudicem, profecto hi videntur a vero non parum aberrare. Nam frequentius quidem *inspiratio* laeditur, quia plures sane causae incidunt, ut mox patebit, quae inspirationi officiant, quam quae ex *expirationi*. Sed negari haud potest, hanc quoque interdum, etsi multo rarius, vitari aut inhiberi, quemadmodum infra signi-

significabo. Itaque cum innumera ferme sint, quae respirationi rite obeundae requiruntur, ut ex physiologicis constat, cumque alia inspirationi, alia expirationi inserviant, quotiescunque eorum aliqua defecerint, respiratio etiam laedatur, necesse est. Causae igitur laesae *respirationis* erunt *Laesae respirationis multiplex causa.* bene multae; sed ut ordine procedam, ab iis primum ordinar, quae *inspirationi* impedimento sunt, deinde ad eas veniam, quae *expirationem* intercipiunt.

§. CXCVIII.

Inspirationi officiant aër vel copia, vel qualitate deficiens, vel alienis noxiisque halitibus ¹⁾ infectus, larynx, trachea ²⁾, bronchia indurata, rigentia, vel spasmo contracta, vel muco, lympa, pure, tumore, abscessu, polypo ³⁾, calculis, lumbricis ⁴⁾ aliisque alienis corporibus illapsis obstructa, vel arctata, vel compressa, vesiculae pulmonares pulvere, pilis, floccis, pituita, sanguine aliove humore oppletae, aut lapideis concretionibus, scirrhis, tuberculis, vomicis, abscessibus, oedemate vel quavis alia congestionem etiam sanguinea impeditae, hydrothorace, hydrocardia, empyemate, emphysemate ⁵⁾, hydatidibus, mediastini pleuraeque tumoribus, cordis, auricularum aortaeve dilatationibus extrinsecus oppressae et gravatae, vasa pulmonica glutinoso humore, concreto sanguine vel viscidiorum infarcta et praetumida, musculi intercostales alique, qui thoracem elevant et dilatant, paralysi tacti, aut alio modo male affecti, inflammati immobilesque redditi, nervi ad eos tendentes simili vitio laborantes, diaphragma pariter resolutum, viscera abdominalia sursum contra septum transversum, imo in cavum thoracis adacta, ventriculus flatibus turgens, aut abdomen aqua intumescens, diaphragmatis descensum impediens, et demum aër in cavum thoracis ingressus atque expansus, aut praegravatus aliquis tumor pulmonum dilatationem ⁶⁾ impediens.

1) *Aër*, si debita copia deficiat, aut immodice rareseat, inflandis pulmonibus dilatandoque thoraci impar est. Potest etiam noxiis mephitis ita scatere, ut nervos repente resolvat, sicque paralysin musculorum thoracem elevantium inducere.

2) Vid. *Vol. III. cap. XVII. de angina* §§. CCCLXXV. CCCLXXVI. CCCCXXIII. et seqq.

3) *Polypi*, quales naribus innascuntur, saepe asperam arteriam et bronchia obsident; imo interdum tussi vehementi evulsi expelluntur. Vide WARENI observationes in *Medic. transact. by the colleg. of physic. Lond. Vol. I. p. 407.*

HALLERI ob-
servatio.

4) HALLERUS (*opusc. patholog. observat. IX.*) et alii passim observarunt, lumbricos e faucibus sibi viam in laryngem et asperam arteriam parasse. Vide HERBINIUM, *Journal de médec. Novemb. 1778. p. 422.*

5) Vid. BURSERIUM in *additionibus ad DALLARIUM, Saggi di medic. prat.*

Alia MECKE-
LI.

6) *Difficilem respirationem* et demum mortem ipsam ab aëre intra dextrum thoracis cavum collecto natam vidit prae ceteris MECKELIUS (*Mémoir. de l'acad. des scienc. de Berlin. 1759. p. 42.*). Tanta erat aëris moles atque expansio, ut diaphragma ex latere dextro deprimeretur deorsum, et iecur ad intestinum coecum usque protruderet. Aër autem iste e pulmonibus in cavum thoracis erupisse videtur cl. viro. Idem cl. auctor invenit (*ibid. p. 44.*) steatoma quatuor libras et uncias tres pendens, quod superius diaphragmati inhaerebat, et pleuram et lobos pulmonis sinistri corque ipsum e sua sede dextrorsum propulerat, ventriculum vero et lienem ad umbilicum et ilium versus. *Ex sch. auct.*

§. CIC.

Quae exspi-
rationem
laedant.

Exspiratio ¹⁾ vero imminuitur aut tollitur ab aëre in pulmones ingresso nimirum elastico, et vim contractilem eorum superante, a nimia pulmonum laxitate, inertia, debilitate, ab ossea bronchiorum rigiditate, propter quam nequeunt non modo dilatari, sed ne concidere quidem, nec se restituere, a spasmodica et involuntaria musculorum intercostalium aliorumque thoracem elevantium contractione diutius, quam par est, protracta, a spasmo pariter diaphragmatis perdurante, a paralysi aut destructione sternocostalium et aliorum depressorum, a laxitate, resolutione, sectione musculorum abdominis aliisque similibus causis. Item impeditur exspiratio a diaphragmate deorsum tracto per auctam molem hepatis aut lienis, quae interdum tanta est, ut hypochondria non modo, sed etiam hypogastrium occupet.

Quomodo fiat
inspiratio.

1) Musculi intercostales interni et externi, qui duo et viginti numerantur, costas elevant; diaphragma vero, dum se

contrahit, deprimitur. Sic thoracis cavum in latum et longum dilatatur. In maioribus vero inspirationibus aut inspirandi conatibus ad dilatandum thoracem concurrunt musculi scaleni, sterno-mastoidei, serrati posteriores, superiores, anteriores utrique, pectorales, item cervicales descendentes alique fortasse thoraci, claviculis scapulisque inserti. His inspiratio perficitur. Expirationem vero elater et pondus costarum, vis retinens bronchiorum et vesicularum pulmonarium, fibrae musculares, quae in bronchiis atque in aspera arteria existunt, musculi sterno-costales LIEUTAUDII, sive triangulares aliorum, musculi abdominales et demum in vehementiori conatu longissimus dorsi, sacro lumbalis, lumborum quadratus adjuvant absolvuntque. Vid. HALLER. *Elem. physiolog. T. III. lib. VIII. sect. IV. §. VI. ad XI. Idem §. XX. ad XXIV.* *Quomodo exspiratio perficiatur.*

§. CC.

Hinc cuique exploratissimum est, difficilem respirationem saepe aliorum morborum esse filiam, neque *asthma* a sola, lenta et viscida materia pulmones replente, uti olim a quibusdam putatum est, proficisci, sed ab aliis atque aliis fere innumeris causis (§. CXCVIII.), ad quas praeterea referendus est sane impeditior sanguinis e corde in arterias traiectus; quo spectant cordis cavearum laxata compages, valvularum aortae ostio praefixarum rigiditas aut ossea durities, aorta ipsa angustior, aut polypo, aut tumore ¹⁾, aut aliis eiusmodi impedimentis tam interioribus, quam exterioribus obcoecata. Restitans enim sanguis in vasis pulmonaribus pulmonum vesiculas praegravat obruitque. *Respiratio difficilis aliorum effectus morborum.* *Alia vitia, a quibus asthma oriri potest.*

1) Ex hac causa intra paucos dies magna difficultate spirandi et pulsu intermittenti affectus obiit D. TROMBELLUS medicus chirurgus Bononiensis in oppido Lugo Ferrariensis ditioris. Iamdiu orthopnoea atque animi deliquiis levioribus pulsumque irregularitate laborabat. Eius cadaver dissectum ab excellenti medico BRUNORIO, qui in aortae ostio invenit tumorem arteriae membranas ad ovi columbini magnitudinem, omnemque cavitatem occupantem. Ex hoc cochlearia aliquot puris effluxere. Ceterum pulmo sanguine turgibat, et sanguinis aliqua effusio aderat in thorace, causa forte atrocissimi doloris, quo miser in pectore ante mortem cruciabatur. *Historia haec deprompta est ex epistola BRUNORII ad MINARDIUM medicum Faventinum missa, quam inter auctoris adversaria repertam laud inutile duximus hic memoriae mandare.* *Tumoris aortae exemplum.*

§. CCI.

*Differentiae
difficilis re-
spirationis.*

*Asthma hu-
midum et
siccum.*

*Ab aliis
causis et a
durationis
ratione aliae
differentiae.
Siccum a
convulsivo
differt.*

Itaque difficilis respiratio, prout a vitiis pulmonibus aut thoraci inhaerentibus, vel aliarum partium dissitarum culpa oritur, modo est *idiopathica*, modo *sympathica*, et pro originis diversitate modo *primaria*, modo *secundaria*, modo *symptomata*. Speciatim vero *asthma* ratione causae distinguitur in *humidum* sive *humorale*, et *siccum* sive *convulsivum*, *spasticum* et *flatulentum*. Nec desunt qui in *sanguineum*, *pituitosum*, *purulentum*, *scirrhosum* illud etiam dividant; imo durationis modo in *continuum*, *fixum*, *periodicum*, *vagum*. Passim *siccum* et *convulsivum* unum idemque reputatur, sed perperam. Nam omne *convulsivum* esse potest quidem *siccum*, non vero omne *siccum* a convulsione aut spasmo pendere perspicuum est, si ad causas, quas (§§. CXCVIII. CIC.) indicavimus animus advertatur.

§. CCII.

*Causae re-
motae asth-
matis tam
humidi,
quam sicci.*

Veluti remotiores causae *asthma* sive *humidum*, sive *siccum* antecedunt plethora in aetate media, serosa sive pituitosa colluvies, mucii copia et fibrarum rigiditas in senibus, aër humidus et frigidus, vapores metallici, sulphurei, arsenicales ¹), humor arthriticus, podagricus, scabiosus, materia variolosa, herpetica, ulcerosa ad pectus translata, haemorrhoides et catamenia suppressa, cruditas acida primarum viarum, praesertim in hypochondriacis et in pueris, caco-chylia quaecunque ²), ingesta acria, uti fungi, cicuta aliaeque plantae venenatae, remedia ex plumbo parata, affectio hysterica aut hypochondriaca ³). Denique viam malo quasi certo sternunt artes quaedam, uti molitorum, lapicidarum, tabacopoeorum, cribratorum, frugum mensorum, carminatorum lanae, lini, cannabis, et si quae sunt aliae similes.

1) Interior bronchiorum membrana adeo sensibilis est, ut ab acrioribus halitibus una cum aëre haustis illico spiritus iter praecludatur, constrictis spasmo fibris muscularibus, bronchiorum segmenta cartilaginea nectentibus. Hinc aut lethalis peripneumonia subito oritur, vel, si evaserint, *asthma* fere incurabile, et tota vita perseverans. VAN SWIETEN. §. 824. *Aër humiditate etc.*

2) Magnam *asthmatum* partem a stomacho pendere notavit BAGLIVIVS. *Append. de asthmat.*

3) In his vel a stomacho flatibus distento, vel a spasmo diaphragmatis *asthma* potest induci, nimirum vel quia sic sursum propellitur urgeturque diaphragma, ut descendere nequeat, vel quia deorsum spastice trahitur, ut laxari et elevari, quemadmodum ad expirationem opus est, nequaquam possit. FELICIUS *Del presagio medic. p. 166.*

D i a g n o s i s :

§. CCIII.

Difficilis respiratio (§. CXCV.) per se patet, atque ex Quaedam ad
iis etiam, quae dicta sunt, varii eiusdem gradus (§. CXCVI.) *diagnosin*
erui possunt. Causae vero plerumque latent, aut obscurae *recte statuen-*
admodum sunt. Quare, ubi ad eiusmodi aegros accedimus, *dam necessa-*
sedulo indagari oportet, assidue ne malum teneat, an per *riopraemitt-*
intervalla recurrat, num *primarium*, aut alterius morbi *sym-*
ptoma sit. Utrum nervi laborent, ut vel de paralyti, vel
de convulsione et spasmo suspicari liceat. An sanguis aut
copia, aut qualitate peccet. An signa adsint hydrothoracis,
aut hydrocardiae, empyematis, aut vitii alicuius organici la-
ryngem, asperam arteriam, pulmones, cor, aut vasa maiora
in praecordiis occupantis. An demum muscoli respirationi
dicati afficiantur, aut thorax consensu aliarum partium, atque
imprimis abdominis laboret.

§. CCIV.

Deinde disquirendum est, an *asthma humidum*, aut *Asthmatis*
siccum, aut *convulsivum* vexet. *Humidum* cognoscitur tussi *humidi dia-*
humida, sibilo, stertore, levamine humoris alicuius excre- *gnosis.*
tionem subsequente. Solet etiam nunc augeri, nunc mites-
cere, prout humoris congestio increseit aut imminuitur, at
nunquam intermittit, nisi morbo penitus soluto. In *sicco* *Signa sicc-*
tussis vel nulla est, vel inanis, et sputi expers. In *convul-* *et convulsivi.*
sivo et *spasmodico* signa non deerunt convulsivae affectio-
nis nervorumque aut in ipsomet eorum exortu, aut in eorum

progressu et distributione, puta abdomine, laborantium, nullus stertor, aut nullius saltem materiae sibilus persentitur, nulla eiusdem excretio, aut si ulla, uti urinae tenuis et crebrae atque aquae, sine levamine est; malum a subita plerumque aliqua causa, et praesertim animum et nervos afficiente oritur, subitoque etiam cessat, aut saltem, quando minus opinamur, sese remittit; circa diaphragmatis porro regionem constrictio quaedam percipitur, quasi zona arcte circumdaretur, somnusque si superveniat, plerumque remedio est, dum contra somno aliae asthmatis species non sublevantur. Praecipuum vero et non infrequens *asthmatis convulsivi* symptoma saepe deprehendi summam pulsuum raritatem, ex qua sola non raro morbi natura mihi innotuit.

Symptoma praecipuum convulsivi.

§. CCV.

Signa communia omnibus speciebus asthmatis.

Communia esse possunt cuique asthmati praecordiorum anxietas, pulsus parvi, inaequales, intermittentes, rari, cordis palpitatio, faciei rubor, livor aut pallor vespertina aut nocturna exacerbatio, aut ad quemcunque corporis motum mali incrementum, vocis impedimenta, extremorum frigus, e lecto resiliendi necessitas, fenestras aperiendi, vehemens scapularum, humerorum, claviculae abdominisque agitatio¹), pinnarum nasi diductio, tremor, suffocationis metus et similia.

1) Ab huiusmodi musculorum abdominalium agitatione probabile est oriri dolorem, quem in abdominali et epigastrica regione saepe queruntur asthmate graviori laborantes.

P r o g n o s i s.

§. CCVI.

Signa prava et fausta cuiusque speciei. Orthopnoeae. Asthmatis.

Quaecunque *respirandi difficultas* non vacat periculo; periculum vero pro vario eiusdem gradu, et pro varia etiam, quae eam intulit, causa modo minus modo gravius est. In *orthopnoea* ut plurimum maius. *Asthma* contumax esse consuevit, et saepe revertitur, et licet leve ab initio interdum videatur, plerumque tamen *hydrothoracis* aut alterius chro-

nici morbi triste augurium est. In senibus vix unquam curatur, imprimis si inveteraverit; imo in *catarrhum suffocativum* et *apnoeam* facile transit. *Siccum* in *humidum* verti cum facili et levante pituitae excreatione bene ominatur; contra, si cum virium deiectione mutatio haec obvenerit, nam indicium tum esset, instare *catarrhum suffocativum*, sive sanguinis per pulmones traiectionem prorsus intereceptum iri. *Asthma convulsivum* sive *spasticum* acutus vere morbus est, et saepe vel optimis remediis reluctatur. Raro tamen occidit, nisi cerebrum aut cor graviter una laedatur. *Qui gibbi in asthmate aut tussi fiunt, ante pubertatem moriuntur* ¹⁾. *Spinae perversionem et spirandi difficultatem sanguinis fluxus liberat* ²⁾. *Spirationes, quae nanisi erecta cervice ducuntur, hydropem siccum faciunt* ³⁾.

Siccum in humidum verti, bonum interdum, quandoque etiam malum. Convulsivi vel spastici.

HIPPOCR. aphorismi.

1) HIPPOCR. Aphor. 46. sect. VI.

2) Coac. praenot. 311.

3) Coacar. 424.

§. CCVII.

Huc transferendum quodammodo est illud HIPPOCRATIS oraculum: *Ex iis, qui strangulantur, et resolvuntur, nondum autem sunt mortui, non se recolligunt, quibus spuma circa os fuerit* ¹⁾. Tanta enim videtur fuisse suffocationis vis, ut non omnis faucium, et tracheae mucus inter respirandi conatus expressus, et cum aëre intime permixtus in spumam abiverit, et simul vasa cerebri aut rupta, aut enormiter dilatata nervorum omnium, etiam vitalium actionem sustulerint. Praeterea spuma circa os lethale signum exhibere poterit, ubi haec incipientis intra pulmones corruptionis aërisque sese extricantis fuerit significatio. An imadversione quoque dignum est illud, quod monet RIVERIUS ²⁾, nimirum complures *difficultati urinae* obnoxios saepe, hac evanescente, in *asthma* incidere, redeunte vero, ab *asthmate* liberari. Quod etiam de podagricis affirmari potest. Frequentissimum enim est, eos gravissima difficultate spirandi corripiri, si *podagra* diutius immunes exstite-

Signum vere mortuorum, cur spuma circa os.

Observatio de asthmate ex metastasi aliorum morborum.

rint, nec prius convalescere, quam podagra ad pedes aut artus sese iterum contulerit.

1) *Aphor. 43. sect. II.*

2) *Prax. med. cap. de asthmate.*

C u r a t i o.

§. CCVIII.

Indicationes.

Causis curatio accommodata est. Missis autem spirandi difficultatibus, quae aliorum morborum symptomata sunt, quaeque ab eorundem curatione levamen exspectant, ad eas descendam, quae peculiare propriumque expostulant medicinae genus. Itaque si aër difficultatem spirandi fecerit, emendari arte debet, aut eius mutatio imperari. Si venena aut noxii vapores in suspicionem veniant, notae acritati occurrere contrariis remediis oportet, aut citissime, si fieri possit, eorum expulsionem moliri. Si a paralysi aut spasmo malum pendeat, omnia, quae in *capite VIII. Vol. III. de nervorum distentione et rigore* proposuimus, hic quoque opportuna erunt. Sed imprimis quando *convulsivum* et *spasticum* asthma est, oleum e vegetabilibus expressum, alterantisque in modum datum egregie prodest, itemque reliqua, quae molliunt et laxant, et ea pariter, quae anodyna sunt, uti liquor anodynus mineralis HOFFMANNI, sal sedativum HOMBERGII, liquor C. C. succinatus, sal volatile succini, camphora, moschus opiumque. Extrinsecus ad laxandum musculorum intercostalium spasmum conferre cataplasma ex cepis in oleo olivarum assatis praedicatur a nonnullis. Peregrinatio vero aërisque in salubriorem mutatio, quam BAGLIVIVS summopere laudat ¹⁾, hic praesertim locum habet. In asthmate sicco aut convulsivo humidi suffitus et vapores a LOUISIO ²⁾ commendantur.

1) *De morbor. succession. cap. XII.*

2) *Mém. de l'Acad. roy. de chirurg. T. V. ann. 1774. p. 549.*

Si ab aëre oriatur.

Quid agendum, si a causis venenatis sit.

Si a paralysi aut spasmis.

Oleosa.

Anodyna.

Quid si a spasmo nervorum intercostalium.

Aëris mutatio.

§. CCIX.

In summa *spirandi difficultate*, si repente corripuerit, *Venae sectio* atque homini non aetate, nec morbis fracto supervenerit, *quando conveniat* quaecunque eius causa sit, expedit sanguinem e vena brachii mittere, et multo magis, si plethora, si rubor faciei, si evacuatio aliqua suppressa id auxilii exigere videantur. Neque ab ea pulsus parvus, obscurus et contractus, aut extremorum frigus deterreat, dummodo reliqua non repugnent.

§. CCX.

Primarum viarum sordes, ubi sui indicia proferunt, *Emetica.* morbumque fovere videntur, vomitu aut alvi ductione expellantur. Vomitione illud etiam efficitur, ut, si quid in *Cathartica.* pulmonibus haereat, valide inde excutiat. In asthmate *Quid asthmatis humido.* porro humido crassioris viscidiorisque pituitae excretio *Oleosa.* adiuvanda est oleosis, incidentibus, saponaceis. Imprimis laudantur veronica, scabiosa, althaea, hyssopus, helenium, *Incidentia.* radix iridis florentinae, sperma ceti, gummi ammoniacum, sapo venetus, oleum lini, mel, oxymel acetumque scilliticum, syrupus nicotianae, althaeae, erysimi, millepedes, eorum *Saponacea.* dilutum, aut ex vino albo expressio, alcalia volatilia, balsamica et terebinthinacea. Flores etiam sulphuris hic commendantur. FONSECA ¹⁾ pomo dulci excavato indebat floris *Flores sulphuris et thus.* sulphuris scrupulum, et tantundem thuris masculi. Postea operculo suo clausum coqui cum cortice praecipiebat sub cineribus calidis, et sic coctum, et cortice mundatum comedendum dabet alternis diebus ad octo vel decem vices. Conficiebat etiam *electuarium* in hunc modum: Rec. *Sacchari, diamargariton frigid., diapenidior. ana unc. j., flor. sulphuris pulv. drachm. iiij., mell. despumat. q. s f. electuar. molle.* *Dos. drachm. j. bis aut ter in die.* *Qui-* *Formula tabellarum.* bus vero tabellarum forma magis arridet, hae sic parari possunt. Rec. *Sacchari rosat. unc. j. flor. sulphur. drachm. j. M. F. s. a. tabellae.* Quod si humor pulmones obstruens *Mucilaginea.* videatur potius serosus atque acer, quam crassus et visci-

duſ, tunc praeter oleoſa mucilagineſ quoque, emulſiones, decocta hordei, hydrogala ceteriſ praeſeruntur.

1) *Conſil. med. LVIII.*

§. CCXI.

Radix ſcillae.

Marrubium album.

Fumus tabaci, tuſſilaginiſ, achilleae montanae.

Incidendi et ſputum urinaſque movendi laude celebratur radix ſcillae ¹). Hanc HESSIUS adhibebat a graniſ tribuſ uſque ad grana duodecim ²). Marrubium etiam album potenter viſcidoſ et lentoſ humoreſ incidit et ſolvit. Alii ſuccum eiſ, alii pulverem radiciſ, alii ſyrupum, conſervam alii ſummopere extollunt. At LANGEUS ³) ex pulvere foſſiorum leni calore ſiccatorum maiuſ emolumentum cepit. Tenerrimi ſurculorum apiceſ ad id aptioſe dicuntur. Fumum *tabaci* experientia commendavit. Eo enim egregie ſputum elicitur, pulmoneſque repurgantur. Sed *tabaco* ſubſtitui poteſt tuſſilago in eundem uſum, et achillea montana artemiſiae tenuiſoliae facie Lobelii, quam ſaepe profuiſſe memoriae ⁴) proditum eſt.

1) *Videſiſ animadverſioneſ de ſcilla in Adverſariis med. pract. LUDWIGII. Vol. II. P. IV. c. 4. pag. 695.*

2) *Commerc. litt. Norimb. an 1739 hebdom. 34.*

3) *Miſcell. verit. fascic. I. p. 57.*

4) *Memor. dell' accad. di Parigi. Edit. venet. T. IX. p. 25.*

§. CCXII.

Acida vegetabilia.

Praeſtantiora acida foſſilia, praeſertim in ſenibuſ.

Acida quaecunq; pulmoneſ ad tuſſim exſtimulant, et ſimul incidunt, exſcreationemque promovent. At interdum e vegetabilibuſ deprompta ob admixtaſ mucosaſ parteſ vix ſatiſ operantur, praeſertim in ſenibuſ, qui obtuſiori ſenſu donantur. Quare FARRIUS in eorum aſthmate et tuſſi foſſiliuſ acida tam intrinſecus, quam extrinſecus adhibenda mavult ¹). Multo vero priuſ a FLOYERO ²) commendata fuerunt, imprimiſ nitri ſpirituſ, et *gas ſulphuriſ*, ſive aqua ſunio ſulphuriſ acidulata. Longo autem uſu cantharideſ celebritateſ acquiſiverunt. Hae enim cuti admotae, ut notum

Cantharides.

est, non modo vesicas excitant, unde humor prolicitur, verum etiam aliquid sanguini immittunt, quo eius lentor attenuetur. Quare mos est quorundam, eas pluries et variis locis adhibendi, ut earum vis cum sanguine magis communicetur. His pituitosos senesque pristinae sanitati semper restituit *Praestantes* KLAUMINGIUS.³⁾), ut ipse narrat. Potissimum vero in usum *in metastasi.* veniant, quando metastasis morbo causam praebuerit.

1) *De acid. virib. p. 123.*

2) MEADIUS *De imperio sol. et lun. p. 19. vel 29.*

3) *Ephem. N. C. et CRANTZIUS Mat. Medic.*

§. CCXIII.

In ipso autem suffocationis metu praeter sanguinis missionem, de qua supra dictum est, plurimum saepe profuit pedes, aut manus, prout commodius fieri potest, in calidam demittere, fricationibus et cucurbitulis artus subiicere, aquae vaporem per os haurire. Devicto vero morbo, danda opera est, ne revertatur. Eo collimant fonticuli brachiis, femoribus, aut intra scapulas inusti, quos praeter MEADIUM¹⁾) complures alii proponunt. Sanguinem quoque vario modo emendare oportet, quo spectant multa, sed praesertim serum lactis, et lac ipsum, iura cancerorum fluviatilium, ranarum, testudinum, viperarum²⁾), succi herbarum temperantium et antiscorbuticarum, decocta lignorum, aquae thermales, balnea, equitatio, vectio, aëris in rusticum et puriorem mutatio. Quae enim de exhalationibus e terra aratro fracta, aut e fodinis sulphureis emanantibus praedicantur, etsi certis non sint experimentis innixa, non tamen omnino spernenda videntur. His igitur pro causarum diversitate uti licet ad prophylaxin, quibus si etiam victus opportuna ratio adiungatur, spes maior erit morbi arcendi praecavendique.

Balnea calida.

Fricationes.

Cucurbitulae.

Vapores

aquei.

Ad prophylaxin.

Fonticuli.

Quae sanguinem emendent.

1) *Monit. et praecept. med. cap. V.*

2) Vide § 142. in not. Volum. III.; ibi enim viperini iuris usus fusius ab auctore defenditur contra quosdam eius vituperatores.

§. CCXIV.

Suspensi et submersi quomodo curandi. *Apnoeae* summum gradum attingunt laqueo suspensi, aut aqua submersi. Hi ad vitam interdum, dummodo vere mortui non sint, revocari possunt. Non erit ergo alienum tradere, qua ratione iis succurendum sit. Utrisque corpus universum valide, et diutissime perfricandum est; venae brachii, aut colli aperiendae, ut sanguinis aliquot unciae effluant; cucurbitulae siccae affigendae; clysteres acres subter dandi; fumus tabaci ¹⁾, aut aër in os (compressis naribus, ne per eas redeat), atque in anum insufflandus; acria naribus indenda, et vino calido os fovendum. Strangulatis etiam oleo et vino calido collum inungendum, submersis vero aequali temperato calore, quo foveantur, opus est. Quibusdam remedio fuit cinis aut arena calefacta, qua scilicet universum corpus involutum fuit. Neque hic silentio praetereundi sunt ii, qui vaporibus aut halitibus venenatis, uti carbonum, cloacarum, aliarum mephitium suffocationem aut mortem apparentem incurrerint; nam quantocius in aërem apertum, et frigidum capite elevato, maxillis diductis transducendi sunt, aqua frigida aspergendi, et fere eadem ratione, qua submersi et suspensi, ad vitam compellendi. In horum tamen os aut anum acria et volatilia, non vero stupefacientia, qualis *tabaci* fumus est ²⁾, immitti debent. Deinde etiam, prout res exigit, alia excitantia, revellentia et evacuantia administrari possunt.

Vaporibus venenatis suffocati.

Aër frigidus et liber.

Aquae aspersiones.

Cautio circa usum tabaci et acriora remedia.

1) Submersum *tabaci* fumo in anum insufflato ad vitam Genuae anno 1777 revocatum fuisse, nuper ex literis comperi Cl. viri I. B. PRATOLONGO, cuius consilio atque ope id auxilii ibi primitus adhibitum fuit. *Ex sch. auct.*

2) CARMINATI *De Animal. ex mephit. et noxiis halitibus interitu.*

CAPUT VII.

DE ANIMI DELIQUIIS, SIVE DE LIPO-
THYMIA ET SYNCOPE.

§. CCXV.

Quando vitales animalesque actiones imminuuntur, aut *Animi deli-*
abolentur ita, ut homo se viribus repente destitui sentiat, *quum quid*
pallescat, frigeat, pulsibusque arteriarum evanescentibus mo- *sit et quo-*
rituro, aut mortuo similis evadat, tunc is *animo linqui* di- *tuplex.*
citur. Cum vero huius morbi varii sint gradus, non alie-
num est, eorum singulos recensere. Levissimus omnium est
Ἐκλυσις, sive *virium exsolutio* ab *ἐκλύω* *exsolvo*. Hunc
subsequitur *Λειποθυμία* ¹⁾, sive *animi deliquium* aliquando
gravius. His omnibus adhuc gravior est *Συγκοπή*, vox graeca
a GALENI temporibus in artem invecta, quae definitur *prae-*
ceps virium omnium lapsus, sive *subita rescissio*; *κόπτω*
enim *scindo* est. Omnium denique gravissima habetur *syn-*
cope, quae cum ²⁾ *Ἀσφυξία*, sive cum *pulsus* in toto cor-
pore *abolitione* coniungitur, *Σφύξις* enim, sive *Σφυγμός* *pul-*
sus est; cui particula privativa addita fit vox, quae *sine pulsu*
sonat. Sed speciatim de *asphyxia* in sequenti capite dice-
tur, cum non recte, mea quidem sententia, ad animi deli-
quia referatur. Plerumque enim in *asphyxia* sensus et mo-
tus et calor supersunt, quod minime *syncope* *graviore* cor-
reptis convenit.

An asphyxia
ad animi de-
liquia recte
referatur.

1), Synonyma sunt *lipothymia*, *lipopsychia* et *apopsychia*
a *λείπω* *derelinquo* et *Θυμός* *animus*, aut *Ψυχή* *anima*.

§. CCXVI.

Causa proxima videtur esse cordis et sanguinis motus *Causa pro-*
fatiscens, aut etiam plus minus interceptus. Languenta enim *xima.*
aut feriente cordis motu, languent ferianturque tum vitae,
tum animi actiones; in quo positam diximus *animi deliquio-*

Causae remotae.

rum naturam. Antecedentes et remotae causae sunt subitae et graves animi commotiones, odorum acutiorum perceptio, dolores aliquarum partium acerbiores ¹⁾, spasmus cordis gravior non minus, quam eiusdem paralytica resolutio ²⁾, nervorum cardiacorum compressio aut irritatio ³⁾, convulsiones in cerebro inceptae, aut alibi exortae, et ad cor ipsum propagatae, ossicula in processu falcato meninges et cerebri prementia, irritantia, pungentia, talia scilicet, et tali in loco posita, ut nervos convellere aut resolvere possint, qui ad cor spectant, aut cum corde consentiant ⁴⁾, evacuationes inmodicae quaecunque, venena, febres malignae et pestilentes, balnea calida, transitus subitus e loco temperato in calidum, aut e calido in frigidum, plethora tam vera, quam apparens, sanguinis ad cor reditus impeditus, aut auctae eidem e corde propellendo resistentiae, cacochymia, acritates aliaeque pravae sanguinis constitutiones, ventriculi, et imprimis eius sinistri orificii morsus et irritatio, primarum viarum putridae, acidae, alcalescentes cruditates et sor-des, biliosa colluvies, vermes cuiusvis generis, et praecipue teretes et lati, hysterica ac hypochondriaca mala, et demum vitiosa structura, vitia ipsa cordis et adsitarum partium.

1) SENAC. *Du coeur. Lib. IV.*

2) MORGAGNIUS *Epist. anatom. XXIV. n. 13.*

3) *Id. ibid. n. 5.*

4) *Id. ibid. n. 6. 7.*

§. CCXVII.

Aliae causae ab aliis praecordiorum citiis.

Inter haec primus fere locus tribuitur ab ALBERTINIO et MORGAGNIO venae cavae et auriculae dextrae dilatationi, speciatim si una nervorum principium, aut cardiaci nervi idiopathice aut sympathice afficiantur ¹⁾; deinde polypis dextri et sinistri cordis ventriculi, tum maxime, cum serum in cerebri cava effusum concurrat ²⁾, aut cor simul ulcere *) labore, quo casu dolor plerumque etiam in eius regione percipitur ³⁾; aortae item ac arteriae pulmonari praeter modum expansis et dilatatis. Tunc enim maiori nisu opus est

cordi, ut sanguinem protrudat per arterias, cum eius propulsio minime ab arteriarum systole sustineatur. Si vero eodem praeterea tempore cerebrum aqua aut alio modo compressum forte sit, eo magis cordis vis imminuta et languens resistenti sanguini cedat succumbatque necesse est ⁴).

1) *Epist. anatom. med. XXV. n. 3.*

2) *Id. ibid. n. 4.*

3) *Id. ib. n. 17. 20. 21. 22.*

4) *Id. ib. n. 11.*

*) *Cordis ulcus cancerosum cum lipothymia et syncope* CARCASSONII observavit CARCASSONIUS. En morbi historia, qualis exstat *observatio. Tou. II. p 252. Histoir. de la Société Roy. de médec. etc.* Iuveneula annorum XXII: huc venerea laborans unctione mercuriali curatur. Libera evadit ab omnibus malis, quibus torquebatur. Superfuit solum quoddam pondus in interiori pectoris parte e regione mammae sinistrae intra quintam et sextam costam verarum; de quo ante unctiones querebatur. Quinque aut sex mensibus post absolutam antiveneream curationem assidue de eodem pondere lamentabatur; sed praeterea accesserat dolor pungens ad eundem locum, nempe a centro mammae ad medium sternum eiusdem lateris sinistri. Comparabat huiusmodi dolorem ad acus puncturas subinde inflitas. Fames canina per annum unum subsecuta est, quam hienteria comitabatur. Pulsus erat parvus, frequens et intermittens. Inter dolorum cruciatus pulsus deficiebat per aliquot minuta secunda. *Lipothymiae* et *syncofes* crebrae. In progressu decumbere non poterat nisi erecta, nonnihil inclinans retrorsum super latus sinistrum, aut super *anterius (le devant)* pectoris. Dolor, qui binos annos perseveravit, gradatim augebatur. *Syncofes* frequentiores, querelae item, praesertim sub vitae finem. Anno ante mortem famem caninam excepit cibi fastidium. Sectio anatomica ostendit *ulcus etc.* *Ex sch. auct.*

§. CCXVIII.

Nec fortasse a vero abest, aërem quandoque evolutum, *In cordis caveis aër evolutus syn-* et cordis cava distendentem in causa esse, cur, impedita *copes causa interdum est.* eius systole, *syncope* subsequatur; quod observavit GRAET- *Item hydrops pericardii et ruptura cordis.* ZIUS ¹), referente MORGAGNIO ²). Pericardii etiam hy- drops, aut eius cum corde aliqua connexio cordis motum impedire interdum visa est ³); sive id fiat, quod aqua circumfusa eius fibrae mollescant enerventurque, sive quod compressione et pondere ita cor revinciatur, ut libere dilatari nequeat. Quidquid demum sive proxime, sive remote

*Exemplum
eiusdem.*

cordis motum cohibere, infringere aut tollere potest, causarum remotarum loco erit. Lethalem syncopen etiam subito efficiunt cordis rupturæ. LUDWIGIUS affert exemplum ⁴⁾ dextræ cordis auriculæ per externum ictum disruptæ, et subitam inde mortem afferentis. Sinistram quoque auriculam cordis diffractam a *polypo* intus contento vidit LANGHANSIUS ⁵⁾; itemque corruptum refert ⁶⁾ DIETERICUS NUMMSENIIUS Hamburgensis.

1) *Dissertat. de hydrop. pericard. in prooem.*

2) *L. c. n. 13.*

3) *Id. ib. n. 15. 16.*

4) *Advers. med. P. I. p. 234.*

5) *Act. helvet. T. II.*

6) *Dissertat. inaugural. de corde rupto. Lips. 1764.*

D i a g n o s i s.

§. CCXIX.

*Diagnosis
eclysis et
lipothymiae.*

Eclysin, sive imminentem *lipothymiam* praenunciant capitis offuscatio, gravitas, vertigo, tenebrae oculis obversantes, faciei et labiorum pallor, extremorum frigus, virium languor, sudor e fronte et collo manans, anxietas praecordiorum, pulsus parvus, imbecillus, frequens, varius et subito mutabilis; quae omnia fiunt graviora, si iam adsit *lipothymia*. In *syncope* autem ipsa subitus et praeceps est virium lapsus, respiratio fit obscura, pulsus minimus, aut nullus, facies pallet et livet, totum corpus frigido madet sudore ac alget, aegri nec vident, nec audiunt, nec loquuntur, sed concidunt, membra quasi resoluta laxantur, interdum spasmi inaequaliter tenduntur, nares acuminantur, oculi subsidunt, incavantur, invertuntur, tempora collabuntur, et si ad summum gradum *syncope* pervenerit, quem aliqui asphyxiam vocant, facies etiam virescit.

*Signa dia-
gnostica
synopes.*

§. CCXX.

*Qui syncope
ab apoplexia
distinguitur.*

Differt porro *syncope* ab apoplexia per pulsum, respirationem et faciei colorem, quae ut plurimum in apoplexia ser-

servantur, imo quandoque invalescunt, contra vero deficient *Quomodo*
 in *syncope*. Item ab epilepsia, quod membra alternis moti- *ab epilepsia.*
 bus universa convelluntur, non concidunt, ac spuma ex
 ore prorumpit. Ab hysterica demum suffocatione, quod in *Ab hysterica*
 hac respiratio saepe cessare videtur, non tamen pulsus, nisi *suffocatione.*
 forte cum ea etiam syncope copuletur. *Lipothymia* et *syn-* *Lipothymiae*
cope solitis differentiis et ipsae subiiciuntur, quibus alii morbi. *et syncopes*
differentiae.
 Hinc *primaria, secundaria, symptomatrica, sympathica, hy-*
sterica, convulsiva, idiopathica appellatur. *Cardiacae* sin-
 gulare nomen obtigit ei imprimis, quae ab organicis ipsius
 cordis aut proximarum partium vitiis pendet.

P r o g n o s i s.

§. CCXXI.

Qui saepe et vehementer absque manifesta causa animo *Quando exi-*
linquuntur, ex improviso moriuntur ¹⁾). Hi enim vel po- *tium porten-*
lypo, vel aneurysmate, vel alio organico vitio laborare viden- *dat animi de-*
tur, quo tandem penitus cordis et sanguinis motus interci- *fectio.*
pitur. Saepe etiam mortis causa est subita cordis aut vaso-
rum eius disruptio, et sanguinis cita in cavum pericardii aut
thoracis effusio. Si fluxui muliebri convulsio et animi de-
liquium superveniat, malum ²⁾). Convulsio enim ab inani-
 tione lethalis esse consuevit, neque cor, ubi sanguinis prae-
 sentia deficit, suum motum instaurare potest. Ceterum cau-
 sarum diversitas diversam quoque prognosin efficit.

1) HIPPOCR. *aph.* 41. *sect.* II.

2) *Aphor.* 50. *sect.* V.

C u r a t i o.

§. CCXXII.

Duplex curatio est, altera in *paroxysmo*, ut vocant, *Aquae frigi-*
 altera extra ipsum. In *paroxysmo* statim motus sanguinis *dae aspersio*
 et cordis excitetur. Facies itaque aqua frigida extemplo *in facie.*

Volatilia naribus applicata. aspergatur. Contractis enim frigore fibris sanguis per venas ad cor provehitur, eiusque motum instaurat. Hac etiam ratione nervea vis incitatur, ut cordis irritabilitas in actionem revocetur. Idem praestant volatilia naribus admota, uti aqua melissae *spirituosa*, et reginae Hungariae, acetum acerrimum, sales volatiles oleosi, spiritus salis ammoniaci, urinae, cornu cervi, oleum succini. Cavendum tamen est, ne odoramentis aut ptarmicis aegrum laedamus. Sunt enim qui ea sive suavia, sive ingrata minime ferunt, aut ab iisdem convelluntur, quod, ubi *lipothymia hysterica* aut *convulsiva* est, plurimum officit. Acetum et sales volatiles fere ab omnibus feruntur. Intrinsecus quoque vinum generosissimum, spiritus melissae, aqua cinnamomi, confectio *altermes* salesque volatiles, aut ex his mixturae variae prudenter et partitis vicibus ingeri possunt. Cautè tamen cardiacis utendum, ubi *syncope haemorrhagiam* subsecuta est, nam liberalior eorum usus, excitata nimis vitali vi, haemorrhagiam iterum ciere posset.

§. CCXXIII.

Alexipharmaca, si a malignis causis sit, vel a febris perniciosa. Si malum a malignis venenatisque causis oriatur, alexipharmacis ac antidotis erit ei occurrendum, nimirum theiaca, contrayerva, serpentaria virginiana, vino, cortice peruviano, praesertim si *lipothymia* aut *syncope* febris perniciosae symptoma sit. Castoreum, camphora aliaque anthyserica conveniunt, si ab utero fiat; si vero a stomacho ac intestinis, ea opportuna sunt, quae causam tollunt aut emendant. Vehemens dolor sedantia ac anodyna exposcit; et plethora, polypus, aneurysma, terror missionem sanguinis. Neque frictiones, cucurbitulae siccae acresque clysteres omitantur, ubi diutius malum trahitur, neque supervacua sunt.

Anodyna. reliqua revellentia, si cerebrum primario affici suspicio sit.

Revellentia.

§. CCXXIV.

Curatio extra paroxysmum. Extra paroxysmum causae penitus auferendae sunt, ne revertatur *animi deliquium*. Generatim cardiaca, instau-

rantia, volatilia commendantur, utpote quae sanguinem et cor excitant, humores reparant, aut, si opus fuerit, resolvunt. Quo etiam omnis vitae regimen spectare debet.

CAPUT VIII.

DE ASPHYXIA DUOBUSQUE EI PROXIMIS PULSUUM VITIIS.

§. CCXXV.

Asphyxia, ut paulo ante docuimus, est *pulsus privatio*. *Definitio.* et quidem talis, ut nullibi in toto corpore, saltem tactui, arteriae moveri videantur. Hoc modo accipitur a GALENO aliisque, qui eius vestigiis institerunt ¹⁾. Quoniam vero in syncope graviore pulsum saepe defectus observatur, ideo asphyxiam cum syncope ita nonnulli coniunxerunt, *An cum syncope confundenda asphyxia?* ii praesertim, qui arteriarum pulsum omnem a cordis systole repetunt, ut quasi summus quidam eius morbi gradus putaretur. Hinc nil mirum, si Cl. SAUVAGESIUS *mortes apparentes uno asphyxiae nomine comprehenderit*, cui tamen adversatur prae ceteris auctoritas LANCISII, qui in libro — *Opinio SAUVAGESII rejicitur auctoritate LANCISII.* *de subitaneis mortibus* — eiusmodi syncope correptos non *Ἀσφυκτοὺς* (i. e. asphycticos), sed *pseudomortuos* appellat.

1) GALENUS *lib. I. de praesag. ex pulsib. cap. II. et lib. I. de different. puls. cap. 3.* BONETUS *Medicin. septentr. T. I. l. 2. sect. XXI. cap. 2. et Sepulchret. T. I. l. 2. sect. IX. Observ. I. IV. VII. XLV. et BARTHOLIN. de luct. theor. cap. 14.*

§. CCXXVI.

Adversatur quoque SAUVAGESIO Cl. MORGAGNIUS, qui *Refutatur asphyxiam esse tradit, quando pulsus adeo imminuuntur, ut percipi amplius non possint, additque, aegros interea sensibus adhuc pollere, loqui, moveri, imo etiam non penitus* *quoque SAUVAGESII aliorum cel. virorum ob-*

*servationibus.
Differentia
inter asphyxiam et syn-
copen.*

*Exempla
diuturnioris
asphyxiae.*

*MORGAGNII
observationes de asphy-
xiae notis.*

frigescere; quo sane differunt evidentissime a syncope mor-
teque apparente detentis ¹⁾). Hanc porro de *asphyxia* opi-
nionem observationibus non tam *sepulchreto* BONETI inser-
tis, aut e VALSALVAE *schedis* depromptis, quam compluri-
bus suis aliisque non paucis hinc illinc collectis et prolatis
invictissime comprobatur. Recenset enim ibidem ²⁾) nedum
unius, vel alterius diei *asphyxias*, verum diuturniores, quae
scilicet ad quadraginta et ultra dies, imo ad quatuor usque
menses fuerunt productae; quin respiratio, loquendi poten-
tia, sensus, motus, vires calorque desiderarentur ³⁾). Imo
in *adversariis* ⁴⁾) non solum ex BALLONIO ⁵⁾) *asphyxiam*
quatuordecim dies ante obitum perstantem, sed etiam duos
ex RIOLANO ⁶⁾) excitat, qui sine ullo arteriarum pulsu sex
et decem annos vixerunt; qualem casum etiam a RONSALDO ⁷⁾)
visum ibi pariter memorat. *Aegri enim externis internis-
que sensibus satis vigent, loquuntur commode, se de latere
in latus convertunt* ⁸⁾), *quin prompte se erigunt aliqui* ⁹⁾),
et (quod noster vidit RAMAZZINIUS ¹⁰⁾) *iuvenis quidam
hebraeus, cui ad quatuor dies nullibi arteriae micabant,
adeo robustus erat, et ad motum expeditus, ut etiam ipsa
die, qua e vivorum statione decessit, e lectulo surrexit,
et suas vestes induerit* ¹¹⁾). Quare appositissime vir prae-
clarissimus animadvertit, *asphyxiam sine syncope esse posse,*
syncopen sine asphyxia non posse ¹²⁾).

*Asphyxia
sine syncope
est, haec vero
sine illa non
datur.*

1) *Epist. anatom. med. XXIV. n. I. IX.*

2) *N. VIII. IX.*

3) Consentiant observationes HALLERI *Tom. III. oper. minor. p. 306.*, RAMAZZINII *constit. epidem. ann. 1692. ... 93. ... 94. §. 23.*, SCHENCKII *Tom. II.*, BERRYAT. *Mém. de l'acad. royal. des scienc. de Paris. ann. 1748. pag. 58. et Comm. Lips. vol. II. P. IV. pag. 578.*

4) FERNELIUS *asphyxiam* XXIV. horarum curatam narrat, confirmatque RAMAZZINIUS *constit. cit. §: 33.* Post sex dierum *asphyxiam* quosdam convaluisse testatur BARTHOLINIUS *cent. IV. observ. 42.*

5) *Advers. II. animad. 44.*

6) *Epidem. II.*

7) *Encheirid. anat. lib. V. cap. 46.*

8) MORGAGN. *cit. epist. XXIV.*

- 9) *Ibid.* n. 2.
 10) *Ibid.* n. 6.
 11) *L. c.* n. 9.
 12) *Epist.* XXV. n. 1.

§. CCXXVII.

Atque haec, quam modo descripsimus, est *vera* asphyxia. *Asphyxia vera.*
 Sunt quidem aliae asphyxiae species, quas cum HAENIO *Spuriae*
spurias ¹⁾ vocamus. Tales sunt asphyxiae in alterutro aut *asphyxiae*
 utroque brachio observatae; dum interea reliquae arteriae *quae et quot.*
 temporales, carotides, crurales aliaeque consueto motu attol-
 luntur et subsidunt. Hae autem peculiariū partium *asphy-* *Origo et*
xiae vel a profundius locatis arteriis, aut nimia pinguitu- *causae ha-*
 dine sepultis, vel a variata earum distributione, aut insolita *rum spuria-*
 tenuitate, aut a subclaviarum ²⁾, axillarium aut humeraria-
 rum compressione, aut earundem obstructione aut spastica
 constrictione oriuntur. Inter quas referri etiam debet illa
 asphyxia, quae in fine plerorumque morborum ante mortem
 ex virium omnium, ac imprimis vitalium, languore et de-
 fectu supervenit. Non enim in hac, ut in illa *vera*, motus,
 vox, sensus, color et calor aequè servantur.

1) *Rat. med.* T. XII. cap. 2. p. 42.

2) Pulmones infarcti, duri, tumidi *subclavias* etc. premunt.

§. CCXXVIII.

Spuriarum autem *asphyxiarum* ut non admodum ob- *Verarum*
 scura origo, sic quoque non difficilis explicatio videtur. *causae pro-*
 At *verarum* dispar ratio est. Parum enim lucis cadaverum *babiliores.*
 sectiones hactenus huic malo attulerunt. Verosimile tamen est,
 easdem causas, quibus *lipothymia* et *syncope* (§§. CCXVI.
 CCXVII. CCXVIII.) inducitur, hic quoque locum habere,
 sed mitius agentes. Inter has arteriarum rigiditas rationi *Arteriarum*
 videtur magis consentanea, qua fit, ut sanguinem illae qui *rigiditas cui*
 dem recipiant, distendi vero, ac in diastole micare nequeant. *asphyxiae*
 Idque sane de ea dici potest audentius, quacum universi *speciei expli-*
 corporis mentisque aliquis languor coniungitur. Quomodo *candae con-*
veniat.

vero eiusmodi causae apte accommodari poterunt *asphyxiae* diuturniori, illibatas mentis functiones ac alacre musculorum exercitium constanter servanti? Cur cessante arteriarum, quae tactu explorari possunt, motu, non etiam illico cessant reliqui motus et reliquae functiones, ut in syncope?

*Conjecturae
de causis
diuturnioris
asphyxiae.*

Fortasse cor in *asphyxia* vasaque maiora circa cor ita moventur adhuc, ut sanguinis circuitus per pulmones, cerebrum et cerebellum perennetur. At diu calor et vita in partibus a corde remotioribus superesse nequeunt, nisi in his quoque aliquis, etsi lenis, ponatur humorum circuitus. An ergo, motu cordis et sanguinis utcunque perseverante, sola arteriarum systole nervorum ad eas spectantium vitio conquiescit? Multa profecto argumenta ab accuratissimis observationibus deducta videntur evincere, arteriarum motum non a sola cordis vi dimanare ¹). Sed missa re difficillima explicatu, in qua nihil certi neque MORGAGNIUS, neque HAENIUS statuerunt, satius est aliquid de causis, quas anatome in *asphyxia* defunctis detexit, referre.

*Arteriarum
motus non a
sola cordis
vi dependet.*

1) Id RHODII, LANCISII, MORGAGNII, HAENII, ZIMMERMANNI, BARTHEZII aliorumque observationes evincunt.

§. CCXXIX.

*HAENII ob-
servaciones
anatomicae
de asphyxiae
causis.*

HAENIUS scribit ¹), *anatome facta multorum post asphyxiam mortuorum, cor et auriculas flaccidas dilatatasque, in aliis grumosum cruorem, in aliis multa alia vitalium viscerum detecta vitia esse; integrum cuique esse, horum vitiorum cuilibet originem tribuere causasque asphyxiae, esse vero huc usque et imperfectam et incertam explicationem omnem, cum non in omnibus eadem causae repertae fuerint; cum hae ipsae causae in aliis asphyxias generatrices non exstiterint; cum causae enarratae quaecunque alios longe morbos creaverint; cumque tandem mira, sed obscura de nervis doctrina id saltem evicerit, ne vestigiis quidem vitalium morborum in cadavere inventis, hos a solis nervis excitari perpetuarique posse.*

1) *Rad. med. T. XII. p. 49.*

§. CCXXX.

Ex MORGAGNII vero anatomicis disquisitionibus certo colligere possumus, *asphyxiam* aliquando natam non tam a pericardio per vincula membranæ cordi adhaerente, quam ab ipsius cordis exteriori membrana crassiori et duriori facta, qua commode cor dilatari prohibeatur ¹⁾, et tunc præcipue, cum simul pericardium aqua aut pure scateat; itemque a polypis in corde aut initio arteriæ magnæ locatis ²⁾, aut a sero in ventriculis cerebri collecto, cerebellumque afficiente, aut ab abscessibus cerebelli aliisque vitiis, quibus nervi sive ad cor, sive ad arterias tendentes læderentur. Neque tandem ab *asphyxiæ* causis excludi posse videntur primarum viarum saburra, atque hystericae convulsivæque affectiones.

Aliæ de asphyxiæ causa MORGAGNII observationes.

Aliæ asphyxiæ causæ.

1) *Epist. anat. med. XXIX. n. 3.*

2) *Ibid. n. 7.*

§. CCXXXI.

Proxime ab *asphyxia* sequuntur duo alia pulsum vitia, summa nimirum eorum *exilitas* cum *debilitate* coniuncta, et aliquis eorum ictus subinde deficiens, quem *pulsum intermittentem* dicunt. Et primum, quod ad illam spectat, ea vel a natura est, neque tunc mali aliquid portendit, vel a morbo ¹⁾, veluti ab ingenti fibrarum cordis flacciditate et atonia, a cordis aucta mole cum summa laterum eius tennitate et debilitate (unde ea, qua opus est, vi non potest sanguinem expellere), aut cum aqua in pericardio contenta, et cor aut laxante, aut comprimente coniuncta. Cor enim auctum sine his pulsum magnum, vibratum et vehementem progignit. Aqua vero in pericardio contenta, si acris fuerit, addit celeritatem, atque interdum duritiem.

Duo alia vitia pulsum. Exilitas et intermissio. Exilitas et debilitas pulsus vel a natura, vel a morbo est.

1) MORGAGNIUS *epist. XI. n. 13., epist. XXI. n. 49. et epist. XXX. n. 15.*

CCXXXII.

Sanguinis quoque in arterias ingressum imminuunt *valvulae semilunares* aortæ ostio præfixæ, si duræ, cartilagi-

Debilitas pulsus ab aliis vitiis internis.

neae aut osseae evaserint. Hinc *pulsus parvus* et *debilis* facile intelligitur derivandus, qui praeterea observatur in iis, quibus *vasa cordis coronaria*, aut *arteriae* ab aorta proficiscentes osseam rigiditatem induerint ¹). Consensus item ab imo ventre, a saburra putrida ²), aut acri stabulanti, ab utero ad cor eiusque nervos cardiacos propagatus, horum nervorum paralysis, sanguinis inopia, arteriarum angustior capacitas, languida systole, imminuta irritabilitas pulsum *parvum, exilem ac debilem* gignunt.

1) *Idem* MORGAGN. *ibid.* n. 19.

2) *Id.* *ibid.* n. 20.

§. CCXXXIII.

Ab arcta cordis cum pericardio connexione.

Pulsus praeterea *debilem* et *parvum* efficit pericardium cum corde arcte connexum. Quo cor cum neque satis expandi, neque satis contrahi possit, nil mirum, si *pulsus debilis* inde sequatur. Talem observavit PEYERUS, LOWERUS et MORGAGNIUS; sed debet simul adesse aut parva sanguinis copia, aut languida cordis vis, aut magna arteriarum resistantia, uti rigiditas, durities, angustia, aut spastica constrictio, aut plenitudo tanta, ut arteriae non possint nisi modice se contrahere. Alias *pulsus incitatus* et *vehemens* esse posset, qualem DIONYSIUS, FREINDIUS et LAFAYUS ¹) commemorant.

1) MORGAGN. *epist.* XXIV. n. 12.

§. CCXXXIV.

De pulsu intermittente.

Iam vero aliquid de *pulsu intermittente* dicamus. *Intermittens pulsus* considerari potest tamquam *brevissima asphyxia*. Quid enim est *vera asphyxia* nisi *pulsus intermissio* quam longissime perdurans? sed *pulsus intermissio* raro per se sola morbus occurrit. Saepe aliorum morborum symptoma et signum est, ad quorum cognitionem non parum confert, si eius naturam et causas paulo uberius exposuerimus.

Saepe aliorum morborum symptoma.

§. CCXXXV.

Pulsum intermittere dicimus, quando per intervalla diastole arteriarum deficit, nec tactu percipitur. Si enim assidue, et diu huiusmodi defectio esset, non *pulsus intermissio* sed *asphyxia* vocaretur. Deficere autem arteriarum per intervalla diastole debet, si per intervalla aut cor non transmittat sanguinem in arterias, aut arteriae eum non recipiant, aut si recipiant, non ea vi et copia recipiant, qua ad eas dilatandas opus est. Cor autem non transmittet sanguinem in arterias, nisi alterne contrahatur et dilatetur, et nisi viae, per quas et sanguinem recipit et transmittit, liberae satis sint. Contractio et restitutio cordis alterna interrumpitur, si vis nervorum aut sanguinis influxus deficiat, aut aliqua impedimenta cordi opponantur, quae cor cohibere possint, ne se introrsum aut extrorsum moveat; non autem recipiet sanguinem, nec transmittet libere, si sanguinis desit debita copia, si viae obstruantur, si comprimantur, si earum structura a naturali statu aliquo modo recedat, sic ut circuitus sanguinis multifariam perturbetur aut interrumpatur. Si haec per intervalla ac subinde tantum agant aut fiant, per intervalla etiam arteriarum diastole deficiet, id est *pulsus intermittet*.

Quid intermissio pulsus.

Quae cordis systolen et diastolen impediunt et perturbant.

§. CCXXXVI.

Sed licet et cor bene constitutum sit, et eius actio rite absolvatur, pulsus tamen arteriarum culpa intermitteri potest, si nimirum earum ostia angustiora sint, si earum tunicae vi impellenti non satis cedant, si contrahi non facile queant, si vis nervea aut irritabilitas in eis aut langueat, aut spastice eas afficiat, si arteria magna in suo principio et arcu ita sit dilatata, ut valvulae neququam eam claudere possint, sic ut quando contrahitur, sanguis in sinistrum cordis ventriculum repellatur; tunc fiet *pulsus intermissio*, et tanto facilius, quanto magis erit ipse cordis ventriculus dilatatus. *Intermissio pulsus ex hac causa synchrona est diastolae cordis; contra in aliis casibus est synchrona systolae cordis* ¹). *Fit etiam intermissio pulsus arteriarum culpa absque vitio cordis, et qua ratione explicetur.* *Ex dilatatis arteria magna et corde pulsuum in-*

*terminatio
synchrona
est diastolae
cordis.*

*Exempla di-
latati cordis
cum inter-
missione pul-
sum.*

Satis quippe evictum putamus, sanguinis per arterias circui-
tum non solius cordis actioni esse tribuendum.

1) *Exempla dilatati cordis et aortae*, cum quibus *pulsus intermissio* erat (hinc ut ego puto dependens) videntur in ita-
lica collectione TARGIONII TOZZETTI, cui titulus — *Prima
raccolta di osservazioni mediche* pag. 115. et sequentibus us-
que ad pag. 125. *Ex sched. auct.*

§. CCXXXVII.

*Causae aliae
ex aliis ana-
tomicis ob-
servationibus
deductae.*

*Frequentio-
res.*

*Vitia valvu-
larum cordis.*

*Calculi et
tumores iis
innati.*

*Cordis ad-
nexorumque
vasorum po-
lypi.*

*Pericardium
cordi adhae-
rens.*

*Erosio tuni-
cae aortae.*

*Animi pa-
themata.*

*Paras vagi
aut interco-
stalis laesio,
compressio
etc.*

*Hysteria,
flatus, ca-
cocoehylia,
vermes etc.*

Communiter causae, quae *palpitationem* (de qua *ca-
pitate* sequenti), *lipothymiam*, *syncopen* (§§. CCXVI. CCXVII.
CCXVIII.) et *asphyxiam veram* (§. CCXXVIII. et seq.)
inferunt, etiam *pulsui intermittenti* efficiendo, si leviori
modo breviorique tempore agant, valere putantur. Quae
vero frequentius et certius pulsum intermittentem reddide-
rint, si clinicorum et anatomicorum consulantur observatio-
nes atque extispicia, sunt vitia valvularum cordis tam tri-
cuspidalium, quam mitralium et semilunarium, nimirum ri-
gida, osseae earum durities, imprimis cum ventriculi sini-
stri dilatatione coniuncta, ut a COWPERO et VIEUSSENIO
reperita est, vel calculi aut tumores iisdem innati, quales
HORSTIUS et BELLINIUS viderunt, polypi tum cordis, tum
adnexorum vasorum ¹), cordis aucta moles aut exulceratio,
uti in *sepulchreto anatomico* BONETI refertur, quamvis haec
ultima non semper pulsum intermittentem efficiat ²), peri-
cardium cordi adhaerens, aut putrido humore scatens, aor-
tae interior tunica crosa, qualem vidit MICHELOTTUS in
patricio amplissimo viro, ut infra dicetur, animi pathemata,
a quibus nervi cardiaci, vel etiam ad arterias aut musculos
iis superpositos tendentes afficiuntur ³), paras vagi aut in-
tercostalis laesio, sectio, compressio, paralysis, ut ex VAL-
SALVAE et MOLINELLII periculis compertum est, aliarum
etiam partium nervi irritati et puncti, ut in doloribus atro-
cioribus et vulneribus, affectiones hypochondriacae et hy-
stericae aliaeque nervosae affectiones ⁴), flatus ventriculum
aut intestina distendentes, cacocoehylia, vermes ac alia visce-
rum imi ventris mala, quae sive compressione, sive irrita-

tione per nervos propagata cordis aut arteriarum motum interdum intercipiunt, licet tunc pulsus intermissio brevi evanescere soleat.

1) MORGAGN. *l. c. n. 21. n. 22.*

2) *Id. ibid.*

3) *Id. ibid. n. 20.*

4) In vidua quadam annorum XXXIX. suum statum pertaesa, optimo tamen habitu et temperamento, sed a pluribus annis rheumatismo obnoxia, ita ut frigore singulari a femore usque ad pedem dextri lateris vexaretur, *parvum, debilem et rarum* pulsum observavit ZIMMERMANNUS in brachio dextro, contra vero in brachio sinistro celerem ac fortem. *De l'expérience Tom. II. p. 23.* Id ipsum plerumque accidit in membris paralysi affectis. VOGEL. *Prax. med. Ex sched. auct.*

§. CCXXXVIII.

Asphyxia, pulsus parvus et debilis aut intermittens *Diagnosis et*
 facile per se patent. Causae item, si omnia tam antecede-^{causae.}
 dentia recte pensitentur, quam quae in aliis capitibus *de*
morbis praecordiorum et thoracis tradidimus, memoria te-
 neantur, non erunt scitu impossibiles. Generatim omnis
pulsuum defectus, aut *languor*, aut *intermissio*, si a causis
 cordi ipsi, aut vasis eidem adnexis inhaerentibus ortum tra-
 hant, maioris momenti sunt ac periculi, quam si aliunde
 profluerent. *Pulsus intermissio*, si a corde proxime affecto *Quando a*
 fiat, dignosci potest cordi manu admota. Si enim eodem *corde sit.*
 tempore, quo pulsus micatio desinit, deficiat quoque cor-
 dis motus, certo pronunciari potest, a corde pulsus inter-
 missonem oriri. Sunt enim arteriarum diastolae synchronae *Quando ab*
 cum cordis systole. Si vero cordis motus ordinatus et mi-
 nime interruptus percipiatur, indicium est, pulsus intermis-
 sionem arteriis proxime affectis deberi.

§. CCXXXIX.

Sed de his, quoniam aliorum saepe morborum sympto-^{*Prognosis et*}
 mata sunt, aut tamquam signa a semiologis considerantur, ^{*curatio.*}
 non plura. Eorum enim maius vel minus periculum, aut
 mala significatio a diversa tum causa, tum origine depen-

det; quemadmodum et curatio ¹⁾), quae plerumque a morbo, cuius symptoma haec sunt, erit petenda.

1) *Diurnus inaequalis pulsus curatus est opii parva dosi quotidie data, ut narrat MORGAGNIUS. Epist. anatom. med. IX. n. 7. Ex sched. auct.*

CAPUT IX.

DE CORDIS PALPITATIONE.

CCXL.

Non solum imminui, interrumpi et deficere cordis actio potest, verum intendi etiam ac ita invalescere, ut quae a sano homine, dum pacate naturaliterque se habet, minime animadvertitur, iam aucta et percipiatur, et molestiam aliquam inferat. Id autem evenit, quando cor vehementiori motu concilatur, subsilit, pectus praeter morem arietat, extrorsumque urget, ut admota etiam manus saepe repellatur. Imo tantus saepe cordis motus tunc est, ut non soli aegrotantis sensui se molestum reddat, verum aliorum cum oculis, tum auditui costarum resiltione et sonitu ¹⁾) fiat manifestus. Vehemens haec et vibrata cordis concussio nostris *palpitatio*, graecis vero Παλμὸς dicitur.

1) Narrat FORESTUS, iuvenem ex vulnere tanta correptum palpitatione cordis, ut sonitus eius per fenestram in viam usque perveniens a praetereuntibus audiretur. *Ex sch. auct.*

§. CCXLI.

Cor autem nequit urgere atque impellere extrorsum pectus, nisi validius se contrahat, aut nisum sese contrahendi edat. Erit itaque *palpitationis* causa proxima *vehementior* cordis *systole* sive *contractio*. Sed cor ut vehementius contrahatur, acriori quodam stimulo, quam natura

Quid palpitatio cordis.

Causa proxima quae. Vehemens et acrior sti-

ferat, irritari, aut saltem (quod probabile etiam est) eadem *multus maiorem cordis contractionem gignit.*
 cordis contractionis vi remanente, imminui debent, ut aiunt, *resistentiae*, quae sunt ab eodem superandae. Utroque enim casu validior cordis contractio insequitur, totaque eius fere actio in costas se exserit. Stimulorum vero plura genera ad id apta vel cordi ipsi insident, vel extra cor posita ac locata videntur, sive, quod eodem recidit, causae *palpitationis* remotae in rebus vel cor irritantibus, vel irritationis causam praebentibus continentur. *Stimulorum species variae. Aliae in corde, aliae extra cor sunt. Remotae.*

§. CCXLII.

Quae cordi insident, sunt ea imprimis vitia, quae vel *Causae, quae ipsi cordi insident.*
 maiorem sanguinis copiam ad ipsum alliciunt, uti aneurysmatica tam *cordis* et *auricularum* ¹), quam *arteriarum coronariarum* dilatatio, flacciditas laxitasque; vel eius fibras *Quae maiorem copiam sanguinis ad cor alliciunt, vel fibras eius irritant, vel sanguinis circuitum impediunt.*
 distrahunt irritantque, uti inflammatio, abscessus, tubercula, lapilli aut ossicula alicubi in eo genita, vel sanguinis e corde egressum, vel in ipsum ingressum quodammodo difficiliorem reddunt, uti *venae coronariae* varicosae et obstructae, polyposae concretiones *aurículas*, *sinus* aut *vasa maiora* impedi-
 pedientes, carnea aut lapidea corpora interius nata, *arteriae pulmonaris*, *auricularum* aut *sinuum* constrictio, compressio aut dilatatio, cartilaginea osseave earum partium induratio ²), *valvulae tricuspides*, *semilunares* aut *mitrales* durae, rigidae, lapillis aut ossiculis scatentes, concretae, strigosae, adhaerentes (tunc enim vel non permittunt liberum sanguinis e corde egressum, nec qui exiit, satis impediunt, ne retrocedat ³), tumores quicunque *basi cordis* adnati, aut *arteriarum e corde egredientium tunicis* interiecti, ipsius *cordis* tumor, ossificatio, abscessus, polypus ⁴) atque alia eiusmodi. Quibus si adnumeraveris nimiam cordis irritabilitatem atque sensibilitatem, ob quam levissimo quovis stimulo cordis actio in pueris, adolescentibus foeminisque delicatioribus incitatur, recte factum esse putavero. *Nimia cordis irritabilitas et sensibilitas.*

1) *Dextra cordis auricula dilatata sanguinis nimiam copiam in cor immittit, hinc irritatur et palpitat.* MORGAGNIUS.

Observationes ex anatomico.

2) *Arteriae pulmonaris cartilaginea induratio*, vel intus et extus *lapideis tuberculis* obsessa imprimis cum *cordis aucta mole* a MORGAGNIO observata est. *Epist. XXIII. n. 10. 13. 14.* „RIOLANUS in *anthropologia cor cartilagineum* scelesti cuiusdam hominis descripsit. Os in corde humano a GEMMA et ab eodem RIOLANO adversum est, ut illud, quod ex cadavere URBANI VIII. P. M. nuperrime extractum fertur.“ THOMAS BARTHOLINUS ad *Fortunat. Licetum cent. I. epist. LXVI. Ex sched. auct.*

3) MORGAGN. *Epist. anat. med. XXIII. n. 9.*

4) *Id. Epist. II. n. 15.*

§. CCXLIII.

Quocunque autem modo ex his fiat, ut sanguis in *corde* restitet congeraturque, sive quod a *dextris* aut *sinistris* eius *caveis*, aut e *venis coronariis* non libere egreditur, sive quod in eas, speciatim *sinistras*, non nisi difficulter admittitur, vel quod copiosior in easdem, imprimis *dextras*, influit; necesse profecto est, ut *cordis irritabilitas* ad vehementiorem contractionem excitetur, eoque maiorem, quo irritabiliores erunt cordis fibrae atque ad motum paratiores.

Irritabilitas cordis aucta.

Exempla remotarum causarum palpitatio-nem inferentium.

Tumores ad basin cordis adnati.

Sic *cordis*, exempli causa, *auriculae* praeter naturam *dilatatae* vel plus sanguinis recipiunt immittuntque in cor, vel sanguine distentae adsitas arteriarum pulmonaris atque aortae truncos comprimunt, et sanguinis e corde egressum retardantes *palpitationi* causam praebent. Simili prorsus ratione tumores ¹⁾, adipis copia, aut excrescens caro ad *basin cordis* adnata ²⁾, qualem observavit GARNERUS ³⁾, eos ipsos arteriarum truncos comprimendo *palpitationem* inferre

Vasorum obstructions.

posse videntur. Item *valvularum mitralium* vitio, aut *auriculae sinistrae*, aut *venae pulmonaris* et *coronariarum venarum* obstructione, infarctu, compressione, sanguis in *cordis dextris caveis*, aut tota eius substantia restitans ad frequentem validioremque sollicitabit contractionem.

Observationes ALBERTINI.

1) *Tumores*, qui *latera cordis* occupant, non inferunt *palpitationem*, ut constat ex ALBERTINII observationibus. Item materiae qualitas consideranda est. *Sanguineum tumorem sine palpitatione* vidit idem ALBERTINIUS. *Comment. institut. scientiar. Bonon. T. I. in opusc.*

BARTHOLINI aliac.

2) THOMAS BARTHOLINUS l. c. similia observasse alios cla-

rissimos viros, testatur his verbis: „Quippe ad *cavae venae orificium* in inopinata morte suffocatis *carnea* quaedam *frustula cum pingui mole* iuvenit RIOLANUS et in plithisico Cl. WORMIUS noster ex utroque *cordis ventriculo carunculas quasdam emergentes* vidit, ut et BAUHINIUS anatomicorum princeps; quod nobis quoque Patavii pridem observatum. Ut taceam *palpitatione cordis* laborantem sacerdotem apud SCHENKIIUM lib. 22. observat., cui *circa cordis basin excrescentia* sex drachm. dependebat.“ *Ex sched. auct.*

3) *Sepulchret. sect. VIII. observ. 23.*

§. CCXLIV.

Ad causas, quae extra cor sunt, referuntur *aortae im-* *Causae re-*
minuta capacitas, ossea ¹⁾ aut cartilaginea durities, im- *motae quae*
 mis cum aliis *praecordiorum, aut sanguinis, aut cerebri,* *extra cor*
aut nervorum vitiis coniuncta; eiusdem aneurysmata, poly-
 pus, *tunicarum* eius tumores varii, spastica constrictio ab *Aortae vitia*
 humore acri deposito ¹⁾, secreto aut praeterlabente indu- *multiplicia.*
 cta, *interioris tunicae* exulceratio ²⁾, qualem viderunt MOR-
 GAGNIUS, LANCISIUS et in nobili patricio Veneto popularis
 meus PETRUS MICHELOTTUS ³⁾, serum acre ⁴⁾, pus, ichor *Alia pericar-*
 in *pericardio* collecta, tumor, abscessus, praecipue ad *dii vitia.*
pericardii basin ortus, *pericardium* ipsum (etsi modo faciat
palpitationem, modo non, ut animadvertit ⁵⁾ Cl. MOR-
 GAGNIUS) crassum, durum, pinguedine refertum, cartilagi-
 neum, *cordi* arcte adhaerens, tunc saltem, cum *vasa e corde*
egredientia comprimit, ac fere strangulat, *aortae truncus* *Trunci aor-*
 statim sub *curvatura a ramo bronchiorum sinistro*, qui sub *tae et vaso-*
 ea sternitur, per inspirationem dilatato, ut notat PORTA- *rum pulmo-*
 LIUS ⁶⁾, compressus, compressa quoque a tuberculis, vo-
 micis, hydatidibus, empyemate, hydrothorace aut hydrocardia
pulmonum vasa (quamquam haec sola causa non sufficit),
 aut quocunque modo obstructa, *thorax* angustus et depres- *Thoracis,*
 sus, *spinae dorsi* distorsio, incurvatio, *sanguis* crassus, visci- *spinae dorsi*
 dus, iners, copia excedens, motu aut acritate peccans, ve- *et sanguinis*
 luti in *cachexia, chlorosi, cacochynia, morbis acutis, sca-* *vitia.*
bie, herpete, podagra, arthritide retropulsis, *ulceribus*
externis resiccatiss, lue venerea, scorbuto consuetisque eva-
 cuationibus cohibitis, hystericae atque hypochondriacae affe-

Nervorum affectiones. Diaphragmantis spasmus. Cacoehylia, vermes, flatus, vita deses, animi pathemata.

ctiones, in quibus *cor*, vel *vasorum*, vel *textus cellulosi*, vel *membranarum*, vel *nervorum* consensu ac irritatione non raro afficitur, spasmus *diaphragmatis*, imprimis *eius processuum* sive *appendicum*, inter quas arteria magna descendit, atque ab iis convulsis constringi potest, cacoehylia primarum viarum, vermes ⁷⁾, flatus ⁸⁾, corporis insolitae atque excedentes exercitationes, vel contra vita deses, otiosa aut crapulae dedita, animi pathemata, praesertim ira, gaudium, terror, nervi demum tam in *cerebro*, quam in *gangliis ramisque paris vagi ac intercostalis* ad cor tendentibus irritati, aut aliter male affecti.

Observationes ex anatomico.

1) Ex VERDRISH *observationibus* (*Ephem. nat. cur. cent. VI. obs. 51.*) patet, saepe cum *aorta ossea cor auctum*, durum tumensque inveniri. Cor item, *vasa coronaria, auriculam dextram* ampliata, ut in IANI PLANCI observatione. *Auricula sola dextra ampliata*, qua copiosior sanguis in dextrum ventriculum demittitur, sufficit ad *palpitationem* inferendam, ut GRATZIUS narrat. Cum *cordis simul et pulmonis scirrhis et sanguine viscido, mucoso* ex COHAUSENII fide; item cum *sanguinis copia nimia aut prava qualitate palpitationis* est. *Ex sched. auct.*

2) Saepe *acer humor* ibidem deponitur, si debilitas et laxitas eum alliciat. Secernitur quoque, si verum est, oleosum quendam mucum ab arteriarum tunicis (ut LANCISIUS et GORTERIUS contendunt, nec negat MORGAGNIUS) exstillare ad eas lubricandas. Vid. LANCIS. *de cord. l. II. propos. VI.*, MORGAGN. *epist. XXIII. n. 5.*

Unde caloris sensus, de quo aegri queruntur.

3) *Concellitur* interdum *aorta* sic, ut crassiores et asperiores, quae per se non irent, particulae ad interiorem arteriae superficiem urgeantur, ibi haereant, asperitatem faciant, exulcerent, sensumque acris et urentis caloris ibidem efficiant, unde intelligitur, cur de hoc *caloris sensu* saepe aegrotantes querantur.

4) Nimirum in ALOYSIO FOSCARIO, qui propterea *cordis ac aortae palpitationi et pulsui inaequali atque intermittenti* fuerat ante mortem obnoxius. Vid. *Comment. instit. scientiar. Bonon. vol. I. p. 419.*

5) MORGAGN. *epist. XVI. n. 23.*

6) *Epist. XXIII. n. 23.*

7) *Mém. de l'acad. roy. des scienc. ann. 1769.*

An vermes in pericardio reperti sint.

8) Non satis probatum videtur MORGAGNIO, *vermes* in *pericardio* fuisse repertos; nec quidquam concludere observationes SYLVII, HARTMANNI, BALLONII, HALLERI, RIOLANI. *Epist. cit. 23. art. XV*, item *epist. 24. n. 23.* Potius *vermes cardium* vellicantes in consensum cor trahere censet. *Epist. eadem*

eadem 23. n. 15. cit. Ad rem facere videntur quaedam adnotata capit. X. §. CXXXII. de morbis inui ventris, quae videsis.

7) *Flatus ore emissi palpitationem levant. Ventriculus et intestina aëre distenta diaphragmati et cordi incubanti obstant. Epist. anat. med. XXIII. n. 16. In corde et pericardio incusatus aër ex MORGAGNIO non satis evincitur. Ibid.*

D i a g n o s i s.

§. CCXLV.

Signa fere propria *palpitationis* ex iis, quae supra (§. CCXL. etc.) exposuimus, peti debent. Sciendum est praeterea, motum cordis interdum, ubi pertinacior *palpitatio* vexat, costas ipsas suo impetu luxare et diffringere, quod FERNELIUS et BELLINIUS testantur, vocem et respirationem in graviore morbi gradu intercipi, anxietatem praecordiorum, vertiginem, aurium tinnitum, membrorum tremorem, animi deliquia, somnos interruptos terrificosque saepe accedere, et pulsum, qui in leviori malo vix celerior esse solet, iam intermittentem aut certe magnopere inaequalem, parvum atque obscurum reddi. Nonnulli vero, uti BELLINIUS et LIEUTAUDIUS, affirmant, quamcunque pulsus differentiam cum palpitatione coniungi posse; nimirum *pulsus* modo esse *rarum*, modo *frequentem*, modo *tardum*, modo *celerem*, *magnum*, *parvum*, *validum*, *debilem*, *inaequaliter inaequalem*, *intermittentem*, et sic porro; prout nimirum uno potius modo, quam alio cor contrahitur, et sanguis in arterias diversa vi, copia, celeritate proiicitur, aut arteriarum capacitas, renisus, expeditum iter varia se habent ratione. Potest enim fieri, ut cor frequentissime contrahatur, et tamen arteriarum pulsus sint rari; quod non qualibet cordis contractione tantum sanguinis in arterias transmittatur, quantum ad eas proportionate implendas dilatandasque requiritur, aut ab arteriis non recipiatur eo modo, ut arteriarum mications cordis motibus respondeant.

Signa diagnostica palpitationis. Cordis palpitatione interdum costae luxantur et diffringuntur.

Pulsus ratio varia.

Cur pulsus interdum sit rarus, etsi cor frequenter contrahatur.

§. CCXLVI.

Variae differentiae palpitationis.

Differt quoque *palpitatio* ratione gradus, modi, durationis ac originis. Hinc alia *levis* est, alia *magna*, alia *aequalis*, alia *inaequalis*, *continua*, vel *intermittens*, et certis intervallis aut horis *recurrens*, vel *accidentalis*, vel *protopathica*, vel

An palpitationis differat a tremore cordis.

sympathica, vel *convulsiva*. Differre quoque eandem a cordis *tremore*, docent nonnulli. Quum enim pulsum cordis motui respondere putent, pulsum vero in palpitatione esse posse rarum norint, *patere*, inquirunt ¹), *palpitationem in tremore consistere non posse*, quia *tremor cordis*, frequens nempe eius contractio, frequentem quoque pulsum efficiat oportet. At hi falli sane videntur, ac inter eos BELLINIUS non sibi constat. Fatetur enim, *interdum palpitationem cum creberrimo cordis motu esse*, et cum eo *pulsum rarum* quandoque coniungi (§. CCXLV). Sed creberrimus cordis motus nonne *tremoris* ideam continet? Quidni igitur *tremor cordis ad palpitationem* referatur? Idipsum videtur a SENACIO ²) et LIEUTAUDIO ³) quodammodo innui, quorum alter palam asseverat, *palpitationem*, quando *levis* est, confundi posse cum *cordis tremore*, qui in statu quodam cordis languido per pulsum deficientem, inaequalem, virium prostrationem, animi deliquia sudoresque frigidos mortis prodromos consistere, satis significatur. Verum in *palpitatione* vis cordis aucta videtur, imminuta vero in *tremore* morti praeunte; quod sane non leve discrimen inter utrumque malum fortasse aliquis reputabit. Reponi tamen ei posset, non semper *tremorem* cum virium vitalium languore coniungi, et non raro a *convulsiva cordis affectione*, quae irritabilitatis quoddam augmentum est, excitari, et si quando viribus deficientibus succedit, virium defectum suppleri motus crebritate ac celeritate, neque propterea a *palpitatione* esse segregandum.

Levis palpitationis cum tremore cordis confunditur.

An semper tremor a languore virium vitalium dependeat.

1) *Bellinius.*

2) *Traité du coeur.*

3) *Histoir. anat. méd.*

§. CCXLVII.

Ut palpitationis diagnosis facilis est, utinam pari quo- *Differentes palpitationis*
 que perspicuitate causarum, a quibus efficitur, varietas di- *causae qui*
 stingui posset! Sola anamnesis ad earum differentias asse- *possint di-*
 quendas plurimum conferre videtur. Si a plethora palpi- *stingui*
 tatio sit, si a sanguine viscido et solidarum partium laxi- *Anamnesis.*
 tate, si ab acritatibus, tam antecedentia, quam coniuncta
 nobis significabunt plethoram, cacochymiam, cachexiam, chlo-
 rosin, scorbutum, luem veneream, acria retenta aut retro-
 pulsa. Si a *cacochylia*, a *vermibus*, ab *hysterica* aut *hy-* *Signa qua-*
pochondriaca affectione, a *flatibus ventriculorum distenden-* *rundam cau-*
tibus, a *cerebri* aut *nervorum laesionibus* fiat malum, ade- *sarum extra*
 runt horum singulorum signa a nobis saepius narrata. Et *Indicia pal-*
 quidem in hystericis atque hypochondriacis saepe quaedam *pitationis*
 occurrit constrictio circa infimum oesophagi extremum, pro- *ab hysteris-*
 pter quam aegre et difficulter cibi in ventriculum descen- *mo et hypo-*
 dunt. Haec autem a superioris ventriculi oris aut oeso- *chondriasi.*
 phagi spasmu, qui non raro ad fauces usque producit, *A spasmis.*
 plerumque, interdum vero a diaphragmate, per quod oeso-
 phagus transit, convulsio oritur. Dolor quoque spasticus
 ad dorsum humerosque, imo ad brachia diffunditur, qualis
 ab aneurysmatibus excitari solet, licet hic nulla huiusce vitii
 exstent indicia.

§. CCXLVIII.

Reliquarum causarum, uti *hydrothoracis*, *hydrocardiae* *Aliarum cau-*
 aliorumque morborum, quibus thorax et pulmo obnoxius *sarum signa.*
 est, signa iam alibi tradita fuerunt¹). De *polyposis* vero
concretionibus, de *aneurysmatibus*, *varicibus* aliisque *prae-*
cordiorum organicis vitiis erit in sequentibus X. et XI.
capitibus opportunus dicendi locus. *Crassities pericardii*, *Incerta signa*
 aut eius adhaesio aut tumor vix dignosci possunt. Plerum- *vitiis per-*
 que cum his perturbatus cordis motus esse solet, aut signa *icardii.*
varicosi generis, de quibus infra dicemus, quandoque repe-
 riuntur, quamquam semper est cur medicus dubitet, mo-
 tusne ille perturbatus, aut palpitatio sit ob vitium *peri-*

cardii, an potius ob vitium alicuius ex illis partibus, quae sub eodem ac intra idem sitae sunt, et ab eodem non ita coërcentur in suis motibus, quin hi sensibiles fiant. Imo interdum cum his etiam *cordis moles aucta* reperta fuit ab ALBERTINIO ²⁾). Ceterum vitia *pericardii* signis aliarum partium vitiorum communibus stipari solent, sic ut in iudicio ferendo eo magis suspensus haereat medicus, quo exer-

Signa quaedam ex ALBERTINIO.

Signa adhaesionis pericardii ex MECKELIO.

citatio est in cadaverum sectionibus. Attamen ALBERTINIUS in *pericardii* vitiis magis pulsum perturbari, facilius animam deficere, et sensum doloris et caloris ad sternum percipi quandoque observavit ³⁾). CL. MECKELIUS ⁴⁾) haec signa putat sufficere ad detegendam pericardii cum corde adhaesionem; pulsus nimirum ad quemcunque motum inordinatus et auctus, interdum intermittens, in incipiente malo saepe fortis, in fine eiusdem semper debilis, postea crebra cordis palpitatio, respiratio anxiosa, vox saepe inopinato intercepta, haemoptysis, rubor faciei perpetuus, anxietates insignes et ad quamcunque abdominis expansionem auctae, sensuum internorum turbatio, macies et nutritio deficiens, quin causam in visceribus abdominalibus quis suspicari possit. Quam suam sententiam non solum rationibus physiologicis et pathologicis, verum etiam practicis observationibus nititur confirmare. Generatim vitia cordis atque adnexarum partium contumacius ac assidue affligens malum creant. Non tamen ab eius interruptione et quiete statim licet concludere, *palpitationem* ab aliis causis pendere. Incidit enim, ut organica quandoque vitia aliquod temporis intervallum conquiescant, temporum vero mutationibus, aut insigniore diaetae errore, aut corporis exercitatione motuve validiore accedente facile reviviscant.

Malum a cordis vitiis contumacius.

Quies inorganicis vitiis infida; nam facile eadem reviviscunt.

1) *Cap. V. huius voluminis de morbis pectoris.*

2) *Comment. instit. scient. Bononien. T. I. p. 384.*

3) *L. c.*

4) *Histoir. de l'acad. royal. des scienc. et belles lettr. ann. 1755. à Berlin p. 76.*

P r o g n o s i s.

§. CCXLIX.

Perspecta causarum natura, facile definiri potest, quanam futurus sit exitus. In morbis acutis, si cum signis coctionis exsurgat palpitatione, plerumque exoptatam crisin promittit; secus morbum deteriorem fieri, ac praecordia gravari portendit. In plethoricis ac aetate iuvenili saepe narium haemorrhagiam aut haemoptoën antecedit. A causa leviori, quae discuti facile potest, aut per se facile desinit, puta cacoehylia, animi pathemate etc., expers periculi est. Neque admodum timenda est, si a convulsivis affectionibus, ut in hystericis ac hypochondriacis esse solet, aut a sanguinis dyscrasia, cruditate, plethora fiat, dummodo opportunis ei occurratur auxiliis. Maius negotium facessit ea, quam metastasis, aut consuetae evacuationis suppressio, aut haemorrhagia intulerit. Quae demum a vitio organico originatur, curationem vel nullam, vel difficillimam, et vix perdurantem admittit, critque periculi magnitudo pro eiusdem vitii ratione aestimanda. Aestimatio autem vitii ab adiunctis etiam symptomatibus, difficili respiratione, pedum oedemate, praecordiorum anxietate, imbecillitate aut intermissione pulsuum desumitur. Ut plurimum moleste afficit eos, qui iam quadraginta annos excedunt. Hi autem ad senectutem raro perveniunt, morte immatura sublatis. Vel enim acuta febris, vel hydrope, vel repentina syncope correpti intereunt ¹). Generatim palpitatione, quae crebro incidit, non spernenda est, imprimis si diuturnos animi affectus consequitur, aut post solutos morbos, et cum multa nausea et bilis vomitu contingit, neque vomitus nauseam et palpitationem tollit, ut familiare est atra bile laborantibus et durum licnem habentibus.

Quando bona vel mala in morbis acutis superveniens palpitatione.

Interdum est signum imminuentis haemoptysis vel haemorrhagiae.

Quando expers periculi sit.

Quando non. Si a vitio organico dependeat, eius periculum quomodo aestimandum.

Quinam huic magis obnoxii.

Quid, si frequens sit, et morbos chronicos consequatur.

1) NICOL. PISO *lib. II. de morb. cogn. et curand. p. 207.*

C u r a t i o.

§. CCL.

Curatio secundariae et symptomaticae.

Indicationes generales.

Quando sanguis mittendus.

Quando non.

Sanguinis missio e brachio, pede, haemorrhoidibus quando utilis.

Varia medendi ratio esse debet pro causarum diversitate. *Palpitatio deuteropathica* aut *symptomatica* curatur iis, quibus morbus, unde illa proficiscitur. E suis itaque locis petenda est. Generatim vero curandum est, ut sanguinis per praecordia circuitus facilis reddatur, quaecunque irritatio aut irritandi potestas tollatur, emendetur, educatur, sensibilitas nimia aut nimia irritabilitas mitigetur, ac demum cor adnexaeque partes firmentur. Uno fere omnium ore sanguinis missio ad palpitationem curandam commendari solet, et quidem ea saepe necessaria est palpitatione laborantibus. Verum, ubi vires languent, aut hydropis metus est, aut haemorrhagiis evacuationibusque vasa conciderunt, noxia iure habenda est. Neque admodum prodest, licet interdum levamen asserat, in *idiopathica*. Ceterum in ea *palpitatione*, quam *plethora*, *actas juvenilis*, *bonus corporis habitus*, *suppressae evacuationes*, *motus corporis aut animi vehementior*, aut *terror antecesserint vel comitentur*, sanguinem mittere e brachio, pede aut haemorrhoidibus, utilissimum est. Item quando a *polypo* aut ab *aneurysmate* est, et *malus corporis habitus* nondum eo provectus sit, ut obstet, nullum praestantius ea occurrit auxilium, quo graviora symptomata instansque suffocatio praecaveatur.

§. CCLI.

Quando adhibenda ecco-protica, clysteres, anthelminthica, aperientia.

Alvi ductio.

Sanguinis lentori, visciditati, acritudini

Si *cacochylia*, *vermes*, *viscerum abdominalium obstructio* aut *ventriculi repletio* morbum fecerit, lenia ecco-protica, clysteres, anthelminthica atque aperientia adhibenda sunt. Proficuum quoque est alvum ducere, ut capitis mala avertantur, si qua cum ipsa *palpitatione* exorta sint. Sanguinis lentor, visciditas, acritudo postulat succos cichorei, taraxaci, buglossae, lupulorum, melissae, beccabungae, nasturtii aquatici, aut inscula iisdem plantis alterata, serum

caprillum, lac, aquas medicatas tam thermales, quam acide-
dulas, aut ferro scatentes. Ubi morbi cutanei retropulsi
palpitationem excitaverint, praeter diluentia et temperantia
inox memorata, stibio crudo diaphoretico, floribus sulphu-
ris, decoctis ex sarsaparilla, china, smilace aspera, saponi-
ria, iuribus ex viperis ac balneis opportune utendum est.

*quid oppo-
nendum.
Quae mede-
la palpita-
tioni a retro-
pulsis morbis
cutaneis.*

§. CCLII.

In hypochondriacis ac hystericis amara ac stomacho di-
cata, uti absinthium, chamaedrys, abrotanum, cascarilla,
quassia, cortex peruvianus, rhabarbarum, elixir proprietatis
Paracelsi, et e chalybe parata remedia locum habent; quae
postrema etiam convenientissima sunt, ubi cordis maiorum-
que vasorum compages laxata ac ampliata sit. Neque car-
diacorum atque analepticorum obliviscendum est, si virium
languor, aut sanguinis imminuta copia malum creavit. Si
vero nervorum affectiones in causa fuerint, anodyna et ner-
vina in usum vocentur, imprimis pulveres temperantes, ni-
trum, liquor anodynus mineralis *Hoffmanni*, C. C. succi-
natus, oleum succini, sal sedativum *Homborgii*, camphora,
castoreum, aqua florum aurantii, tiliae, menthae piperi-
tae, nuces virides cohobatae, moschus, opium, quamquam
hoc a LIEUTAUDIO hic reprobatur.

*Palpitationi
ab hypochon-
driasi et hy-
steriagenitae
quae medan-
tur.*

*Item cordis
maiorumque
vasorum di-
latactioni.*

*Quando
utendum car-
diacis et ana-
lepticis.*

*Quando
anodynus.*

§. CCLIII.

Victus ratio indicationibus accommodetur. Vitetur re-
pletio et ciborum varietas. Coena sit levis. Vinum vel
prorsus intercidatur, vel aqua, in qua chalybs extinctus sit,
temperetur. Quiescendum etiam quam maxime est, iis prae-
sertim, qui aliquo organico vitio laborant, vel lenissimus
sit motus, et qualis neque defatiget, neque sanguinem con-
citet. Exerceri vero et moveri saluberrimum est hypochon-
driaca aut hystERICA passione affectis; dummodo sensum et
per gradus exercitatione ac motu utantur. Studia, venus,
animi pathemata, ira, tristitia, moeror sedulo arceantur.

*Vitae regi-
men.*

CAPUT X.

DE CORDIS AORTAEQUE POLYPO.

§. CCLIV.

Definitio.

Ex quo anatome diligentius excoli coepta est (a sacculo nimirum XVI.), saepius a prosectoribus inventae sunt intra vias sanguinis tenaces quaedam firmacque concretiones, carnis, membranae aut lardi frustulum referentes, quibus ob aliquam cum narium polypis similitudinem *polypi* nomen indiderunt ¹); quod morbi genus aut plane a veteribus ignoratum est, aut certe vix coniectura perceptum ²).

*An morbus veteribus notus.**Qui fuerit primus inventor polyporum in cadaveribus.*

1) HALLERUS in ea haeresi est, ut putet, VESALIUM et BENIVENIUM fuisse primos *polypi* inventores in cadaveribus. At MORGAGNIUS dubitat, num veri *polypi* fuerint, an potius *excrecentiae*, ut eas nominavit MARCELLUS DONATUS alique. Hinc observationis laudem tribuit HAEUIDAEIO PADUANO, qui floruit circa initium saeculi sexti decimi, deinde COYTERO et CANANO ad ann. 1574., BALLONIO ad 1575., SMETIO 1576. ERASTO 1580.

2) GALENUS fortasse coniectura id morbi assecutus est, ubi ANTIPATRI morbum describit sub *leviuni arteriarum obstructionum* nomine.

§. CCLV.

Polypi sedes.

Frequentius faciliusque reperitur *polypus*, qua maiora atque ampliora sunt spatia, quae sanguis permeare consuevit, *cordis* nimirum *cava* et *arteriae magnae truncus*, praesertim si aliqua praeter naturam dilatatio hisce accesserit.

*Multiplex ratio et forma concretionis polyposae.**Descriptio harum varietatum.*

Multiplex vero ratio et forma est harum (§. CCLIV.) concretionum, quae illic deprehendi solent. Ex pluribus pleuraeque stratis sive lamellis sibi mutuo applicatis concrescunt ceparum in modum. Non raro in his lamellis alba puncta aut rivuli, vasa mentientes, si rubrae fuerint, aut rubri, si fuerint albae, notantur. Aliae mucosum pituitosumque coagulum, aut etiam grumum sanguinis coacti, cui materies alba gelatinae instar superinducta sit, aut atrum sanguinem

concretum, aut ex his coalescens corpusculum quoddam tenax, fibris quodammodo contextum, membraneum, coloris varii repraesentant. Adhaerent etiam fere omnes vasorum et sinuum parietibus, sed non uno ubique adhaesionis modo. Quandoque enim aliqua sui parte liberae sunt, fluctuant, ac in proxima vasa quasi cruribus emissis producuntur, ac multiplici ratione sanguinis cursum variant. Quandoque firmitus hic illic haerent immotae. Quandoque demum vasorum concavae superficiei quasi novam interiorem tunicam subtendunt, vel foraminulis pertunduntur, vel etiam excavantur, ut per eas sanguini liceat transcurrere.

§. CCLVI.

Causa proxima harum concretionum videtur esse aliqua *Causa proxima.* *motus sanguinis imminutio* sive *quies*, qua eius partes *gelatinosae, mucosae,* sive, ut vocantur, *fibrosae* in unum coguntur et concrescunt. Notum enim est, sanguinem, ubi motum amiserit, coagulari ac consistere, idque imprimis eius parti concrescibili et *mucosae*, quibus crassamentum, serum et lymphæ scatent, potissimum deberi. Quidquid igitur sanguinis motum imminuit, retardat, cohibet, aut eius concrescendi vim auget, aut solidarum partium robur enervat atque infringit, quietem illam, e qua *polyposae concretiones* pendere diximus, procreabit. *Lipothymia* sive animi *Praecipuae lipothymia, syncope, pavor subitus et vehemens.* deliquium, et multo magis ipsa syncope inter causas remotas primum tenent locum, secundum vero pavor subitus et vehementis terror. Namque si recte perpendatur, quomodo in *animi deliquiis* et subitis gravibusque terroribus cordis motus supprimatur, sanguisque aut sistatur, aut retardetur, et quomodo inter cordis, valvularum eius vasorumque repetitos languidos tremores succutiatur, perspicuum mox erit, necessario *polyposas concretiones* esse orituras, ut ex RUXSCHII atque HAENII luculentissimis evincitur experimentis.

§. CCLVII.

Praeterea, dum sanguinis per praecordia circuitui se *Aliae causae. Vitia in praecordiis.* opponunt, constrictio, induratio, compressio aut tumores

Pectoris varii morbi. Spasmus aut resolutio musculorum respirationi inservientium.

arteriae pulmonaris aut aortae, pulmonum morbi, uti difficilis respiratio, asthma, peripneumonia, pleuritis, phthisis, hydrops pectoris et pericardii, itemque musculorum respirationi inservientium spasmus diuturnior aut resolutio, aliaque huius generis impedimenta, quae sanguinis liberum motum impediunt, aut retardant faciuntque, quo minus cordis auriculae et sinus se deplere possint, polypo progignendo causam praebent.

§. CCLVIII.

Proëguminae, quae lentorem sanguinis inducunt, eiusque ad concrendum vim adaugent.

Lentorem sanguinis eiusque ad concrendum proclivitatem et vim augendo *polypi* generationi favent diathesis inflammatoria, lues venerea, arthritica, scorbutica, scabies aliaque cutis vitia retropulsa, moeror, acida imprimis mineralia, spiritus fermentati, venena coagulantia, speciatim saturnina, halitus venenati, febres-pestilentes et contagiosae, alimenta cruda, viscida, austera, concoctu difficilia, tempestas et regio perfrigida, aut contra nimius calor, gelidae potus, plethora, seri et lymphae nimia aut copia, aut densitas, corporis proceritas, quam incusat HOFFMANNUS, immodicae, etsi consuetae evacuationes, et prae ceteris uberior quaecunque sanguinis, SWIETENIO notante, profusio.

§. CCLIX.

Aliae, quae atoniam solidorum unaque tarditatem fluidorum infirunt.

Dilatationes auricularum, ventriculorum cordis adnexorumque vasorum.

Quae vero solidarum partium vim imminuunt ac hebetant, sanguinemque ad concrendum alicubi praeparant, sunt imprimis otium, vita iners et deses, in qua corpus languet, elater fibrarum deperditur, humorum circuitus lentescit, eorumque deperit requisita liquiditas. Nec absimili ratione agunt animi curae graviores ac studia immoderata. Sed huc praecipue spectat auricularum ventriculorumque¹) cordis, aut vasorum his appensorum aneurysmatica et varicosa dilatatio. In iis profecto locis sanguis consistit, in quibus *impellens vasorum vis minor* fuerit, et *maior luminum capacitas*. Maior autem capacitas et minor vis impellens in vitiis tam *aneurysmaticis*, quam *varicosis* procul dubio est.

1) In eadavere CAROLI COM. FIRMIANI insubrica et regia *Observatio anatomica.* primum, deinde caesarea simul legatione italica clari, sed doctrina magis, humanitate sine exemplo omniumque virtutum laude commendatissimi, cuius adhuc desiderio tenentur quotquot sunt cuiusvis ordinis cives, in eius, inquam, eadavere inventus est thorax valde depressus, et pericardium, in quo liquor exiguus aderat, ita pinguedine obvolutum (quae sane duos latos digitos mensura excedebat), ut ab ea undique comprimeretur. Quare *cor parvae molis flaccidumque, auriculae item parvae* apparuere. *Sinistri ventriculi parietes summe tennes* ac fere *cartilaginei*, *dextri vero paulo quidem minus extenuati*, sed *valde flaccescentes*, intra cuius *cavitatem polypus grandior*, qui duobus veluti *ramis* serpendo ingrediebatur *cavam et arteriam pulmonarem*, detectus est *extima sua parte grumosus nigricansque, intima ac centrali albus, fibrosus, tenax.* *Interiorem hanc concretionem veterem* fuisse, secus *recentem* atque a morte exortam, quae in *exteriori ambitu* cernebatur, creditum est, Nam si *alba illa et dura recens* concretio fuisset, eadem *superne et infra crnosa* quae dicitur *pars* (ut statuit MORGAGNIUS *pseudopolypis* in eadaveribus sive erectis, sive supinis genitis) visa esset. Sed interna erat et *embolum* referebat, cui circum ambiens recentior concretio sive *pseudopolypus* incumbibat; ergo *hanc recentem, veterem illam* fuisse recte potest definiri. *Extenuatio autem tenuitasque parietum utriusque ventriculi et flacciditas dextri* innuere videntur, *cor olim fuisse aneurysmaticum*; posteaque angustum in locum a comprimente pinguedine redactum parvae molis apparuisse. Ex quibus vitiis symptomata morbum comitantia, ipsamque mortem explicat Cl. *Auctor* in suo *diario italico anni 1782.* Nos vero haec pauca modo delibavimus, ne totam ab origine historiam morbi, integram sectionis anatomicae narrationem aliaque corollaria ab eo ibi deductis exseribentes longiori orationis filo a suscepto rerum ordine discedere videremur. *Nota editoris.*

§. CCLX.

Quotiescunque igitur contingit, ut *sanguinis grumus* *Grumus sanguineus.* sive a deliquio, sive a pavore et metu, sive a nimia cavearum, per quas transit sanguis, amplitudine, sive ab earundem scabritie, inaequalitate, constrictione, compressione aliave causa in corde aut adnexis vasis motum amittat, aut remoram faciat, ibique haereat, sensim eidem aliquid eius accrescit, *fibrosae imprimis atque ad concrescendum pronissimae seri partis*, lentae, viscidae, a reliquis secedentis, ac *Genesis et structura polypi in homine vivente.* ob imminutum motum coalescentis; sicque aliis atque aliis particulis in fibrarum aut telae modum accedentibus ac ad-

pressis, mutuaque attractione conferruminatis (quin immo in cordis anfractus, villos, lacertosque, aut in valvularum tendines insertis, implicatisque) coagmentantur, ac solidantur *polypi* variae duritiei, molis et coloris; prout maior cohaesio, aut diuturnius tempus, aut copiosior materiae additio, aut rubra albidave sanguinis pars in eorum concretionem concurrerit. Atque ita rem se habere, ipsa *polyporum* structura saepe *grumum sanguineum* quasi nucleum recondens, et *congeriem pellicularum sibi mutuo impositarum* (quales MALPIGHIVS vidit, quum eorum fabricam penitus perscrutaretur) omnino referens ostendere videtur.

§. CCLXI.

An vera eorum opinio, qui putant, polypos vel in articulo mortis, vel statim a morte duntaxat conflari.

Nec me hinc movent, quae contra *polypi* in vivis generationem adducuntur rationum momenta a clarissimis viris KERCKRINGIO, LIEUTAUDIO, PASTA, FANTONIO, RUYSCHIO, SWENCKIO aliisque putantibus, concretiones *polyposas* quascunque, quae in mortuorum corde vasisque maioribus inveniuntur, parietibus, valvulis, columnisve affixae ex sanguine eiusque concrescibili parte in ipso interitu, aut mox post interitum duntaxat conflari. Nam etsi non infirmemur, saepe has quidem in ipso mortis articulo, vel paulo post eam ex quiescente, frigefacto coactoque sanguine compingi, non tamen desunt invicta argumenta, quibus ad credendum compellimur, *polypos* in vivente etiam homine nasci, et diu cum vita superstite coniungi.

§. CCLXII.

Infirmas KERCKRINGII obiectiones.

Et primum, ut aliquid adversariorum obiectionibus responam, scire oportet, KERCKRINGIUM non quaecunque *polypi generationem* impugnasse, sed eam duntaxat, quae ab universalibus sanguinis partibus repetitur, non vero quae ab *albis* et *concrescibilibus* oritur; idque *tam molli brachio*, ut ait MORGAGNIUS ¹), fecisse, ut MALPIGHIO non arduum fuerit multo validiori manu contra eum *polyporum* defensionem suscipere ²). Neque minus infirmam esse cau-

sam, quam *polypis* indixit LIEUTAUDIUS ³⁾, cum ipse *polypos*, quales in naribus prorumpunt, id est *fungosas excrescentesque carnes*, a se unquam in cadaveribus, quorum ingentem numerum dissecuisse narrat, repertos neget. Nam non de *tumoribus carneis fungisque* cordi aut vasis innascentibus hic sermo est, ut ex iis, quae supra innuimus, apparet (quamquam et excrescentes carnes sive sarcomata, licet ipse non viderit, viderunt sane VESALIUS et BENIVENIUS, teste MARCELLO DONATO, et demum RICHARDUS WISEMANNUS ⁴⁾ in puella sexdecim annorum) sed de *concretionibus* hic agitur, quae a *sanguine concreto* aut eius *concrescibili parte* fiunt. Clarissimi porro ANDREAE PASTAE obiectiones valere potius adversus eos, qui omnes polypos in cadaveribus inventos iamdiu exstitisse in viventibus credunt, vel alias causas, quibus morbi et mors ipsa tribui aequiori iure poterat, aut non inquisivere, aut secus ac debuissent neglexerunt, aut dubiis, fallacibus aliisque vitiis communibus signis nimium confisi temere, et non satis vere *polypum* ubique posuere.

Item LIEUTAUDII obiecta infirmiora.

Obiectiones PASTAE inopportuna.

1) *Epistol. anatom. med. XXIV. n. 27.*

2) *Oper. posthum.*

3) *Précis de médecine liv. I. chap. de la syncope p. 275.*

4) *Tractat. chirurgic. anglice scriptus etc.*

§. CCLXIII.

Quae omnia tantum abest, ut nos tangant feriantque, quin a nobis aequissima lance expensa, ut rationi consentanea probantur. Non tamen illud inde consequi arbitramur, ut *polyporum* generationem in viventibus nec veram, nec possibilem reputemus. Animadvertimus enim primo, *aneurysmata*, quae initio magna pulsatione attollebantur, saepe temporis progressu omnem pulsationis ictum paulatim amittere; idque plerumque, ut apud omnes in confesso est ¹⁾, accidere ex eo, quod *aneurysmatis* cavum, crescente sensim sanguine, et polyposa hinc orta crusta, quasi nova tunica interius obducatur; hocque adeo certum

Ex allatis obiectionibus non sequitur, genesin polyporum nec veram, nec possibilem esse. Demonstratio. I. Argumentum.

II. *Argum.
ex LANGHAN-
SII observa-
tione.*

esse, ut instituta sive temere, sive consulto in viventibus incisione *aneurysmatum* eorum, quae in *cubiti* aut *poplitis* flexura erant, id ipsum sit pluries demonstratum. Reserato enim aneurysmatis sacco, protinus ne dum *polyposae concretiones* varii generis proruperunt ²), verum etiam totam eius interiorem faciem succinxisse visae sunt. Secundo notandum ducimus, LANGHANSIUM narrare ³), a *polypo* se disruptam vidisse *sinistram cordis auriculam*, qui tantae molis erat ac firmitatis, ut recens natus dici nequaquam posset; neque nasci in ipso mortis tempusculo eum potuisse credimus, quoniam manifestum omnino est, quidquid sanguinis liquidi auriculae inerat, aut in eam ingrediebatur, antequam dehisceret rumpereturque, celeriter ab eadem dilacerata effluere debuisse, neque quidquam eius in ipsa retineri potuisse, nisi quod iam multo ante coiverat, firmiterque adhaeserat.

1) SWIETENIUS in BOERHAAVII *aphorismos* §. 176. p. 236., HAENIUS *Rat. medend. Part. IV. cap. 2.*, MASOTTIUS *Dell' Aneurisma del poplite* p. 28.

2) *Acta Helvetica* T. II.

3) *Ibidem* p. 123.

§. CCLXIV.

III. *Argumentum ex
LANCISII ex-
perimento.*

*Idem exper-
imentum a
FERRARIA
confirmatum.*

Tertio rem LANCISII experimento, si quod aliud, probatissimo confirmamus. Ligavit vir clarissimus in vivo cane alteram ex arteriis iliaticis. Post dies XV. dissecuit ligatum vas, invenitque in eo supra vincturam *polyposam concretionem* ¹). Nec obstat, idipsum experimentum ab alio celeberrimo viro repetitum non respondisse. Nam illud idem, quod LANCISIUS narrat, ligato in agno arteriae iliacae ramo tentavit, viditque manifestissime PASCHALIS FERRARIA ²), nec non ante eum Cl. PETITUS in iis, quibus membrum aliquod fuerat amputatum; altero quippe ab amputatione die, interdum etiam vigesimo aut trigesimo *polypos* in arteriis membri mutilati, quibus vinculum ad sanguinem sistendum de more fuerat iniectum ³), offendit.

1) *De aneurysmat. Prop. XXXVIII.* p. 127.

2) *Delle morti, e malattie subitanee. Edit. 2. p. 39. et seqq. Neapoli 1767.*

3) *Mémoir. de l'académ. des scienc. année 1731.*

§. CCLXV.

An hae *polyposae concretiones* vitae deficienti, aut sanguinis coagulationi mortem subsequenti tribui possunt? Si itaque et solita aneurysmatum pulsatio, innascentibus intus *polypis*, persaepe evanescit, et partium exteriorum aneurysmata, ubi sectione aperiuntur, *polypis* plena in vivis se produnt, et auriculae cordis disruptae *polypos* intra concretos interdum exhibent, et in vivis animalibus non minus quam in hominibus capta experimenta eos demonstrant, concludendum sane est, *polypos*, qui in corde vasisque sanguinis aut dilatatis, aut quocunque alio modo labefactatis reperiuntur, non omnes deficientis vitae, sive mortis esse, ut a nonnullis habentur, effectus.

Conclusio ex allatis argumentis.

§. CCLXVI.

Quod si *polypos* negantium auctoritas non minoris ponderis ac momenti auctoritatibus refellenda sit, non desunt *PECHLINII, MALPIGHII, SMELLII, VATERI, LANGGUTHII, SCHACHERI, HOFFMANNI, SENACII, SWIETENII, MORGAGNI, HALLERI* aliorumque omnigena doctrina anatome et clinice excellentium sententiae atque observationes; qui omnes et *polypos* tuentur, et iamdiu in vivis genitos aut viderunt, aut visos esse testantur. Et quamvis sanguinem recens extractum in durissimam massam interdum concreescere, et vitreo vasi non leviter adhaerere (quod Cl. PASTA obiicit) negandum non sit, attamen cum illustri HALLERO licebit notare ¹⁾, *coagula nimis dura et alba, neque adeo subito nata, in auricula potissimum dextra, valvulis venosis, tendineis funiculis et ramis suis intertexta, cordisque lacertis, et demum ita innata, ut nisi lacerentur separari non possint, aut demum minimis inter reticulatas cordis interni fibras quasi radiculis suis infixa* (quae cum bene

Auctoritati negantium polypos opponuntur illustriores auctoritates.

Cl. PASTAE obiectio reijcitur HALLERI argumento.

multis aliis vidit (Cl. auctor) aliam omnino naturam et cohaerendi rationem prae se ferre, quam ea, quae aut recens in cadaveribus, aut in extracto e vena sanguine nata dicuntur.

1) *Physiolog. lib. V. sect. I. §. XI.*

§. CCLXVII.

Idetiam evincunt symptomata praece- Praeterea, quid *symptomata polypum in cadavere inventum praecedentia* significant? *Nonne haec* (inquit laudentia polypi *datus HALLERUS* ¹) *manifesto confirmant, in vivente iam in cadaveribus inventio-* *homine impedimentum in cordis caveis adfuisse, quod non nem.* *nuper demum, interque moriendum natum fuit? et cor palpitavisse, cum se imperfecte depleret? neque unquam eo se liberavisse stimulo, qui a polypo (crasso corpore) internam caveam obsidente natus non poterat non cor sollicitare?* Adde MORGAGNIUM ipsum, qui alioquin argumenta omnia, quae contra *polyporum in vivis genesin* adduci possunt diligentissime *conquisivit, recensuit et probavit, polypos tamen non omnes negantem.* Ipse enim tam olim in *adversariis anatomicis secundis, animadversione secunda,* quam nuper in *epistola anatomica medica XVII. num. IX.,* itemque in *epistola XVIII. num. XXIII.,* et demum in *epistola XXIV. num. XXX. polypos ante mortem (in sacciformibus praesertim aneurysmatibus) gigni posse, et genitos se vidisse interdum testatur.* Imo *perdifficile existimat (si motus sanguinis, etsi non sit omnino impeditus, sed tamen retardatus, ut in magnis aneurysmatibus) nihil tandem, longo saltem temporis intervallo, secedere, nihil concreescere, et adhaerere e sanguine aut lentius illuc progrediente, aut etiam in sacciformibus aneurysmatibus prope modum subsistente.* Verosimillimum enim est, *per idem sacci orificium, per quod facile illapsus impulsusque est, totum non facile reducturum.* Quamquam vero in *aneurysmatibus* interdum sanguinem cogi posse affirmet, negat tamen id in *corde*, licet praeter naturam *ampliato*, evenire, quod *fibrae cordis irritabiliores sint, ac proinde validius*

Accedit auctoritas MORGAGNII, qui non omnes polypos in vicis gigni posse negat.

Cur MORGAGNIUS neget tantummodo in corde polypos concreescere posse

sem-

semper reagent, quam illae arteriarum, ita ut nunquam in eo sanguis possit conquirere ²). Verum qui hac de causa *Reiicitur* *polypos* reiiciunt, perpendant velim, non solum a *motu de-* *haec MOR-* *gagnii exce-* *ptio non sa-* *tis validis* *fundamentis* *innixa.* *concutiente*, qualis in syncope, aut magno in terrore cor prehendit, oriri, ut perspicue demonstravit experientissimus *innixa.* HAENIUS; ne de alienis in sanguinem immissis eumque coagulantibus aliquid dicamus. Ex quibus omnibus, ni fallor, patere satis videtur, *polyporum generationem a vivo etiam homine non esse penitus excludendam.*

1) *Physiolog. l. c.*

2) *Cit. epist. XXIV. n. 30.*

§. CCLXVIII.

Cum vero *polyporum* alii mortis tempore, alii iampridem vivente adhuc homine concrescant, duplex ideo eorum *Hinc duplex* *genus poly-* *porum, vero-* *rum nempe* *et spuriorum.* genus constituendum esse videtur, alterum *verorum*, qui scilicet iamdiu in vivo homine exorti sint, morbumque reapse effecerint, alterum *spuriorum*, qui morte tantum accedente formantur. Illi ex firma, tenaci, elastica et fibrosa *Quinam veri.* veluti substantia constant, et parietibus, columnis valvulisque cordis aut vasorum lateribus arcte adhaerent, ut inde sine laceratione interdum divelli nequeant. Hi vero a morte *Qui spurii.* nati quandam massam mollem, facile separandam, sanguini coacto, aut crustae *pleuriticae* dictae persimilem, aut grumum inferiori parte rubrum, superiori vero gelatinosum et albidum aut flavescentem referunt. Quam divisionem ita *Divisio haec* *probatissima* *MORGAGNIO* *est.* probat MORGAGNIUS, ut etiam rationem, qua polypi in cadaveribus reperti ad utrum genus referri debeant, scitissime *Ex eo utrius-* *que, veteris* *et recentis* *polypi signa.* tradat ¹). Summatim innatos *saccatis aneurysmatibus* ante mortem esse autumat, si *circum undique et in omnem plagam extendantur ac adhaereant*, sic ut *positum aegri aut cadaveris non videantur sequi*, itemque si *colore lurido* aut *obsoleto* sint, *substantiaque praeter modum exsucca*; hisque discriminibus differre *veros a spuriiis*, seu, ut vocant, *pseudopolypis* in corde aut vasis a morte natis, cum

hi contrario se modo habeant, et positus diversitati, in quo quis obierit aut iacuerit, ad amussim apprime respondeant, *rubra nimirum parte subter locata, desuper vero albedo glutine, seu glutinoso coagulo apparente.*

1) *Epist. anatom. med. XVII. n. 29.*

D i a g n o s i s.

§. CCLXIX.

Polypi latentes in praecordiis quibus signis dignosci credantur.

Incerta haec, quia communia aliis morbis.

Quaedam etiam, non excepto pulsu intermittenti, plerumque desiderantur in polypi vitiiis. Pericardii crassities quandoque polypum mentitur. Qualitas pulsus peculiaris in polypo.

Exposita *polyporum* vera natura ac origine, signa modo recensenda sunt, quibus *polypi* in praecordiis delitescen-
tes dignosci creduntur. Praecipuae eorum notae habentur
pulsus intermittens aut inaequalis, pulsatio carotidum et sub-
claviarum vehementior, cordis palpitation, lipothymia et syn-
cope, respirandi difficultas et pedum oedemata. Quantum
vero haec incerta eorum indicia sint, utpote multis aliis
morbis et causis communia, sic ut *pathognomonica polypi*
esse nequeant, partim ex iis, quae de *laesa respiratione*,
hydropo thoracis et pericardii, *lipothymia et syncope*,
asphyxia, *pulsu parvo, debili ac intermittente* et *de cordis*
palpitatione tradidimus, partim ex iis, quae de *aneurysma-*
tibus et *varicibus* praecordiorum in sequenti capite traden-
tur, luculentissime erit perspectum. Imo quaedam ex his
(non excepto pulsu intermittente, aut inaequali, qui alio-
quin perpetuus *polypi* comes a plerisque habitus est) de-
fuisse interdum in iis, in quibus *polypus* repertus est, ve-
racior historia medica ¹⁾ docet, nosque ipsi non semel ob-
servavimus. Imo sapientissime monet ALBERTINIUS ²⁾, pe-
ricardii crassitiem, aut cum corde cohaesionem saepe *polypi*
signa prae se ferre, et errandi occasionem praebere, nec
certo vitia haec internosci posse, nisi quis fortasse putet
satis discriminis esse, *pulsus* in *polypo* magis a naturali
plerumque recedere, et motum manu ad cordis locum ap-
posita manifestiorem percipi, nec ita facile ac in illis ani-
mum deficere.

1) ALBRECHTUS THAER *Nov. act. phys. med. acad. caesar. Leopold. Carolin. N. C. T. I. ann. 1757. p. 6.*, MORGAGNIUS *Epist. cit. TXIV. n. 28.*, TREWIUS *nov. act. phys. med. etc. T. II. observat. 53.*, *Commentur. de reb. in Sc. nat. et med. gest. Vol. VII. Part. I. p. 114.*

2) *Super quibusdam difficilis respirationis vitiis inter opuscula Vol. I. Comm. institut. scientiar. et art. Bonon. p. 385.*

§. CCLXX.

Nihilo tamen minus si causae, quae *polypo* gignendo valent, praegressae fuerint, si aliorum in *praecordiis* vitiorum signa absint, aut eorum, cum quibus *polypi* facile coniunguntur, indicia non desiderentur, et praeterea pulsus nisi intermittens, inaequaliter saltem inaequalis, cordis palpitatio, tremor, anxietas, angor, difficilis respiratio, tussis et molestus in pectore sensus (quae postrema indicant sanguinem e sinistro cordis ventriculo in aortam non libere ingredi, aut e pulmonibus refluxum in vena pulmonari aut sinistra auricula congeri) aegrum paulatim corripiant, ac assidue divexent, non sine causa de *polypo* intra aortam, aut *sinistrum cordis sinum*, aut *auriculam sinistram* poterimus suspicari¹). Si vero respiratio minus labore pulsus languidior ac exilior sit, et crebrius syncope, quam suffocatio recurat, tremor cordis et anxietas magis, quam vehemens palpitatio affligat, et venae colli subsiliant, et quasi undulationibus micent, probabilius videtur *polypus dextris cordis caveis* insidere. ALBRECHTUS THAER²) in homine, in cuius dextro ventriculo *magnum polypum* in arteriam pulmonarem protensum, in sinistro vero minorem, sed in aortam ultra pedem decurrentem cum corde ingenti reperit, *difficilem respirationem* et *summam anxietatem* cum interpositis *lipothymiis*, sive *pulsuum intermissione* observaverat.

1) ALBERTINIUS *l. c. p. 391.*

2) *L. c.*

§. CCLXXI.

Ex his vero quaedam continua sunt, quaedam recur-
rentia. Pulsus praecipue fere perpetuo esse solet inaequa-
Pulsus ratio varia.

liter inaequalis, imo in ipsa difficiliore respiracione, quae ut plurimum ad quemlibet vel leviorẽ corporis motum, aut ad aëris mutationem, et speciatim ad venti austri flatum accedit, aut ingravescit, obscurus fit, intermittit ac deficit.

Anomaliae cordis et spiritus affectiones.

Cordis vero tremor, palpitatio, vel eius iactitatio et dyspnoea inordinatim invadunt, revertuntur aut exacerbantur, et suffocationem, lipothymiam atque ipsam quoque syncopen minitantur. Non tamen statim ac pulsus intermissio aut inae-

Cur interdum praesente polypo nulla in pulsibus irregularitas.

qualitas abest, credendum est *polypum* etiam abesse. Praesente enim *polypo* in praecordiis, nullam interdum pulsum inaequalitatem aut intermissionem deprehensam fuisse, iam

§. CCLXIX. adnotavimus; videlicet quando *polypi* moles, structura aut positio talis est, quae sanguinis itum et reditum etsi laedat, non tamen enormiter laedat aut intercipiat ¹).

1) ALBERTINIUS *l. c. p.* 390.

§. CCLXXII.

Alia signa observata a MALPIGHIO.

MALPIGHIUS praeter pulsum intermittentem et crebram lipothymiam cum cordis *polypo* coniungi etiam vidit pluries pulsum vibratum, vasa in iugulo dilatata, praecordiorum angustiam, alterutrius brachii torporem, in eodem pulsus ob-

Quaedam ex HOFFMANNO.

scuritatem, et spasticum in sterno dolorem ¹). HOFFMANNUS vero dolorem fixum circa cor cum sensu compressionis inter initia percipi asseverat; cum autem iam adoleverit, accedere ad haec frequentiore cordis palpitationem pulsumque summopere inaequalem et saepius ad intervalla subinde

Alia ex aliis.

intermittentem ²). Oedemata pedum addunt alii, alii faciem rubram, purpuream alii, alii cachecticum cum palpebrarum tumore colorem, anhelitum facile inter loquendum insurgentem, sanguinem e vena eductum tenacem, densum, pleuriticum, cacochymiam aliaque laesae abruptaeque sanguinis per praecordia traiectionis consecutaria ³). Sed quam caute hisce signis uti liceat, iam alibi (§ CCLXIX.) indicavimus.

Cautio.

1) *L. c.*

2) *L. c.*

3) HAENIUS, MACOPPE, MALPIGHIUS.

P r o g n o s i s.

§. CCLXXIII.

Polypus passim incurabilis reputatur. Saepe mortem subitanam ¹⁾ vel catarrhum suffocativum inducit ²⁾. Interdum lenta morte enecat, et hydrothorace aut hydrocardia, in quam incidunt ii praesertim, quibus subtumida est facies, aut oedemata pedum aut cachecticus habitus supervenerint. Nonnullos polypo laborantes miseram vitam ad XV. XVI. annos protraxisse narrant RIOLANUS, RIVERIUS aliique ³⁾. Quamvis vero morbus incurabilis hic esse perhibeatur, si tamen recens sit, neque adhuc indissolubilis polyposa concretio evaserit, HAENIUS et LANGHANSIUS ⁴⁾, a quibus non valde absuisse videtur ALBERTINIUS, non omnem abiiciunt spem, creduntque fieri posse, ut idonea curatione removeatur, imo etiam curatos aliquos referunt.

Passim incurabilis habetur.

Alios morbos chronicos inducit.

Ad multos annos trahitur.

Non desperandum quandoque, si recens morbus sit.

1) TULPIUS et BARTHOLINIUS subitam mortem a *polypo sinistri ventriculi* illatam narrant, et WEPFERUS ab *aortae polypo*.

2) Vidit KIRSTENIUS.

3) Lentam ex *polypo* mortem commemorant *acta academica naturae curiosorum*.

4) *Ratio medend. Part. II. cap. VIII.*

5) *Act. Helvetica T. II. pag. 133.*

C u r a t i o.

§. CCLXXIV.

Curatio itaque innititur indicationibus sanguinis lento-rem resolvendi, debitum eidem fluorem ac aequabilem per vasa excursum restituendi, polypi solutionem moliendi, aut eius saltem incrementum prohibendi, effectusque, qui ipsum consequuntur, mitigandi. Hinc sanguinis missio, et quidem iterata, praesertim in plethoricis et sanguineis temperamentis, accommodatissima censetur cum ad *polypum* praecaven-

Indicationes.

Iterata sanguinis missio tum ad praecavendum,

tum ad curandum polypum.

Cautelue in sanguinis missione.

Ab ea non deterreat obscuritas pulsus, vel ali-quod cachexiae principium.

Experimenta Halleriana.

Cita esse debet V. S.

dum, tum ad eundem dissolvendum, ubi iam est, tum etiam ad eius symptomata discutienda aut compescenda. Sit tamen in ea instituenda aliquis modus, adiunctorumque ratio, ut par est, habeatur, ne vires plus iusto cum magno aegrotantis detrimento deiciantur, vasorum robur infirmetur, aut debita sanguinis crasis destruat; quod a sanguine temere ac inconsulto profuso non raro accidisse dolumus. Ab eo vero non semper deterreat pulsus obscuritas, oppressio virium, aut aliquod cachexiae principium; nam ubi aeger opprimi suffocarique videtur, saepe mirifice cauta sanguinis missione relevari potest; et melius est anceps experiri remedium, quam nullum. In universum vero nihil magis fastidientem cordis motum erigit revocatque, aut congesto resistantique sanguini iter parat, aut inceptam eius concretionem resolvit, quam cita sanguinis missio, ut *Halleriana* in vivis animalibus facta pericula ostendunt.

§. CCLXXV.

V. S. quando celeriter instituenda.

Quibus sanguis tutius mittatur hirudinibus vel cucurbitulis.

Vincturae et fricationes, manuum pedumque in calidam immersiones.

Quando cardiacis, resolventibus et paregoricis utendum.

Hoc itaque praesidio *palpitationi* vehementius urgenti, *orthopnoeae*, itemque *syncopae* supervenienti celeriter succurrendum est. In *cachecticis*, *hydropicis*, *debilibus*, *viscerum obstructionibus affectis* tutius sanguis mittitur per hirudines haemorrhoidibus applicitas, aut cucurbitulas tam siccas, quam scarificatas dorso cruribusque admotas. Fricationes quoque et ligaturae dolorem inferentes, manuum et pedum (si per oedemata liceat) in calidam demissio, odoramenta naribus supposita, ac alia huius census utiliter pro diversa circumstantiarum ratione et necessitate in usum vocari possunt. Neque interdum alienum est, cardiacis, lenioribus resolventibus, imo etiam sedantibus et paregoricis uti; ubi nempe languida vitae vis excitanda, aut spasticae convulsivaeque affectiones sedandae videantur

§. CCLXXVI.

Alvus decedenda clysteribus et blan-

Quidquid etiam viscera abdominis praegravat, vasaque illuc decurrentia comprimit, aut obicem diaphragmati oppo-

nit, diligentissime expedit amovere. Quare alvus a faecibus *dis eccopro-*
 flatibusque libera servetur ope clysterum blandorumque ec-
 coproticorum, de quibus saepe a nobis mentio alibi facta *ticis.*
 est. Deinde quae diluunt, quae temperant, quae sanguinis
 et lymphae densitatem attenuant, causisque, unde morbus
 dimanavit, occurrunt, in usum veniant. Nitrum, tartarus *Incidentia.*
 vitriolatus, terra foliata tartari aut eius liquor, sal poly-
 chrestus, mel, oxymel, gummi ammoniacum incidunt egre-
 gie. Ob vim, ut vocant, saponaceam et simul temperan- *Diluentia.*
 tem commendandae sunt verno tempore ptisanae ex hordeo, *Ptisanae*
 gramine, sonchio, chaerophyllo, cichoreo; aestivo vero aquae *verno tem-*
 medicatae affatim et diu, prudentis tamen medici consilio, *pore.*
 hauriendae. His enim universa sanguinis massa diluitur, vasa *Aestate*
 omnia deplentur reseranturque, humorum circumvolutio pro- *aquae medi-*
 movetur, fibrarum oscillatio excitatur, et nimia ad concre- *catiae.*
 scendum sanguinis proclivitas avertitur.

§. CCLXXVII.

Reliquis vero ab illustri imprimis Gallorum regis ar- *Spiritus salis*
 chiatro SENACIO anteferuntur spiritus salis ammoniaci, sal *ammoniaci,*
 tartari, sapo venetus, aqua calcis rite ex ostrearum testis *tartari, sapo*
 crematis parata, atque ex his quotidie tantum sumi duntis- *ven. et aqua*
 sime iubetur, quantum morbi magnitudini et pertinaciori *calcis ex*
 naturae videtur accommodatum. Incipiendum autem a par- *Cl. SENACIO*
 tiori dosi est, paulatimque ad largiorem ascendendum. Tanta *ceteris sunt*
 inest his resolvendi polypum potentia, ut praegrandes du- *praestan-*
 rioresque polypi e cadaveribus extracti, atque in aquam cal- *tiora.*
 cis cum sapone veneto et sale tartari commixtam iniecti bre- *Dosis horum*
 vissimo temporis spatio colliquati fuerint ¹). *remediorum,*
et mira eo-
rum vis.

1) Vid. SENAC. *Traité du coeur. Vol. IV.*

§. CCLXXVII.

LANGHANSIUS ¹) tamquam experientia comprobatum *Pulvis LANG-*
 sumi iubet semel aut bis quotidie pulverem, qui fit ex ra- *HANSII com-*
 dicis serpentariae virginianae scrupulo, salis ammoniaci de- *positus ex*
 faccati et nitri puri singulorum granis XII. Deinde ad cha- *rad. serpent.*
virgin., sal.

amm. et nitr. lybis usum cum lenibus aromaticis adiectis transeundum esse *puriss.* praecipit. Chalybi vero tunc maxime erit locus, cum solidarum partium debilitas, mala chylosis et cachexiae metus remedia roborantia suadent. HAENIUS etiam gloriatur ²⁾), non paucos *polypo* detentos sola antiphlogistica cura a se fuisse sanitati restitutos. Dedit autem his per sesquimenssem singulis diebus semunciam roob baccarum sambuci, tantundem pulpae tamarindorum et nitri drachmam ex seri lactis largiori haustu. Addebat vesperi pro re nata *paregoricon* ex diacodion. Ab ALBERTINIO ³⁾) succum expressum ex lupulorum aut chaerophylli foliis commendatum legimus, cui interdum lac adiciebat gummi ammoniaci ea confectum ratione, quam BARTHOLETTUS proponit, vel spermatis ceti recentis partem aliquam; et ubi valentius agendum esset, cum aliquot granis florum salis ammoniaci martialium permixtam, vel aliquod salis essentialis alicuius plantae dissolventium genere. Hoc nomine praestare etiam dicuntur radix polygalae tam virginianae, quam vulgaris, dulcamara, arnica, extractum cicutae atque aconiti coerulei, tinctura acris antimonii aliaque huius generis attenuandi laude insignia. Decocta vero lignorum, mercurium salesque volatiles, utpote quae vel cordis arteriarumque motum nimis concitant, vel sanguinem rarefaciunt, eiusque augment motum, cum BOERHAAVIO ⁴⁾), ALBERTINIO ⁵⁾) aliisque sanioribus medicis vel nunquam in *polypi* suspitione adhibenda, vel magna omnium rerum consideratione cautissime usurpanda esse censemus ⁶⁾).

1) *L. c.*

2) *L. c.*

3) *L. c.*

4) *Inst. med.* §. 826.

5) *L. c.*

Observationes et exempla damni a mercurio illati. 6) Virum vidit ALBERTINIUS ex *mercurio dulci* salivae proritandae causa sumpto incidisse in contumacem *cordis palpitacionem*; idem alium ab eodem *mercurio* tam *dulci*, quam *civo* assumpto ex *praccordiorum aneurysmate* enecatam; ac tandem alium ab *illitu mercurii* post aliquot annos *dilatatione auriculæ cordis dextrae* et *pericardii hydrope* correptum obiisse. Hinc monuit PARAEUS, aneurysmata interna frequen-

ter accidere iis, qui litus mercuriales ad curationem luis venereae multoties pertulerint. Sublimati etiam corrosivi usus suspectus esse debet, ut patet ex BONELLII in Cl. BASSANII animadversionibus.

§. CCLXXIX.

Quod attinet ad victus rationem, carnibus praestant *Victus ratio.* olera, fructus probe maturi, pisces fluviatiles. Glutinosa omnia, acida, austera et spiritus fermentati, imo vinum meracum (nisi cachexiae timor aut ventriculi languor aliter poscant, quo in casu id aqua chalybe ignito alterata dilui potest) penitus exulent, utpote quae sanguinis spissitudinem augere, aut eum cogere, vel rarefacere nimis et exagitare possunt. Postrema hac de causa suspecta est quoque corporis *Noxia corporis nimia exercitatio.* exercitatio, maxime incessus per acclivia. Lenissima tamen vectio in aëre puro, elastico, sicco, ventis haud agitato permitti potest. Animi quoque affectus vehementiores, eorumque causae sedulo vitentur, imprimis amor, odium, *Animi pathemata arcedenda.* moeror atque ira. Ex his enim alii actiones naturales depravant, alii cordis motum laedunt aut intercipiunt, alii concitant ac irritabilitatem sollicitant; unde vel crudi impurique succi in sanguinem traducuntur, vel lentore incrementum promptior via ad stagnationes paratur, vel vasa impetu maiore illato praeter naturam dilatantur, ut inde *polypus* incrementum facilius recipiat, vel repente diffracta dehiscant.

N O T A.

Exstat inter minora opuscula auctoris de hoc argumento dissertatio, quam legendam tradidit VINCENTIO NEGRO anno 1776, quum is de huiusmodi cordis vitio theses publice propugnandas aggrediretur. Vide theses de polypis praecordiorum, quas in Ticinensi Gymnasio laudatus VINCENTIUS NEGRO propugnavit, et eodem anno Ticini edit. in 4. Typis Ioseph. Bolzani.

CAPUT XI.

DE ANEURYSMATIBUS ET VARICIBUS
PRAECORDIORUM.

§. CCLXXX.

Etymologia. Id quod Latini *arteriae dilatationem* appellant, a Graecis *Ἀνεύρυσμα*, ab Arabibus *hyporisma*, vel *aporysma*, vel *emborysma* nominatur. *Aneurysmatis* etymon non omnes una eademque ratione explicant, alii enim ab una, alii ab alia voce illud derivant ¹). Graecis Arabibusque erat ille *tumor arteriae*, qui ab ea disrupta aut discissa effusoque sanguine in vicina spatia ortus esset ²). Ab hac sententia descitum est posterioribus temporibus, sic ut *non rumpi*, sed tantummodo *dilatari arteriam* in *aneurysmate*, FERNELIO et VESALIO praeceuntibus passim crederent ³). SENNERTUS vero, HILDANUM fortasse secutus ⁴) *aneurysmatum* naturam non in sola *dilatatione arteriae*, verum etiam in eius *tunicae interioris ruptione* (duabus enim tunicis arteriam constare olim putabant), exteriore interim integra, positam esse tradidit ⁵). Sed SENNERTI, FERNELII et VESALII sententiam reprobans FREINDIUS, observationibus bene multis in medium prolati, veterum opinionem restituere annisus ⁶) est. Rem vero ipse, si non fallimur, minime confecit. Ostendisse tantum visus est, *aneurysmata* cum ad summam dilatationem perveniant, disrumpi tandem, non in ipsa ruptione arteriae antea constitisse.

1) HIERONYMUS MONTIUS, ut LANCISIUS tradit (*de aneurysm. in gener. lib. I. propos. I.*), in enervationis vocabulum transtulit *aneurysma* a particula privativa *α*, et τοῦ νεύρου, i. e. *a nervo*. SYLVATICUS autem (*Tractat. de aneurysmat.*) a verbo *Ἐγέρνω*, scilicet *dilato*, deducit. Demum M. AURELIUS SEVERINUS (*De noviss. observ. abscess. cap. VII. p. 170.*) *Ἐγέρνω*, nempe *effluere* et *exsilire* derivandum arbitratur. Etymologia vero SYLVATICI reliquis praeferenda videtur.

2) GALENUS (*lib. Isagog. defin. med., et de tumorib. praet. natur. class. III. c. XI.*) aneurysma (inquit) est relaxatio venosi vasculi, aut dispersio spiritalis materiae sub carne per dissultationem se se diffundentis etc. Atque alibi: ore autem in arteria facto, affectio aneurysma vocatur; fit autem vulnerata etc. Ex his GALENI verbis colligitur, ab eodem tam dilatationes venarum, quam arteriarum, earumque ruptiones comprehendi sub uno aneurysmatis nomine. Addit autem ibi unam ex multis causis, nempe vulnerationem; quod clarius explicat libro *de citrand. ration. per sang. mission. 22. et 23.* inquiens, incisam arteriam aneurysmate facillime corripit. Vid. ORIBASIIUM *Collect. medicinal. lib. VII. cap. 13. et 14.*, AETIIUM *Tetrab. IV. sermon. 2. cap. 51. et serm. III. c. 10.* ACTUARIUS ZACHARIAE filius (*meth. med. lib. III. cap. 2.*) testatur, hoc nomine Graecos intellexisse etiam simplicem dilatationem arteriae. *Ex sch. auct.*

3) Vid. BONET. *Sepulchret. anatom. lib. IV. sect. 2.*

4) Vid. FREINDII *Histor. med.*

5) *Id. ibid.*

6) *L. c.*

§. CCLXXXI.

Hodie vero compertissimum est, arterias, detracto aut destructo cellulari quo firman-
Qualis hodie morbus intelligatur.
 tunc, protinus intumescere, et praeter naturam extendi, quin ulla interiorum scissura aut laceratio contigerit; neque ullo negari potest modo, a vulnere, punctura, contusione interdum aneurysmata repente oborta esse; neque rationi experientiaeque repugnat, laxata quomodocunque, aut exesa, aut diffracta interiore arteriarum compage, eas in tumorem protuberare consuevisse. Hinc aneurysmatum triplex genus commodissime constituitur, alterum a sola dilatatione arteriae, alterum ab eadem disrupta, aut quocunque modo aperta, hiantem ac sanguinem effundentem, tertium ab utraque causa oriundum, sive mixtum, quod Cl. HUNTERUS ¹⁾ constituit, etsi a nonnullis ut fictitium reiiciatur ²⁾.

Triplex aneurysmatum genus.

1) *Medical observations and inquiries by a society of physicians in London. Vol. I. artic. 37.*

2) *Id. referunt auctores Diarii de litteratura Europae T. IV. ann. 1758. pag. 114.*

§. CCLXXXII.

Quae ad *primum* genus spectant, a chirurgiae profes-
Primum ge- soribus *vera* appellantur, *spuria* quae ad *alterum* ¹⁾, quae
nus est vero- demum ad *tertium*, utpote ex vero et spurio composita,
rum, spurio- *mixta* ab HUNTERO mox laudato dicuntur ²⁾. Nonnulli
rum secun- addunt *quartum* genus, scilicet *aneurysma varicosum*, quod
dum, et ter- fieri dicunt, quando *arteria* et *vena* contiguae ita perfo-
tium compo- rantur, ut sanguis ex illa in hanc irruens *tumorem salien-*
situm sive *tem* efficiat ³⁾, ut si ex. caus. *basilica vena pertusa com-*
mixtum. *municet cum vulnere arteriae brachialis subiectae* ⁴⁾. *Spu-*
Additum *rium* porro aneurysma dividitur in *diffusum*, et in *circum-*
quartum est, *scriptum*. Illud est, quando *sanguis effusus* latius per *cel-*
varicosum *lularia spatia* vagatur; hoc vero quando *sanguis e cellu-*
dictum. *lari textu* aut *membrana aponeurotica* incumbente ita coër-
Divisio spu- cetur, ut in angustiore loco consistat ⁵⁾. Subdividitur quo-
riorum in *que spurium* a Cl. FOUBERTIO in *primitivum*, et *consecu-*
diffusa et *tivum*; quorum alterum mox post arteriae laesionem orit-
circumscri- tur, alterum vero post aliquot dierum spatium ab eiusdem
pta ab HUN- laesione consequitur ⁶⁾.
TERO facta.
Subdivisio in
primitivum et
consecutivum
ex FOUBER-
TIO.

1) PLATNERUS *Instit. chirurg.* §§: 420. 21. (†).

2) *L. c.*

3) WHITE et THOM. ARMIGER. *Comm. Lips. T. XVIII. P. III. p. 408.*, et FOUBERT. *Mém. de l'acad. roy. de chirurg. T. II. p. p. 535.*

4) *Comm. Lipsiens. l. c.*

5) HUNTERUS *l. c.*

6) *L. c.*

HUNTERI
error nota-
tus.

†) AETIUS distinxit iam aneurysmata in *vera* et *spuria*; et fallitur Cl. HUNTERUS, cum eius distinctionis auctorem facit PAULLUM AEGINETAM, qui floruit seculo VIII. christianae salutis.

§. CCLXXXIII.

Distinctio *Aneurysmatum* vero distinctionem in *vera* et *spuria*
prima de ve- probare tunc tantum videtur LIEUTAUDIUS ¹⁾, cum exte-
ris et spuriis *rioribus* ea occupant partes. Quod sane de reliquis aliis etiam
LIEUTAUDIO *subtilioribus* divisionibus dici posset. Non tamen absurdum
arridet tan- est, quodlibet genus (§§. CCLXXXI. CCLXXXII.) ubique
tum de ex-
ternis.

oriri posse, et si qua difficultas est, totam in iis distincte dignoscendis, quoniam intrinsecus sita saepe omnem oculorum et manuum inquisitionem effugiunt, positam esse arbitramur. A vero tamen fortasse non abest, *aneurysma verum* frequentius *interioribus*, *spurium exterioribus* in partibus, ac praecipue in *artibus* deprehendi, quemadmodum PLATNERUS ²) rectissime monet.

Utrumque genus tam intus, quam extra possibile est. Verum aneurysma crebrius intus et spurium extra est.

1) *Précis de médecine liv. I. p. 146.*

2) *L. c. §. 422.* Exemplum spurii aneurysmatis interiorum partium vide apud TABARRANIUM *observ. anat. n. VIII. pag. 16.*

§. CCLXXXIV.

Ex his in universum expositis, quid sit *aneurysma*, quisque intelligit. Est autem vel *arteria* praeter naturam alicubi *in tumorem dilatata* atque expansa, vel *tumor* in circumpositis partibus ab *eadem rupta*, aut *incisa* et sanguinem effundente ortus, vel utriusque mali complicatio. *Venis* quoque eiusmodi vitium commune est. Hinc enim vel propriam ac naturalem figuram amittunt, et ampliorem capacitatem acquirunt, vel ruptae aut discissae in cellulas circumpositas aliquid sanguinis effundunt. Illud nomine *varicis*, hoc *ecchymoseos* sive *sugillationis* proprie distinguitur. Non enim eorum nos auctoritate movemur, qui uno *aneurysmatis* vocabulo utraque et *venarum* et *arteriarum* mala complectuntur.

Qualis et quotuplex vitium arteriarum aneurysma.

Idem vitium venis quoque commune, et quotuplex. Varices. Ecchymoses vel sugillationes.

§. CCLXXXV.

De his itaque vitiis tam *aneurysmaticis*, quam *varicosis*, non quidem universis et quibuscunque, sed de iis duntaxat, quae specialim in *praecordiis* fiunt, mox disseremus, in *praecordiorum spatium* latius quam moris est, ad CORNELII CELSI exemplum, extendentes ¹), eo quidem consilio, ut universa fere *aorta*, in quam crebrius *aneurysmata* cadunt, et vena *cava*, quae *varicibus* corripitur, in eodem spatio commode etiam comprehendi possint. Antequam vero progrediamur, aliquid de ea peculiari divisione, qua in recensendis *prae-*

Hic agitur de iis tantum, quae in praecordiis fiunt. Praecordiorum spatium cur ad totam fere aortam et venam cavam extendatur.

Divisio LANCISII. *cordiorum aneurysmatibus* usus est Cl. LANCISIUS, praemonere convenit. Haec et ipse in *vera* sive *legitima*, atque *Quae ei vera sint.* in *notha* sive *spuria* quidem distinxit, sed alia prorsus significatione, quam eiusmodi voces a chirurgis medicisque (quod

Quaenam spuria. supra exposuimus) accipi soleant. *Legitima* enim ei dicuntur tam, quae a laxato arteriarum textu, quam quae ab earum soluta continuitate procedunt. Contra *spuria*, quae ab initio non villorum fibrarum arterias contexentium debilitas, laxitas aut solutio effecit, sed adauctus sanguinis impetus, cui ferendo sine divulsione non valeat naturalis communisque arteriarum firmitas sive resistendi vis; id aut in his relaxatio aut ruptio villorum vel tunicarum tanquam effectus consequatur, minime vero aneurysmati primam causam prae-

Divisio SAUVAGESII. beat, sicque in *vera* facile transmutentur ²). Scire etiam interest, *aneurysmata*, quae *vera* a LANCISIO appellantur, *passiva* a SAUVACESIO, et quae *spuria* ab illo, ab hoc *activa* ³) nominari.

1) *Lib. II. cap. 3. lib. IV. cap. 1. et 8. lib. V. cap. 26.*

2) *De aneurysmat. in gener. lib. I. propos. V.*

3) *Nosolog. method. T. I. class. I. ord. V. gen. 2.*

§. CCLXXXVI.

In duo genera rectius distinguuntur aneurysmata arteriarum, id est non saccata, et saccata. Pace vero Cl. LANCISII, alioquin optimi de hisce morbis scriptoris, *aneurysmata* sive *arteriarum dilatationes*, quibus praecordia obnoxia sunt, in duo potissimum genera distribui possunt, quaecunque fuerit eorum origo, eorum nimirum, in quibus arteria in quamlibet partem ultra naturae limites expanditur, ac eorum, quae arteriae pars aliqua *e casis latere* sacci instar protuberans excrescensque format. Vix enim ullum *interiorum partium aneurysma* est, a quo alterutra huiusmodi dilatatio abesse possit. Atque huius aneurysmatum divisionis, in *sacciformia* nimirum et *non sacciformia* ¹), auctor est Cl. MORGAGNIUS ²), quem postea secuti sunt SCHREIBERUS ³), VALCARENGHIUS ⁴) alique. Ast praeter arterias *cor* etiam multiplici ratione dilatari potest, cuius *dilatationes* quid vetat eodem *aneurys-*

Cor etiam iisdem dilatationibus obnoxium.

*mat*is nomine cum BALLONIO ⁵), LANCISIO ⁶) aliisque bene multis hodie vocare, easque pariter in *sacciformes* et *non sacciformes* dispescere?

1) *Non sacciformia* dici etiam possunt *cyliandroidea* cum SAUVAGESIO.

2) *Adversar. anatom.* 2. *aort. animadvers.* 38. et *Epist. Anat. med.* XVII. n. 27.

3) *Act. erudit. Lips. ann.* 1731. *mens. Aug. pag.* 377. 378.

4) *De aneurysm. observ.* I.

5) *Consil.* 109.

6) *L. c. proposit.* 11.

§. CCLXXXVII.

Cor autem, ut ab hoc exordiamur, modo totum, modo *Cordis dilata-*
 aliqua sui parte tantum *dilatatur*, aliisque etiam vitiis (puta *tatio vel so-*
polypis, sarcomatibus, tumoribus variis, itemque *erosione aliis vitiis*
 exterioris ambitus una simul non raro subiicitur. Exempla *copulata.*
cordis universi *mole aucti* et praeter modum *dilatati* fre- *Varia dilata-*
 quentissima extant apud auctores ¹). Interdum cum summa *tionum cor-*
parietum eius *extenuatione* aut *flacciditate* dilatatio coniun- *dis ratio et*
 gitur, interdum cum dilatatione cavearum omnium *parie-*
tum crassities ac *spissitudo* firmitasque augetur, interdum *natura.*
moles tantum ipsa videtur *aucta*, quin tamen iusto maior
 cavearum amplitudo dici possit. Quandoque etiam *arteriae*
 et *venae coronariae aneurysmaticae* et *varicosae* in eo cer-
 nuntur. Ita vero saepe extenditur, ut *iuvenci cor*, aut *ca-*
put maiusculum, aut *ter quaterve naturalem magnitudinem*
adaequet superetve ²).

1) Primi, qui ea notaverint, sunt NICOLAUS MASSA anno *Auctores,*
 1534 in *lib. introduct. anatom.* c. 28.; VESALIUS *De human. qui de cor-*
corpor. fabric. lib. I. c. 5., CAROLUS STEPHANUS *De diss. dis mole au-*
part. corp. hum. lib. II. cap. 33.; BALLONIUS *Epiden. l. II. et exempla*
in constitut. autumn. ann. 1573, ANDREAS LAURENTIUS *Hist. referunt.*
anat. corp. hum. lib. IX. quaest. 18. Qui alias huiusmodi
 historias desiderat, legat etiam BONETUM *Sepulchret. anatom.*,
 SCHENKIUM *Pratyriseon, sive observ. d. merar. etc.*, LANCIS-
 SIUM *De motu cord. et aneurys.*, KINGS-MACOPPE *De aort.*
polyp., MORGAGNIUM *De sed. et causis morbor. per anatom.*
indag., SENACIUM *Traité du coeur*, PASTAM *De cord. polyp.*
in dub. revocat., VALCARENGHIUM *De aort. aneurysm. observ.* 3.,

MATANIMUM *De aneurysm. praecord. vitiis*, SWIETENIUM *Comment. in Boerhaav. aphor. de cogn. et curand. morb.*, LIEUTAUDIUM *Hist. anat. med.*, HAENIUM *Ratio medendi*, et ibi non cordis tantum, verum etiam aortae, venae cavae aliorumque vasorum dilatationum exempla inveniet.

2) NICOLAUS MASSA et BALLONIUS *loc. citatis*.

§. CCLXXXVIII.

Modo quaedam cordis partes, modo plures dilatantur.

Quandoque autem aliquae tantum cordis partes, aut una vel altera singillatim in immensam molem explicantur. Imprimis *dextra cordis auricula* huic vitio obnoxia est, ut modo *dimidiatum*, modo *integrum cor*, modo *caput infantis recens nati* magnitudine referat. Dilatatur quoque *dexter eius ventriculus*, sicuti etiam *sinister*, eiusdemque lateris *auricula*, et ita quippe ut interdum disruptionis periculum immineat, imo disruptio ipsa sequatur. *Sinistri*

An plus dextrae, quam sinistrae partes laborent.

vero *ventriculi* dilatationes plures vidit LANCISIUS, item MORGAGNIUS, quam *dextri*; *auriculae* vero *sinistrae* rariores, quam *dextrae* ¹⁾). At SWIETENIUS contrarium docet ²⁾). Interdum *dextrae*, interdum *sinistrae* solum *cavae*, interdum *utrinque* una *simul* ampliantur, ut apud observationum anatomico-medicarum scriptores videre est.

1) *Epist. anat. med. XVIII.*

2) §. 176.

§. CCLXXXIX.

Quaenam ex arteriis aneurysmate afficiantur.

Quaenam frequentius. Unde frequens erosio earumque disruptio.

Ex arteriis porro, quae in praecordiis locantur, praecipue aneurysmate afficiuntur *arteria pulmonaris, bronchialis, aorta* tam in suo initio atque arcu, quam in trunco *descendente, subclaviae, carotides, axillares, coeliaca, hepatica, splenica, mesentericae, emulgentes, iliacae* earumque *rami*. Sed frequentius reliquis *aortae curvatura*, quod et proximior cordis actioni sit, et totum sanguinis impetum arcu suo recipiat. Saepe *arteriarum aneurysmata* aut ab acri humore ibi deposito, aut acri ex stagnatione facto intus eroduntur, et sanguinem in pericardium, in pectoris cavum aut alia proxima loca tam lacerata ac erosa, quam rupta

rupta effundunt. Inter pocula et iocos arteriam pulmona- *Exempla ar-*
rem diffractam MATANIUS ¹⁾); *erosam et sanguinem in* *teriarum pul-*
pericardium evomentem TABARRANIUS ²⁾); *aortam prope* *monar., aor-*
corruptam MORGAGNIUS ³⁾); et ob *molem adauctam* a cor- *tae, bronchia-*
dis basi secedere incipientem MERYUS ⁴⁾) viderunt. *lis aneurys-*
chiale eodem vitio affectam in quodam cursore repente *mate affecta-*
rum et dis-
ruptarum.
denato conspexit Cl. LEPROTTUS ⁵⁾). Interdum intus osseae
evadunt, aut osseis squamis obducuntur. Ex *aorta in aneu-* *Interdum os-*
rysmā dilatata, et hic illic *ossea* obiit WEPFERUS ⁶⁾). *seae, aut*
Aortam cum aneurysmate tres digitos lato *indurata,* ac *squamulis os-*
osseis intus *luminis* obsitam refert MORGAGNIUS ⁷⁾), VAL- *seis obductae*
evadunt.
SALVA ⁸⁾); et *crusta ossea* inductam ALBERTINIUS ⁹⁾). De *Exempla ex*
observationi-
bus cel. viro-
rum.
monstrosissimo tribus digitis *supra cor aneurysmate* cum
interiore *aortae tunica erosa* mentionem facit RUYSCHIUS ¹⁰⁾),
aliique multi commemorant, quod imprimis lue venerea la-
borantibus non infrequenter accidit. Haud raro *aortae* *Interdum*
aneurysma oesophagum et tracheam comprimit. De hac *aortae aneu-*
rysmā oeso-
phagum et
tracheam
laedit.
dilatata *oesophagum tracheamque* comprimente meminit RA-
MAZZINIUS ¹¹⁾); ac de alia, quae *oesophago* ita adhaerebat,
ut eo *eroso* in ventriculum post *anerysmatis* ruptionem san-
guis descenderit, MATANIUS ¹²⁾). Prope cor saepe ita di- *Saepe in im-*
mensum pro-
pe cor ex-
crescit.
lātatur, ut in immensam molem exerescat. *Orificium* eius
adeo *amplum* in *corde aneurysmatico* olim LAURENTIUS et
nuper PASCHALIS FERRARIA observatum memorat, ut *bra-*
chium *admitteret* ¹³⁾).

1) *De praecordior. morb. p. 120.*

2) *Observat. anat. n. 8.*

3) *Epist. anat. med. XVII. n. 29.*

4) *Hist. acad. Parisin. anni 1716. p. 51.*

5) *Comm. acad. Bonon. Vol. I. p. 345.*

6) HAENIUS ex eius vita in *Rat. med. P. IV. p. 15.*

7) *Epist. citat. n. 17.*

8) MORGAGNIUS *ibid. n. 23.*

9) *Comment. acad. Bonon. V. I. pag. 402.*

10) *Observ. chirurg. n. 38.*

11) MORGAGNIUS *Epist. XVIII. n. 17.*

12) *De aneurysm. praecord. morbis* pug. 120.

13) *Delle morti e malattie subitanee* p. 89.

§. CCXC.

Damna ab aneurysmatibus aliis remotis et solidis partibus illata. Rarae observationes

I.

Saccus arteriae magnae cum fractura claviculae et IV. costarum carie.

II.

Aliud ingentis molis in dextra aortae parte ad thoracis usque latus dextrum et ultra sternum.

III.

Item arcus aortae saccus comminuta 3. costa extra protuberans.

IV.

Aliud arcus aortae cum duplici externo tumore.

V.

Curvaturae arteriae magnae a medio thoracis ad inferiorem mandibulam.

VI.

Aliud arcus

Interdum etiam *aneurysmata* ad varias dissitas regiones producuntur, ossa opposita diffringunt, cartilagineae solvunt, omnia carie pessumdant. *Saccus aneurysmaticus haedii* num caput superantem ovalis figurae in dextro arteriae magnae latere, antequam haec commune principium subclaviae et carotidi dextrae praeberet, cum dextrae claviculae ruptura, carie et quatuor primarum costarum, qua diu cartilagineae esse solent, corruptione, describit MORGAGNIUS ¹⁾, et ante eum VATERUS ²⁾, SCHREIBERUS ³⁾ et FLACKIUS ⁴⁾. *Aneurysma sacciforme* circumferentiam XXI. $\frac{1}{4}$ pollicum rhenholland. habens, X. $\frac{1}{4}$ latum altumque inter secundam et tertiam costam veram ex anteriore dextra aortae parte enatum, ac in dextro thoracis latere extrorsum protuberans sinistrorsum vero ultra sternum extensum, a clavicula duorum digitorum latitudine distans, inferius ad papillam usque dextram protensum, ac intus ad sinistrum usque cordis ventriculum expansum, sanguineque polyposo plenum (unde pulsus debiles et parvi in aegro fuerant) refertur ab EDUARDO SANDIFORTIO ⁵⁾. Aliud *sacciforme* in latere dextro *arcus aortae* post magnam vocis et corporis contentionem ortum, legitur in *Miscellaneis variae litteraturae* Lucae editis ⁶⁾; quod sic protuberabat dextrorsum, ut inter secundam et quartam costam, tertia penitus comminuta, ad ovi anserini magnitudinem erumperet. Nec dissimile fuit illud, quod ab *arcu aortae* inter secundam et tertiam costam, itemque inter tertiam et quartam sibi viam paraverat, duplicemque tumorem extrorsum attollebat, visum a MORANDIO ⁷⁾. Memoratu quoque dignum est, quod in curvatura magnae arteriae ab enormi quatuor dierum vomitu ortum iam prodidit in lucem LITTREUS ⁸⁾. Hoc media sui parte occupabat thoracem, superiore ad collum usque ferebatur, imo ad ipsam inferiorem mandibulam ascen-

debat. Cl. MORGAGNIUS narrat quoque in viro ludo pilae lignae et vini largiori potui dedito anteriorem arcus aortae parietem in magnum se expandisse *aneurysma*, quod summum os sterni huicque insidentia claviculae extrema et proximas costas partim absumserat, partim carie vitiaverat, et suprema ex parte sterni sub furunculi specie proruperat⁹). Ex gravissimo terrore *aneurysma aortae* in homine quinquagenario excitatum, et cum spirandi difficultate, febre, sinistri pulsus abolitione et cordis palpitatione coniunctum, tuberculumque supra sinistram claviculam ovo columbino magnitudine aequale exhibens, memoriae prodidit GUATTANIUS¹⁰). In dorso circa vertebrae in patricio viro aortae *aneurysma* in tumorem protuberans ex VESALIO descriptis ALBERTINIUS. Exempli vero *aneurysmatum subclaviarum, carotidum, axillarium, bronchialis arteriae, aortae descendens, coeliacae, splenicae, hepaticae aliarumque* videantur apud cel. viros VALSALVAM, MORGAGNIUM, NENCIUM, BEAUSSIERIUM, FANTONIUM, LEPROTUM, HALLERUM, LANCISIUM, in historia Academiae Parisinae, apud BOUCHERUM, BANDERIUM, MATANIUM, TABARRANIUM aliosque non paucos.

aortae cum carie et consumptione ossium sterni, claviculae et costarum.

VII.

Aortae supra claviculam sinistram exhibens tuberculum insignis.

VIII.

Item aortae in tumorem protuberans circa vertebrae dorsii. Reliquarum arteriarum aneurysmata.

- 1) *Epist. anat. med. XVIII. n. 25.*
- 2) *Ephemerid. N. C. decad. III. n. IX. observ. 162.*
- 3) *Nov. Comment. acad. scientiar. Petropolit. T. III. phys. n. 4.*
- 4) *Ephemerid. nat. curios. cent. V. observ. 74.*
- 5) *Nova acta phys. med. N. C. T. IV. p. 21.*
- 6) *T. II. p. 184.*
- 7) *Mém. de l'acad. roy. de Paris ann. 1707.*
- 8) *Epist. anatom. medic. XXVI. n. 9.*
- 9) *De aneurysmat. intern.*
- 10) *Comm. instit. sc. et ar. Bonon. vol. I. p. 402. et seqq.*

§. CCXCI.

Venae demum intra praecordia varicibus patent, sed ex his imprimis vena cava, pulmonaris. Earum quoque exempla crebro occurrunt apud laudatos scriptores. Dilatationis in-

Varices venarum praecordiorum. Venae caeve exempla.

gentis *venae cavae* cum *corde maximo* et supra diaphragma prolapso meminerunt *Miscellanea N. C. Tom. V. decad. 1. observ. XL.*; item *venae cavae*, nec non *auriculae dextrae* amplioris, sanguinisque turgentis, in homine annorum LIV. subita morte extincto repertae LANCISIUS ¹), ut MORGAGNIUM, ALBERTINIUM aliosque plures praeteream. *Venam* porro *pulmonarem* dilatatam commemorat PARAEUS, [memorantque post eum alii quamplures. Hoc pariter vitio non vacat ipsa vena *azygos*. Eius enim truncum immaniter dilatatum ad palmi longitudinem, ut etiam post ruptionem, quae circa medium longitudinis contigit, *venae cavae* latitudinem simularet, invenit in phthisico HERACLITUS MANFREDIUS ³). Sed notatu digna omnino est observatio PORTALII ⁴), quae docet, in cadavere hypochondriaci, qui suppressis haemorrhoidibus in lentam febrem inciderat, et ea extinctus est, *venam portarum* adeo dilatatam, ut intestini faciem prae se ferret, cum hepate praegrandi et scirrhoso inventam esse ⁵).

1) *De subitan. mort. observ. I. p. 243. et observ. IV. p. 281.*

2) *Oper. lib. VI. cap. 32.*

3) MORGAGN. *Epist. anat. m. XXVI. n. 29.*

4) *Histor. anat. med. T. I. p. 125.*

5) Vasa etiam breviora varicibus obnoxia sunt. Id patet ex observationibus, et ex illa potissimum, quam habet COLUMBUS *de re anatom. lib. XV. p. 292.* In Cardinali CIBO *vena*, quae a *liene* ad *os ventriculi* tendit, insignis magnitudinis erat, quae disrupta ventriculum et intestina sanguine replevit, et mortem intulit; licet dum viveret, vomitu et secessu aliquot sanguinis libras reiecerit. Huic sectioni adfuit BRASSAVOLA. *Ex sch. auct.*

§. CCXCII.

Causae utriusque vitii, tam aneurysmatici, quam varicosi.

Iam vero ad causarum recensionem, quibus haec vitia originem debent, veniamus. Harum itaque quaedam *cor* ipsum, vel *aliquas eius partes*, vel *venam cavam* et *pulmonarem*, vel *arteriam* eiusdem nominis dilatant; quaedam cum *cordi*, tum *aortae* in *aneurysma* diducendis aptissimae esse consueverunt. Ad primum genus pleraeque causae per-

tinent, quas *cordis palpitacionem* inferre, supra (§§. CCXLII. CCXLIII. CCXLIV.) tradidimus. Imprimis videntur huc spectare, ut observationes anatomicae docuerunt, aortae angustia¹) aut eius initium osseum, valvulae semilunares osseae, angustia pariter aut induratio arteriae pulmonaris, valvularum eius ad latera adpressio, tumores quicunque egressum sanguinis aliquomodo e corde impediētes, exterior cordis erosio, vomendi conatus repetiti et diu continuati. Nec desunt, qui aërem quoque in cordis thalamis evolutum et expansum his addiderint.

1) *Aneurysma cordis* ab *angustia aortae* et *valvulis induratis* natum refertur a MECKELIO *Tom. VI. Mémoir. de l'Académ. roy. de Berlin. A. 1750*; et a MORGAGNIO *epist. stia aortae. anat. med. XVIII. n. 2. et n. 6.*

Novi et ego puellam annorum sedecim, quae aneurysmate ex *angustia aortae* laborans, usque a teneris unguiculis obnoxia fuit universi corporis tremoribus, magnis anxietatibus, palpitacioni cordis, nec non pulsum irregularitati. Tempore, quo eius menstrua fluebant, omnia symptomata augebantur, imo venae sectione vel purgantium usu ea increescere vidi. Demum syncope superveniens vitae finem imposuit. *Ex adversar. auct.*

§. CCXCIII.

Ad alterum genus referuntur nativa et acquisita fibrarum cordis aut arteriarum debilitas et laxitas, item nimia rigiditas¹), motus vehementiores, insignes nisus conatusque thoracis, ut tubarum aut fistularum inflatio, ars cisiarii, rhedarii, baiuli, cursoris, saltatoris, cantus effusus, tussis valida et diu protracta, animi pathemata²) (praesertim ira diu violenterque compressa), moeror, terror subitus ac ingens, ictus³), lapsus, gestatio, vulnera, polypus, mercurialium remediorum usus⁴), interioris tunicae arteriarum exulceratio, aut exterioris consumptio⁵), sanguinis boni nimia copia, etsi haec raro per se sola sufficiat, cacochymia, hereditaria labes⁶), lues venerea, hypochondriacae, hystericae, rheumaticae, catarrhales, haemoptoicae, herpeticae affectiones, ac demum largior ciborum ac vini ingurgitatio. Hanc vero tanti facit LANCISIUS, ut ex centum

Causae secundi generis.

LANCISII opinio de fre-

quentiori
causa proe-
gumena.

aneurysmatibus sponte natis quinquaginta saltem inde progenita ipse asseveret. Cor item mole auctum *aneurysmatibus arteriae pulmonaris* aut *aortae* causam praebet; quod validius sanguinem trudens in eas, alterutram, aut utramque urgeat, distrahat, divellat sensimque amplificet, necesse est.

HALLERI
opinio.

1) *Aneurysmata* in *aorta* a *rigiditate* hac proficisci videntur, quod in *infantibus* nunquam, in *iunioribus* rarissime, in *senibus* frequentissime hic morbus oriatur ex *disrupta a sanguinis ictu* *exteriore tunica*. HALLER. *Opusc. patholog. observ. XX.*

ALBERTINII
doctrina.

2) Ab huiusmodi principio celeberrimus ALBERTINIUS causam deduxit, ob quam non infrequens in hominibus, rarum vero in brutis hoc vitium occurrat (*T. I. Comment. instit. scient. et art. Bononiens.*). Quod spectat ad hanc causam, scire licet ex ea, si pathemata subita, mixta et pugnancia ac vehementia sint, saepe quasi extemplo *aneurysmata* nasci; *vitia vero varicosa* ex simplicibus, diuturnis et gravibus animi curis plerumque lento passu suboriri.

3) Vidcantur exempla apud LANCISIUM *l. c. propos. 21.*, SWIETENIUM *Comm. in BOERHAAV. aphor. 176.*, VALCARENGHIUM *Observ. II.*, HAENIUM *Rat. med. P. IV. c. 2.*, aliosque.

4) ALBERTINIUS *l. c.*

5) HALLER. *Prim. lin. n. 34.*

Observatio-
nes.

6) LANCISIUS *De aneurysmat. in gen. propos. 47.*; ALBERTIN. *lib. cit. 65.* Uterque observavit, *aneurysmatica vitia cordis* et *adnexarum partium* eadem omnino a proavo et parente in liberos perniciose hereditate descendisse. *Ex sch. auct.*

D i a g n o s i s.

§. CCXCIV.

Ardua et
difficilis est.

Singula haec vitia (§§. CCLXXXVIII. CCLXXXIX. CCXC. CCXCI.) variasque causas (§§. CCXCII. CCXCIII.), unde dimanarint, internoscere res sane complicatissima est.

Utilis metho-
dus ALBERTI-
NII, ut facili-
or fiat.

Ut vero minus difficultatis quaerenti indagantique occurrat, cum Cl. ALBERTINIO notandum est¹), in praecordiorum vitiis, praeter alia signa mox asserenda, applicata ad thoracem, vel ad eum locum in quo morbus latitat manu, motum quendam insuetum vel cum pulsatione, vel sine ea percipi, vel etiam nullum. Plerumque motus, qui coniunctam

Quaecumque
pulsatio

habet insolitam, diu durantem et cum vibratione ictuque *aneurysmaticae dilatationis cordis* micantem *pulsationem*, percipitur in simplici *dilatatione* *aneurysmatica* aut *cordis* totius, aut *auriculae*, aut *ventriculi sinistri*, aut *aortae*, aut *subclaviarum*, *carotidum*, *axillarium*, aut aliorum ab *aorta descendente* prodeuntium *arteriarum*. Qui vero sine eiusmodi pulsatione motus est, *Quando minor aut valde insensibilis evadat.* aut fere nullus ac insensibilis esse videtur, coniungi ut plurimum solet cum *dilatationibus caudicis venae cavae*, aut *auriculae*, aut *ventriculi dextri* ²⁾ aut *arteriae* aut *venae pulmonaris*, aut *arteriae bronchialis*, aut *venarum subclaviarum iugulariumque*. Utilissima sane est clinico eiusmodi *Quandoque varietatibus obnoxiae huiusmodi leges sunt.* observatio motus vel praesentis, vel absentis in hisce morbis; quamquam ea non ita certa constantique lege innitur, ut pluribus de causis, dilatationum nimirum gradu, figura, magnitudine, situs varietate, complicatione, temporis aliarumque rerum ratione variari interdum quam maxime non possit.

1) *Comment. instit. scient. et art. Bononiens. T. I. p. 83. De difficili respiratione. silitis. Inter opuscula.*

2) Laudatus ALBERTINIUS *dextri cordis ventriculi dilatationem* refert ad vitia, quae vocat ipse *varicosa*: quia motum *BERTINII* do-
inducit fere *insensibilem*, et quasi sine ulla pulsatione. At *ctrina a*
BURGGRAVIUS (*Act. academ. natur. cur. Vol. X. A. 1754. BURGGRAVII*
edit. Norimb. p. 140. et *Vol. IV. p. 684. Comm. Lips.*) do-
cet, in *dextri cordis ventriculi aneurysmate ictum cordis non infirmetur.*
omnem sub laeva papilla, sed sub sterno et in dextro etiam
thoracis latere percipi. Cuinam, quaeso, maior fides adhi-
benda? ALBERTINIUS solam experientiam consuluit, quae ve-
racior est. BURGGRAVIUS vero videtur ad loci rationem respe-
xisse. At *pulsatio* non a cordis aucta capacitate, verum ab
eius *valida contractione* videtur repetenda. An haec maior in
dextro cordis ventriculo dilatato? an *dexter ventriculus dextra*
in parte residet, aut in posteriore? Non videtur. Fortasse
itaque plus iusto verosimilitudini indulsit. Id etiam ex eo pa-
tet, quod ultro ipse fatetur, interdum *non ventriculum dex-*
trum aneurysmaticum inventum esse, ubi dextrorsum pulsa-
tio percipiebatur, sed ipsum aortae arcum dextrorsum di-
stentum. Ex sched. auct.

§. CCXCV.

At ubi pulsatio non valida admodum est, sed modica, *Sipulsationis motus minus sensibilis sit,*
aut longe minor, quam vitii magnitudo ferat, aut loci con-

quid a diligenti observatore praestandum.

Quaenam vitia cordis pulsationem obscuriorem aut minimam reddant quandoque.

Quando a pulsatione imminere mortem dignoscatur.

Quaedam alia praemitenda et considerata, ut pulsatio aneurysmatica a reliquis pulsationibus eiusque differentiae et gradus distinguere possint.

ditio eam quodammodo minus sensibilem reddat manui, altius etiam digiti ad iugulum iuxta tracheae latera et sub claviculas adigendi sunt, eodemque tempore intentis oculis carotidum motus, aut venarum iugularium undulationes accurate lustrentur, idque pluries, ac imprimis a pastu, a motu, a scalarum ascensu iterandum, ut medici diligentiam non effugiat. Modica enim et longe minor pulsatio, imo interdum nulla est, ubi cor, licet aneurysmaticum, a basi ultra eius medietatem durius, ac quasi tendineum aut flaccidum nimis evaserit, vel ubi parietes dilatatae arteriae praeter modum crassiores redditi, aut oblongum et quasi fornicatum concreti et polyposi sanguinis aggerem intra se nacti, aut cartilaginea osseave intrinsecus tunica fuerint omnino obducti. Quod postremum ubi incidit, cognosci poterit, si pulsatio olim praecesserit, diu perstiterit, paulatim deinde elanguerit, et melius inde aeger habuerit. Quando vero sine hac causa pulsatio et pulsus obscuriores evadunt, tunc vires deficere, mortemque appropinquare perspicuum est.

§. CCXCVI.

Praeterea sedulo inquirendum est, an motus manu perceptus a naturali recedat, nec ne, et quali quantoque recessu. An in propria cordis sede, an in vicinia videatur. An pulsans pars naturalem servet molem et magnitudinem, aut ampliorem exhibeat. Arduum enim est distinguere pulsationem cordis a pulsatione *aneurysmatis* prope cor positi, nisi haec omnia diligenti studio excutiantur. Si extra pectus morbi sedes fuerit, ubi costae impedimento manui esse non possunt, probe considerare oportet, num diameter arteriae aucta revera sit, quod facile anatomes peritus perspiciet, an vero secundum naturam. Si enim aorta aut coeliaca valide et crebro pulset, idque fiat sine ullo eius diametri augmento, indicium erit, *aneurysma* abesse.

§. CCXCVII.

Signa, quae in praecedentibus

His (§§. CCXCIV. CCXCV. CCXCVI.) accuratissime

indagatis observatisque vel signa alterutrum vitii genus indicantia inveniuntur, vel nulla. Si aliqua, confirmari, si nulla, suppleri possunt aliis, quae aliunde petuntur, nimirum e respirationis laesione, e pulsu, e sensu aliquo aut ponderis, aut cuiusdam constrictionis, aut levis doloris regionem cordis subinde infestante (praesertim si cordis inordinatus motus praecesserit, aut una concurrerit), e decubitu et somno in utrovis latere, potissimum sinistro, non facili, e somni, imprimis inter eius initia, interruptione et levi aliquando se movendi necessitate. Respiratio autem morbo incipiente, vel paulo post eius initium non laeditur nisi post motum concitatio-*Respiratio- nis laesio pro variis morbi stadiis.* rem, aut modice tantum laeditur, ac inter somnum plerumque primum aliquam permu- tandi lateris aut residendi necessitatem inducit; invalescente vero, respirationis laesio et ipsa increscit, imo saepius leviorive ex causa aggreditur. *Aneurysmata* enim sive cordis, sive aortae, aut alterius cuiusque arteriae intra thoracem pulmones mole comprimant, sanguinis per eos motum pervertunt, et saepe diaphragma ipsum praegravant, sicque respirationis liberae actioni officiunt ¹). Aortae quoque, ubi sinistrum bronchiorum ramum amplexitur, aneurysmatica dilatatio sic ramum illum, qui etiam natura angustior est, comprimit, ut per eum inspiratio fieri nequeat ²). Pulsus ipse pluribus modis a naturali aegrotantis habitudine deflectens magnitudine, vel parvitate, tensione, vel molli- tie, vel vibratione, vel frequentia, vel inaequalitate, vel intermissione, vel alia quacunque ratione, si cum constantia talis fit, sive in utroque carpo, sive in alterutro (ut saepe solet), poterit diagnoseos obscuritati non parum lucis af- ferre, dummodo ad ea animus advertatur, quae *de asphyxia, pulsu exili et parvo atque intermittente* proposita sunt (*cap. VIII. huius de morbis pectoris volum.*). Non tamen *Animadvertiones circa haec, i. e. motum et pulsationem cordis, re- spirationem* omnis motus cordis inconditus, aut pulsus et respirationis laesio statim vitia praecordiorum significat, ut alibi saepius praeceptum est. Id satis evincunt affectiones hypochondriacae et hystericæ, chlorosis; naturalis amplioris cordis vis,

tium subsidium peti possunt. Unde petenda.

Respiratio- nis laesio pro variis morbi stadiis.

Qui respiratio ab his vitis laeditur.

Quae signa a pulsu petenda.

Animadvertiones circa haec, i. e. motum et pulsationem cordis, re- spirationem

*et pulsum,
ad errorem
in diagnosi
vitandum.*

aut pectoris angustior capacitas, aut utraque simul iuncta, aut fervida aetas ac temperies, aut pulsus ab ipsa natura inaequalis, vel intermittens, praesertim in pueris, in senibus, in podagra confirmata affectis, aut podagra imminente, in quibus si febris superveniat, naturalis evadere solet; sicut a naturali in febribus mali moris absque ullo organico vitio in intermittentem deflectit.

1) MORGAGNIUS *epist. A. M. XVII. n. I.*

2) PORTALIUS *Mém. de l'acad. roy. a 1769.*

§. CCXCVIII.

Signa nascentis, vel iam nati in praecordiis vitii.

Haec signa (§. CCXCVII.) cum vel omnia, vel plura concurrant, cum diu constanterque perseverent, et sine alio manifesto pectoris morbo sint, nos de vitiis nascentibus, vel iam natis praecordiorum monere possunt, eoque magis, si dolor quasi rheumaticus, inter initia praesertim, ad superas thoracis partes, ad humeros, ac ab his ad medietatem usque unius, vel alterius brachii, vel utriusque persentiat, et maxime ad omoplatas, et si demum causae recensitae

Signa ingravescentis morbi.

iam (§. CCXCIII.) non defuerint. Ingravescentibus porro eiusmodi vitiis, labefactata sanguinis crasi et distributione, non raro ob difficilem orthopnoicamque respirationem, quae demum accedit, vasa pulmonum alicubi turgescunt, distenduntur, imo etiam lacerantur, rumpuntur, aut erosa dehiscunt, unde saepe in aliis sanguis per sputum prodeat, in aliis lympa et serum; hinc tussis, congestiones, dolores

Quaenam superveniant, vel praecedant.

pleuritici, peripneumoniae superveniunt. His saepe succedit, quin imo interdum praecedit ex retardato venosi sanguinis refluxu, aut dissilientibus vasis lymphaticis, aut uberiore per vasa exhalantia effusa humoris copia, quam recipi per absorbentia possit, hydrops pericardii, thoracis, abdominis, atque ex similibus causis sopor perpetuus, mentis obtenebratio, apoplectici affectus, hepatis obstructio, oedemata.

§. CCIC.

Atque haec de communibus *aneurysmatum* signis. Nunc ad cuiusque propria concedimus. *Cor* itaque utroque thalamo *aneurysmaticum* si fuerit, his notis distinguitur. Manu sinistrae mamillae admota cordis ictus non ibi tantum percipitur, sed sub sterno et ad latera extenditur latius, quam cordis naturalis magnitudo postulat, ac ita pulsationes eius confunduntur, ut fere ad numeros redigi nequeant. Imo id evenit, quod eveniret, si toto pectore, nimirum superne ad iugulum usque, inferne ad scrobiculum cordis, ac ad latera etiam demissiora plura quasi corda simul et sine ordine subsilirent, et quidem plus minus vehementer pro varia aneurysmatis magnitudine. Ad quemcunque corporis motum mox gravior anhelatio et molestior cordis palpitation praesto est ¹). Praeterea aegri in sinistro thoracis latere, in quo dolor vel pondus esse solet, non possunt decumbere, subinde pectoris oppressionibus, anxietatibus, orthopnoeis ²) animique deliquiis, licet levibus corripiuntur. Interdum commodius et spiritum ducunt, et cibos deglutiunt, corpore ad anteriora incurvato ³). Pulsus vero plerumque magnus, durus, vehemens, vibratus, ac ab initio rarus, deinde durus item, sed celerior ac inaequalior est ⁴). Interdum tamen naturalis ⁵) est, quin etiam parvus, exilis, intermittens; sed tunc extenuatio etiam cordis parietum, aut nimia flacciditas, aut aliud vitii genus, aut nerveae vis cum his imminutio coniungitur. Saepe quoque accidit, ut cor *aneurysmaticum* deorsum procidat, diaphragma ventriculumque inferiora versus detrudat, difficilesque circa stomachi regionem molestias procreet. Tunc cor prolabi dicitur, et *pulsatio* cordis in hypochondrio, imprimis sinistro, vel epigastrio sic persentitur, ut saepe pro *coeliacae* pulsatione habeatur ⁶).

Signa peculiaris cuiusque vitii aneurysmatici praecordiorum.

Utriusque cordis ventriculi aneurysmatum notae.

Pulsatio.

Respirationis ratio.

Item pulsus ratio.

Prolapsus cordis ita inferius accidit, ut pro coeliacae pulsante sumatur.

1) BURGGRAVIUS in act. acad. N. C. col. X. ann. 1754. ed. Norimb.

2) MORGAGNIUS Epist. A. M. XVII. n. 6. 7. 8. 9.

3) Idem epist. XVIII. n. 18. 19.

4) *Id. epist. XVII. n. 7.*

5) *Id. ibid. n. 8. 9.*

6) *Id. ibid. n. 17. et 28., epistola item XV. n. 53.*

§. CCC.

Notae aneurysmatum aortae.

Aortae vero *aneurysmata* si intra thoracem sita sint, vel sursum, vel dextrorsum, vel sinistrorsum procul a cordis sede plerumque pulsationibus se produnt; interdum etiam in iugulo et temporibus, in dorso eorum pulsationes sunt manifestae. Spirandi quoque difficultas motu ingravescit, pulsus durus, rarus potius et vibratus, non intermittens, nec inaequalis (nisi cum aliis vitiis copulentur), interdum parvus et debilis, et facilis in utrumque latus decubitus esse

Signa adulti morbi graviora.

consueverunt ¹⁾). Saepe ubi adoleverint et tracheam, et bronchia, et praecipue oesophagum comprimunt, unde et suffocatio, et pluribus in locis aliquod deglutiendi impedi-

Dolores, qui ab aegris falso flatibus tribuuntur.

mentum supervenit ²⁾), praesertim resupinato corpore. Non raro dolores in eo latere diuturni et gravantes divexant, qui a flatibus erumpentibus levantur. Hinc aegri flatibus se tor-

Cur etiam morbus aliquando convulsivus videatur aegrotanti.

queri ac laborare credunt. Sed malum minime a flatibus est. *Aneurysma* potius oesophagi compressione sive flatus in ventriculo coërcendo, sive spasmus excitando sibi novam adiungit molestiam; emissis vero flatibus, vel laxato spasmo tandem omnia mitescunt ³⁾). Interdum etiam aura quaedam ascendens ab aegris percipitur; quare putant morbum esse *convulsivum*. Sed haec opinio plerumque refellitur aliis signis, et potissimum anteriora versus residendi ⁴⁾)

necessitate.

1) *MORGAGNIUS epist. XVII. n. 17. et 21.*

2) *Idem n. 25. et 26. Epist. item. XVIII. n. 22.*

3) *Idem epist. XVII. n. 14. 15. 16.*

4) *Id. epist. XVIII. n. 18.*

§. CCCI.

Aneurysmatum varia diagnosi

Prout ergo vel plura, vel pauca, vel unum, vel alterum ex his (§. CCXCV. usque ad CCC.) antecedunt, co-

mitantur et subsequuntur aliquod praecordiorum vitium aneurysmaticum, certior, vel incertior, vel etiam dubia erit eiusdem diagnosis. Obscurissima quoque est, ubi cordis motus, ut interdum usu venit, fere perpetuo variatur, et laesio organica etiam extra cor, ut in partibus prope ipsum positis, reperitur, ac demum ubi plura vitiorum genera variaque ratione complicantur, sic ut propria cuiusque signa discerni nequeant, nisi post cadaveris sectionem institutam. Qua in re summo mentis acumine et recta rerum omnium consideratione, si unquam, opus est.

§. CCCII.

Diametri arteriae consideratio, ubi *pulsatio aneurysmatis* suspicionem movet, ubique necessaria admodum est, sed imprimis ubi arteriae manibus magis patent, uti sunt etiam eae, quae in imo ventre locantur. Hac enim sola observatione *aneurysma* a reliquis arteriarum vitiis feliciter distinguebat, quin unquam falleretur, expertissimus ALBERTINIUS. Cum itaque *sola pulsatio arteriarum* non statim pro *aneurysmatis* signo haberi possit, cavendum est, ne de hoc etiam incipiente suspicemur, quoties in imo ventre magna pulsatio persentiat. Multa enim in causa esse possunt. Imprimis macies summa potest *aortae descendens* eiusque ramorum pulsationes reddere manifestiores. (Exempla vide apud BERENGARIUM ¹) MARTIANUM ²) aliosque). Item plenitudo nimia, compressio arteriarum, phlegmonodes tumor aut scirrhus, aut quicumque alius in pancreate, mesenterio, aut alibi situs arterias comprimens, obstructions, spasmi, irritationes varii generis. Huc pertinent *aneurysmata spuria* LANCISII, quae in sola vehementiori arteriarum pulsatione sine earum dilatatione continentur. MARGGRAFFIUS ³) vidit *pulsationem* ab umbilico ad cordis usque scrobiculum pertinentem et tantam, ut saepe ab adstantibus audiri posset, quae triginta et quatuor annos perduravit. Cumque suspicaretur, non ab *legitimo* arteriae in mesenterio insignis *aneurysmate*, quia diametro vix paulo amplifi-

pro varietate indicationum.

Quae obscurissima est.

Monitio.

In suspitione aneurysmatis arteriae diametri consideratio necessaria.

Sola arteriarum magna pulsatio fallax signum.

Plures causae pulsationis sunt, quin adsit aneurysma.

Exempla.

Aneurysmata spuria

LANCISII sine dilatatione arteriae et cum eius pulsatione vehementiori.

Observatio

MARGGRAFFII de pulsatione arteriae mesenterii sine aneurysmatis vitio.

cata videretur, eam oriri posse, sed ab *spurio* (quod vocabat LANCISIUS), idque ob diuturnitatem aestimaret insana-
bile; datis tandem post innumera incassum ab aliis adhibita
remedia nonnullis, quae humorum saltem cruditatem corri-
gerent, praeter omnem spem *pulsatio* haec intra non lon-

*Alia TABAR-
RANII maxi-
mae pulsa-
tionis aortae
in epigastrio
a scirrho non
ab aneurys-
mate genitae.
Tertiu MOR-
GAGNI paten-
tissimae pul-
sationis aor-
tae intra pe-
ctus absque
ulla dilata-
tione aut lac-
sione eius-
dem.*

gum tempus felicissime sublata fuit ⁴). TABARRANIUS ⁵)
sub regione epigastrica non modo *pulsationem*, sed etiam
tumorem pugni magnitudine deprehendit, eamque cum ce-
teris *aneurysmatis legitimi* signis coniunctam. Sed eius
loco scirrhosum ad mesenterii centrum tumorem sectione
cadaveris detexit, qui *aortam* comprimebat, eiusque pulsa-
tionibus attollebatur. Miram habet observationem MORGAG-
NIUS de sutore consistentis aetatis, magno vini potatore,
qui signa omnia *aneurysmatis aortae* intra pectus, et prae-
terea *manifestissimam omnium* a capite ad calcem *pulsa-
tionem* ostendebat; in cuius tamen cadavere nullibi inventa
est arteriarum dilatatio aut interior earum conspicua labes ⁶).

1) *Comment. IX. super anatom.* MUNDINII.

2) *VII. Epid. n. 3.*

3) *Act. N. C. T. VI. observ. 131.*

4) *MORGAGN. epist. XXXIX. n. 20.*

5) *Observ. anat. ed. 2. n. IX.*

6) *Epist. anat. med. XXIV. n. 34.*

§. CCCIII.

*DIAGNOSIS
vitiarum GE-
NERIS VARI-
COSI aequae
difficilis est.*

Difficilis quoque *diagnosis* videtur *vitiarum*, quae ad
varicosum genus spectant. Aegre enim cognoscuntur ea
quae motum edunt *pulsationis* expertem, vel admodum le-
vem ac obscurum; aegrius quae eundem non tantum obscu-
rum, sed etiam profundum et confusum; aegerrime demum

*Quaenam im-
pedire que-
ant, ut pul-
sationis mo-
tus percipia-
tur.*

*In quibus-
dam varico-
sis vitiis pul-*

quae nullum, aut vix ullum eius vestigium exhibent. Quo-
rum in numero sunt vitia, quae intra pericardium subort:
ab ipsomet pericardio vel magnopere crasso, vel cordi arcto
adhaerente sic coërcentur, ut eorum motus a nobis minime
percipiatur. *Dilatatio caudicis venae cavae ac dextrae cor-
dis auriculae*, aut *omnium dextrorum eius cavorum*, no-

tantibus LANCISIO ¹⁾ ac ALBERTINIO ²⁾ nec repugnante *sus plerum-*
MORGAGNIO ³⁾ pulsum habet plerumque magnum atque ae *que aequalis.*
qualem. Interdum tamen etiam inaequalem fuisse, docent *Interdum in-*
observationes ⁴⁾; imo *varicosum* vitium nonnulli docent a *aequalis, par-*
pulsu parvo ac minime vibrato designari. Sed praeterea in *cus etiam,*
ea cordis angustiae ac oppressiones animique defectiones *nec vibratus.*
aegrum excruciant, quae nonnunquam in syncopen cardia *Deliquia et*
cam desinunt. Multa autem in causa sunt, cur haec pluri *syncope.*
mum varient, pericardii nimirum firma cum corde cohaesio, *Cur haec si-*
organica alia vitia coniuncta diversa et morbida partium, *gna varient*
quae praecordiis insident, proportio, vis cordis sive natura- *plerumque.*
lis, sive praeter naturam adscita, morbus ipse prout sim-
plex aut complicatus, recens aut vetus, atque id genus alia.
ALBERTINIUS ⁵⁾ in cadavere hominis, qui ex paulo citatiore *Observatio-*
ambulatione statim cordis oppressionibus animique deliquiis *nes ALBERTI-*
cum pulsu deficiente corripui consueverat, invenit *nii.*
cretiones sinum falcatum occupantes, ac auriculam cordis
dextram, quae frequenter dilatationi obnoxia est, sic dila-
tatam, ut membranea potius quam muscularis appareret.
Alios quoque vidit, qui adultiore iam morbo, quasi praeter
eius morem nec e lecto surgere, nec in eodem residere po-
terant, quin cordis spiritusque oppressionibus, ac animi de-
fectu tentarentur, ideoque perpetuo fere decumbere coge-
bantur. Similia prostant exempla apud MORGAGNIUM, ac *Aliae ex*
imprimis notatu digna sunt duo, quorum alterum ⁶⁾ *dex-* MORGAGNIO.
tram auriculam in ingens marsupium dilatata cum au-
ctu cordis mole exhibet, qua postremis vitae diebus ortho-
pnoea talis inducta fuit, ut aeger ne conqueri quidem de
pectoris oppressionem posset, dum interea eius pulsus iuxta
naturalem rhythmum se haberent; alterum vero ⁷⁾, in quo
auriculam dextram summopere dilatata orthopnoea, pul-
sus durus, celer, parvus, hydrops pectoris, pericardii ab-
dominisque subsecutus est.

1) *De aneurysm. lib. I.*

2) *L. c. p. 390.*

3) *Epist. anat. med. XVIII. n. 11.*

- 4) MORGAGNIUS *ibid.*
- 5) *L. c.*
- 6) MORGAGN. *epist. XVII. n. 8. 9.*
- 7) *Ibid. p. 10.*

§. CCCIV.

Signum pathognomonicum dilatationis auriculae et ventriculi dextri ex LANCISIO. Fluctuatio vel palpitatio iugularium est signum, quod cum aliis morbis ac citius coniungitur.

LANCISIUS tamquam signum *auriculae et ventriculi dextri* praeter naturam *dilatati pathognomonicum* proponit *venarum iugularium sive pulsationem, sive fluctuationem*. Ex dilatatione enim auriculae ac ventriculi cordis dextri sequi docet, ut orificium quoque utrique interiectum, quod valvulis tricuspidalibus munitum est, ita dilatetur, ut, his diductis et necessario hiantibus, sanguinis portio a ventriculi constrictione per rimas earum in venam cavam repellatur; unde *venarum iugularium conspicua dilatatio*, et mox, eodem ventriculo relaxato, par constrictione alterne contingant, quae a minus cautis ac attentis pro carotidum dilatatione et constrictione haberi possint. Sed meminisse oportet, hoc signum interdum cum sola *chlorosi* coniungi, cum *graviditate*, cum *valvulis triangularibus non diductis*, sed tantum a sanguine in validiori cordis systole (qualis est palpitazione laborantibus) extrorsum propulsis, concussionisque in sanguinem venarum transferentibus ¹⁾, cum minori quam par sit ventriculi sinistri capacitate, aut quocunque alio obstaculo sanguinis e corde egressui opposito effectumque suum ad dextra cordis cava exserente, et demum cum aliqua triangularium valvularum, si non omnibus, strigosa aut inflexili facta, aut cum chordulis earum erosio, aut laxatis, unde orificium, cui dicantur, aut non satis occludant, aut si occludant, extrorsum tamen urgeri invertique possint, et retrogradum motum in venosum sanguinem imprimere ²⁾.

1) HOMBERG. *Mémoire de l'académ. des scienc. ann. 1704.* Ex hac causa vidit HOMBERGIUS *palpitationem* non solum *iugularium*, verum etiam *venarum brachii*.

2) MORGAGN. *Epist. XVIII. n. 9. 10.*

§. CCCV.

Quare ut recte signo hoc uti possimus, videndum primo est, ne forte pro *pulsatione venarum iugularium alterna* tantum quaedam earum turgentia accipiat, quae validae inspirationi et expirationi succedit ¹), aut tremulus ille motus, quem proximae carotides vibrationibus suis interdum excitant. Deinde quaerendum est, an iugularium palpitatio et concussio cum cordis angore, palpitatione, animi defectio-
Ratio recte utendi huiusmodi signo, ne cum aliis turgentibus et palpitantibus confundatur.

tionibus, pulsu magno atque inaequali aliisque huiusmodi vitiorum signis (§. CCCIII) coniungatur. Tunc enim dextrorum cordis cavorum dilatationem signum hoc poterit indicare. Secus nequaquam. Cum vero venae iugulares subsilire ac pulsare vel vitio auriculae dextrae, vel vitio dextri ventriculi possint, MORGAGNIUS modum tradit, quo utrumque distinguas. *A ventriculi dextri, inquit, contractione illas micare intelliges, si obtutu in his fixo, simul digitis arteriae aut temporum, aut carpi admotis, evidenterernas eodem temporis puncto venas se attollere, quo senties arteriam pulsare; contra evenit, si non ab huius, sed a contractione auriculae dextrae subsiliant* ²).

1) VALSALVA iugulares in inspiratione subsidere, attolli expiratione, MORGAGNIUS vero contrarium vidit, id est turgere in inspiratione, subsidere in expiratione. *Epist. XIX. num. 33.*

2) *Epist. anat. med. XVIII. n. 12.*

P r o g n o s i s.

§. CCCVI.

Aneurysmatica et varicosa vitia discriminis plenissima et gravissima sunt, imprimis si adoleverint, aut alia insuper mala sibi adiunxerint. Nondum enim his medicina est inventa. Universim iuniores et robustiores homines, si his vitiis corripantur, celerius pereunt; aetate vero provec-
Haec vitia carent remedio. Exitiosa magis iuvenibus et robustioribus, quam senili et imbecillae aetate.

aut corpore imbecilli diutius eorum vim sustinent, item mulieres, quam viri. Coenobitae et moniales saepe hisce mor-

Qui eis obnoxii praeter ceteris sint. Hereditarius morbus interdum est. Vel repentinam, vel mortem lentam afferunt.

An aeger semper pereat statim post ruptionem.

Quomodo vel quando leniri coërceri morbus contingat.

bis conflictantur, et diu etiam eos ferunt. Interdum malum ex hereditaria nativaeque constitutione a proavo, ab avo ac patre in filios transfunditur. Quinque fratres ex his vitiis sublato, alios repentina, alios lenta morte abreptos narrat ALBERTINIUS. Qui subito moriuntur, aut ex syncope, aut ex ruptis repente *aneurysmate* aut *varice* pereunt. Interdum si ruptio non statim magna sit, sed lente sanguis ex angusto hiato effluat, aegri a ruptione per aliquot horas supersunt, nec nisi sensim extinguuntur. Interdum etiam sine ruptione asphyxia sive pulsum abolitione correpti per aliquot adhuc dies vitam trahunt. Initio tamen leniri certe, si non amoveri possunt huiusmodi morbi, spesque aliqua superest differendae mortis. Immo si nascentes, atque ex occulto, ut solent, insidias agentes dignosci possint, possent etiam ex parte reprimi et coërceri, ne adeo celeriter increscerent, atque ad peiora contenderent.

C u r a t i o.

§. CCCVII.

Curatio generalis.

Cautio adhibenda.

Quale curationis initium.

Praestantia V. sectionis ex LOPESII observatione.

Eo spectet curatio, ut sanguinis nisus in vasa immittatur, horum vero renisus augeatur, universa humorum massa, si quo vitio laboret, emendetur, depravata organorum structura reparetur, et quidquid alicubi praeter naturae ordinem aut concreverit, aut confluerit, aut haeserit, ad pristinam rectaeque oeconomiae rationem redigatur. Sed danda est opera, ne dum vim liquorum in vasa incurrentium retundere, aut vasorum in liquores reagentium intendere volumus, modus minime excedatur, sed tantum, quantum opus est, solummodo efficiatur; quod sane difficillimum esse fatemur. Initium itaque curationis esto a tenuissimo, blando temperanti victu, quiete summa tum corporis, tum animi, potu aqueo et sanguinis missione. Quantum sanguinis missionitribuendum sit, vel una declaret observatio GARZIAE a LOPESIO. Is enim in homine, cui arteria loco venae per-

tusa fuerat, sinuit sanguinem effluere, donec syncope accederet, tuncque, vasis magna ex parte exhaustis, splenium vulnere apposuit, et brevi illud coaluit, quin ullum insequeretur *aneurysma*. Sanguinis autem missio aetati, temperamento, habitui, viribus, regioni, tempestati aliisque circumstantibus rebus aptetur, repetaturque, quoties videatur e re futurum. Generatim tamen incipienti morbo, nec valde provento, nimirum nondum *statum* praetergresso, utilis ea est. Nocet autem provectioni ac ultra *statum* ¹⁾ constituto. Praestantissimum quoque auxilium ea praestat in gravioribus respirationis angustis et cordis oppressionibus, praesertim si sputa sanguine tincta aut meri sanguinis superveniant; sed parca et prudenti manu adhibenda est, ut eidem iterandae locus, qui saepe recurrere solet, non desit, nec sub eadem aeger viribus deficiat. Vere item ac autumnio utilissime ad symptomata atque incrementum morbi praecavendum adhiberi consuevit. Nec ab ea deterreat aliquis partium extremarum tumor. Nam saepe post eductum sanguinem, restituto liberiore sanguinis circuitu, ille ut effectus depravatae in organis mechanices dissipari consuevit ²⁾. Ab hoc vero praesidii genere nos fere abducat subtumida facies, cachecticus habitus, venerea aut scorbutica cacoehymia, quae proximum in hydropem aut anasarca transitum praenunciant. Desistere etiam ab ea oportet, quando solitum amplius non affert solatium. Cavendum item est, ut monet MORGAGNIUS ³⁾, ne invito aegro aut admodum repugnante sanguinem mittamus. Accidit enim interdum, ut sub ipsam sanguinis missionem, aut paulo post rumpatur aneurysma, atque aeger pereat. Quod fortasse ab aucta sanguinis velocitate, quae eiusdem detractio concitari solet, repetendum videtur.

*Generales
regulae circa
sanguinis
missionem
observandae.*

*Quando ab
ea abstinendum.*

1) ALBERTINIUS *l. c.* p. 394.

2) MORGAGN. *epist. med.* XVII. n. 31. 32.

3) *Id. ibid.*

§. CCCVIII.

*Cathartica
noxia*

Noxium porro est alvum ducere validioribus medicamentis. Compertum est enim, improvido consilio nonnullos pharmaco cathartico sumito sub ipsam alvi ductionem, aut paulo post ipsam interiisse. Innocua sunt lenientia alvum et enemata, ubi res expostulare videtur. Imo solis clysmatibus ex urina pueri, sale prunellae, vel nitro stibiato, aut terebinthina vitello ovi soluta, aut melle rosato solutivo paratis uti expedit, quando respirationis difficultas et partium externarum tumor increscunt. Interdum etiam lenissima ac anodyna in alvum iniecta spasmodicae ventris affectiones exposcunt.

*Innocua al-
vum ducentia
quae.
Clysmata.*

*Anodyna in-
iicienda*

§. CCCIX.

*Diuretica
acriora ar-
cenda.*

Acriora item diuretica cautissime in usum veniant, cum experientia demonstraverit, motum sanguinis ab his nimium concitari, aut dolores nephriticos induci, aut hydropicum tumorem sic interdum augeri, ut respiratio paene supprimatur, aut licet aegri inter initia copiosiore urina emissi levare videantur, subita tamen, vel non tarda saltem virium exsolutione non raro eos confici, ac e medio praeter om-

*Mitiora pro-
ponuntur.*

nium expectationem repente tolli. Mitissima ac fere innoxia habentur syrupus terebinthinae, imprimis si ex saccharo rosato aut cydonite fuerit confectus, millepedum infusio vel pulvis, nitrum, liquor terrae foliatae tartari, quae praesertim in pectoris anxietate cum aucto partium oedematoso tumore opportunissima fiunt. Tunc etiam oxymel scilliticum, mel hispanicum, sal volatile succini vel eius essentia

*Succus plan-
taginis cum
operculorum
cochlearum
pulvere.*

locum obtinent. Sed ALBERTINIUS prae reliquis commendabat succum plantaginis tum recens expressum, tum ad dimidium excoctum, eumque vel nigrum, vel mixtum cum pulvere operculorum cochlearum propinabat. Sic quoque

*Calidiora et
concitantia
arceantur.
Roborantia
quae*

calidiora omnia ac concitantia remedia procul absint. Item quae corroborante ac vulneraria, ut vocant, facultate pol-
lent, mitioris naturae sint oportet, atque imprimis ex eo genere, quod sanguinem blande fluidum servat, si crassitie

peccare videatur, aut, si tenuitate, debitam ei crasim restituant. Saepe enim alterutrum vitium in hisce morbis, nempe vel nimius lentor, vel nimius fluor esse consuevit.

§. CCCX.

Ex alterantium itaque classe ea seligantur, quae causis morbi atque indicationibus, quas supra posuimus, faciant satis. Generatim cichoreum, taraxacum, fumaria, acetosa egregie temperant ac refrigerant, praesertim ex lactis sero decocta. Si simul adstringendum aliquantulum sit, aut simul blande serosa colluvies per urinas educenda, consolida, plantago, agrimonia, hederæ terrestris, hypericon, hisque similes plantae adici possunt. Quibus vero lactis serum sive vaccinum sit, sive caprillum, aut decocta ex vegetabilibus modo propositis non bene cedunt, sufficiunt interdum iura ex cancris fluvialibus et carne ranarum palustrium, quibus sub finem incocti leviter fuerint flores aut hyperici aut hederæ terrestris. His porro pro varia complicatorum morborum ratione modo antivenerea, modo antiscorbutica, modo absorbentia, uti coralliorum aut osteocollae pulvis, modo nervina atque antispasmodica adiciuntur. Excipi autem commodissime solent vel cydonitæ, vel conserva rosarum rubrarum, vel extracto hyperici, aliove apto ac idoneo medicaminum genere. Nonnunquam additur *tingtura martis* in succo pomorum dulcium elicitæ, aut scobis ferri in pollen super porphyritim attenuata, aut alia, prout corporis habitus, liquorum diathesis, hypochondriorum affectiones, oedemata, syphilis etc. peculiarem exposcunt animadversionem.

Alterantia ex sero lactis decocta.

Adstringentia addenda quæ.

Iura cancrorum et ranarum.

Varia adicienda in fine pro varietate complicationum.

Additio interdum fit vel tincturae martis, vel scobis ferri attenuatae.

§. CCCXI.

In summis respirandi difficultatibus (quæ sæpe quasi periodice recurrunt, aut saltem vehementius subinde aggrediuntur), cum non semper liceat sanguinem mittere (§. CCCVII.), ad alia praesidia, quæ spiritum faciliorem reddant, est confugiendum. In his volatilia naribus adnota excellunt, ut spiritus melissæ, sanguinis humani, salis am-

Recurrens morbus est.

Volatilia quæ et quando.

moniaci, acetum vini; quinimo aliquid etiam eorum intrinsecus dari potest, ut guttae aliquot spiritus salis ammoniaci, aut fuliginis, aut liquoris cornu cervi succinati aqua hyssopi aut capillorum veneris exceptae. Oleum quoque ex amygdalis dulcibus recentissime expressum, aut commune ex olivis eductum utilissime propinari solet tam cochleatim, quam

Oleosa.

Quando rhabarbarum oleo adiiciendum.

Fricationes artuum eorumque in calida immersiones.

Quid in paroxysmo et torpore aut dolore sinistri brachii conveniens sit.

Frigida in nudumpectus iniicienda.

Quid sputo sanguinis opponendum, si V. S. locum non obtinet.

ad aliquot uncias nudo haustu. Quod si alvus etiam ducenda sit, ut liberior respiratio fiat, amygdalis, antequam oleum exprimatur, adiiciatur pulveris rhabarbari tantillum. Sed reliquis palmam fere praeferunt fricationes artuum, aut eorum in calidam immersiones ¹⁾). Quocunque enim modo sanguis in arteriis, atque adeo in ipso *aneurysmate* consistat congeraturque, anxietates animae, quae inde excitantur, illico cessant, reliquis partibus per aquam calidam laxatis. Hinc brachia, manus, pedes in eam demersi, vel lintecolis aqua calenti madidis involuti paroxysmum et praecavent, et praesentem solvunt. Id etiam opportunum est, ubi brachium sinistrum, quod saepe evenit, dolore aut torpore afficiatur. Dum autem artus sic aqua calida foveantur, si simul eorum fricatio accesserit, promptior revulsio aliqua fit, et si qua convulsio copuletur, resolvitur. In solae frictiones (etiam siccae) tremores, spasmos et iactationes sopiunt, somnumque accersunt, ut non semel vidimus. Interdum aqua etiam frigida in pectus nudum proiecta solamen attulisse visa est ²⁾). In orthopnoeis tussique vehementiori, quae subinde excitantur, sputum sanguinis erumpit, nec semper vena ad illud sistendum secari potest, nec secta semper sufficit. Sistendo itaque aut praecavendo huiusmodi sputo quies, abstinentia, potus denulcens imperandus est. Succus etiam concretus hederæ terrestris cum terra catechu non una vice profuit.

1) ALBERTINIUS *l. c.*, MORGAGNIUS *Epist. XVII. n. 27.* et SENACIUS *Traité du coeur etc. Tom. IV.*

2) ALBERTIN. *l. c.*

§. CCCXII.

Sed maxima curationis aut prophylaxeos pars in diac- *Prophylaxis.*
 tetico regimine sita est. Loco vini, quod exulare debet,
 nisi stomachus, vires aliaque exigant, datur potui aqua sim-
 plex vel ignito chalybe alterata, vel ex ligno lentisco, aut *Potus ratio.*
 cotoneo, aut hordeo decocta, additis, si videatur, passulis
 dulcibus. Alimenta sint et parca, et levissima, et quae vi- *Alimenta*
 ribus sustinendis tantum sufficiant. Pulmenta ex hordeo *quae.*
 contrito aut oryza in lacte vaccino aut iure cocta bis vel
 ter in die sumta sine alio cibo interdum profuerunt. La- *Diacta lactea*
 ctea vero diaeta post unam vel alteram sanguinis missionem *cum decubitu*
 instituta, et ad XXX. aut XL. dies protracta cum perpe- *in lecto.*
 tuo in lecto decubitu ex VALSALVAE ac ALBERTINII testi-
 monio plurimum visa est aliquoties profuisse. Vesperi som- *Quieti som-*
 nus ac quies emulsionibus, diacodion, imo etiam laudano, ubi *noque conci-*
 valentius agere expediat (uti in doloribus et spasmis opus *liandis, et*
 est), concilietur. Doloribus vero ob subclaviarum disten- *dolori lenien-*
 tionem urgentibus remedia opium habentia uti spasmos com- *do quid con-*
 pescentia dentur. Praefertur illud opii genus, quod lau- *ferat.*
 dani liquidum IO. BAPT. HELMONTII nomine venit, daturque
 sub vesperam *ad guttas XII. vel XV. in aqua distillata*
ex succo lactucae hausta ¹). Omnes denique remotae cau- *Causaeremo-*
 sae evitentur. *tae vitandae.*

1) MICHELOTTUS in opusc. vol. I. comment. institut. sc. et
 art. Bononiens.

N O T A.

Fortasse plura in dissertatione Dè aneurysmaticis praecor-
 diorum vitiis, quam anno 1777. Ticini editam, atque in
 theses distributam propugnavit cl. auctoris tunc auditor et
 discipulus, immaturo fato nobis creptus, CAIETANUS LOMBAR-
 DINIUS Mediolanensis.

VOLUMINIS QUARTI
DE
MORBIS IMI VENTRIS
PARS ALTERA.

THE HISTORY OF

MORRIS IN VENTURE

AND HIS

DE MORBIS IMI VENTRIS.

CAPUT I.

DE DYSPHAGIA.

§. I.

A morbis, qui ad pectus pertinent, ordo iam admonet, ut *Definitio.*
ad eos, qui sedem habent in *abdomine*, properemus. In *Quae morbi*
huius prope ingressu se primum offert *Δυσφαγία*, videlicet *natura.*
difficilis, ut a nobis accipitur, aut *impeditus alimentorum*
potusve per oesophagum in ventriculum *descensus*. Neque *Cur non ad*
interest, dolor in ea percipiatur, an absit; aut celer acutus-*faucium vel*
que morbus sit, an lentus et diuturnus ¹). Neque hic ea *thoracis mor-*
bos referatur.
impedimenta comprehendere volumus, quae faucibus verius in-
sident, utpote iam alibi (capite *de angina* voluminis III.)
a nobis exposita. Neque demum, quia oesophagus a gutture
incipit, thoracisque cavum traiecit, quisquam obtrudat, per-
peram de laesa deglutiendi actione a nobis hoc loco agi;
nam si minus sede, natura certe et connexione oesophagus
ad ventriculum, qui in abdomine situs est, tamquam eius
appendix continuata attinet.

1) SAUVAGESIO *dysphagia* est difficultas deglutiendi cum *Dysphagia*
dolore coniuncta. Doloris autem sensus ab ea abesse posse *an cum do-*
mili videtur, quin ipsa cesset. Nec satis sic definita ab *an-*
gina synanche, nempe pharyngis inflammatione, in qua diffi-
cultas deglutiendi cum dolore coniungitur, ut patet, discrimi-
coniuungatur
natur. Neque assentior MATTHAEO VAN GEUNSI, qui (*in co-*
GESIUM.
lumine XI. P. I. II. Actorum Haarlemens.) *dysphagiam* *An lentus*
lente accedere et progredi, *anginam* vero celerem et repenti-
chronicusque

*morbis sit, ut
VANGEUNSIO
placet.*

num morbum esse existimat. Nam et dysphagia interdum celeriter et repente oboriri et progredi potest, quemadmodum ex sequentibus patebit; et contra lento etiam passu aggredi *angina*, diuque persistere, ut alibi (*Volum. III. Cap. XVII. §§. 408. 419. 439. 443.*) indicatum est.

§. II.

*Causae or-
ganicae.*

Aegre autem, aut nullo modo ingesta descendunt in ventriculum, si via non pateat, aut potentiae sive vires eorum descensum promoventes deficient. Via non patet, si extrinsecus comprimatur a *tumoribus* cuiusvis generis in oesophagi sive gulae vicinia natis, a thymo, a glandula thyreoidea, ab aspera arteria, a pulmonibus induratis et tumentibus, a glandulis dorsi, aut etiam bronchialibus obstructis, ac mole praeter modum auctis, ab aneurysmatibus imprimis aortae ¹), a varicibus, a nimia pinguedine circum congesta, a spasmo diaphragmatis, ab eiusdem adsitarumque oesophago partium phlegmone ²), ab hepatis magnitudine immodica atque ad oesophagum sic protensa, ut eum ad dorsi vertebrae allidat. Vitio autem ipsius oesophagi via occluditur, si oesophagus coarctetur vel spasmo, vel tunicarum eius inflammatione, callo, scirrho, vel folliculorum muciferorum tumoribus, vel glandularum cardiacam cingentium obstructione, vel ipsiusmet superioris ventriculi oris tumoribus, scirrhis, callis, vel polypis, fungis, carcinomatis aliisque huiusmodi vitiis innatis accretisque, vel obstruatur ab alienis corporibus intrusis, infixis, aut alibi haerentibus ³), vel parietum coalitu praeter naturam concreverit.

*Observatio-
nes et exem-
pla.
Aneurysm.
aortae.*

1) Exemplum tumoris aneurysmatici in sinistra iuguli parte orti ex aorta in sacrum sursum dilatata, a quo non modo aspera arteria et larynx, sed etiam oesophagus et pharynx premebantur, et respiratio, vox et transitus ciborum impediiebatur, habet ex VALSALVA MORGAGNIUS *epistola anat. med. XVII. n. 19. et 20.*

Aliud simile *ibidem n. 25.* adducit exemplum respirationis et transitus per oesophagum impediti ex ingentis aneurysmatis sacciformis arcus aortae pressione. Saccus autem aneurysmaticus sub clavicula dextra ad sternum situs erat, et duorum vel trium mensium spatio ita creverat, ut alterum quasi caput e medio sterni enatum videretur. Tertium porro videri potest

apud eundem Cl. MORGAGNIUM *epistol. anatom. med. XVIII. n. 22.*

2) Raras esse *inflammationis oesophagi* observationes SCHACH- *Inflamm. oesophagi.*
TUS *Instit. med. pract. l. VII. cap. XII. p. 249.* affirmat. Tres tamen, idest certe paucas, invenies apud MORGAGNIUM
epistol. anat. med. VIII. 25. XXXVII. 30. LIX. 15. sectione comprobatas.

3) A *conglomeratis in oesophago lumbricis* ibique cunctan- *Lumbrici in oesophago.*
tibus *dysphagiam* in puella febre gastrica verninosa laborante
ortam vidi et prope suffocantem. Sectio cadaveris rem comprobavit.

§. III.

Potentiae vero, quae deglutitorum descensum promo- *Aliae causae ab aliis defectibus et vitis oesophagi.*
vere debent, deficere pluribus modis possunt, sed potissimum si mucus, quo interior oesophagi facies obliniri solet,
non secernatur, aut a folliculis suis non suppeditetur; si
eiusdem oris fibrae coarctentur ¹⁾, vel eius tunicae obrigue-
rint, aut cartilagineae aut osseae evaserint; si fibrae musculares
ulcere exedantur, aut summa atonia, aut paralysi laborent,
sive id propria, sive nervorum culpa contigerit; postremo si
oesophagi aliqua pars in saccum expansa sit, cuius exemplum
adduxit GRASHUYSIUS ²⁾, aut oesophagus ipse deorsum a
ventriculo e sede sua prolapso distrahatur, aut alia quacunque
ratione elongetur disrumpaturve, quem casum in viro generosissimo
offendit Cl. BOERHAAVIUS ³⁾; aut ulcere perforetur, ut in
phthisico quodam vidit HEISTERUS ⁴⁾.

1) *Quum ad rem facere videatur, rarioris dysphagiae Exemplum adiciamus exemplum, quod ex diario italico cl. auctoris de verae dysphagiae.*

„Obiit mense decembri anni 1782. quidam ex Dominicana *Observatio auctoris.*
familia LX. annos natus, quem ad summam maciem adduxerat
dysphagia oesophagea, qua iamdiu laborabat, cuiusque noxios
effectus a prima iuventa coeperat experiri, cum nisi sensim
lenteque admodum mandere posset, eique manu guttur,
ut facilius deglutiret, comprimendum esset, et si quid cibi
extremo vitae suae curriculo sumeret, licet omnino, aut ferme
liquidus foret, usque ad ima stomachi minime pervenire
videatur, sed illum identidem paulatimque aeger ex ore cogebatur
reiicere. Dissecto cadavere hoc unum vitium organicum in
eodem repertum est. *Summitas oris oesophagi* aliquanto
erat *adstrictior*. Pone oesophagum autem, quo nempe desinit

pharynx, *cavum* inventum est ad *infundibuli speciem efformatum*, in quod alimenta transibant. Qua latius patebat, erat hiatus sive initium eius apertum; infra post oesophagum descendebat appendice oclusa, inter ipsum nempe et colli vertebrae VI. aut VII. latos digitos longitudine adaequans. Statim ac ad oesophagi initium, quo nimirum *arctior* erat, pervenerant alimenta, a recto tramite deflectendo dictum *cavum*, sive *saccum* ingressa ibi tamdiu morabantur, donec vi alicuius spasmi in eodem excitati sursum retropulsa exirent. Huiusmodi *saccus* erat quaedam veluti *hernia extremitatis inferioris* et *posterioris pharyngis*. Cetera nulla laesione erant affecta. Haec omnia mecum Cl. GIANELLA clinicus Mediolanensis experientissimus, qui adfuit sectioni, oretenus communicavit. *Dysphagiam* a tali causa genitam neminem descripsisse recorder."

2) *Acta N. C. Tom. VI. observat. 73.*

3) *Artrocis nec descripti prius morbi historia.*

4) O. SCHACHT. *Instit. med. pract. l. VI. cap. XII. §. 26.*

§. IV.

Proëguminae.

His porro vitiis (§. II. III.), quorum innumera prostant ¹⁾ exempla apud observationum anatomico-medicarum scriptores, tamquam causae remotiores ortum praebent mollior, tenerior et debilior corporis constitutio, aut siccior et strigosior eius habitudo, virus strumosum, venereum, scorbuticum, metastases, acria, venenata, coagulantia ingesta, potus gelidus, aut contra nimis fervens, uti foliorum *thee* aut fabarum *caffè*, spiritus vinosi inflammabiles, aromatici, vina adulterata, aut plumbi sive saturni calce aut solutione edulcata, diuturnus aquarum quarundam usus, salinorum, stramonii, et fortasse fungorum quorundam esus, morsus animalium rabidorum, capitis, pectoris et nervorum morbi, errores diaetetici, ac vehemens pleno ventriculo vomitus.

1) Vid. BONET. *Sepulchr. anatom. lib. III. sect. IV. a pag. 745. ad. p. 755.*

D i a g n o s i s.

§. V.

Pro varia aegri, causarum, loci affecti aliarumque rerum ratione plurimum quoque differunt morbi phaenomena.

*Generalis
diagnosis.*

Singula igitur rite perpendantur necesse est, si speciei peculiarisque causae, quae *dysphagiam* parit, diagnosim assequi velimus. Perpetuum fere est, in hoc morbi genere ali-
 menta, statim ac oesophagum ingrediuntur, vel ab ipso re-
 pelli, vel ulterius progressa in eodem subsistere atque haere,
 vel super trochleam quasi circumagi, vel per angustum tramitem cum anxietate et quandoque cum dolore pedetentim gliscere et transire. Accedit etiam, quod auge-
 scente morbo uberior ut plurimum sub lento et difficili deglutitorum transitu salivae copia prodeat; in quo multi *pathognomonicum* huiusce mali signum positum esse credunt. *Signum fere perpetuum.*
 Verum, ut ingenue fatear, hic quoque, sicut in plerisque aliis morbis notavimus, diligenti opus est examine eorum omnium, quae antecesserunt et subsequuntur, antequam quidquam certi statuatur. *Aliud quibusdam pathognomonicum.* *Monitum.*

§. VI.

Haec (§. V.) communia fere esse consueverunt. Propria vero peculiaris cuiusque causae plerumque nec desunt, nec sedulum indagatorem praeterfugiunt. Nam *dysphagiam* a tumore magno in oesophagi vicinia sito effici cognoscas, si aeger non solum difficulter deglutiat, verum dolorem etiam quendam in pectore proximisque oesophago partibus cum gravitatis et pressionis sensu, imprimis circa mediastini aut diaphragmatis regionem, itemque cum difficili et brevi inspiratione, interdum etiam cum suffocationis metu percipiat, et praeterea si stilus aut cereus funiculus, vulgo *candeletta*, demissus obstaculum extrinsecus quodammodo locatum inveniat, quo oesophagum comprimi ¹) appareat. *Diagnosis particularis.*
 Praegressi vero laryngis, asperae arteriae aut pulmonum morbi, earumque partium laesae functiones, ut vocis mutatio, continua spirandi difficultas, paulatim aucta, tussis, sibilus, stertor aliaque huiusmodi ostendent, ab aliqua laryngis, aut asperae arteriae, aut pulmonum parte indurata et mole aucta malum pendere. Adest tum etiam singularis pectoris gravitas, et stilus in oesophagum leniter demissus *Signa dysphagiae a tumoribus oesophago adiacentibus.* *Ab aucta mole aut induratione laryngis, aut asperae arteriae, aut pulmonum.* *Resistentia stilo superatur.*

offendit quidem obicem, sed talem, qui ei cedere et locum dare videatur.

1) A. P. NAHUY. *De morb. oesophag. in act. acad. Haarlem. vol. XI. p. 179. et seqq.*

§. VII.

Signa dysphagiae a glandulis dorsi.

Quo loco occurrant eorum resistentiae.

Dysphagia ab ulcerato oesophago.

Quando suspicari licet, malum ab *obstructione glandularum dorsi* oesophago adsitarum oriri, tunc respiratio fere libera est, desuntque signa (§. VI.) affecti organi vocis et spiritus. Nec dolor deglutientem corripit. Stilus vero demissus, si quid impedimenti alicubi invenit, id circa quintam dorsi vertebam occurrit, et plerumque alibi glandularum aliquae obstructae et tumentes praesto sunt, et corpus *pituitosis* humoribus scatere videtur, aut labe *scorbutica*, *venerea* aut *strumosa* contaminatum est. Si vero dolor aut ardoris sensus deglutienti molestus sit, atque ea antecesserint, quae suppurationem indicant, aut ulcus efficere solent, aut comitantur (quod facile cognosces ex iis, quae iam alibi tradita sunt); tunc de *dysphagia ab oesophagi ulceratione* coniecturam facies.

§. VIII.

Signa dysphagiae a tumoribus oesophago intrinsecis.

A scirrhis.

Signa scirrhi in cancrum mutati.

Cum vero oesophagi fistulam *excrescens caro*, aut *fungus*, aut *polypus* tenet, iterque paene impedit, verosimile omnino est, transitum ingestorum, imprimis si solidiuscula fuerint, longe difficiliorem reddi; corpus autem, quod stilo demisso obiicitur, reniti quidem aliquantulum, sed non difficulter superari. Contra *scirrhus*, ubi non exiguus est, omnem ferme deglutiendi facultatem tollit, prohibetque, quominus, nisi magna vi adigatur, stilus ultra procedat, quod si, ubi resistens corpus occurrit, dolor etiam acer et pungens, aut ardor lancinans percipiatur, conicere licet, *scirrhum*, qui *dysphagiam* facit, in *cancrum* commutari, aut iam ulcere corrumpi.

§. IX.

Signa dys-

Tumorum, qui *folliculo* aut *cystide* includuntur, dia-

diagnosis paulo difficilior est, cum vix a scirrhis, aut fun-^{phagiae a}
 gis, aut excrescenti carne discerni queant. Si quod tamen^{tumoribus}
 discrimen intercedit, id omne positum esse videtur in mi-^{tunicatis.}
 nore vel maiore mollitie et renisu, quem deglutienda aut
 stilus invenient. *Rigiditas fibrarum oesophagi*, docente *A sola rigi-*
 NAHUYRIO ¹), eosdem propemodum effectus praestat, quos^{ditate mem-}
 scirrhus. Sed exstant exempla oesophagi cartilaginei facti,^{branarum}
 per quem sine molestia cibi in ventriculum descendebant ²).^{oesophagi an}
 Non ergo sola rigiditas, nisi cum *arctato oesophagi meatu*
 coniuncta, *dysphagiam* procreabit. In rigiditate praeterea
 sola, quacum coniuncta non sit viarum angustia, stilo faci-
 lius quacunque patet aditus.

1) *Act. academ. Harlem. T. XI. p. 179.*

2) MORGAGN. *Epist. anat. med. XXVIII. n. 15. ex GOR-*
NIAE observatione.

§. X.

A nimia fibrarum oesophagi laxitate aut paralyysi si de-^{Signa dys-}
 glutindi difficultas provenerit, deglutita neque dolorem,^{phagiae ab}
 saltem notatu dignum excitant, neque singula eadem diffi-^{atonia et}
 cultate descendunt, liquida enim difficilior, quam solidiora^{paralyysi.}
 deglutiuntur, contra quam in ea specie, quae ab impedi-
 mentis intra cavum oesophagi innatis (§. VIII.) gignitur.
 Utraque tamen sive liquida, sive solida aliquo auxilio, aut
 irritamento, aut conatu peculiari egent, ut ulterius prola-
 bantur. Sed si perfecta resolutio fibrarum fuerit, ingesta
 aut haerent, suffocationemque minantur, aut in fauces na-
 resque refluunt. In huiusmodi *dysphagia* stilus quoque fa-
 cile demittitur, nulloque obstaculo repellitur. Habitus cor-^{Stilus immit-}
 poris laxis, aquosus, languidus, segnitie et torpor omnium^{tur absque}
 motuum et functionum, mentis stupor, soporosi et paraly-^{resistentia.}
 tici affectus, apoplexia nervorumque resolutiones aliae eam
 comitantur aut antecedunt.

§. XI.

Contraria omnino ratio est *dysphagiae a spasmis*. In ^{Signa dys-}
 hac non modo constringi aut coarctari oesophagus vel totus^{phagiae a}
^{spasmodis.}

vel eius aliqua pars percipitur ab aegrotante, verum etiam stilus immissus fortiter a circumposito canali amplexatur. Plerumque accedit et recedit, intervalla libera a deglutiendi

Ad fauces et collum extenditur tumor.

difficultate relinquens. Saepe ab ipso ventriculo exorditur eiusmodi spastica constrictio, aliquando ad fauces et collum spasmus tumore et quasi suffocatione se prodit, et si alicubi magis oesophagum afficit, ibi globi cuiusdam aut boli restitantis sensum affert, qui tamen non fixus est, sed modo altius ascendit, modo inferius deprimitur. Interdum ita universus oesophagi tractus rigescere videtur, ut quasi pali infixi imaginem animo sistat. Tum vero epigastrium saepe tumet et tenditur, cibi plerumque desiderium deficit, et subinde etiam pectoris oppressiones atque anxietates accedunt, flatus ex ore erumpunt, aut erumpere nituntur, horripilationes, pandiculationes oscitationesque intercedunt, nec

Ad epigastrium quoque.

Signa adsunt hysteriae et hypochondriasis.

Dolor sub sterno et iuxta spinam quandoque.

desunt tremores, aut hysteriae, aut hypochondriasis reliqua symptomata causaeque, inter quas pathemata animi, moeror, tristitia, ira compressa praecipua sunt. Dolor interdum sub sterno occupat, interdum iuxta spinam propagatur, et non raro vox ipsa perit. Id mali genus modo assidue tenet, modo sese remittit, modo statis quibusdam horis recurrit, praesertim vespertinis, modo ad aliquot dies protrahitur, modo brevius est, et cito deserit, quamquam levi ex causa ad redeundum paratissimum. Plerumque frigido potu exacerbat, calido vero lenitur. Haec species, observante SAUVAGESIO, opisthotonium comitatur, aliosque tetanicos affectus.

Tetani affectus comitatur.

§. XII.

Quomodo reliquae species innotescant.

Dysphagia denique a muci defectu, ab ariditate interioris oesophagi superficiei, a coalitu eius tunicarum, ab earum inflammatione, a diaphragmatis spasmo aut phlegmone, a scirrhone duritie cardiae, ab aneurysmate aortae, aut cavae aliarumve venarum varicibus, ab hepatis aucta mole, ab oesophagi elongatione, aut ruptura, aut in saccum expansione, a saturninis, a venenis, a solanis, stra-

*monio, a potu fervente aut gelido, a vermibus aliisque corporibus alienis in oesophagum illapsis aut intrusis, et si quae aliae species sunt, ut internosci possint, diligentissime respicere oportet ad causas remotas, ad symptomata, ad effecta quae consequuntur, ad locum qui magis patitur, atque ad notas aliorum morborum, ex quibus enasci possunt; quod arduum nequaquam erit, si memoria probe teneantur ea omnia, quae sparsim suis locis fusius tradita fuerunt. Causarum item quaedam extrinsecus adveniunt, atque adeo in sensus incurrunt, ut latere minime possint medicum, qui ab aegro eiusque assidentibus et familiaribus sedulo quaesiverit, quae acta prius sint, quae fortuito contigerint, quae comesta aut potata fuerint, quae vitae et victus ratio adhibita, et sic porro. Sed nihil in casu difficili- *Ancipiti in casu quid agendum praestet ad singularum naturam dignoscendam.* liori atque ambiguo praestantius utiliusque est, quam similibus morborum historias et defunctorum extispicia, quorum non exigua nobis copia hodie suppetit, consulere, et sagaciter cum nostris comparare ¹). Incredibile enim est, quantum id ad diagnosin tum morbi, tum causae recte instituendam luminis afferat.*

1) Loca complura apud scriptores, in quibus historiae dysphagiarum a variis diversisque et raris causis pendentium indicantur, videsis in *Nosologia SAUVAGESII class. VII. ord. 3. gen. 17. Ex sch. auct.*

P r o g n o s i s .

§. XIII.

Cognitis autem et rite compertis causis, continuo sequitur, ut, quid timendum aut sperandum sit, et quid auxilii ab arte peti debeat, perspicuum nobis fiat. Nam periculum maius aut minus a causae magnitudine aut levitate aestimabitur. Itaque si eiusmodi ea videatur, ut minime per nos emendari aut tolli queat, ut pleraque organica vitia, de quibus dictum supra est, esse solent, aegri in summa desperatione versantur, paulatimque inopia alimenti atque *A causis maius vel minus periculum. Quid, si ab organico vitio fit.*

Quando salutis spes. inedia confecti misere contabescunt, et tandem exsuccī et viribus omnibus destituti pereunt. His si qua spes salutis unquam relinqueretur, id quidem eveniret, si inter initia, morbo nempe nondum eo profecto, quo incurabilis sit, in causae cognitionem ventum cito esset.

C u r a t i o.

§. XIV.

Curatio dysphagiae a rigiditate fibrarum aut muci defectu. Verum cuiuscunque generis exitusque fuerit *dysphagia*, non omittam proponere, quae cuique curatio opportunior videatur, eo consilio, ut si minus ad curationem sit satis, ad mitigationem saltem calamitatis vitaeque productionem quoad fieri potest conferat. Itaque *angustior oesophagi capacitas* aliqua *fibrarum rigiditate* et *muci defectu* orta exposcit ea, quae humectant, molliunt et lubricant, uti decocta radicum althaeae, malvae, seminum lini, olea unguinosa, blanda et recentia, mucilagines ex gummi arabico et tragacantha, aut amylo, atque ex his composita paulatim et saepius danda. Demittendus etiam subinde in oesophagum est stilus flexilis ex pinnis cetaceis cum capitulo eburneo, aut ex spongia confecto ad alterum extremum alligato, ut caute et leniter oesophagus dilatetur.

§. XV.

Curatio dysphagiae ortae a glandulis, vel a callo aliisque citiis oesophagum arctantibus. Si *oesophagi cavea a tumidis obstructisque glandulis* *oppleatur*, aut extrinsecus arctetur comprimaturve, si *callus* alicubi fieri incipiat, indicantur incidentia, resolventia, attenuantia, aperientia, uti sales mediī, alcalini, saponēs, gummata ferulacea, extractum cicutae, mercurius, interpositis identidem iis, quae alvum leniter ducunt. Verum tanta saepe est difficultas deglutiendi, ut huiusmodi medicamina aut sumi ore non possint, aut non ea copia et frequentia, qua opus esset. Tunc litus ex mercurio administrari debent, praesertim si venerea labes in suspicionem cadit. Quae-

tuncque demum causa glandulas obstruxerit, tumidasque effecerit, collum recenti in morbo mercuriali unguento lege artis perfricari iubet MUNCKLEYUS ¹), sic ut aliquis salivæ fluxus excitetur, exemplisque in medium prolatis non paucis huiusce methodi utilitatem tuetur.

1) *Medical transactions published by the college of physicians Vol. I. p. 165.*

§. XVI.

Nec alia adhibenda medela est *tumoribus* aliis, aut *scirrhis*, aut *iecinori infarcto*, aut in *enormem molem expanso* (§. II.), si ex his morbus profluxerit. At si in *carcinomata* iam abierint, aut abire inceperint, quoniam exstirpationi vix ullus relinquitur locus, cavere oportet ab omnibus iis, quæ valde acriterque agunt, et contra adhiberi ea duntaxat, quæ acritates leniunt, symptomata blande coërescent, et canerosæ corruptioni quocunque modo resistunt. In his primas tenent lac asininum, serum lactis caprilli, ragnarum et cancerorum fluviatilium iura, camphora, cortex peruvianus, aquæ medicatæ, balnea, eccoprotica identidem propinata, et urgente dolore, aut phlogoseos metu sanguinis missio et prudens opii usus. *Ulceræ* vero, *excresecens caro* et *fungi*, si oesophago inesse comperiantur, leniter detergentibus, reprimentibus atque exsiccantibus medicamentis egent, nec aliena tum etiam habentur quæcunque pro varia sanguinis labe atque acritate eum corrigere et purificare creduntur, imprimis antiscorbutica, antivenerea, antiscrophulosa, sudorifera atque alia huiusce generis.

Quæ curatio, si ab aliis tumoribus, aut scirrhis, aut carcinomatibus morbus sit. Cunctio circa scirrhus.

Lacasinum et caprillum. Deuulcentia, roborantia, antiseptica, balnea. V. S.

Opiata. Quid ulceribus fungosisque excrecentiis conveniat.

§. XVII.

Maiori cum fructu opera navabitur in ea deglutiendi difficultate, quæ ab *inflammationibus oesophagi* aut *proximarum partium*, vel a *vermibus*, vel ab *acribus, ingestis et venenatis*, vel a *spasmis hystericis et hypochondriacis* proficiscitur. *Inflammationem* enim qualia discutiant et resolvant, adeo nota et comperta puto ex superioribus alibi.

Cunctio dysphagiarum ab aliis causis.

Inflammatoriæ medela.

Genitae a vermibus.

que saepius repetitis doctrinis, ut commemoratione hic minime opus habeant. Quod ad *vermes* attinet, hi non modo enecandi anthelminthicis validioribus sunt, de quibus infra peculiari capite ¹⁾ agemus, verum etiam cito deorsum cathartici, aut sursum emeticis expellendi. *Acrida, venenata ingesta* pinguibus oleosisque irretiantur, aut aquosis liberali manu datis diluantur, et quum primum fieri poterit emeticis et cathartici sursum deorsumque et ipsa eiiciantur.

Ab acribus, venenatis, ingestis pro-genitae.
Spasmodicae.

Spasmos autem, indagata prius eorum origine, etsi plerumque pertinaciter vexent, et plus molestiae quam discriminis afferant, non ita arduum opus est superare, iis tamen exceptis, quorum causae cerebro aut spinali medullae insideant; nam hi difficilius tolluntur, ut patet ex *tetano, opisthotono*

Natae a saburra, a dyspepsia, a suppressis evacuationibus sanguinis etc.

aliisque spasticis affectionibus, imprimis idiopathiciis. At si a *saburra gastrica*, si a *depravata ciborum coctione*, si a *catameniiis* aliisque consuetis, puta *haemorrhoidum, evacuationibus* manaverint, remedio plane iis sunt eccoproctica, amaricantia, tonica, de quibus proxime dicam, vel sanguinis missio, aperientia et evacuationes consuetas revocantia. At si *nimia sensibilitas nervea*, aut *irritabilitas Halleriana*, aut *animi pathemata* fuerint in causa, praeclare tum eos tollunt emollientia, oleosa, anodyna et opium imprimis, atque animi quies contrariiue affectus.

Quid si a nimia sensibilitate nervea, irritabilitate musculari, aut animi pathemate.

1) Vid. cap. X. §. CXXXIV. et seqq. huius II. Partis.

§. XVIII.

Quid de spastica TODIUS nimio salinorum usu adtributa. Cur adhibitis remediis nihil TODIUS profecerit. An curatio praestita a TODIO tribuenda sit quassiac, vel

IOHANNES CLEMENS TODIUS meminit *dysphagiae spasticae*, quam induxerat, ut ipse sibi persuaserat, nimius salinorum medicaminum usus. Huic nec vis castorei, nec essentia gentianae, nec aqua menthae piperitae, nec liquor anodynus mineralis HOFFMANNI, nec elixir viscerale eiusdem quidquam profuerat, quod nequaquam mirum est, cum omnia ista fibrarum tensionem irritabilitatemque potius adaugere potuerint. Ipse vero eam intra triduum feliciter sustulit ¹⁾ diluto aquoso *quassiae* instar *thee* praeparato, ac saepius in die propinato. Probabile autem videtur a copia potius aquei

tepentisque potus, quo salium vis irritans enervata ac diluta, *potius potus*
nec non fibrarum tonus relaxatus est, quam a *quassiae* pe- *aquae copiae.*
culiari virtute id emolumenti fuisse perceptum.

1) *Collect. societatis medic. Harniens. Vol. I. p. 205.*

§. XIX.

Contraria his omnino expetit *dysphagia* ab *atonia* aut *Curatio dys-*
paralysi. Fibrarum inertiam, laxitatem immittentemque irri- *phagiae ab*
tabilitatem, ubi deglutiendi facultati officit (raro enim per- *atonia et pa-*
fecte eam adimit), ea omnia emendant, quae serosos et pi- *ralysi*
tuitosos humores detrahunt, quae acri quodam stimulo ex- *Recidivum*
citant vim muscularem, quae fibras roborant et firmant. *hoc malum.*
Horum longo et continuato usu paulatim diuturnum et fa-
cile recidivum malum abigitur. Paulo difficilior res est, ubi
vis *nervea* languet, ut in *paralysi oesophagi.* Quo obscu- *Languente vi*
rius est et abditius eius principium, et quo lentior diutur- *nervea cura-*
niorque progressus, semper vero in deterius ruens, eo mi- *tio difficilior.*
nor spes affulgere solet recuperandae valetudinis. Quando *Quid si apo-*
autem ab *apoplectico* insultu repente corripit, a morbi prin- *plexiae sym-*
cipis, cuius symptoma est, gradu maiore vel minore exitum *ptoma est.*
dimetiri licet. Quae tum ad curationem accommodata sint,
ex capite IV. de *apoplexia* §. CXLII. et seqq., ubi de *pa-*
ralysi disseruimus *morbos capitis* volumine III. recensentes,
compertissimum puto.

§. XX.

Corpora aliena in oesophagum illapsa, aut intrusa, aut *Dysphagiae*
casu deglutita, uti monetae, clavi, lapides, ossicula et nu- *ab ingestis*
clei quorundam fructuum aliaque eiusmodi, aut frusta ma- *cursatio.*
iora solidi alimenti, non prius satis comminuta dentibus, in
eo haerentia aut infixata peculiarem considerationem meren-
tur, utpote quae subitam promptamque opem expostulant.
Generatim desuper hausta aqua aut oleo eorum transitus *Oleum.*
promoveri solet, et si id non suffecerit, stilo cereo aut si-
mili instrumento leniter demisso deorsum sensim propellun-
tur. Nam quando in ventriculum delapsa sunt, facile postea *Stilus cereus.*

sibi viam parant per intestina, sic ut intra duos vel tres dies ex ano egredi cernantur. Raro ultra hosce terminos retineri solent, quamquam interdum non egredi visa sint, nisi post decem aut plures etiam dies; quod a magnitudine et figura corporis, aut a materie, ex qua illud constat, variari non parum potest. Non diffiteor tamen, huiusmodi corpora interdum aut in pyloro, aut in aliis intestinorum flexibus, aut ad valvulam coli sisti, et diu ibi adhaerere, et gravissima mala progignere, ut proh! nimium experientia demonstravit. Sed nihil adiuvat eorum ex intestinis egressum magis quam oleosa, pinguis, mucilaginosa subinde sumpta, et quidem copia non modica. Sic sine noxa vel in ipsis infantibus et pueris corpora voluminis et figurae eius, quae minime ad descendendum apta credebantur, vidi ut plurimum paulatim deiecta atque excreta.

§. XXI.

Quid agendum, si difficilius extractio corporum sit, vel eorum deglutitio.
Varia tentanda proponuntur.

Interdum tamen accidit, ut nullo modo e loco, quem in oesophago tenent, dimoveri queant, sive quod infixum ibi sint, sive quod instrumentum, quo detrudi debent, in oesophagum demitti minime liceat. Tunc in fauces digiti aut pluma oleo illita demitti debent, ut vomitus proritetur. Si haec non proficiant, deglutiendum frustulum panis aut fructus alicuius est, et conatu ingenti adigendum, ut, si fieri potest, detrudat, secumque deferat impactum corpus. Quod si hoc quoque vel fieri non liceat, vel frustra tentetur, tunc globus ex spongia oleo imbuta forti filo serico accurate alligata deglutiendus est, atque iterum ope fili appensi sursum retrahendus; sic enim saepe spinac, acus, ossicula aut deorsum protruduntur, aut sursum feliciter revocantur, teste Cl. HEISTERO. Demum si haec quoque fallant, emeticum aqua dilutum nonnulli propinandum iubent, ut vomitu excitato sursum per os reiciantur. Sufficit enim, ut paucae guttulae emetici liquoris in ventriculum distillent, vomitumque cieant. Consilii bonitatem prosper exitus saepe demonstravit. Frustum carnis bovinae in medio oesophago cui-

dam militi haeserat, quin ulla arte sive deorsum sive sursum moveri posset. Singulari prope ausu in venam brachii tartarum emeticum liquidum infudit IOH. LEBERECHTUS SCHMUCKERUS ¹). Post semihoram circiter magno cum impetu vomitus accessit, eoque frustum illud facile eiectum est. Nescio tamen, an id semper tutum sit, semper-*An tutum*
que tentari queat. Caro certe illa brevi aut corrumpi po-*semper reme-*
tuisset, aut aliter digeri, ut mole diminuta locum mutaret,*dium emesis?*
descenderetque in ventriculum sine discrimine. Verum durioribus corporibus an eadem sors promitti posset? Num etiam vomitus acutis, lacerantibus, scindentibus corporibus, uti acus, clavi, cultri aut vitri frustula sunt, aequè innoxius futurus dicetur? Profecto timeri iure potest, ne vomitus inanibus nisibus altius infigantur, ut avelli amplius nequeant. Igitur, si unquam prudenti consilio opus est, hisce in casibus profecto ne desit, ut temeritatis nota vitetur. Illud *Quando sectioni oesophagi locus sit.*
hic praeteriri non debet, quod interdum huiusmodi corpora non longe a pharynge immota in oesophago remanent, quin ulla ratione educi possint. Hoc in casu sectionem oesophagi e latere asperae arteriae, ut inde extrahantur, proponere ausus est vir chirurgiae peritissimus, multisque nominibus clarus GUATTANIUS ²).

1) *Miscell. chirurgic. Vol. I. pag. 335. Item in Commentar. Lips. Vol. XXIV. p. 325.*

2) *De aneurysmat. ad calcem. Vid. etiam Vol. III. harum Institution. §§. CCCLXXXVI. CCCCXXXVI. in notis.*

§. XXII.

Restat demum, ut aliquid dicam de regimine eorum, *Diacta.*
quibus malum ita increvit, ut alimenta vel tenuissima deglutiri, et ad ventriculum ob summas itineris angustias transmitti quam minimum vix possint. His oportet stilo cerco *Quomodo nutriendi aegroti.*
aut (quod magis placet) fistula flexili cava ex tela cerata confecta oesophagum leniter dilatare, et per eam infundibili ope liquores nutrientes ad ventriculum demittere. Instrumentum huiusmodi, quo iniici alimenta in ventriculum

Enemata ex iure carniū, lacte etc. possint, videre est apud MAUCHARTIUM, qui illud excogitavit, et hunc in usum perfici curavit. Si vero ne id quidem locum habet, quod frequentissimum est, enemata ex

iure carniū, vel ex lacte et vitellis ovorum similibusque alimentis crebro subter dentur, ut hac saltem ratione vita pro virili sustineatur. Nec utilitate carebit, totum corpus subinde demergere in balneum tepens ex sero lactis, aut aqua et lacte commixtis, vel iure carniū tenui cum vini canarini tantillo, ibique aliquantulum sinere, ut venis absorbentibus attrahatur subtilior humoris pars, qua corpus quodammodo reficiatur nutriaturque. Sed durum miserrimumque est sic vitam protrahere conari, cum quidem plerumque incassum id fiat.

CAPUT II.

DE AUCTO CIBORUM DESIDERIO ET FASTIDIO PRAETER NATURAM.

§. XXIII.

Ancti appetitus citia quae et quot.

Appetitus, sive cibi desiderium, interdum ita praeter naturam augetur, ut non modo omnes quicumque cibi sine ullo discrimine avidissime assumantur, quin tamen satieta-tem procreent (quod in *Κυνροξεία* sive *Ὁρεξι κυνώδη*, fame videlicet *canina*, atque in *bulino* sive fame *bovina* contin- git), verum etiam quandoque in certas quasdam res vehe-menter feramur cum a natura cibi alienas, tum in alimen- tum usurpari solitas, ut in *pica*, *cissa*, *citta* et *malucia*.

Bulimus.
*Pica, cissa, citta et mu-
lucia.*

§. XXIV.

*Definitur
cynorexia.*

Cynorexia definitur insatiabilis ciborum cupiditas, quam brevi ingestorum vomitus consequitur, aut cita per annum

eorum deiectio. Sic levato a nimio onere ventriculo, nova vorandi cupiditas redit, iterumque devorata vomuntur, non secus ac canibus evenit nimium voracibus. Cum vero alimenta cito ex alvo, interdum semiconcocta egeruntur, hanc *Fames lupina* affectionem nonnulli vocant non *famem caninam*, sed *lupinam* sive *Λυκορεξία*.

§. XXV.

Λ cynorexia differt *Βούλιμος* sive *Βουλμία*, quod in hac posteriore immodicam famem, nisi eidem mox satisfiat, excipiant animi defectiones. *Picam* porro, *Κίσσαν* sive *Κίτταν* esse perhibent eam appetitus depravationem, in qua absurda atque a cibis aliena, uti calx, gypsum, creta, lapides molares, carbo, cinis, vitrum, stercus, appetuntur ¹); *Μαλακίαν* vero, in qua peculiares quidam cibi aut condimenta, sed nimia copia atque aviditate nimia sumuntur, cuiusmodi sunt haleces, piper, zingiber, sal aliaque similia ²).

1) Narrat SENNERTUS, fuisse mulierem, quae cretam et lapides molares contritos ad duas libras quovis die sine noxa ingererat. *Observationes.*

2) Apud GALENUM exstat historia feminae cuiusdam utero gerentis, quae zingiberis libras aliquot unica vice maxima cum voluptate et sine ullo faucium aut stomachi ardore devoravit.

§. XXVI.

Quemadmodum autem ciborum *appetentia* praeter modum saepe augetur, aut praeter naturam depravatur, ita quandoque imminuitur aut aboletur. *Imminuta* dicitur *Λυσορεξία*, prorsus *ablata* *Ανορεξία* aut *Αποσιτία*; quamquam hac postrema voce intelligendum quidam velint illud cibi fastidium, in quo sola ciborum praesentia horrorem et nauseam moveat. Verum non semper singula haec a medicis accurate satis distinguuntur, cum plerumque appetentiam tam *imminutam* quam *deletam* uno *anorexiae* nomine appellare soleant.

§. XXVII.

Causa coniuncta, ut vocant, *cynorexiae* et *bulimi* est, Causa pro-

*xima cyno-
rexiae et bu-
liniae.
Remotae
causae.*

ni fallor, *molesta* quaedam *sensatio*, qua qui afficitur, ver-
sari sibi videtur in magna cibi sumendi necessitate, sic ut
perpetuo esuriat. Eam excitant et foveant vel gastrici succi
acriores activioresque facti, vel ciborum reliquiae in ven-
triculo vellicandi vim adeptae, vel choleodochi in ventricu-
lum et in pylorum insertio aliquando observata in voraci-
bus ¹⁾), lumbrici, taeniae aliaeque vermium species, pariet-
um et rugarum stomachi validior inter se confrictio, vel
eiusdem peculiaris quaedam convulsiva aut spastica affectio;
hystericis praesertim feminis non insolens, vel sensibilitas
aut irritabilitas ventriculi undecunque aucta, quarum alter-
utra a levi et naturali quacunque causa excitetur, ac famis
sensum maiorem moveat, et peristalticum motum invertat,
aut ita intendat atque acceleret, ut inde et animi deliquia
et vomitus ingestorum copiam subsequens, aut eorum prae-
properus descensus facile intelligantur. Hunc celerem ni-
mis ciborum e ventriculo descensum ita magni faciunt non-
nulli scriptores, ut in hoc uno atque adeo in praecipiti et
creberrima vacuitate ventriculi positam horum morborum
causam velint. Quin imo contendunt, ideo iusto celerius
alimenta e ventriculo prolabi, quod *pylorus* ipse praeter na-
turam ita latus patensque ²⁾) sit, ut eorum descensum, prout
par est, retardare et reprimere nequeat, dum interea valide
ventriculi vires expultrices agunt. Sententiam confirmant
observatione anatomica Cl. RUYSCHII ³⁾), qui in cadavere
cuiusdam mulieris ex diuturna *Lycorèxia* defunctae non aliud
vitium reperit, nisi *pylori* insolitam dilationem, quae omnes
unius manus digitos admittebat. Cibos illa, dum viveret,
statim ac assumserat, et vix ventriculo exceptos demitte-
bat ad intestina, et paulo post torminibus afficiebatur, do-
nec sic alimento privata ac tunc confecta morte tandem ma-
lis finem imponeret.

*Quarundam
opinio de uni-
ca horum
morborum
causa.
Pylori dila-
tatio.*

*Observatio
RUYSCHII.*

*Observatio-
nes anatomi-
cae aliorum.*

1) BOHN, *Circul. anat. physiol. Progygnas. X. p. 153.*
ETTMÜLLER. *Oper. T. II. p. 54. in homine.* In voracissimo
animali struthiocamelo inseritur ductus biliaris in pylorum,
observante DUVERNEYO. *Mém. de l'acad. des scienc. ann. 1692*
p. 30. Item in hystrice. *Id. ibid.*

2) Ad huiusmodi opinionem accessit perceleber NATALIS JOSEPH. PALLUCCIUS in recenti opusculo inscripto: *Arte nuova e facile di curare i mali* etc., ubi pag. 48. etiam admonet, curari morbum ab hac causa profectum sola abstinencia.

3) *Observ. anat. chirurgic. observ. 47. pag. 94.* Haec ob- *Non semper*
servatio refertur etiam a Cl. LIEUTAUDIO *Hist. anat. med. a dilatato*
T. I. lib. I. articulo XXVII. Sed ibi etiam PLATNERI obser- *pyloro haec*
vatio allegatur *de pyloro laxo et dilatato* in homine, qui *vitia sunt.*
nunquam *fame canina* aut *bulimia* laboraverat.

§. XXVIII.

Alterutrum vero depravati appetitus vitium, *pica* nempe *Causa item*
et *malacia* (§. XXV.) non aliunde probabilius repeti potest, *et origo pi-*
quam a *mutata perversaque gastricorum liquorum natura,* *cae et mala-*
sed tamen eiusmodi, quae non solum ventriculi sensum mo- *ciae probabi-*
tumque concitando appetitum primo adaugeat, verum etiam *lior.*
per nervos sensum commune sensorium, et deinde protensos
illinc nerveos surculos ad linguam et nares spectantes sic
afficiat, ut idea cum desiderii in hanc vel illam rem, tum
voluptatis ex ea percipiendae animo obversetur. Non autem *Mentis hal-*
sola mentis hallucinatio, ut quibusdam videtur, hic satis est, *lucinatio non*
sed *succorum etiam digerentium peculiaris* quaedam *vis nova* *est causa suf-*
et *actio* necessario requiritur, ut nempe res tam absurdae, *ficiens.*
atque ab usu alimenti alienae et ferri et digeri sine ulla *Vis nova et*
noxa possint. Quam ob rem nil mirum, si *aciditatem*, ut *peculiaris*
vocant, *esurinam* plerique medicorum in ventriculi succis *succorum di-*
existere putant; nec profecto valde a vero aberrare eos *gerentium*
arbitramur, cum huiusmodi malis laborantes acidum saepe *actio requi-*
humorem eructent, terreis atque alcalicis delectentur, ho- *ritur.*
rumque ope, retuso veluti acore, plerumque sanentur. *Aciditas*
Accedit, quod pleraeque remotae causae eius generis esse con- *esurina in*
sueverunt, quae acido spontaneo gignendo aut alendo potis- *ventriculi*
simum valent, quales sunt rerum crudarum et fructuum im- *succis exi-*
maturorum abusus, hypochondriaci ac melancholici affectus, *steus.*
tenera corporis constitutio, graviditas, mensium suppressio,
chlorosis, cachexia, cacoehymia, aetas puerilis, moeror, vita
deses et nimia quies.

Causae re-
motae acidi-
tatis.

§. XXIX.

Contrarii vitii i. e. imminuti vel deleti appetitus contrariae etiam causae.

Causa proxima. Proëguminae.

Causae pro-catarepticæ.

Ciborum porro desiderium imminuitur aut etiam aboletur (§. XXVI.) defectu illius sensationis, in qua naturalis appetentia continetur, causisque contrariis (§. XXVII.); nimirum a lenta et viscida saburra ventriculi, ab inopia aut inertia gastrici liquoris, a putridi, purulenti aut alcaliscentis principii commixtione, a biliosi humoris imminutione, depravatione aut copia exuberante, a naturalis sensibilitatis aut irritabilitatis ignavia, a sanguinis velociori motu aut eius circa ventriculum congestionem, ut in febribus quibusdam, a tumoribus, scirrhis, canceris, ulceribus aliisque vitiis ventriculo aut vicinis sedibus infestis. Quae si etiam nervorum principium commune ita permovent, ut idea aversationis atque odii in eo enascatur, aut si ventriculum ita offendunt et gravant, ut comesta sine molestia, dolore, nausea aut vomitu retinere nequeat, iam clare patet, cur *Ἀποσιτία* sive *summum ciborum fastidium* adesse debeat. Antecedunt haec mala tamquam causae remotae animi pathemata, imprimis terror et moestitia, venus immoderata, mentis contentiones assiduae, evacuationes nimiae, lactatio diutius protracta, uterus gravidus, excrementa in intestinis accumulata, motus navis in mari, largior et crebrior potus aquae calidae aut tepidae, nimius aut frequens pinguium, oleosorum, putrium, alcaliscentium, narcoticorum, vini, spirituum inflammabilium usus, vita exercitationis expers, suppressae aut adauctae evacuationes, plethora, aestivi calores, aër iners et palustris, obstructions viscerum imi ventris, atra bilis stagnans, melancholia, febres et alia huiusmodi.

Diagnosis et Prognosis.

§. XXX.

Diagnostica signa unde petenda.

Singulorum istiusmodi affectuum (§§. XXIII. XXIV. XXV. XXVI.) diagnosis ex iis, quae supra explicata iam sunt, omnino evidens est, nec difficilis causarum inventio,

si cuiusque morbi tradita descriptio prae oculis, ut decet, habeatur. Quare aliquid potius de eorum prognosi dicamus. *Fames aucta* per se periculo vacat, nisi cum aliis ^{Prognosis famis auctae.} morbis copuletur, quorum aut discrimen, ut in *hectica* et *phthisi*, aut longitudinem, ut in *febris intermittentibus* et *lentis* atque in *hydrope*, aut relapsum, ut in convalescentibus, solet portendere. Sed *cynorexia* non raro altum soporem, aut *lienteriam* sive laevitatem intestinorum, aut *atrophiam* post se trahit; itemque interdum visa est desinere in *bulimum*, et tandem in *syncopen* lethalem. Peri ^{Cynorexiae effectus mali.} culosior enim est *bulimos* ob animi crebra deliquia, quae cum comitantur et subsequuntur. ^{Bulimus periculosior.}

§. XXXI.

A *pica* et *malacia*, si diu perdurant, praesertim in ^{De pica et malacia quid metui debeat.} pueris et virginibus, expectari debent peiora mala, ut *cachexia*, viscerum abdominalium obstructiones, ventris tumor, mesenterii infarctus, *cacochymia*, *macies*, *atrophia*, *hydrops*. Mulieres vero utero gerentes minus detrimenti percipere, una fere voce testantur clinici exercitiores. Ad *cibi fastidium* sive *anorexiam* spectant sequentes HIPPOCRATIS aphorismi: *mente constare, et bene se habere ad ea, quae offeruntur, bonum; contra se habere, malum* ^{Prognostica appetitus imminuti ex HIPPOCRATE.} ¹⁾. In morbo diuturno *cibi fastidium* et *deiectiones sinceræ, malum* ²⁾. *Malum quoque in dysenteriis, et cum febre peius* ³⁾; in universum prae ceteris metuenda est *apositia*. Causam saepe indicat gravissimam et vix depellendam. In morborum declinationibus appetitus languens aut deiectus ^{Ceteris periculosior APOSITIA.} ^{Quid significet in morborum declinationibus.} ^{crisim imperfectam significat, et metum iure incutit, ne aegri recidivi fiant.}

1) Aphorism. XXXIII. sect. 2.

2) Aphorism. VI. sect. 7.

3) Aphorism. III. sect. 6.

C u r a t i o.

§. XXXII.

Curatio cynorexiae et bulimi.

Quid si a gastrici liquoris acrimonia sit.

Diluentia.

Oleosa.

Absorbentia.

Magnesia alba.

Quando emeticis utendum.

Sensibilitatem et irritabilitatem auctam compescientia.

Vini usus famem coërcet, praesertim in bulimia.

Quando anthelmintica conveniant.

Acida mineralia.

Curatio cynorexiae et bulimi eo spectare debet, ut sensatio illa permolesta famis, quam dixi (§. XXVII.), deleatur. Id vero praestabitur causas eius singulares removendo. Quare ubi hae in gastrici liquoris acrimonia nimia consistunt, diluentia aquosa, oleosa, pinguis, mucosa, lac vaccinum, lacticinia, terrea, alcalica et similia magna copia et longo tempore sumenda indicantur. Quibus subinde interponere blanda evacuantia, et sic morbi fomitem deturbare, convenientissimum est. Inter ea, quae alvum laxant, hic ceteris praestat magnesia alba liberali manu et iterato praescripta. Si his malum non cesserit, emetica etiam tentari possunt, ubi nihil obstat, eo consilio, ut totum gastricum systema excutiat, et breviori via noxius humor emendetur. Radix ipecacuanhae primum locum sibi vindicet. Sensibilitas et irritabilitas ventriculi aucta, auctusque eius peristalticus motus, ut causis famis auctae adnumerari interdum potest, sic consopiri compescique debet remediis opium habentibus, quibus illud etiam efficitur, ut vomitus et citae assumptorum ex alvo deiectio conquiescat. Quod maxime faciendum, cum *hysterica* aut *hypochondriaca nervorum mobilitas* morbum fovere videatur. Famis quoque sensum vinum generosum et dulce retundit iuxta illud HIPPOCRATIS ¹⁾: *famem vini potio solvit*. Id autem praestantius erit in ipso *bulimo*, quia cardiaca vi lipothymias et syncopes praecavebit. Si *vermium* suspicio inciderit, quae eos enecare, obstupescere aut expellere posse creduntur, in usum vocentur. De his iam alibi ²⁾ satis retulimus. Illic praecipue acida mineralia conveniunt, et speciatim spiritus sulphuris, quo famem caninam curasse POTERIUS fertur. Fortasse *fames* illa erat a *vermibus*, aut etiam a nimia ventriculi irritabilitate, quam imminuere sane potuit acidum sulphureum, quin *alcalinam volatilem acrimoniam* acido corrigent-

rigendam in illo casu fingamus. Demum *pylori laxitati* Quomodo
aut *dilatationi*, ob quam praeproperus et praeceps a ven- *pylori laxi-*
triculo ciborum descensus fiat, *cynorexiam* aut *lycorexiam* *tati, a qua*
pariens, medebitur imprimis abstinencia et alimenti in plu- *cynorexia et*
res vices cauta divisio, videlicet ut vacuus ventriculus tem- *lycorexia,*
pus pyloro relinquat sese contrahendi. Nec eo in casu to- *medendum.*
nica et leniter adstringentia paregoricis mixta praetermitti *Tonica et*
debent. *paregorica.*

1) *Aphor. XXII. sect. 2.*

2) *Vol. I. De febr. §. CCCCII.,* et huc quoque refertur *Cap. X.,* quo peculiariter agitur *de vermibus.*

§. XXXIII.

Quod spectat ad appetitus depravati, sive *picae* et *ma-* *Curatio pi-*
laciae (§. XXIII. et XXV.) curationem, in hac non *cae et mala-*
modo gastricis succis restituenda est naturalis et pristina *ciae.*
temperies, verum imaginationis etiam vitium tollendum ven- *Quae prae-*
triculusque firmandus. Saepe leni vomitu aut alvi ductione *mittenda.*
causa sive fomes morbi subtrahitur. Si acor nimius peccet, *Si ab acore*
terreis, alcalicis, absorbentibus, nempe oculis cancerorum, *nimio quid.*
terra *nucarina, lemnia, bezoar minerali,* ut appellant, ma-
gnesia nitri, coralliis pulveris forma datis corrigitur. Eva-
cuationes suppressae omni ope revocentur. Cautius in fe- *Suppressae*
minis gravidis procedere oportet. Namque in his natura *evacuationes*
saepe ipsa sibi prospicit aut vomitu excitato, aut paulatim *revocandae.*
sponte, sic ut post tertium aut quartum gestationis men- *Cautela cir-*
sem omnis appetitus depravatio finiatur. In universum iu- *ca gravidas.*
cundis aptisque epulis, vino rubro et generoso, probabili
sermone et prudenti consilio, subacidis, amaricantibus, to-
nicis atque imprimis e ferro deductis aliisque auxiliis ad re-
ctam victus rationem usumque ciborum salubrium aegri pau-
latim redigendi sunt.

§. XXXIV.

Dysorexiae demum, *anorexiae* atque *apositiae* (§. XXVI. *Curatio im-*
XXIX.) adhibenda etiam curatio est, quae causarum varie- *minuti aut*
IV. *deleti appeti-*

tus iuxta va- tati respondeat. Si *lenti et viscerum humores ventriculorum*
rias eius cau- *oppleant*, eiusque *sensum atque irritabilitatem obtundant*,
sas. quod ex corporis habitu, temperamento, aetate, victu praecedente, sapore oris fatuo, salivae lentore, linguae albedine, epigastrii pondere dignoscetur, salibus neutris, gummi ammoniaci, sapone veneto incidendi primum solvendique sunt, deinde eccoproticis subducendi. Hoc nomine excellent rhabarbarum, aloë, agaricum atque ex his varia compositorum genera. Nec locus denegatur blandae emesi, quando aeger eidem assuetus sit, aut ad vomendum propendeat, aut morbus memoratis medicamentis parum obediatur, nec ullum contraindicans illam prohibeat.

§. XXXV.

Si ab inertia humoris gastrici et atonia ventriculi. Si vero *gastricus liquor iners* videatur, et *ventriculi atonia* simul concurrat, quod causae remotae consideratione patebit, aperientibus, amaris, leniter aromaticis, stimulantibus et roborantibus utendum erit. Inter haec celebrantur absinthium, abrotanum, centaureum minus, chamaedrys, mentha, radix caryophyllatae, valerianae sylvestris, lignum quassiae, cortex cascarillae, mali aurantii, chinae chinae et prae ceteris chalybs. Ex his parantur diluta, decocta, tincturae, extracta, elixiria multiplicia pro varia rerum, aegri et aetatis ratione. Elixir illud, quod a *Paracelso* nomen habet, quodque in magno pretio habetur, ex aloë constat, myrrha et croco. Sed caute in temperamentis calidis et siccis, et regionibus meridionalibus, aut aestivis temporibus, nam nimium calefacit atque exstimulat, a prudentioribus usurpari solet.

§. XXXVI.

Quae biliosam colluviam emendent evacuantque. Quando amarus oris sapor, linguae, oculorum, cutis flavedo, ructus nidorosi, urinae coloratiores aut croceae bilis copiam, aut alcaliscentem corruptamve naturam significant, corrigenda atque evacuanda *colluvies illa biliosa* est, quae appetitum deiecit, succis vegetabilium subacidis, tama-

Subacida.

rindis, cremore tartari aut blandis emeticis. Egregie etiam *Evacuantia*.
 abstergit evacuatque aqua tectucciana, sal subamarum muti-
 nense, anglicanum, carolinum, polychrestum magna aquae
 copia dilutum. A sanguinis vero copia, aut motu eius con- *Curatio*
 citiore, aut circa ventriculum congestionem *cibi fastidium morbi, si a*
 manare si ostenderint plethorae signa, aut pulsum citatus mo- *nimia copia*
 tus, aut evacuationes consuetae deficientes, tunc venam ape- *sanguinis*
 rire oportet, haemorrhoides reserare, catamenia promovere, *aliisve citis*
 et vegetabilium succis, ut loquuntur, saponaceis stagnan- *eiusdem sit.*
 tem sanguinem in visceribus ventris resolvere, eiusque cir- *S. M.*
 cuitum restituere. Huc pertinent succi cichorei, taraxaci,
 agrimoniae, graminis, aut horum decocta, melle aut oxy-
 melle addito actuata, vel serum lactis cum aliqua illarum
 plantarum decoctum, aut pulpa tamarindorum sali cuidam
 neutro admixta atque epicratice data. *Incidentia et*
resolventia.

§. XXXVII.

Quae demum *anorexiae* species aliorum morborum de- *Curatio se-*
 bentur praesentiae, tolli laud possunt, nisi primario morbo, *cundariae*
 si fieri possit, curato. Verum ubi morbus princeps nequa- *anorexiae.*
 quam curationem admittit, vanus omnis labor ad appetitum *Si princeps*
 revocandum. Interea tamen non deserendus omnino aeger *morbus in-*
 est, dandaque opera, ut quam minimum damni patiatur, da- *curabilis sit,*
 tis tonicis, antisepticis, antipyricis, et facile sub parva mole *quae conve-*
 nutrimentum largientibus pro aegri consuetudine et lubitu. *niant aegro-*
 Ceterum in quovis huiusmodi vitii appetitus genere ea *tis.*
 victus ratio instituitur, quae causis ipsis tollendis accommo-
 data sit. Generatim animi curae, et quaecunque nervorum *Diaeta.*
 vim et robur, aut humorum naturalem indolem aut copiam
 evertunt, et pessumdant, diligenter vitari debent. Corpus
 deambulatione, vectione, equitatione, cursu, venatu, frica-
 tione frequenti roboretur. Balnea item frigida, aquae me- *Balnea,*
 dicatae et martialia medicamenta apto tempore opportunis- *aquae medi-*
 sima reputantur, atque ad prophylaxin non minus, quam *icatae et mar-*
 ad curationem maxime faciunt. Alimenta sint levia, grata,
 iucunda et leni quodam stimulo praedita. Fructus maturi

atque olera plerumque optime cedunt, minusque nauseantur. Vinum meracum, non pingue, non dulce, sed tenue, acidulum, aut subausterum, quale rhenanum, austriacum, burdigalense, sed vetus et tempore perfectum, aut his simile videtur concedi posse, et reliquis antecellere.

CAPUT III.

DE LAESA ALIMENTORUM COCTIONE.

§. XXXVIII.

Quae et quot genera huius vitii.

Quid dyspepsia.

Quid brady-pepsia.

Quid apepsia.

Diaphthora quid.

Haec vitia raro sola, et saepe complicata.

Ex diaphthora duplex cruditatis species, i. e. nidorosa, et acida sive soda.

Quatuor laesae coctionis genera reperiuntur apud medicinae practicae scriptores, nimirum *Δυσπεψία*, *Βραδυπεψία*, *Ἀπεψία* et *Διαφθορά*. Primum est, quando ciborum coctio sive digestio imperfecte difficulterque peragitur; alterum, quando tardius, quam decet, absolvitur; tertium, quando penitus deficit atque aboletur, sic ut cruda alimenta in ventriculo maneant, aut inconcocta deiciantur; quartum demum, ubi spontaneam corruptionem subeunt potius, quam digerantur. Raro autem haec vitia seorsum, prout descripta sunt, sese exhibent; sed saepissime vario modo complicata simul inveniuntur. Atque ubi *diaphthora*, sive *alimentorum spontanea degeneratio* fit, duplex emergit cruditatis ratio, nimirum *nidorosa* sive, ut aliter dicitur, *alcalescens* aut *putrida*; atque *acida* altera, quam *sodam* aut *ardorem ventriculi* aut *Πύρωσιν* nominant nonnulli. Addi his potest cruditas *rancescens* aut *rancida*, quae sapore a reliquis facile distinguitur.

§. XXXIX.

Tertia quoque, rancida dicta, addenda.

Quemadmodum plures causae ad rectam ciborum coctionem concurrunt, et necessariae sunt, quas physiologia recenset atque explicat, sic earum omnium, aut quarundam

defectio, imminutio aut depravatio eam delent, impediunt, *Causa laesae coctionis.* minuunt aut vitiant. Itaque huc referri debent pleraeque illae causae, quibus (§. XXVIII. XXIX.) laedi, depravari aut deleri appetitum docuimus, et praeterea mala ciborum conditio, copia nimia, praeparationis defectus, liquoris salivialis, gastrici, duodenalis, biliaris videlicet et pancreatici parcitas, inertia, dyscrasia vitiataque indoles, tumores, ulcera, calli aliaque mala ventriculum proxime aut remote laedentia, irritantia, comprimentia, laxantia, et demum quae frequentissima causa habetur, ventriculi atonia et paralysis, aut *Quae frequentior.* contra spasmus, unde peristalticus eius motus aut languet, aut cessat, aut turbatur, aut cohibetur. Quando atoniae *Imbecillitas et resolutio ventriculi.* et paralysi malum debetur, *imbecillitas* etiam et *resolutio ventriculi* a nonnullis appellatur.

D i a g n o s i s.

§. XL.

Vitiatae coctioni obnoxii imprimis sunt desidi vitae et *Signa communia.* litterarum studiis dediti, pathematibus animi diu vexati, hypochondriaci, melancholici, debiles, languidi, vino et venere soluti et fracti. Eos autem angunt ventriculi pondus, inflatio, languor, distentio, anxietas, fluctuationis in eo perceptio, murmura, flatus, ructus frequentes, praesertim quinque vel sex horis a pastu permolesti, rubores faciei, difficilis aut gravis respiratio, pravus oris sapor, lingua muco albo aut flavo obducta, cibi semi-concocti per os reiectio, appetitus plerumque deficiens, alvus saepe compressa, ventriculi aut intestinorum dolores, borborygmi, quandoque diarrhoea, faeces cinereae, alias virides, animi leves defectiones, ieiuno praesertim ventriculo, globus ad fauces ascendens, ibique boli instar haerens, cordis palpitationes, vapores fugaces, pulsum mira varietas, vertigines, capitis dolores, imprimis circa frontem aut tempora, aurium tinnitus, vigiliae nocturnae, somni interrupti, pallor faciei, tristitia,

timor, macies. Atque haec quidem communia habentur cuiusque *laesae coctionis* ciborum. Sunt vero quaedam propria singularum *cruditatum* (§. XXXVIII.), sed praecipuus oris et ructuum sapor eas distinguit; nam in *nidorosa* sapor quidam putridus, qualis ex ovis corruptis percipitur, permolestus est, et quidquid carnis, iuris aut animalis cibi est, aegri odio habent atque aversantur; contra *acida*, aciescentia, vegetabilia tantummodo cupiunt. In *acida* autem cruditate insolitus acor salivam inficit, et si quid e ventriculo ructus forma aut flatus erumpit cibi aut humoris, acidum saporem prae se fert, fauces exurit, et in terram decidens aceti instar ebullit. In hac cruditate saepe queruntur de ventriculi quodam ardoris sensu, veluti roderetur.

Rancida. *Rancida* demum cruditas subsequitur cibos pingues, oleosos, et praecipue ex butyro aut flore lactis paratos, et in eructationibus fauces atque os sic afficiuntur, ut a butyro rancido et corrupto affici solent.

P r o g n o s i s.

§. XLI.

Dixi, quomodo *laesae ciborum coctiones* manifestentur. Restat modo, ut dicam de morbis, qui eas subsequi consueverunt. Hi profecto innumeri fere sunt, sed frequentiores videntur cardialgiae, dolores colici, varia alvi profluvia, hypochondriasis, cachexia, scorbutus¹), phthisis, atrophia, obstructiones imi ventris, hydrops, arthritis, podagra, nephriticae aliaeque chronicae affectiones, imo etiam febres gastricae acutae aut lentae, putridae, malignae et quandoque exanthematicae. Quare non negligenda istiusmodi coctionis ciborum vitia, et, quoad per eorum causas licet, emendanda pro viribus. Spes autem omnis curationis obtinendae sita est in recenti origine morbi, in eius levitate atque in aegrotantis facili ingenio, quo libenter legibus medicinae se obliget, et consiliis idoneis aures praebeat.

Non tamen facile promittenda salus est; saepe enim ob levissimos diaetae errores recrudescit malum. Interdum etiam a causis, quae minime removeri possunt, fovetur, inter quas *resolutio ventriculi* ponenda quoque est, quae raro atque aegerrime medelam recipit.

Ob leves diaetae errores recrudescit malum.

Quaedam causae nequeunt removeri.

Observatio rara auctoris.

1) Facilis est transitus a laesa ciborum coctione in affectionem hypochondriacam, atque ab hac in scorbutum. Ante annos amplius viginti quinque vir aetate florens, temperamento melancholico biliosus, civis Faventinus, DOMINICUS BERTOLATIUS cruditatem acidam laborabat, ex qua non modo in hypochondriacam, sed etiam in scorbutum verum atque omnibus signis confirmatum incidit, non putridum certe, ut plerumque esse solet, sed acidum frigidumque. Tanta autem fuit aciditatis spontanei, ut vocant, vis et progressio, ut saliva reliquique humores aceti acerrimi atque erodentis saporem referrent. Nec ulla arte potuit acor ille obtundi aut emendari, quamquam longo tempore plurimum excellentium medicorum consiliis usus esset, ita ut demum macie lenta confectus, et viribus vitae paulatim deperditis extremum diem obire debuerit. Vidi ex eadem causa scorbutum laborantem nobilem quendam virum Florentinum, cui medicam opem ferebat doctrina, atque usu praestantissimus, si quis alius, XAVERIUS MANETTIUS. Illi autem tanta erat in aciditate cruditatem proclivitas, ut neque ius carnis, neque carnes ipsas assumere posset, nisi ex avibus exteris ad *alcalescendum* prioribus. Cetera enim alimenta, etiam iurulentia et carnea aciditatem molestissimam in eius ventriculo acquirebant. Vegetabilis diaeta, cuius laudes eximias celebravit Cl. COCCHIUS, pluries tentata, semper plurimum detrimenti eidem attulit. Rara, fateor, haec quidem exempla, sed vera, atque meis oculis visa nolui silentio et oblivione perirent.

Alia observatio XAV. MANETTI.

C u r a t i o.

§. XLII.

Ut causae ciborum fastidii prope eadem sunt laesae Indicationes. eorundem coctionis, sic indicationes et curatio (§. XXXIV. ad XXXVII.) ibi propositae huic quoque morbo conveniunt. Generatim aperientia et amaricantia laudantur, utpote quae gastricorum succorum et bilis et succi pancreatici secretionem promovent, copiam et vim augent, et naturalem eorum crasin restituunt. Non debent tamen promiscue adhiberi, nec sine delectu. Ratio enim, uti in omni alio morbo, habenda est aetatis, temperamenti, sexus, re-

Curatio generalis.

In calidis siccisque tempera-

mentis quae remedia.
Aperientia. gionis atque anni temporis, et pro horum diversitate modo haec, modo illa deligi et praeferri. In calidis puta, et siccis temperamentis gramen, cichoreum, acetosa, fragraria, agrimonia, taraxacum inter aperientia atque amaricantia primas habebunt; contra in frigidis et humidis temperiebus praestabunt radices apii, petroselini, dauci sylvestris, absinthium, abrotanum, marrubium et sic porro. Idem dicito de eccoproticis et alvum ducentibus. Priori in casu cremor tartari, tamarindi, manna, sales medii, in altero rhabarbarum, aloë, sales fixi plantarum, sapo venetus opportuniora erunt. Itaque *therapeutices* notissima praecepta probe observentur, et pro circumstantiarum diversitate medicamenta quoque prudenter accommodata eligantur.

§. XLIII.

Si ab atonia quae curatio.
Roborantia. In ea vero *ciborum coctione laesa*, cui causam praebet fibrarum laxitas atque atonia, aut nervorum resolutio, in universum roborantia utiliter adhibentur, quae inter excellunt cortex aurantiorum, chinae chinae, cascarillae, radix valerianae sylvestris, rubiae tinctorum, ligni quassiae, aquae acidulae ferratae, uti spadanae, recobarienses, mauritianae aliaeque plures huius census, et ferrum ipsum varia ratione praeparatum, delicatioribus nimirum menstruo vegetabili solutum, robustioribus in scobem tenuissimam redactum. Prodest etiam quamplurimum *resolutione ventriculi* laborantibus aqua frigida perfundi, in ea natare, stillicidio epigastrium subiicere, membra saepius perfricare, exerceri, rusticari, peregrinari, equo veli, atque in aëre puro et perflato vitam degere. Praeterea quibus cito in *ventriculo* *cibus putrescit*, e carnibus dandae illae potissimum sunt, quae paulo firmiores et duriores habentur, uti bubulae. *Acidae cruditati* magis resistunt potus aqueus, carnes, et quidem avium atque animalium sylvestrium, pisces, ova atque olera acria et ex plantis cruciformibus depromta. Contra *nidorosae* et *rancidae* opponuntur acida, acescentia, victus ve-

Acidulae ferratae.
Quid resolutione ventriculi laborantibus.
Quibus cito cibus putrescit in ventriculo quae nutritio.
Quae cruditatibus acidis.
Quae nidorosis et rancidis.

getabilis, legumina, farinacea, vinum acidulum, abstinencia a carnibus, ab ovis, a pinguibus, aut oleosis.

CAPUT IV.

DE NAUSEA ET VOMITU.

§. XLIV.

Gradu tantummodo videntur differre inter se *nausea* Definitio et *vomitum*. Illa vomitum plerumque antecedit, estque inu- nauseae et vomitus. tilis vomendi cupiditas, saepe aliquo cum conatu. Hic vero, nempe *vomitum*, est violenta eorum, quae ventriculo continentur, aut in ipsum et proximas eius partes confluunt, per os reiectio. Ut autem levior motus fibrarum oesophagi ac ventriculi inversio *nauseam*, sic validior, adductis in contractionem spasticam saepe diaphragmate et musculis abdominalibus, *vomitum* efficit.

§. XLV.

Causa proxima utriusque est *convulsiva oesophagi*, aut *Causa pro-* *ventriculi*, aut *adnexarum partium irritatio*, at eiusmodi *xima utrius-* *que.* porro, ut motus ab inferioribus ad superiora invertatur. Huic efficiendae sunt apta ea omnia, quae ciborum desiderium imminuunt, augent, aut depravant (§§. XXVII. XXVIII. *Causae re-* *motae.* XXIX.), aut coctionem alimentorum (§§. XXXIX. XL.) impediunt. Quorum aliqua ventriculo insident, aliqua extra ventriculum quidem exstant, sic tamen, ut connexionem, sensibilitate, consensu eum afficiant. Insigniora vitia, quae *Aliae in ven-* *triculo, ex-* *tra cum aliis* *sunt.* ventriculo insunt, quaeque vomitum diuturnum excitant, sunt *Quaenam* *ventriculi.* obstructio pylori, eiusdem callus, scirrhus, ventriculi ulcus, abscessus, hernia ¹), carcinoma, superioris orificii laxitas et atonia, sanguis vasa ventriculi nimium distendens, aut in iis stagnans, inflammatio eius ²), pravorum humorum colluvies,

acria, venenata, pingua, putrida ingesta et retenta, vermes.

Extra ventriculū vitia quae.

Quae extra ventriculum esse solent sunt capitis ictus, cerebri vulnus, communis sensorii quaevis laesio, imaginatio-
nis vis, nervorum paris vagi, pharyngis laryngisque irritatio,
hepatis ³), pancreatis, mesenterii, lienis, renum, uteri, vesicae mala, abdominis musculorum aut intestinorum inflam-
matio, tumor, obstructio, strangulatio, spasmus, motus rhe-
dae, navis, reique ingratae conspectus. A ligato sarcomate
in fronte vomitum sympathicum excitatum, narrat P. C.
ABILGAARDUS ⁴).

Observationes.

1) *De herniis ventriculi et eius effectibus vide notam in fine huius capituli post §. LII.*

2) *Vomitum ab huiusmodi causa esse genitum, et subsequuta gangraena etiam mortem, patet ex historia, quam refert BARONIUS in actis acad. Parisin. ann. 1748. Vid. etiam Comm. Lips. vol. II. P. I. p. 31. Ex sch. auct.*

3) *Post vomitum contumacissimum ingestorum aequae ac materiae nigrae foetidacque cum alvo adstricta Cl. LIEUTAUDIUS in cadavere vetulae lobum minorem hepatis excavatum invenit, in quo haerens putrida sanies ventriculum arroserat, viamque in eum sibi fecerat. Hist. anat. med. I. T. I. p. 35. Ex sch. auct.*

Observatio auctoris de vomitu diuturno et lethali.

De vomitu diuturno et lethali legi meretur observatio ab auctore descripta et inserta n. XXXI. voluminis I. collectionis, quae inscribitur — Observationes medicae, quae anatomia superstructae sunt — et quam Lucae edidit Cl. BENVENUTUS ann. 1764.

4) *Collect. soc. med. Havniens. vol. I. p. 176.*

§. XLVI.

Utriusque differentiae. Idiopathici et sympathici, primarii et symptomatistici etc. Aliae differentiae a materiae qualitate.

Hinc *nauseae* et *vomitūs* multiplices differentiae. Ma-
lum enim vel *idiopathicum* est, vel *sympathicum*, *prima-*
rium, vel *secundarium* et *symptomaticum*, item *periodicum*,
frequens, *habituale*, *salutare*, *criticum*, *noxium* et sic porro.
Pro varia quoque materiae reiectae ratione vomitus distin-
guitur in *pituitosum*, *biliosum*, *aeruginosum*, *atrabilarem*,
nigrum, *verminosum*, *stercoreum*, *cruentum* etc. Rarum
autem non est, sanguinem etiam in ventriculi cavum effundi,
et vomitu sursum efferri; idque fieri aliquo ex modis, qui-
bus aliae haemorrhagiae (*Vol. III. c. XII. et Vol. IV. p. I.*

Sanguinei

c. II. et alibi) eveniunt. At frequentior causa est lien ob-^{frequentior}structus. Vasa enim brevia sanguine restitante oppleta de-^{causa.}hiscunt, et contentum liquorem in ventriculum evomunt.

CHOLERA.

§. XLVII.

Quod si *vomit* creber incidat, et eodem tempore, *Definitio*
quo sursum fit evacuatio, haec ipsa deorsum etiam contin-^{cholerae.}gat, sic ut ore et ano multa et liquida una ac violenter expellantur, *Χολέρα* id morbi dicitur. Periculo plenus sane morbus est, et intra paucos dies, imo horas saepe enecat. Oritur autem a causa vomitus ad intestina quoque et reli-^{Causa pro-}qua abdominis viscera propagata, sive a spastica et inordi-^{xima.}nata ventriculi atque intestinorum agitatione, qua quidquid in iis continetur, aut confluit, aut allicitur, violenter expellitur. Causae eius remotae frequentiores sunt fructuum ho-^{Causae re-}racorum nimia ingurgitatio, liquores et cibi fermentescen-^{motae.}tes, bilis acerrima, purgantia acria, emetica, ac demum acre peculiare intus genitum, aut extrinsecus immissum. Aestate frequentissime corripere consuevit. Distinguitur a plerisque *Differentiae*
in *humidam* et *siccam*. *Sicca* autem est, quando copio-^{cholerae.}sus aer tantum ano et ore violenter expellitur, nullus vero *Sicca et hu-*
aut parcissimus humor, secus atque in *humida* contingit. *Vera et*
viditur etiam in *spuriam* et *veram*. In illa alimenta et po-^{spuria.}tulenta corrupta, in hac bilis aut putridi alii humores eii ciuntur. Febris eam comitatur, si quando gravior est, licet sine febris a plerisque observata describatur.

SINGULTUS.

§. XLVIII.

Vomitui saepe praecit aut succedit *singultus*. Modo ta-^{Modo solita-}men solitarius est, modo aliis quoque morbis supervenit. ^{rius, modo}
Definiri autem singultus potest subita et successive recur-^{non.}
Definitio
singultus.

Causa proxima.

rens velocissimae inspirationis interceptio, qua aër ita vehementer e pectore expellitur, ut ad glottidem et fauces allidens sonitum momentaneum ac peculiarem reddat. Praecipua et proxima eius causa videtur esse spastica, molesta et vehemens diaphragmatis contractio, quae tanta fit, ut momento temporis imae thoracis partes introrsum cum cruciatu adducantur, pulmonesque valide comprimantur. Plerumque simul muscoli quoque abdominales convelluntur, unde thorace magis magisque constricto, vehementior aëris e pulmonibus resilitio contingit. Stomachus item in hoc affectu, oesophagus et glottis ipsa uno ferme eodemque tempore affici videntur. Imo in ventriculo ipso initium morbi plerumque est, atque ab eo ad alias deinde partes protenditur.

Initium morbi plerumque in ventriculo.

§. XLIX.

Remotae causae.

Quidquid igitur oesophagum, ventriculum, laryngem, diaphragma tam proxime, quam remote distrahere aut irritare acriter potest, *singultum* quoque poterit excitare. Huiusmodi sunt boli grandiores difficilius oesophagum transeuntes, copiosior potio uno ac subito haustu ingesta, nimia ventriculi repletio ac distentio, acris alimenti, medicamenti, veneni aut humoris cuiusvis in ventriculum illapsi natura, tussis ferina, pus, aqua, ichor in thoracis cavea collecta, nervosque phrenicos aut diaphragma irritantia, convulsivae quaecunque affectiones abdominalium viscerum, praesertim intestinorum, vesicae urinae, hepatis, ac demum ipsius diaphragmatis inflammatio, vulnus, distractio, rosio et huiusmodi¹⁾.

1) De singultu *symptomate morborum exanthematicorum* saepe auctor loquitur *Vol. II. et speciatim §. CCCXLIV.*; de curatione autem eius §. CCCLXVI. et alibi.

Diagnosis et Prognosis.

§. L.

Signa certius instantis.

Horum omnium affectuum (§§. XLIV. XLVII. XLVIII.) *diagnosis* per se facilis est. Neque multum difficultatis ha-

bet *prognosis*. Instante *vomitu* saliva uberius fertur, labrum inferius contremiscit, hypochondria tenduntur, et *nausea* cum stomachi subversione fit. Ceterum sive *nausea*, sive *vomitus*, cum a levioribus causis originem ducunt, periculo vacant, et vicissim. Consuetus, criticus, superflui, incocti corruptive alimenti aut humoris, per intervalla rediens, plerumque salutaris. Utilis quoque, si assumpta venena reiicit, si alvo fluenti accedit, si neque quantitate, neque qualitate aut adiunctis symptomatibus terreat. Malus ac deterior est, si sincerus, si prasinus, si aeruginosus, si cruentus, imprimis exanthematicis morbis ¹⁾ superveniens, si lividus, si saniosus, si foetidus, si stercoreus, si niger fuerit. Pessimus variis diversisque coloribus distinctus, aut cum distentio nervorum, singultus, virium languor, labor anxietasve eum consequatur; item qui morbis capitis, herniis incarceratis, ileo, inflammationibus supervenit. A graviditate aut suppressione mensium, etsi cruentus ²⁾ sit, non magnum periculum affert; neque semper noxius qui a lienis infarctu, nisi eo sanguis grumosus, crassus, acer, atrabilis erumpat.

Quando vacet periculo, quando non. Quinam salutaris.

Qui noxius.

Qui pessimus.

Quid in gravidis.

1) Vid. *Vol. II. De morbis exanthematicis febrilibus*, ubi saepe de *nausea* et *vomitu* eorundem symptomatis mentio occurrit.

2) *Exemplum vomitus sanguinis et carnis, utpote rarum, et felicitis curationis, ex sched. auct. huc transferendum putamus.* „De *nausea* praecedente et appetitu prostrato diu conquesta quaedam mulier leniter purgatur. Sed postea vomitu corripitur, quo sanguis multus cum duobus carnis frustis eiectus est. Frustum unum lucii hepatis, alterum pulmonis referebat substantiam, et valde magnum erat. Tum corroborantibus valetudini pristinae restituta. Vid. *Miscell. N. C. Ann. VI. observ. XXX. p. 63.*

Observatio.

§. LI.

Cholera vero *spuria* aut *sicca* periculi expers est. *Cholerae Humida* autem ac *vera* saepe lethalis, atque acutissimus morbus. Solvitur interdum sudore critico, aut urina cum ardore reddita. Non raro inflammationem, gangraenam, syncopen aut lenteriam febresque lentas inducit. Singul-

prognosis.

Singultus prognostica. *tus* pariter pueris, hypochondriacis, hystericis familiaris non ita timendus est, ac qui acutis morbis et malignis febribus, ileo, herniis incarceratis, evacuationibus nimis, hepatitidi praesertim, ischuriae vesicali, vulneribus ventriculi aut diaphragmatis supervenit. *Singultum* sternutamentum obortum sedat.

C u r a t i o .

§. LII.

Materialis causae tollendae. Curatio absolvitur iis, quae causas tollunt. *Nausea, vomitus, cholera, singultus* compescitur, si eius causa materialis ventriculo, aut oesophago, aut duodeno insideat, vomitum blande adjuvantibus, diluentibus, demulcentibus, oleosis, clysmatibus, ac demum corroborantibus et anodynis opium habentibus ¹). Huc quoque spectat vinum meracum calide sorbillatum, sal absinthii succo mali medici mixtus, et quaevis alia ventriculo iucunda atque amica; extrinsecus etiam cum theriaca admota. Si ab aliis causis sint, his pro re nata occurrendum est, aut saltem aptis remediis mitiganda symptomata sunt. COMPARETTUS vomitum a tumore pylori ortum curatum narrat sublimati corrosivi usu in nosocomio Patavino anno 1771 ²). *Vomitum sanguineum* nullis remediis cedentem in iuvene brumali tempore per frigidissimas potiones curavit MICHELOTTUS ³). Moschi, camphorae ac opii vires in *singultu* a malignis perniciosisque halitibus diaphragma et ventriculum afficientibus, itemque cantharidum admotarum virtus adeo iam innotuere, ut his immorandum non sit. Ubi vero conquieverit malum, curare oportet exquisitissimo victus regimine, ne iterum, quod frequentissime evenit, recrudescat.

Curatio singultus.

Ad prophylaxin.

1) Vide cap. seq. §. LXX. in nota 5) quae de *antiemetic* virtute radicis columbi referantur, aliaque vomitum sedantia proposita §. CXI.

2) *Occursus medic.* p. 343. A sublimati tamen corrosivi usu non pauca damna ventriculo inferri, et saepe lentos chro-

Cautio circa usum subli-

nicosque morbos sequi contendit PIERACIUS (*Mém. de l'académie de chirurg. T. IV. edit. in 4. p. 153.*); etiamsi quaedam interdum mala deviata videantur. Nec aliter sentire videtur F. C. MEDICUS. Vid. *suppl. 2. ad decad. II. comm. Lipsiens. pag. 225. Ex sch. auct.*

3) *Comm. instit. scient. Bonon. in opusc. Videatur dis- V. S. in disertatio de ratione venaesectionis in vomitu cruento laborantibus*, quae prostat in *Adversar. med. pract. Cl. LUDWIGII P. I. p. 165.*

N O T A.

Coronidis loco nonnulla ad vomitum eiusque effectus per- Hernia vent-
continentia ex sched. auctoris addere liceat. „FABRICIUS Hil- tricoli ab
DANUS commemorat *herniam* ventriculi subsecutam post eme- emetica, eius-
tici assumti enormes conatus. GARENGEOTUS etiam *tom. III. que signa.*
academ. chirurgicae Paris. duas historias recenset huiusmodi
herniae, quas in dubium fortasse iniuria vocavit GUNZIUS in suo
de herniis tractatu Lipsiae edito ann. 1744, dum ipse tamen
proprias refert huius herniae historias. Signa sunt tumor mol-
lis in regione epigastrica, plus minus magnus, qui cedit et eva-
nescit positu supino, vomitus comitans et digestionis vitia, an-
xietas, suffocationes, distractiones, dolores, alvi tarditas. Prae-
cedunt ictus violenti. Reposita et vi contenta hernia cessant
symptomata.“ Videatur etiam PIPELETUS iunior *Mém. de l'aca-*
dém. de chirurg. c. XI. p. 294.

CAPUT V.

DE ALVI FLUXIBUS, SIVE ALVI PRO- FLUVIIS.

§. LIII.

Alvum fluere dicimus, cum saepius excrementa ano *Definitio.*
egeruntur, et liquida sunt, ac aliam, quam quae naturae
faecum convenit, formam et speciem referunt. Praecipua *Fluxuum*
vero *alvi fluentis* genera a clinicis commemorata redigun- *differentiae.*
tur ad *lienteriam*, ad *coeliacam passionem*; ad *diarrhoeam*
et *dysenteriam*, ac demum ad *cruentos alvi fluxus*, nimi-
rum *haemorrhagias*, *fluxum hepaticum* et *nigrum* HIPPO-
CRATIS. De his itaque singulis brevissime dicere oportet.

LIENTERIA.

§. LIV.

Quid lenteria.

Cum epulae potionesque neque coctae, neque corruptae, sed crude et quales fuerunt assumtae, vix ac ne vix quidem mutatae, celeriter et sine dolore, et citra sanguinis aut bilis mixtionem ano deiciuntur (sive liquidae, sive solidae fuerint), *λειεντερία* Graeci, nostri *laevitatem intestinorum* appellant.

Causa proxima quorundam.

Plerisque causa eius fluxus proxima videtur virium digerentium languor et fibrarum pylori nimia laxitas, unde sola respirationis vis inconcocta ex ventriculo alimenta depellit. Sed visa interdum est ampliata pylori

Quaenam auctoris.

capacitas sine *lienteria*¹). Nos ergo *auctam ventriculi et intestinorum irritabilitatem in lenteria* arbitramur, quae ingesta citius expellantur deicianturque, quam necesse est ad eorum coctionem. Idque comprobatur ab iis, quae *lienteriam* praecedunt, nam saepe *cynorexia* eam anteit aut comitatur, tum a medendi ratione, qua cessare solet, nam saepe remediis irritabilitati nimiae adversis curatur. Haud tamen negamus, interdum cum aucta intestinorum irritabilitate²) ventriculi languorem succorumque digerentium inertiam coniungi.

Haec quandoque cum illa compliatur.

1) MORGAGNIUS *Epist. anat. med.* XXXI. n. 7.

2) Intestinorum irritabilitatem nimiam quandoque accusat SWIETENIUS §. 719. *V. pro causa vires etc.*

COELIACA PASSIO.

§. LV.

Quaenam coeliaca passio.

A lenteria parum distat *coeliaca passio* sive *affectio*, sive *coeliacus fluxus*, quem vocant. In hoc alvi excrementa ex concoctis quidem, sed liquidis et chylo intersperso albicantibus constant. Non itaque culpa in ventriculi actionem

Causa proxima. Remotae.

laesam aut deficientem reiicienda est; sed vera eius causa haberi potest impedita chyli in vasa lactea propulsio, aut ab-

absorptio vel bilis et succi pancreatici defectu, quod chylum non satis attenuarint, vel intestinorum vitio, quod infirmiora et languidiora sint, vel vasorum lacteorum, quod vim absorbendi amiserint, vel cicatrice clausa, obstructa aut compressa chylo iter denegent. Quae omnia quum variis ex causis fieri possint, cuilibet vel leviter physiologia imbuto facile innotescunt.

DIARRHOEA.

§. LVI.

Ut in superioribus alvi fluxibus ratio potius habenda est indolis materiae excretæ, sic in sequenti eius copia magis attenditur. Quaecunque crebra, liquida et copiosa alvi deiectio, sive fuerit ex putridis liquatisque excrementis, sive cum his bilis, mucus, pinguedo, serum, aut omnes hi liquores confundantur, *Διάρρῳια* dicitur. Plerumque nullus in ea dolor est; interdum tamen aliquis quoque circa intestina percipitur. Prout vero peculiaris humor prae ceteris excernitur, vocatur vel *biliosa*, vel *mucosa*, vel *pinguedinosa*, vel *serosa*, vel *aquea* et *colliquativa*. Distinguitur etiam in *criticam* et *symptomaticam* ¹).

Quinam alvi fluxus diarrhoea.

Quotuplex.

1) De hac veluti symptomate febrium, exanthematum aliorumque morborum tum capitis, tum pectoris pluries N. A. diu multumque in superioribus disputavit. Quare consulendu quæ Vol. I. II. III. et P. I. Vol. IV. ubiq. ab eo tradita sunt.

§. LVII.

Hanc proxime efficit uberior ad intestina humorum appulsus auctusque intestinorum peristalticus motus, sic ut ab absorbentibus vasis aequa mensura recipi non possint. Remotam causam suppeditant potus uberior tam calidus, quam frigidus, qui neque ad renes, neque ad cutis spiracula cito traducatur, acritates cum cibo, potione, aëre, medicamentis immissæ, aut mora, dyspepsia et putrefactione intus progenitæ, accumulata ac vitiosa natura humoris ga-

Causa eius proxima.

Remotæ causæ.

strici ¹⁾), enterici, pancreatici, biliaris, aquearum quarumcunque excretionum et insensibilis perspirationis suppressio, metastases ad interiora acrium vitiatarumque materierum, dyscrasia sanguinis universi, aut eius inaequalis distributio ac ad interiora ob fibrarum intestinalium laxitatem confluxus, ataxia nervorum, animique pathemata, imprimis ira, difficilis dentium eruptio, vermes, abusus fructuum et rerum fermentantium, vina non defaecata, aquae corruptae ²⁾), nimius calor, febres acutae, et alia huius census.

1) Interdum in ipso ventriculo inventa est diarrhoeae causa. Vid. MORGAGNIUM *Epist. anat. med.* XXXI. n. 9. 10.

2) PRINGLIUS id testatur; itemque affirmat HEBENSTREIT *Anthropologia forens. sect. I. c. 2. §. 12.*

D Y S E N T E R I A.

§. LVIII.

Quinam fluxus vere dysenteria vocetur.

Cum vero liquidis alvi deiectionibus accedunt intestinorum torsiones et crebri ventris dolores, frequens deiciendi cupiditas, excrementa vero foetida admodum sint, et saepe exigua quantitate et mucosae adipi simili aut sanguine intermixta ¹⁾), imo interdum filamentis, carunculis et membranulis scateant, tum fluxus huiusmodi *Δυσεντερία* dicitur, quo nomine *difficultas intestinorum* designatur. Hoc malum *tormina* vocavit A. C. CELSUS. Hinc patet, *diarrhoeam* et *dysenteriam* solo tantum differre gradu, cum in

Differentia eius a diarrhoea.

Causa proximamque symptomata.

hac symptomata graviora omnino sint, et causa proxima, quam *acre* quidpiam efficit, *sensibilitatem* magis afficiat, valentius irritet, tenaciusque intestinis adhaereat, ea pungat, vellicet, rodat, ad egerendum sollicitet, inflammet, dolores, spasmos ac deiectiones excitet, mucum everrat, sanguinem ex dilatatis aut laceratis vasorum extremis exprimat, imo villosa ex tunica quaedam filamenta ac membranacea frustula discerpat, cumque faecibus deturbet. Si *tenuia* tantum *intestina* afficiantur, dolor est acutissimus, isque maxime circa umbilicum exeruciat, alvus non statim post do-

Quando tenuia intestina afficiantur.

loris cruciatus deicitur, cruorque magis cum excrementis *Quando crassa.*
 admiscetur. Si vero *crassa*, obtusior est dolor, non ita
 assiduus, ab umbilico magis distat, statimque post eum de-
 iectiones sequi solent, et cruor ac purulenta materia leviter
 excrementis adhaerent, aut tantummodo innatant. Verum *Quando*
 saepe contingit, ut afficiantur utraque intestina; tuncque *utraque si- mul.*
 una simul haec phaenomena observantur.

1) *Sanguis* si desit, adsint vero reliqua signa, *dysenteria*
 tamen est, ut SYDENHAMUS *sectione IV. c. 3.* pariter animad-
 vertit.

§. LIX.

Remotiores eius causae sunt eadem fere, ac *diarrhoeae* *Remotae*
 (§. LVI.). Inter has vero recensendum est *aestivum tem-* *causae.*
pus post hiemem siccam et aquilonarem, ver autem pluvio-
sum et austrinum ¹). *Ver siccum et aquilonare post hie-*
mem austrinam et pluviosam et tranquillam ²), diuturnae
 siccitates, aestus nimii, calidiores regiones, aër humidus et
 palustris, subitum insolitumque frigus, temperamentum cho-
 lericum aut atrabilare, *aetas virilis* ³).

1) HIPPOCRATES *Aphor. III. n. 11.*

2) *Id Aphor. eod. n. 12.*

3) *Id. ibid. n. 30.*

§. LX.

Dysenteria porro modo *sporadica* est, modo *epide-* *Differentiae*
mica, modo *acuta*, modo *chronica*, modo *benigna*, ma- *dysenteriae.*
ligna, *contagiosa*, *castrensis*, interdum cum *tenesmo* con-
 iungitur, interdum in eum desinit, interdum eo caret.

Est autem *Τενεσμός* illa intestini recti molesta et dolorifica *Quid sit te-*
 irritatio, quae inane plerumque et crebrum deiciendi desi- *nesmus eius-*
 derium procreat. Videtur autem oriri a *ninia intestini* *que causa.*
recti sensibilitate, quam mucii absentia et interioris tuni-
 cae nuditas efficit, unde ad quodvis stimuli genus violenter
 contrahitur, ac quasi in globum contorquetur, qui fallacem
 corporis exitum molientis sensum mentitur. *Tenesmus* vero *Quando sine*
 etiam sine dysenteria esse potest. *Rectum enim intestinum* *dysenteria*
tenesmus.

ab acri muco, a spasmō, ab ascaridibus, ab inflammatione, ab haemorrhoidibus distentis, a calculis vesicae, a faecibus induratis ac haerentibus, aliisque causis irritatum in hunc morbum incidit. Tunc vero mucus tantum cruore conspersus delicitur, anusque saepe prolabitur, ac alvina excrementa, ubi redduntur, naturalem servant figuram, colorem et naturam.

FLUXUS CRUENTUS.

§. LXI.

Qui fluxus cruentus, et unde oriatur.

Cruentus quoque alvi fluxus non raro a clinicis memoratur, qui tum adesse solet, cum cruor purus, ut in haemorrhagiis, aut dilutus, aut nigricans, aut ater, aut splendens ex alvo deiectionibus fertur. Ex disruptis enim, dilatatis, aut erosione ventriculi, intestinorum, hepatis aut pancreatis¹) vasis saepe magna copia sanguis funditur, ut

Quando dicitur fluxus mesentericus LIEUTAUDII, sive haemorrhagia intestinalis.

*cruentus alvi fluxus oriatur. Si sincerus, rutilus et magna copia feratur sine signis haemorrhoidum fluentium, a LIEUTAUDIO fluxus mesentericus, rectius vero haemorrhagia intestinalis vocatur. Si fuerit sanguis dilutior et aquae, in qua caro lota sit, similis, fluxus hepaticus a veteribus, a nostris vero dysenteria hepatica GORDONII, aut BALLO-
NII, aut hepatirrhoea vera SAUVAGESII dici consuevit. Ab hepatis vasis per choledochum ductum in intestina traduci creditur, hepate atonia ac laxitate, aliove vitio, uti ulcere, abscessu, laborante. Verum fluxum hepaticum, observantibus LIEUTAUDIO et LUDWIGIO, negare non ausim. Sed similis quoque, et quidem sine dolore, ex intestinis et pancreate interdum fluere visus est, ut testantur plerique nuperiorum medicorum RIVERIUS, ETTMÜLLERUS, LIEUTAUDIUS, LUDWIGIUS, SAUVAGESIUS. Hunc fluxum vocavit TRALLIANUS coeliacum affectum²). Coeliacus ventriculi morbus CELSI habet ventrem durum, doloremque, alvum adstrictam, difficilem spiritum, crepitus emissionem impedi-*

Quando fluxus hepaticus.

tam³). Tandem si nigrae, foetidae, acres deiectiones sint, *Fluxus spleneticus* GORDONII, *vel* *fluxus niger ac atrabilaris*, *dysenteria splenetica* BALLONII. *vel morbus niger* HIPPOCRATIS et HOFFMANNI habentur, *vel fluxus spleneticus* GORDONII, *dysenteria splenetica* BALLONII. Ex sanguine enim congesto, stagnante, corrupto, nigro, acri e vasis ventriculi aut intestinorum ulcusculis cancrrosis affectorum modo ruptis, modo erosio fieri consuevit. Atque haec *cruenta profluvia* scorbuticis, evacuationes consuetas non habentibus, febribus mali moris tam continuis, quam intermittentibus laborantibus, melancholicis, lienosis, obstructis, ictericis imprimis superveniunt.

1) BOERHAAVIUS id fieri autumat, quando *pancreate scirrhus* existente catharticum propinetur. Tunc eius vi aucta circulatione *vasa* circa *scirrhum* sita urgentur, et tandem disrumpuntur. *De virib. medicamentor. pag. 205.*

2) *Lib. VIII.*

3) *Lib. IV. cap. XII.*

P r o g n o s i s.

§. LXII.

In *lienteria* et *coeliaca passione* aegri fructum alimenti LIENTERIAE et COELIACAE PASSIONIS non sentiunt, ac in malum corporis habitum, atrophiam, tabem, hydropem incidunt. Ardor hypochondriis inest, et *prognostica fausta et infau-* sitis ingens urget, ac interdum cibi fastidium. Interdum *fausta.* morbus trahitur, interdum aegros praecipitat. In tenera aetate facilius depellitur, utique si urina copiosius fluxerit, et corpus ali incipiat. Difficillime in provectionioribus hominibus, praesertim si *dysenteriae* diuturnae successerit, si os exulceratur, si facies rubet, si venter gracilescit et rugosus fit, si senes diu fatigat. In *diuturnis intestinorum laevitatibus ructus superveniens, qui prius non fuerit, signum bonum*¹).

1) HIPPOCRATES *Aphorism. VI. n. 1.*

§. LXIII.

In omni autem *alvi fluxu* illud HIPPOCRATIS memoria tenendum est, quod sic habet: In *perturbationibus alvi* *Signa bona cuiusvis alvi profluvii ex*

HIPPOCRATE et vomitibus spontaneis, si qualia oportet purgentur, con-
et G. CELSO. fert, et facile ferunt; sin minus, contra ¹⁾). Item appo-
site scribit CORN. CELSUS ²⁾): Uno die fluere alvum,
saepe bonum, et etiam pluribus, dum febris absit, et in-
tra septem dies quiescat; purgatur enim corpus, et quod
laesurum erat, utiliter effunditur. Verum spatium pe-
riculosum est: interdum enim tormina et febrem exci-
tat, viresque consumit. Huc spectant alia, quae apud
HIPPOCRATEM leguntur. A longo alvi profluvio detento
spontaneus vomitus superveniens morbum solvit ³⁾). Oph-
thalmia laborantes alvi profluvio corripit, bonum ⁴⁾). Si
leucophlegmatiae vehemens diarrhoea supervenerit, malum
solvit ⁵⁾). Quibus in febre aures obsurduerint, his sanguis
e naribus effluens, aut alvus exturbata morbum solvit ⁶⁾).
Alvi fluxus interdum solvit praecordiorum, aut crurum et
inferiorum partium dolorem derepente absque febre na-
tum ⁷⁾). In alvi profluvii mutationes excrementorum iu-
vant, nisi in prava mutantur ⁸⁾). Qui alvi profluvio diu-
tius cum tussi detinentur, non liberantur, nisi dolores ve-
hementes ad pedes contigerint ⁹⁾).

1) Aphor. II. sect. I.

2) Lib. II. cap. X.

3) Aphor. sect. VI. n. 15.

4) Coac. 224. de iudic. 83.

5) Aph. sect. VII. n. 29. et Coac. 457. 482.

6) Aph. VI. n. 60. Coac. 210.

7) Coacar. 294.

8) Aphor. II. n. 14.

9) De iudicat. n. 17.

§. LXIV.

Item infau-
sta praesa-
gia ex HIP-
POCRATE.
Quae sequuntur, deterioris notae indicia sunt. Ex
morbo diuturno alvi fluxus, malum ¹⁾). Mulieri utero ge-
renti si alvus multum fluit, periculum est ne abortiat ²⁾).
Quod tamen perpetuum non est; interdum enim usque ad
partum innoxie alvi fluxus perfertur, ac sponte a partu de-
sinit. Hinc, nequidquam proficiente medico, naturae res

est committenda ³). *Praerubrum in alvi proluvie excrementum, vitiosum; vitiosum etiam admodum ex viridi pallescens, aut albicans, aut spumans, aut aquosum. Item malum est, quod exiguum, glutinosum, leve et ex viridi subpallidum. Pessima quoque deiectione liquida in sopore et torpore detentis ⁴). Alvus in febre ardente affatim prorumpens mortis periculum affert ⁵) Quibus tabe laborantibus capilli de capite defluunt, hi alvi fluxu superveniente moriuntur ⁶). A tabe detento alvi profluvium superveniens, lethale ⁷). In iis, qui longo tempore consumti sunt, temerariae et quae praeter naturam fiunt alvi exsolutiones una cum vocis defectione tremula, perniciem denunciant ⁸).*

1) *Aphor. V. sect. VIII.*

2) *Aphor. XXXIV. sect. V.*

3) SCARDONA (De morb. mulier. cap. IX. §. V.) optime, ait, ab HIPPOCRATE adnotatum est, mulierem gravidam dysenteria laborantem, si convalitura est ab aegritudine vel ipso partus die, vel paulo post levare oportere. Eadem sunt SCHENCKII et MAURICEAU observationes. *Ex sched. auct.*

4) *Coacar. 611.*

5) *Coacar. 129.*

6) *Aphor. XII. sect. V.*

7) *Aphor. XIV. sect. V.*

8) *Coacar. 634. et 258.*

§. LXV.

Dysenteria quoque non levis est morbus, imprimis Prognostica maligna, quae cum febre esse solet, et epidemica. In hac DYSSENTERIAE. saepe inflammatio aut gangraena supervenit. Interdum etiam Malignae et dysenteria in ulcera intestinorum desinit. A deiectione sine epidemicae. cera dysenteria, malum ¹). Intestinorum difficultate laborantibus vomitio biliosa, circa initia malum est ²). Dysenteriae, quae incipiunt cum nausea, deinde superveniat Alia infausta praesagia ex HIPPOCRATE aliisque. vomitus, paene omnes lethales sunt, ut observat BAGLIVIVS, si nempe adsit in intestinis inflammatio ³) Tormina omnia Chronicac. mala sunt, si cum febre invadunt, aut variis alvi recementis, aut iecoris inflammatione, aut praecordiorum, aut

ventris; aut quaecunque doloribus cruciant, aut cibos cohibent, sitimque inferunt ⁴). *In longis dysenteriis cibi fastidia mala, tum alias, tum si insuper febrierint* ⁵).

Ab atra bile. Dysenteria si ab atra bile inceperit, lethale ⁶). Summo-
pere enim caustica est atra bilis, et cito gangraenam accer-
sit. *Si dysenteria detento velut carunculae secesserint, le-*

Ab infarcto liene. *thale* ⁷). *Quicunque lienosi a dysenteria corripuntur longa,*
eaque in hydropem aut lienteriam convertitur, moriun-
tur ⁸). *Celerrime is perit, quem maxima pars malorum*

In pueris. *symptomatum occupat* ⁹). *Is morbus praecipue pueros a*
quinto anno perimit, et, qui eum superant, ad decimum

A metastasi. *usque; ceterae aetates tutiores sunt* ¹⁰). Peior est, quae
a metastasi, quam quae ab ingestis oritur. Dolores subito
conquiescentes, nigris foetidisque ex alvo sponte prodeunti-
bus cum virium prostratione, pulsu parvo ac debili, aliis-
que pravis symptomatis, gangraena lethali *dysenteriam* ter-
minari significant. Plerumque mortis signum est, cum *te-*
nesmus tantus est, ut perpetuo hiet anus, unde clysteres
statim elabantur; aut ita constringatur, ut nihil possit im-

Tenesmus quando le-
thalis. *mitti.* *Singultus* diarrhoeae aut dysenteriae superveniens,
Quid singul- *aut maculae* in facie erumpentes, aut *pustula nigra* post
tus, maculae *in facie et* *aurem* lethalia sunt. *Pustula* autem *nigra* erumpens post
pustulae ni- *aurem sinistram* iuxta nonnullos mortem *vigesimo* die fu-
grae post au- *turam* praedicat. RIVERIUS etiam addit, manuum oedemata
res. *esse* lethalia.

1) HIPPOCR. *Aph.* 23. *sect.* VII.

2) *Coac.* 463.

3) *In appendic. ad dysenteriam.*

4) HIPPOCR. *Praed.* II. n. 118.

5) *Id. epidem.* VI. VIII. n. 1.

6) *Aphor.* 24. *sect.* IV.

7) *Aphor.* 26. *sect.* IV.

8) *Aphor.* 43. *sect.* VI. *Coac.* 466.

9) *Id. Praed.* II. 118.

10) *Id. ibid.* n. 119.

§. LXVI.

Bene ominantur excrementa solidiuscula liquidis intermixta, et flatus seiunctim emissi. *Si flatus exire incipiant, brevi sanitatem promittunt* ¹⁾. *Raro critica et benigna est. Attamen ab insania dysenteria, bonum* ²⁾. *Lienosis dysenteria superveniens, bonum* ³⁾. *Item quae non longa* ⁴⁾. Generatim dysenterico plurimum inest spei, cui pravorum symptomatum paucissima adsunt ⁵⁾.

1) BAGLIVIVS *Prax. med. lib. II. cap. 3.*

2) HIPPOCR. *Aphor. V. sect. 7.*

3) *Id Aphor. 48. sect. VI.*

4) *Coac. 466.*

5) *Id. Praed. II. 118.*

§. LXVII.

Cruentae alvi deiectiones sincerac aliarum haemorrhagiarum pericula et vices subeunt; ideoque in memoriam revocentur ea, quae alibi innuimus. *Fluxus hepaticus* in hydropem plerumque terminatur. *Niger* modo cita virium exsolutione, modo lenta tabe vitam adimit. *Morbis quibuscunque si bilis atra vel sursum, vel deorsum prodierit, lethale* ¹⁾. *Quibuscunque ex morbis acutis, aut diuturnis, aut ex vulneribus, aut aliter quocunque modo extenuatis bilis atra, vel qualis sanguis niger subtilis prodierit; postridie moriuntur* ²⁾. Nihilo tamen minus exstant observationes, quae docent, aegros interdum evadere.

Prognostica
CRUENTI,
HEPATICI et
NIGRI HIP-
POCR.

1) HIPPOCR. *Aphor. XXII. sect. IV.*

2) *Id. sect. ead. Aphor. XXIII.*

C u r a t i o.

§. LXVIII.

Curatio in his affectibus eo tendat, ut causa primum tollatur, deinde symptomata mitigentur. In *lienteria* initio lenia abstergentia, uti serum lactis, oleum olivarum, rha-

Curatio ge-
neralis.
LIENTERIAE
curatio.

barbari tinctura aquosa, decoctum tamarindorum, deinde leniter sedantia, ac adstringentia, et stomachica, uti the-riaca, diascordium *Fracastorii*, terra lemnia, catechu, sanguis draconis, anara, vinum mali punici, cydonia conveniunt. Haec vero imprimis, si atonia quoque morbum aut

*Cur pueri
huic magis
obnoxii.*

*Aptiora illis
remedia.*

*Curatio COE-
LIACAE pas-
sionis.*
*DIARRHOEAE
et DYSENTE-
RIAE.*

*V. S. quando
institueda.*

*Emetici
utendi ratio
in contuma-
ci diarrhoea.*

*Tragacantha
et opiata.*

*Ipecacuanhae
efficacia in
dysenteria
epidémica.*

Lienteria saepe laborant pueri, quia in-farctum et multa pituita tumens habent ventrem, quo introitus in vasa lactea inhibetur: hinc corpus extenuatur, et omnia ingesta per anum deiciuntur. Curantur autem eccoproticis, resolventibus, stomachicis. Myrrha, sal lixi-viosum, aloë (hic ex vino) aliquoties in die parva dosi data brevi sanitatem restituunt ¹). Nec dissimili ratione agen-dum est in *coeliaca affectione*, dummodo aperientia simul et diuretica in usum vocentur. In *diarrhoea*, et multo magis in *dysenteria* inter initia, viribus adhuc integris, tem-peramento ac aetate florente, si febris aut dolores urgeant, venam etiam iterato secare oportet. Depletis vasis, ac in-flammationis nullo indicio praesente, nec ullo alio morbo repugnante, si materia turgeat, emetico exturbanda est. Nec desunt exempla curationum per emetica praestitarum, ubi nulla signa docerent, aliquid circa primas vias haerere, quod stimulo suo fluxum alvi faceret. Contumaces huius-modi *diarrhoeas* curavit SWIETENIUS ²) dato singulis die-bus per biduum mane vomitorio, deinde etiam alternis die-bus per tres vel quatuor vices iterato, donec felici eventu sisterentur, quod adstringentia nequaquam efficere potue-runt. Vesperi tamen emetici operationem subsequente opia-tum remedium dabat. Item SYDENHAMIUS ³) et PRINGLIUS. Datur quoque epicratice a grani dimidio ad grana duo gummi tragacantha confectione hyacinthina, aut diascordio excepta ⁴). Excellit imprimis *ipecacuanha*. *Dysenterias* anno 1731, Edimburgi grassantes, quae *diarrhoeas biliosas* subsecutae sunt, curatas fuisse narrant repetita eius dosi, narcoticis, rhabarbaroque cum mercurio dulci, qui vomitum interdum ciebat. Adstringentia vero noxia erant, nisi satis prius pur-gantia ⁵) adhibita fuissent ⁶). In illa tamen, quae Lon-

dini epidemica fuit anno 1762, GEORGIUS BACKERUS con- *Eius inuti-*
tendit, inutile prorsus rentedium ipecacuanham fuisse, nec *litas in aliis*
multum opio et rhabbaro, nisi in fine morbi, tributum, *epidemiis.*
ceteris emeticis praeferens tartarum stibiatum ⁷). In Gal *Tartar. sti-*
liis vero anno 1745 autumnali tempore *dysenteria* pariter *biat.*
epidemica, quae neque ipecacuanhae, neque simaroubae, ne- *Vitrum ce-*
que aliis cedebat remediis, vitro antimonii cerato, referente *ratum anti-*
DÜ HAMELIO et ARNALDO ⁸), tuto et feliciter cessit. A *monii.*
PRINGLIO quoque summo opere laudatur; sed GEORGIUS
HEUERMANNUS ⁹) miratur, quomodo is tam saepe illud su-
serit; vitrum enim antimonii ceratum putat referendum esse
inter minus tuta remedia, quia cera semper per liquores
ventriculi eiusque calore liquata augeri *dysenterias* ipse vi-
derit. Contra commendat fabam pechurei (*pechurim*) bra- *Faba pechu-*
siliensis, tamquam antidysentericum, quo ex triginta aegris *rei brasilien-*
vicanos sanavit. De hoc remedio mentionem iam fecerat *sis.*
Cl. BAECKIUS ¹⁰). Praemissis vomitoriis et laxantibus de-
dit eius pulverem ad *scrupul.* ij. bis quotidie, et; si dolores
postulabant, nocte opiatum exhibebat. Post emetica princi- *Lenientia*
pem locum occupant lenientia, tamarindi, myrobalani, rha- *post emesin.*
barbarum, oleum, serum lactis, aqua tectucciana (quam cer-
tissimum remedium REDIUS et BAGLIVIVS ¹¹) habent),
etiam per epicrasin adhibita, interpositis, noctu imprimis,
paregoricis, de quibus modo dictum est. Lysimachia vul- *Lysimachia*
garis flore purpureo, sive salicaria purpureo, sive lythrum *vulgaris.*
Linnaei commendatur a TRELKELDIO ¹²) medico anglo tam
in decocto, quam in pulvere adversus *dysenteriam*. Sa-
licariae quoque praestantiam in *diarrhoeis* ac *dysenteriiis*, HAENII me-
ubi a laxitate malum oritur, variis experimentis cognovit *thodus in*
HAENIUS. Dato prius purgante, drachma una vel scru- *huius reme-*
puli jv. eius pulveris mane et sero dantur. Intra tres aut *dii usu.*
quatuor dies aegri curantur, dummodo sordium copia, nimia
putredo, intestinorum ulcus, aut alicuius visceris labes ab-
sint; paulo vero longiori tempore, si fit diuturnior. An-
nosa diarrhoea ad quaevis rebellis remedia trium hebdoma-
dum spatio sic curata est ¹³).

- 1) GORTER. *de fame* §. 42.
- 2) §. 722. *v. ex pulsu per emetica etc.*
- 3) *Sect. I. cap. 4.*
- 4) Vid. JURIEU *in notis* BREMOND. *ad transact. anglican.*
- 5) Cave tamen a radicis ialappae usu, qui lethalis interdum fuit in dysenteria laborantibus, aut reconvalescentibus, ut videre est in *collection. societ. med. Haeniens. Vol. I. p. 234. Ex sched. auct.*
- 6) *Essais de médec. d'Edimbourg. Vol. I. pag. 42.*
- 7) *De dysenteria et catarrho utrisq. epidemic. ann. 1762. Londini 1764.*

*Methodus
utendi vitri
cerati anti-
monii ex
ARNALDO.*

8) *Histoir. de l'acad. R. des scienc. ann. 1745.* En methodum ARNALDI, qua vitro cerato antimonii dysenterias curabat. Quinquaginta aegros eodem liberasse, nemine excepto, affirmat. Eos elysteribus et lenitivo antea praeparabat; postea sex vel octo grana eiusdem cum rosarum conserva alternis diebus propinabat, vespere autem anodynum exhibebat, terque, quaterque repetebat remedium. Denique curationem, superstitionibus doloribus, leni opiato finiebat. *Comment. Lipsiens. p. 273. et Giornal. medic. di Venezia ann. 1764. n. 50. p. 396.*

9) *Comment. de reb. in sc. N. et M. gest. Vol. XV. p. 303.*

10) *Ibid. Vol. X. p. 198. et XIV. p. 516.*

11) *Cap. de diarrhoea et dysenter.*

12) *Gazzett. d'oltremonti. n. VIII.*

13) *Rat. med. part. III. cap. V. p. 214. et P. IV. c. 7.* Vid. curationem *alvi fluxuum* ab auctore propositam centies in I. et II. *Vol.*, ex. caus. §. 295. *Vol. I.* et §§. 83. 144. 148. et alibi.

§. LXIX.

Quae enemata iniicienda.

Extrinsecus admovendu.

Vesicantia.

Crebra item enemata iniicere proficuum valde est, primum abstergentia, deinde anodyna et sedantia, tandem balsamica et roborantia. Talia sunt, quae ex sero lactis et aqua hordei cum melle rosaceo fiunt, ex decocto pedum vituli et omento vervecis, ex lacte vitello ovi indito, aut terebinthinae eodem vitello ovi solutae tantillo, aut addita theriaca, diascordio, philonio romano, aut decocto radicum consolidae, bistortae, tormentillae, aut ex aqua fabrorum similibusque. Extrinsecus ventri admovenda quae molliunt laxantque, et postremo quae ventriculum et intestina roborant ac firmant. Vesicantia etiam efficacissima ad *chronicam*

diarrhoeam, avvocato aliorum morbi fomite ¹), expertus saepissime est HAMILTONUS ²).

1) *Chronicas* plurimum annorum *diarrhoeas* ac *dysenterias* curatas legimus a suppuratione vulnerum, quae iis laborantibus fortuito inflicta sunt. Fortasse id evenit, quia virus morbosum, quod dysenteriam fovebat, extra corpus eduxerat suppuratio a vulnere inducta. Vid. *Journal. de mēdec. de Paris. Avril. 1756. T. IV. p. 369.* Ibi etiam narratur, quempiam post suppuratas colli glandulas a *diarrhoea habituali* fuisse sanatum. *Ex sched. auct.*

2) *De Febr. miliar. cap. VII.*

§. LXX.

Serosis putridisque deiectionibus remedio sunt, si simul concurrat atonia, adstringentia. Cortex simarubae ex America sub huius saeculi initium in Europam allatus ¹) inter haec recensetur, daturque vel in subtilissimum pulverem redactus, et aqua infusus ²), vel ex aqua decoctus ³). Cortex quoque connessi, poegerebae ⁴), cascarillae ⁵), peruvianus, radix tormentillae eundem usum obtinent. Radix *Iohann. Lopez* ⁶) simarubae praeferenda GAUBIO videtur ⁷). Hodie magno in pretio habetur radix *columbi* ⁸). Mespila immatura magna copia vorata a SWIETENIO celebrantur ⁹), sicut eius semina laudantur a VALERIOLA et FORESTO; FOTHERGILLIUS novum quoddam gummi adstringentis genus ex Africa delatum ¹⁰) describit, laudatque ut pharmacum optimae notae adversus annosas diarrhoeas, fluorem album, immodicos alvi fluxus, et generatim contra quascunque laxitates et acrimonias ¹¹). Eundem in finem commendantur lapidis haematites, tinctura rosarum rubrarum ¹²), coralliorum *Helvetii*, acidi spiritus, atque ex opio parata. Sic aqua calcis vivae iuxta methodum BURLETI ¹³) utilis habetur in *dysenteria*. Huius aquae libra una et semis cum tertia lactis parte singulis diebus epota annuam dysenteriam mitigavit, quam deinde librae tres quotidie per tres hebdomadas datae curarunt ¹⁴). Sed GEORGIUS HEUERMANNUS in quadam constitutione epidemica, quae Hassniae anno 1757 et Rendsburgi anno 1759 et Kellennsae 1761 milites affli-

De revellentibus observatio.

Curatio FLUXUS PUTRIDI cum ATONIA coniuncti.

Radix COLUMBO.

Novum gummi genus a FOTHERGILLIO laudatum.

Alia commendantur. Acidi spiritus.

Aqua calcis vivae iuxta BURLETI methodum.

Observatio HEUERMANNI.

Curatio DY-
SENTERIAE
ab ACIDITA-
TIBUS, STO-
MACHI.

Acida mine-
ralia.

Quae potui
danda.

xit, frustra eam lacti admixtam, frustraque etiam corticem mangostanae et pogerebae adlibuit ¹⁵). Si vero ab aciditate primarum viarum *dysenteria* oriatur, ut ab acerbis immaturisque fructibus, vino, lacte acidis, aliisque huiusmodi causis, tunc absorbentia in usum veniant. Hinc adeo commendat HAMILTONUS ¹⁶) pulveres margaritarum, matris perlae, oculos cancrorum, cornu cervi calcinatum, et terras bolares SWIETENIUS ¹⁷). Quod si acidum illud sit a nimia fermentatione dictorum vegetabilium ingestorum, acida mineralia danda sunt, quae nimiam cohibent fermentationis vim, et aërem evolutum fixum reddunt. Cum vero morbus putridae indolis sit, tum latius patet locus usui huiusmodi acidorum tam ad invertendam putridam colluviam, eamque evacuandam, quam ad vasa et intestina leniter vellicanda ac roboranda ¹⁸). Potui demum aqua nucerina imprimis convenit, aut fontana chalybeata; nec minus proderunt acidulae ferratae alias a nobis commemoratae. Item iura tenuiora succo citrei, aut limonii condita, gummi arabicum in aqua solutum ¹⁹), decoctum hordei tam crudi, quam leniter torrefacti, oryzae, milii vulgaris ²⁰), radicis althaeae, aut saleb, cui substitui potest radix orchidis morionis *Linnaei* ob *gelatinosas eius partes* ²¹), graminis et pimpinellae. Prodest pariter ex QUARINII fide ²²) infusum ex floribus papaveris rhoeados et sambuci siccis.

1) *Essais de médec. d'Edimb. T. I. p. 404. edit. Paris.* Vid. etiam BARBEYRAC. p. 101.

2) *Comm. littér. Norimb. p. 388 — 89. anni 1732 ex lib. inscripto — Voyag. du chev. des Marchais en Guinée etc.*

3) *Essais de méd. d'Edimb. l. c.* et BARBEYRAC. *l. c.*, praeter quos legendi sunt DEGNERUS (*de simaroub. dissertat.*), et ACTA *phys. med. N. C. Vol. V. in append.*, BREMOND. *adnotat. ad transact. Anglic. ann. 1732. p. 158. et seqq.* nec non LAMBSMAE opus eximium, cui titulus: *Ventris fluxus multiplex etc. Ex sched. auctor.*

4) *Comm. de reb. in sc. N. et M. gest. p. 143.* Ex America allatus hic cortex est ut specificum contra *fluxum hepaticum, diarrhoeam, ac dysenteriam. Ex sched. auctor.*

5) SCARDONA *lib. III. p. 39.*, qui optime tradit eum uniri alexipharmacis, uti bezoardicis, rad. tormentillae etc. *Ex sched. auct.*

6) Est radix arboris cuiusdam, quae aut Goae, aut Malacca indigena est, quaeque Indis contra alvi fluxus probatur. *Ex sched. auct.*

7) *Adversar. med. p. 78.*

8) Usque ab anno 1686 Cl. REDIVS ad KIRCHERUM scri- *Nota de ra-*
bens hanc radicem colombo inter alexipharmaca recenset, ad *dice colombo.*
cuius tamen virtutem comprobendam nova institui oportere ex-
perimenta asserit. Nomen ei ab urbe Columbo Indiarum orien-
taliū obvenit. PERCIVALIVS (*Experiments and observations*
on the colombo root) multis a se captis periculis eandem mi-
ros effectus edere testatur non modo in diarrhoeis ac dysen-
teriiis curandis, sed et in cholerae morbo, in vitiis bilis, ac
doloribus intestinorum. Quod quidem JOHNSONIVS etiam con-
firmat. Is tamen antequam ea nteretur ad vomitus sistendos,
remedium aliquod evacuandae bili idoneum praebebat. Tum
singulis trihoriiis, aut quaternis horis pulverem huius radiceis
ad binas drachmas tradere consuevit. In diarrhoeae initiis pro-
fuisse ait uti antispasmodicam, sed magis adhuc in eius fine
veluti tonica, alexipharmaca et antiseptica virtute pollentem.
Eius pulveris XV., aut XX. grana, aequali aut dupla dosi tar-
tari vitriolati superaddita, mira praestitisse narrat etiam in fe-
bribus biliosis, nec minus prospere cessisse ad vomitus in
gravidis coërcendos. Uno verbo aciditas stomachi cruditates bi-
lisque vitia corrigere, stomachum ipsum roborare, acnere ap-
petitum, nauseam et flatu tollere affirmat. *Ex adversar. au-*
ctoris, qui meminit etiam huiusce radiceis columine I. de fe-
bribus §§. CCCXCIV. CCCXVI. Vide etiam *Raccolta di*
opusc. fisic. med. di LUIGI TARGIONI. T. V.

9) §. 722.

10) Est gummi quoddam durum, fragile, intense rubrum ac *Descriptio*
ferme nigricans, eius exceptis minutioribus fragmentis, quae gummi ex
colorem et pelluciditatem amethysti rubri acmulantur (Gummi FOTHERGII
Kino dicitur). Inodorum et austeri saporis est, nec non mucii LIO.
sensum ore veluti excitat, solviturque sextuplo aut septuplo
aquae purae. Fragilitate summa differt a gummi Senegal: sa-
pore etiam styptico dissolvendique in aqua facilitate etiam a
sanguine draconis officinarum. T. I. soc. med. Londinens.
Ex sch. auct.

11) *Ibidem.*

12) HUXHAM. *De aër. et morb. epidem. T. II. p. 99. 105.*

13) *Memor. dell' accad. di Parig. T. IX. ann. 1700.*

14) *Essais de médec. d'Edimbourg. Paris. T. II. et Com-*
ment. Lipsiens. de reb. in sc. N. et M. gest. Vol. II. P. I.
p. 84.

15) *Ibid. Comm. Lipsiens.*

16) *De prax. regul. cap. III. p. 26.*

17) §. 88. n. V.

18) FARRIVS *De acidor. virib. p. 128.* Vide etiam LAMB-

SMAM *l. c.*, ubi *acidum vitriolicum*, cuius usum in militum dysenteriiis BOERHAAVIUS maxime commendavit, ceteris praestare acidis docet contra corruptionem. *Ex sched. auct.* Vide etiam supra allata §. XXXIII. et §§. XLII. XLIII.

Formula miscendae ceræ et spermatis ceti aquae.

19) *Comment. Lipsiens. cit. Vol. II. p. 639.* Cera quoque ut gummi arabicum aquae misceri potest. *Liquescat cera in spiritu vini ad ignem, deinde filtretur spiritus vini. Huius ceræ semidrachma cum drachm. j. mucilaginis gummi arabici misceatur, solvaturque in uncia una et dimidia aquae.* Sic pariter sperma ceti contusum cum mucilagine arabica admiscetur aquae. TARGIONIUS *Opusc. fis. med. T. V. p. 9. Ex sch. auct.*

20) KRAMER. *Commerc. litt. Norimberg. ann. 1733. hebdom. VI. §. 3.* Item *Essais de med. d'Edimb. T. II. p. 481.*

21) QUARIN. *Method. med. feb. ann. 1772. p. 33.*

22) *Id. ibid.*

§. LXXI.

Curatio TENESMI.

Quae dysenteriae tollendae valent, convenientissima quoque sunt *tenesmo*. In usum veniant potissimum iniectiones ex lacte et mucilaginoso, quibus addi potest utiliter diascordium, aut theriaca¹⁾; fodus ex decocto florum verbasci, chamomillae, sambuci, capitum papaveris albi, linimenta ex butyro recenti, aut oleo e baccis *cacao* expresso, vapores ex aceto super candentem laminam affuso ano excepti, et cetera huiusmodi. Reliqua ex causarum varietate et natura petantur. Non pauca ex hactenus allatis (§§. LXIX. LXX.) *cruentas* quoque deiectiones *fluxusque sanguineos* curant. Sed ea imprimis, quae haemorrhagiae sistendae accommodata alibi²⁾ laudavimus. Talia sunt plantago, tormentilla, myrtus, rosae, cydonia, corallia, lapis haematites, atque ex his parata, imprimis vero tinctura coralliorum *Helvetii*, laudanum liquidum *Sydenhamii*, tinctura rosarum rubrarum³⁾, aliaque adstringentia paragrapho superiore iam memorata. Nihil vero praestantius est, quam acida mineralia intrinsecus largiori manu exhibere⁴⁾ ⁵⁾. Quod attinet ad victus rationem, tenuior haec sit, nec nisi fluida, blanda, lenia, demulcentia, gelatinosa, acescentia, nec facile corrumpenda alimenta suppeditet. Cavere oportet etiam in convalescentibus a medicamentis purgantibus. Lethum per radicem ialappae

Emollientia et sedantia.

Acida mineralia. Victus ratio.

Cautio.

lappae allatum iam supra monuimus ex *Collection. soc. med. Havniensis Vol. I. p. 231.*

1) HUXHAM. *De aëre et morb. epid. T. II. p. 99. et 105.*

2) In autographo Cl. auctoris scriptum eius manu legimus — *Hic multa desiderantur*, — quae postea, ut sibi proposuerat, addere non potuit. Si quis tamen plura postulet, hisce analogae reperiet *Vol. II. §. CCXLII. et CCLXXI., et cap. XII. Vol. III., et cap. II. P. I. huius voluminis*; sicuti etiam *Vol. I. de febr. mult. in locis, et maxime quae §. CCCXCVIII. et seqq. leguntur de aëre fixo, camphora et arnica tam ore, quam ano excipiendis.*

3) HUXHAM. *l. c. SCARDONA De morb. mulier. c. 3. §. 15.*

4) *Idem de febr. l. IV. c. 8. §. 29., et FARRIUS Tentam. de acidor. virib. p. 137.*

5) Vide loca citata ex *Vol. II.*, ubi etiam formulae scri *aluminosi, et specifiçi HELVETII leguntur.* Quando vero caute adhibenda sint acida fossilia, tradit N. A. potissimum *§. CCXCV. Vol. I., idipsum observante Cl. BOISSIER, ut ex nota ibi apposita compertum fit. Editor.*

CAPUT VI.

DE STOMACHI DOLORE, SIVE GASTRO-DYNIA ET GASTRITIDE.

§. LXXII.

Antequam progrediamur ad reliquos intestinorum mor- *Ventriculi dolores.*
bos, redeundum nobis est ad eorum veluti initium, ventricul-
culum nempe, a quo paululum discessimus; hic enim, ut
reliquae corporis partes sensu praeditae, dolori et ipse est
obnoxius. Si sinistrum eius orificium, quod sensu acutiore
donatum creditur, acriter doleat, *Καρδιαλγίαν* dicunt. Dif- *Doloris se-*
ficillimum vero est in tot partium, quae sub *epigastrio* ia- *des.*
cent, concursu definire, quatenam potissimum afficiatur; nec
ipsimet aegrotantes satis plerumque indicare sciunt distincte
peculiarem locum, in quo dolor insideat; nec certo constat,

reliquas ventriculi partes non posse exquisitissime sentire, ac acerrimo dolore torqueri. Quare satius videtur, cuicumque dolori, qui ventriculum teneat, si magnus acerque fuerit, atque ideo *corde* in consensum vocato *lipothymias* inferat, hoc ipsum *cardialgiae* nomen tribuere; qua in re consentientem habemus Cl. SAUVAGESIUM.

Quisque dolor acutus cum lipothymia coniunctus cardialgia dicitur.

§. LXXIII.

Si vero aut non magnus sit eius dolor, aut minime lipothymiis comitatus, generatim *γαστροδυνία* dicitur, sive generico *stomachi doloris* nomine indicatur. Quod si ardoris potius molesti speciem referat, *ardor* item *ventriculi*, sive *soda* aptissime nominatur; quamquam haec cum *acida stomachi cruditate*, de qua supra (§§. XXXVIII. XL.) disseruimus, passim confundi soleat.

Quid sit GASTRODYNIA.
Quid soda.

§. LXXIV.

Est etiam alia quaedam gravis et molesta ventriculi sensatio dolori proxima, aut etiam cum eodem saepe coniuncta, quam *anxietatem* appellant; quum scilicet aegri sic afficiuntur et torquentur circa stomachi regionem, ut locum, quo se contineant, minime invenire queant, sed crebro se iactitare, atque assidue positum et figuram mutare, et alta e pectore suspiria ducere cogantur. Haec tamen anxietas confundenda non est cum anxietatibus illis, quae *prae-cordiorum*, aut *uteri*, aut *systematis venae portarum* vitiis tribui debent; quoniam ipsa potius a solius *ventriculi spasm*o latius diffuso oriri videtur.

Anxietas quid.

Cum aliis non est confundenda anxietatibus.

§. LXXV.

Atqui horum affectuum una eademque est causa proxima, nimirum illa partium ventriculi sentientium mutatio aut commotio, quae in sensorio communi ideam doloris modo acris, modo obtusi, aut anxietatis sensum excitare possit. Huic porro sensationi causam praebet quidquid eas partes urget, premit, distrahit, stringit, discerpit, dividit,

Causa proxima harum affectionum.

Causa materialis.

pungit, irritatve, ut alibi (§§. XXVII. XXVIII. XXIX.) posuimus. Quo referuntur acidi, vel acres corruptive humores in stomacho aut secreti, aut confluentes, aut geniti, flatus, vermes, assumpta incongrua, prava, aut aliena et noxia deglutita aut facile degenerantia, venena, emetica, cathartica validiora, consuetarum evacuationum suppressio, ira vehemens, condimenta aromatica, spiritus fermentati, aqua frigida corpore aestuante epota, ventriculi nimia repletio, ulcus, cancer, tumor, abscessus, spasmus, aut sanguis in eius vasis congestio, metastases, febres mali moris, perniciosae, itemque pancreatis et vicinarum, aut consentientium partium morbi, et potissimum mucronatae cartilaginis depressio, sive introrsum luxatio.

Causae occasionales.

§. LXXVI.

Frequentissima vero eius doloris (§. XXVII.) causa est *GASTRITIS* *quid sit.* *ventriculi inflammatio*, quae vocatur *γαστρίτις*. Causae, a *Eius causae.* quibus oritur, sunt cuiusvis inflammationis communes et ple- *Signa diagnostica in-* *flammati* *ventriculi.* raeque iam §. LXXV. memoratae. Quando itaque morbus ab *inflammatione* est, dolor assiduus, ingens, ardens, pulsans epigastrium, cordis scrobiculum, aut sinistrum (imprimis prope costas spurias) hypochondrium tenet, saepe ad dorsum usque protensus; ea regio valde tumet, tactum ob doloris acerbitem refugit, et simul haec omnia cum febre acutissima, pulsuque duro, contracto, modo parvo, modo magno et vehementi coniunguntur. Deglutitio ipsa, imo eructatio quandoque impeditur; sitis ac aestus aegrum extorret, assumpta quaeque vomitu vix compescendo eiiciuntur, dolorque eiusmodi concussionibus ingravescit, atque intensior fit. Accedunt praeterea ob consensum, qui inter ventriculi os superius et cor ipsum intercedit, atque ob ipsam cum diaphragmate aliisque partibus connexionem animi deliquia, anxietates, creber singultus, respiratio difficilis, frequens, brevis, facies tetra, convulsionones, deliria, foetidus oris halitus, aliaque saevissima symptomata. Cum vero interiora vehementer urantur, et simul exteriora algant (quod imprimis

Quando nomen lipyriae assumat.

fieri dicunt in vehementiore ac erysipelatode inflammatione), tunc peculiari febris *lipyriae* nomine a nonnullis appellatur.

D i a g n o s i s.

§. LXXVII.

Signa diagnostica cuiusque doloris.

A bile et acritatibus.

A nimia sensibilitate ventriculi et spasmis etc.

A fermentatione aut corruptione ciborum.

A crasso lentoque humore.

Ab affecta cardia.

Ab ulcere et a vermibus.

A convulsione.

A sensibilitate nerva.

Doloris autem cuiusque peculiaris signa examinanti facile innotescunt. At non omnis *ventriculi dolor* uno modo affligit, nec una invadit ratione. In aliquibus acerbior est, quem practici a *bile* aut *acri* quadam causa repetere solent. In aliis *dolor* se exserit continuo post epulas; idque vel a ventriculi nimia sensibilitate, vel spasmis, vel difficiliore dilatatione, vel ab acribus succis copiosius in eum allectis, aut sursum ad cardiam elevatis fieri potest. In aliis, dum cibus concoquitur, et praecipue sex circiter horis a pastu, exacerbatur; quod vitiose fermentescere massam cibariam, rarescere, aut etiam corrumpi significat. Quandoque a somno *dolor* percipitur; quod proficisci videtur a reliquiis cibi corruptis, aut ab accumulatis in decubitu, aut refluentibus in ventriculum ex duodeno acribus, biliosis acidisque succis, aut ab aëre copiosius extricato, aut ingresso, aut in ventriculo concluso, et sese loci calore expandente. Quandoque *dolor* gravativus est, qui lentos crassosque humores ostendit; alius cum ardore atque aciditatis sapore, ut in *soda*; tensivus alius, qualis a flatibus. Quandoque lipothymiam adducit; tuncque *cardia* affici praesertim creditur ob insignem nervorum plexum, quo donatur, et ob communicationem, quam hi cum cordis nervis habere videntur. Quandoque cum sensu rosionis, et tunc ab *ulcere*, aut a *vermibus*; vel cum contorsionis constrictionisque sensu saepe ad fauces propagato coniungitur, et tunc a *convulsione* oritur. Interdum totum corpus convellitur, extrema refrigerantur, caput vertigine doloreque tentatur; quae omnia a nervorum actione et sensu derivantur. Distingui demum solet *cardialgicus dolor* in *biliosum*, *flatulentum*, *convulsi-*

vum, pituitosum, inflammatorium, idiopathicum, sympathicum, continuum, periodicum et sic porro.

Hinc differentiae cardialgiae.

§. LXXVIII.

Neque semper doloris locus uno *ventriculo* circumscribitur; nam ab *epigastrio* ad *dorsum*, ad *scapulas*, ad *oesophagum* producitur, imo deorsum etiam descendit. Facile quoque *cardialgia* pro dolore colico, aut *dolor colicus*, qui occupat eam *coli partem*, quae *ventriculo* substernitur, pro *cardialgia* accipi potest. Discrimen vero est, quod in *cardialgia* dolor ad *thoracem*, in *colica* autem ad *umbilicum* et *renes* protenditur. Sed quis ex loci ratione partem affectam semper et certo definiat? *Ventriculus* enim interdum e loco motus, aut aëre distentus, aut ad inferiorem imamque ventris partem pondere detrusus a prosectoribus inventus est. Ne confundatur demum *gastritis* cum ea *hepatitidis* specie, quae *iecinoris concavam partem*, aut *sinistrum eius lobum* obsidet, prohibet saevities symptomatum et profundior doloris sensus, qui in illa esse consuevit. Differt quoque a *musculorum rectorum inflammatione*; quod in hac omnia sunt remissiora, et dolor magis ad exteriora vergit. Ab utroque pariter morbo, itemque a *diaphragmatis inflammatione* dignoscitur *gastritis*, quod in hac dolor tum insignis oritur, quando vel alimenta, vel medicamenta in ventriculum perveniant. Reliqui tandem dolores febris acutae absentia facile discriminantur, nisi eam secuta inflammatione sibi adiunxerint.

A ventriculo ad altas partes dolor extenditur.

Cardialgia differt a dolore colico.

An pars affecta e loci ratione definiiri queat.

Quando ab hepatitidis specie quadam differat gastritis.

Item ab inflammatione musculorum rectorum et diaphragmatis.

Aliorum dolorum diagnosi.

P r o g n o s i s.

§. LXXIX.

Levis ventriculi dolor et convulsivus periculi fere expers est. Si vero diuturnior, aut gravia symptomata sibi adsciscat, non caret periculo. *Cardialgia* cum febre continua et magno circa ventriculum dolore, aut febribus ma-

Quid de convulsivo et levi dolore.

Quid de graviore.

lignis tam continuis, quam intermittentibus superveniens, acutissimi, periculosissimi morbi speciem exhibet. Namque aut inflammationis effectus est, quae semper plena discriminis habenda est, aut in eam transire comminatur. Ilac vero correpti inter XXIV. horas interdum pereunt, quod inflammatio ut plurimum gangraena et sphacelo cito finitur. Id autem fieri indicium est, si pulsus parvi, exiles et creberrimi evadant, et, reliquis symptomatibus non remittentibus, dolor cesset, eiusque loco summa anxietas accedat.

Cita mors ex inflammatione in gangraenam transeunte.

C u r a t i o.

§. LXXX.

Causae effectrices tollendae.

Emesis et alvi ductio.

Enemata et fatus emollientes.

Si ab acrimonia, vel alcalica, vel acida, quae curatio.

Si a visciditate, quae.

Si a spasmis, vel a flatibus.

Ubique chamaemelum convenit.

Curatio ut recte instituat, oportet causam doloris effectricem (§§. LXXV. LXXVI.) tollere, irritationem sedare, et, si qua est inflammatio, aut eiusdem metus, eam resolvere, aut praecavere. Causam, si ventriculo aut duodeno inhaereat, quae tamen eiusmodi sit, ut removeri queat, blandus vomitus aut alvi ductio aufert. Oleum amygdalarum dulcium, aut seminum lini, aut olivarum praestantissimum est cum vomitus excitandi, tum alvi laxandae consilio, dummodo largiori manu propinetur ¹). Enemata quoque utilissima sunt, itemque fatus extrinsecus adnoti, qui molliant et laxent. Si *acre* aliquod morbum faciat, id temperetur potu aqueo, demulcente, mucilagineo; si *alcalinae* sit naturae, acidis ²); si *acidae*, amaris, alcalicis ³) et absorbentibus; si *tenax*, *viscidumve* sit, incidentibus, attenuantibus salibusque neutris; si *spasmus*, aut *flatus*, opio, theriaca, diascordio, philonio romano, castoreo, carminativis sedetur excutiaturque. Chamaemelum fere ubique locum habet, ex quo decoctum, oleum destillatum et aquae parantur. Emollit, flatum discutit, spasmos sedat, et leniter sine irritatione roborat.

1) Memini, me non multis abhinc annis feliciter et illico a gravi *cardialgia* liberatum quinque unciiis olei amygdalarum dulcium uno haustu assumtis; postquam nullum dolori leva-

men attulerant alvum ducentia, emollientia, aquae acidulae, venae sectio aliaque tam intus, quam extrinsecus adhibita. Editor.

2) Vid. Vol. I. §. CCXVI., et alibi etiam, ubi auctor multa a recentioribus celebrata adversus cardialgiam proponit. Vid. item hic cap. III. de laesa alimentorum coctione.

§. LXXXI.

Ubi vero plethora, aut suppressa aliqua evacuatio, aut febris acuta, aut gastritis comes cardialgiae sit, quam citissime sanguis semel iterumque mittatur e brachio, pede, haemorrhoidibus, et quoad opus erit, et quoad vires tulerint. Si vero symptoma febris intermittens fuerit ¹⁾, febris accommodatis auxiliis, ac imprimis cortice peruviano curetur. Vermibus anthelminthica opponantur, quae sequenti capite X. recensebimus. Cartilago ensiformis luxata in pristinam sedem cucurbitula sicca apposita retrahatur. Reliquarum causarum curatio e suo quaeque loco petenda est. Victus sit tenuissimus, omnino blandus et liquidus. Tandem prophylaxeos causa serum lactis, lac, medicatae aquae, balnea, deobstruentia, decocta sudorifera, edulcantia, et potissimum martialia remedia usui esse possunt.

Quando sanguis mittendus.

Si a febre intermittente.

Si a vermicibus.

Si a luxata cartilagine ensiformi,

quae curatio.

Victus ratio.

Curatio prophylactica.

1) Est etiam aliarum febrium et morborum symptoma. Videatur praesertim §. CCXI. Vol. I. et supra laudatus locus, sive §. CCXVI.

CAPUT VII.

DE DOLORIBUS INTESTINORUM ALIARUMQUE ABDOMINIS PARTIUM.

§. LXXXII.

Dividi intestinorum dolor solet (nam et ipsa dolori saepissime obnoxia sunt) in colicum ¹⁾ atque iliacum, in eum scilicet, qui Κόλον, sive crassum, aut plenius intesti-

Dolor COLICUS et ILIACUS.

*Veterum
opinionēs
recensentur.*

num afficit, et in eum, qui *tenuē*, sive *Εἰλεον*. Veteribus enim haec duo tantum erant intestina. Utrumque vero dolorem non loci solum diversitate et sede distingui, verum etiam intensionis acerbitate, vulgatissima opinio est. Tradunt nempe plerique, *colicum* tractum *coli* et directionem sequi, *iliacum* vero *ilei* regionem et positum tenere, et praeterea acerbiorē *iliacum* esse, quam *colicum*; quod tenue intestinum nervis copiosioribus instrui videatur; ideoque maiori acutiorique sensu pollere, quam *crassum*, sive *plenus*, uti a C. CELSO ²⁾ nominatur. Addunt etiam, vomitum in *colico* deficere, aut certe in *iliaco* molestiorem et magis assiduū esse.

PLINII locus
a SENNERTO
et TRONCHINI
notatus.

1) C. PLINIUS SECUNDUS *lib. XXVI. cap. I. histor. natur. colum*, sive dolorem *colicum* novum esse morbum scribit, et TIBERIO Caesare principatum tenente irrepsisse, nec quemquam ante imperatorem ipsum, qui in eum primus omnium incidit, eo fuisse correptum. At SENNERTUS *medic. pract. lib. III. P. II. sect. 2. cap. II. quaest. I.*, et post eum TRONCHINIUS *de colic. Picton. cap. I.* locum PLINII falsi insimulant, ostenduntque, CASSIUM C. CELSO contemporaneum et THIEMISONEM, qui sub AUGUSTO floruit et PHILONEM Tarsensem THIEMISONI coevum de *colico* dolore locutos esse. Fortasse tamen excusari PLINIUS, imo absolvi posset, si de quadam doloris *colici* specie, quae tunc primum *epidemice* grassari visa sit, verba fecisse intelligendus esset, quod probabile videtur, ut infra indicabimus. *Ex sched. auct.*

2) *Lib. IV. cap. 13.*

§. LXXXIII.

*An diagnosi
certa a sede
intestinorum
decerni possit.*

*Quot coli
aberrationes
et a quibus
causis oriuntur.*

Verum animadvertendum est, ex sede solum, quam intestina secundum naturam occupare solent, nihil profecto certi aut perpetui posse decerni; cum cadaverum sectiones non semel demonstraverint, intestinorum omnium, speciatimque *coli* positum multiplici ratione variari. Interdum quippe *colon* ab ortu ipso alienam sedem obtinuit; interdum a ventriculo, hepate, liene praeter morem ampliatis et turgentibus detruditur deorsum; interdum excrementis plenum et distentum suo prope pondere deprimitur hypogastrium versus; aut contra flatibus, sive aëre expansum et tympaniticum redditum sursum attollitur, sublimiorique loco assur-

git; quas ob res modo circa umbilicum, modo etiam inferiorius miris variisque flexibus deturbatum, modo sub costas spurias adactum clavatumque ¹⁾ reperitur. Nihil vero magis frequentiusque *coli* sedem subvertit, illudque versus medium abdominis propellit, quam vesana illa laterum iliumque constrictio, quam thoracum, ut vocant, tormento molliuntur mulieres, ut graciliores, et quasi dixerim iuncea in medio ventre appareant; quemadmodum in earum cadaveribus saepissime deprehendimus.

Quae frequentior causa.

1) MORGAGNIUS *epist. anat. med. XXXIV. n. 2. 3.* BONETUS *sepulchret. anat. schol. ad observ. 41., et* LIEUTAUDIUS *nes. histor. anat. med. lib. I. artic. 27.;* qui ex BALLONIO observationem excitat intestini *coli in thoracis cavum per diaphragmatis foramen* protrusi; atque aliam ex *miscell. N. curiosor.,* in qua dicitur *pars coli ventriculo proxima supra diaphragma* haesisse.

§. LXXXIV.

Intestina quoque tenuia sua e sede depulsa modo in hanc, modo in illam partem migrare coguntur. Imprimis id evenit ab utero gravido, ab ascite, ab hydropse cystico, sive saccato, ab herniis, a tumoribus mesenterii, omenti, ovariorum, uteri, tubarum eius aliarumque abdominis partium, ab aucta hepatis, pancreatis, lienis, renumve mole, a ventriculo etiam enormiter dilatato et deorsum prolapso; a quibus omnibus intestina quoque, et maxime *tenuia*, in varias partes tracta aut pulsa locum et sedem suam commutant. Sursum retracta et coalita, itemque in infimam abdominis partem deiecta et complicata a MORGAGNIO ¹⁾ memorantur; a quo etiam signa traduntur, quibus id, ubi contigerit, cognosci possit ²⁾. Omnia ad *hypochondrium dextrum conversa et conglobata* vidit BARTHOLINIUS ³⁾, ad *umbilicum congesta* LAUBIUS ⁴⁾, ad *hypochondria* item *revoluta* COLUMBUS ⁵⁾ ⁶⁾.

Causae aberrationum tenuium intestinorum.

Exempla auctorum.

1) *Epist. anat. med. XXXIX. artic. 28. 29. 30.*

2) Ibidem Cl. MORGAGNIUS haec habet: *In corpore neque obeso, neque maxime extenuato, neque hydropico, neque laborante suspitione dilatatae, aut alias ob causas praeter aberratio-*

num intesti-
norum.

modum ibi pulsantis arteriae magnae descendens, si pulsatio naturalis, et multo magis si durities, quam corpora vertebrarum exhibent, percipiatur; sursum retracta esse intestina coniiciamus, addetque coniecturae non leve pondus, si abdomen simul aequo depressius infra umbilicam, supra autem turgidius animadvertatur. Quod si cum his signis in superiore eadem regione peculiaris et mobilis tumor sese attollat, non modo cavendum est, ne propter renixum et superficiem inaequalem ac tuberosam ad scirrhorum aut strumarum genus facile referamus; veram insuper quaerendam est, quibus indiciis illuc magis adduci possimus, ut ex intestinis fieri coniiciamus. Erunt ea indicia, si aegrum saepe tenuiam intestinorum doloribus, et sanguinis ex haemorrhoidibus fluxui, licet postea imminutus fuerit aut suppressus, obnoxium fuisse intellexerimus, si tumor vexantibus flutibus dolore afficiatur, si alvus magis magisque ex quo tumor incepit, adstrictior sit, atque alia de eodem genere, quae aut in proposita a nobis historia leguntur, aut ex ea in mentem venire possunt. Essent autem haec peculiariora magis indicia, si tumor gravior interdum, aut levior ab aegro, durior autem, maiore, aut mollior minorque a medicis quoque animadverteretur, quemadmodum in herniis accidit intestinorum. Et quavis id rarius in tumore hoc nostro contingere posse videatur ob creberrimos fluxus, non levem constrictionem et arctissimum praesertim intestini cum intestino coalitam, peristaltico eorum motui officientem, quae videlicet caesae materiam, unde renituntur, in ipsis, ut vidimus, remorantur ac retinent; tamen credibile est, si diligenter, saepius ac variis temporibus illa perquisitio repetatur, iisque potissimum, quibus iamdiu nihil, et quibus plasmper recrementorum delectam sit, aut quibus maior, quibusque minor flatuum copia vexet; credibile est, inquam, aliquod eiusmodi signorum aliqua ex parte posse deprehendi.

3) Cent. I. hist. anat. 2.

4) EPHEM. N. C. cent. 9. observ. 64.

5) De re anatom. lib. XV.

6) Qui vero similes coli aliorumque intestinorum et viscerum a propria aut sede aut figura aberrationes videre cupit, consulat HAENIUM in *Ration. medend. P. X. cap. I. tab. 1. 2. 3. 4. et P. XI. cap. III. IV., tab. 1. 2. 3. 4. Ex sched. auctor.*

§. LXXXV.

An doloris
acerbitas si-
gnum sit ilia-
ci pathogno-
monicum.
An comitus
absit semper
in dolore celi.

Neque doloris acerbitas certo *iliacum* esse dolorem arguit, cum a GALENI tempore in hanc usque diem ex historia medica compertum habeamus, modo *colicos*, modo *iliacos* dolores acerbitate et vehementia saevire, sic ut neuter acerbior iure dici queat. Neque omnino verum est, in

colo affecto vomitionem semper abesse, aut minus assidue et minus vehementer, quam in *iliaco*, vexare; nam saepe in hominibus sensibilibus a *colico dolore*, praecipue cum ea *coli* pars, quae ventriculo transversim subiicitur, torqueatur, vomitus vehementissimos assiduosque excitatos vidimus. Quoniam igitur neque locus, quem dolor tenet, neque doloris gradus, neque vomitus praesens aut absens per se satis nos de parte laborante certos reddere queunt, et quoniam complures aliae partes intestinis attiguae, aut interpositae, aut subiectae in abdomine existunt, quarum causa iudicii et diagnoseos difficultas augetur; non uni aut alteri signo fidendum est, sed maturo omnia examine perpendenda sunt, atque ex plurium concursu coniiciendum, an una potius, quam altera pars laboret; ut infra exemplis declarabitur. Quas tamen difficultates ut effugerent medici, quemcunque *abdominis* aut *intestinorum dolorem*, modo vehemens sit et acerbus (nam leviores *tormina* potius dicuntur), nostris temporibus *colicae* generico nomine complectuntur, et pro causarum eius diversitate, a quibus oritur, non paucas differentias conficiunt, suis quasque notis distinguendas, ut paulo post indicabimus.

De parte affecta neque doloris sedes, neque eius intensitatis gradus certum indicium prae se ferunt.

Quid colici doloris nomine modo sit intelligendum.

Quaenam tormina sint. A diversitate causarum differentiae colicarum desumuntur.

§. LXXXVI.

Ad causas autem quod attinet, perspicuum sane est, *Causae quae* has non absimiles esse debere iis, quas § LXXV. exposuimus, et pro diversa earum ratione dolorem, nunc maiorem, nunc minorem, variae naturae excitari. Praecipue vero hic reputatur flatus, bilis depravata aut exuberans, pituitae varia genera, nempe, ut veterum sermone atque opinione utar, vitrea, viscida, acida, salsa, faeces induratae, congestae, aut alicubi haerentes, lapides intestinis accreti, corpora dura, aliena, acuta, uti nummi, acus, ossa, nuclei cerasorum, prunorum aliorumque fructuum atque alia eiusmodi deglutita, nec per anum emissa, sed in aliquo intestinorum flexu restitania, aut alicubi infixae, aut viam obstruentia, vermes multiformes, taeniae, spasmus, convulsio, sanguinis congestio, haemor-

rhoidum aut calameniorum fluxus suppressus, intestinorum tumores, scirrhi, cancri, ulcera, conglomerationes¹), aliaque eorum aut vicinorum viscerum vitia, arthritica, rheumatica, herpetica, scorbutica, scabiosa materies retropulsa, perspiratio retenta atque ad intestina translata, pus in cavum abdominis effusum, acrimonia intestinis infusum, bilis pariter e disrupta cystide fellea repente profusa, ac intestina exterius irritans, febrium cum intermittentium, tum continuarum imperfecta indicatio, aut earum fomes abdominalibus visceribus peculiariter noxam inferens, frigus suspectum, pedum incauta refrigeratio, alimenta per se noxia, aut non bene digesta, rerum fermentescentium, uti musti, cerevisiae non defaecatae, et similium ingurgitatio, fungorum esus, meconium retentum, aut lac acescens, aut coactum in infantibus, et demum ipsa *enteritis*, sive *intestinorum inflammatio*, quam nonnulli *chordapsum*, *iliacam passionem*, aut *ileum* etiam appellant²).

*Inflammat.
intestinor.*

*Conglome-
rationum
exempla.
Observatio
COLUMBI et
AUCTORIS.*

*Aliae MOR-
GAGNII.*

*Quaedam ab
aliis petitae
et depromptae.*

*Quid ilei no-
mine intellex-
erit HIPPO-
CRATES.*

1) Praeter *conglomerationes* intestinorum, quas (§. LXXXIV.) indicavimus, memoratu digna est illa, quam COLUMBUS (*loc. cit.*) descripsit, natam videlicet ex ultimis *ilei* partibus una complicatis, tumoremque in hypogastrio exhibentibus. Similem tumoris speciem vidi et ipse in muliere *colica chronica* iamdiu afflicta, et demum marasmo confecta. Talem quoque post ascitem in inferiori pariter abdominis parte ex conglutinatibus, et cartilagineam fere duritiem adeptis intestinis adducit MORGAGNIUS (*Epist. anatom. med.* 39. n. 29. et 30.). Apud eundem (*Epistola eadem* n. 26.) describitur durus et circumscriptus tumor in infima epigastrii parte extrorsum protuberans, quem sola intestina tenuia retracta et conglomerata simul formabant. Item intestinorum una cum mesenterio in unum quasi globum convolutorum et aretissime cohaerentium exempla legi possunt in *actis academ. N. C. T.* 1. *observ.* 87. et *T.* 6. *observ.* 124. FANTON. *Observ. epist.* 4. BONNET. *sect.* 21. *Observat.* 3. § 8. Quibus similia non pauca ego quoque addere possem. *Ex sched. auct.*

2) Hoc ipso sensu *ileum* acceperisse videtur HIPPOCRATES, quando dixit, *ab ileo vomitus, aut singultus, aut convulsio, aut delirium; malum.* *Aphor.* 10. *sect.* VII. Si enim *ilei* nomine non *enteritidem*, sed *colicolum*, ut vocant, intellexisset, non potuisset recensere *vomitum* tanquam *signum malum*, cum sua natura *coliculus vomitum* contineat, nec sine eo esse possit. Sed clarius apparet, HIPPOCRATEM de *inflammatione intestinorum*, sive *enteritide* locutum libro *de affect.* XXII. I. 5., ubi haec habentur: *Ileus cum apprehenderit, venter du-*

rus fit, et nihil secernit, et dolor inferne omnem alvum tenet, et febris, et sitis. Aliquando vero prae dolore neger etiam bilem comit. In volvulo autem stercus, non bilis vomitu eiicitur. Ex sched. auctor.

§. LXXXVII.

Hinc profluunt *colicarum* differentiae, quae frequen- *Differentiae*
tius a medicis nominantur; nempe *colica flatulenta, biliosa,* *in causis.*
pituitosa, stercoralis, calculosa, verminosa, spastica et
convulsiva, sanguinea, haemorrhoidalis, catamenialis, ar-
thritica, scorbutica, metastatica, accidentalis ab assumtis,
aut a refrigeratione, *inflammatoria*, et sic porro. Praeter
hasce differentias vero, quas causae patentiores suppeditant,
dantur etiam aliae, quae *communes* dici possunt, uti *prima-* *Communes*
ria, secundaria, symptomatice, periodica, diuturna, chro- *aliae differ-*
nica, acuta, endemica, epidemica etc. *Periodicae* saepenu- *rentiae.*
Periodicae.
mero a febrium intermittentium fomite originem ducunt, at-
que ut plurimum earum accessionibus tamquam symptoma su-
perveniunt. Diuturnas et *chronicas* ²⁾ vitia plerumque orga- *Chronicae.*
nica rebellia, solutuque difficilia, de quibus supra §. LXXXIV.
et LXXXVI. mentio facta est, efficiunt, uti *endemicas* et *Endemicae*
epidemicas causae quaedam communes, plus minusve dif- *et epidemi-*
caae.
fusae.

1) HOFFMANNUS praeter dolores (inquit) *intestinorum, Vitia a qui-*
qui acutioris sunt indolis, et vel in salutem, vel in mortem, bus chronici
brevi terminantur, dantur etiam chronici qui sunt generis, dolores sive
et diutius insistent, ac per multas hebdomadas, imo per anni colicae diu-
aliquando spatium excruciant, licet per intervalla suas ha- *turnae oriri*
beant remissiones et exacerbationes. Horum post mortem possunt-
dum fuit inventa causa, quod in quadam parte intestinum
fortiter angustatum, constrictum, scirrhosum, vel callosum
fuertit deprehensum etc. Sect. II. cap. V. p. 180. De inte-
stinor. dolorib. Ex sched. auct.

Scirrhum autem *coli* HOLLERIUS lib. I. cap. 41. de morb. *Scirrhii et*
internis et RHODIUS centur. II. observ. 75. describunt. Item *colli intesti-*
a callo colicam in intestinis productam BENIVENIUS conspexit: *norm.*
Lib. V. De abdit. rer. caus. cap. 30. et 34. HILDANUS quo-
que in cadavere hominis, qui per aliquot annos dolore fixo
et continuo sub *hepatis regione* laboraverat, et tandem gra-
vissima passione *iliaca* extinctus fuerat, invenit *scirrhum* iam
exulceratum in *coeci* intestini fundo. SWIETEN. §. 486. Vid.
RIVERIUM etiam *Prax. med. lib. X. c. 1. de dolor. coli* cet.
RONCALLUM *Hist. morb. p. 172. Ex sched. auct.*

§. LXXXVIII.

*Causae pecu-
liares colica-
rum regio-
num et arti-
ficum.*

*PICTONUM
multiplex
iuxta aucto-
res causa.*

*JAPONICAE
causa.*

*LAPPONICAE.
DAMNONIEN-
SIUM.*

*Causa om-
nium ferme
a plumbo.*

*An plumbum
tantum vel
alia metalla
etiam in
causa eius
sint.*

*Cur haec
SATURNINA
dicatur.*

Causae autem communes vel multos eodem tempore, aut quasdam solum regiones, aut aliquos tantum artifices aut familias afficiunt. Vinum acidum immaturum a CITESIO creditum fuit causa *colicae* illius acutissimae, qua *Pictones* aliosque vicinos populos epidemice vexari ipse vidit¹). Si- milem *colicam* a vino albo non satis defaecato derivarunt PISO, SENNERTUS, CRATO, CARDANUS, WEPFERUS alii- que. Potum acidum, quem *Punch*²) dicunt, nimio conti- nuatoque usu inferre colicas huiusmodi posse, auctor et testis est TRONCHINIUS³), cui etiam eodem nomine sus- spectus est succus citrei et spiritus vitrioli, si potui largiori manu adiiciantur. *Iapones* colicae item simili obnoxios esse ob cerevisiam ex oryza paratam, qua utuntur, fortasse aci- dam, memoriae prodidit KAEMPFERUS⁴). Putridae aquae et vermiculis, quos *setas aquaticas*, sive *gordios* vocant, scatentes, quas *lappones* bibunt, pro causa communiori, unde *colica* laborant, habentur a LINNAEO. A vino po- maceo, vulgo *cidre* gallis, *colicam*, qua *Damnonienses* con- flicari solent, derivandam existimat HUXHAMIUS. GEOR- GIUS vero BACKERUS⁵) eandem e vino quidem pomaceo, sed plumbi admixtione edulcato repetere mavult. Revera nihil magis inferendis atrocissimis hisce *colicis* confert, quam vina *plumbo* aut *lithargyro* edulcata; sicut etiam medica- menta ex plumbo parata tam intrinsecus⁶), quam extrinsecus adhibita, itemque plumbi halitus, aut pulvis inspiratus et deglutitus, cosmetica ex eo parata, et demum alimenta in vasis plumbeis cocta, aut diu in iisdem asservata. Sunt etiam qui inter causas huius *colicae* referant fumos *arseni- cales*, *antimonii* non rite ab alienis expurgati, aut *cinna- baris nativae* non ablutae usum internum, *viride aeris* cibis a vasis cupreis impertitum. Quibus tamen omnino adver- satur docto et praestanti opusculo Cl. STOCKHAUSENIUS, qui a solo *plumbo colicas*, quae passim *metallicae* dicun- tur, oriri contendit, ideoque *saturninas* eas appellat, ut ab

aliis speciebus discernantur ?). Quae *metallica*, aut *satur-* *Cur plumbariorum, figurorum et pictorum propria.*
nina aliis, RAMAZZINIO *plumbariorum*, DUBOISIO *figu-*
lina, itemque *pictorum* audit; quod ei maxime obnoxii sint *ctorum pro-*
metallorum fossores, metallurgi, ac imprimis, qui *plum-*
bum tractant, quique vasa terrea plumbeo vitro obducunt,
aut varia pigmentorum genera dissolvunt, terunt, et ore ex
iis manantem subtilem pollinem hauriunt, uti *figuli* et *pi-*
ctores. Sed praeter enumeratas *colicarum* species scire oportet, nostra hac aetate *colicae* nomen ad dolores etiam alia- *Colicarum nomen ad aliarum abdominis partium dolores indicandos usurpatum.*
rum abdominis partium extendi; atque adeo apud clinicos
saepè mentionem fieri de *colica stomachica, pancreatica,*
mesenterica, hystericà, nephritica, hepatica, sive, ut alii
malunt, *hepatalgia*.

1) *De novo et popul. apud Picton. dolor. col. bil. dia-*
trib. Paris. 1639.

2) *Rum-punch* paratur ex spiritu sacchari ardentissimo et
succo limoniorum silvestrium.

3) *De colic. Picton. Genev. 1757.*

4) *Amoenitat. III. II.*

5) *Medical transactions published by the colleg. of phy-*
sicians in London. Vol. I. p. 175. et seqq.

6) *Traité des mauvais effets de la fumée de la litharge,*
traduit du latin. et commenté par M. J. J. GARDANE. Paris
1776.

7) *Huiusce causae exemplum FERNELIUS offert sequenti*
historica narratione. (De lue vener. cap. VII.)

„Amicus quidam meus erat destillationi a capite interdum *Observatio*
in cervicem et seapulas, interdum in pedum articulos obno- *FERNELII de*
xius; qua tamen superveniente iustis evacuationibus haud aegre *colica a me-*
liberari solebat. Huic a me iam doloribus liberato empiricus *dicamine sa-*
quidam *plumbi pulverem* adversus *arthritidem* ita commenda- *turnino orta.*
vit, ut in eo solo eius recurrentis prae cautionem positam esse
statim persuaderet. Cuius idcirco usum amplexus pulveris eius
sesquilibram ex iusculis, ex vino, et pyris coctis aliisque re-
bus sacchari loco quindecim dierum spatio absumsit. Sed dii
boni! Dysenteria crudelis feбри stipata die duodecima exorta
est cum gravissimis non *ventris* solum, sed et *ventriculi tor-*
sionibus ad eam spinæ dorsi partem, in quam os ipsius in-
cumbit pertinentibus. Ventriculi tanta dissolutio, tanta oris
oblaesio subsecuta est, ut ne contactum vel blandissimum ferre
posset; et quaecunque ingerebantur vel in *plumbeum* nidorem,
vel in rancorem tenuissimum versa mox revomebantur. Inde
ructuum tanta edebatur copia, ut in flatus omnia abire viderentur.
Sedata dysenteria, graves illi *ventris, lumborum et*

ventriculi cruciatus dies viginti perseverarunt cum incendii interni molestissimo sensu, totidemque noctes peregit insomnes. Atque hoc temporis intervallo, licet sitis ipsum non valde exercuerit, appetentia tamen semper prostrata iacuit; nec alvus quidquam nisi vel clystere, vel cathartico medicamento proritata reddidit. Et quaecunque tum infra tum supra aut sponte, aut artis beneficio prodire, *plumbeo* colore infecta erant omnia; suam illam qualitatem internis partibus pertinaciter adeo impresserat. Interim exorto *ictero* corpus totum foedatum apparuit, ac sanguis, sedata dysenteria, ad febris curationem reserata vena detractus totus flavus, biliosus ac spumosos deprehensus est." *Ex sched. auct.*

Alia TISSOTII.

Cl. TISSOTIUS quoque, *atrocissimas colicas a saturni saccharo, et a tinctura antiphthisica GARMANNI* nasci esse, exemplis et observationibus suis confirmat. *De colic. saturnin.* *Ex sched. auct.*

D i a g n o s i s.

§. LXXXIX.

Quomodo dignoscatur (si quando a loco affecto liceat) colicus dolor. Nunc qua ratione singulae *colicae* distinguantur, superest dicere. Et quamquam supra ex doloris loco nihil certi statui de parte affecta monuerimus, ob partium scilicet e sua sede frequentem aberrationem; attamen si suo quaeque loco iuxta naturae ordinem se habeant, non parum lucis affert ipsius loci, quo dolor desigitur aut continetur, anatomica cognitio. Itaque dolor, qui umbilicali regioni insidet, ab intestinis *ieiuno* et *ileo* praecipue affectis, aut ab ipsomet *mesenterio* laborante oriri videbitur. Qui vero dorso lumbisque dextrorsum speciatim infestior est, *duodenum* potissimum aut *ieiuni* initium afficere creditur, cum duodeni finis incumbat lumborum regioni; sed tunc *cardialgiam*, *colicam hepaticam*, aut *nephriticam* quodammodo mentitur, a quibus tamen notis alibi (§. LXXVII. LXXVIII.) allatis distingui debet. Si vero *colon* torquet, a dextro inguine dolor assurgit ad dextrum usque hypochondrium, indeque transversim ad sinistrum sub costis spuriis fertur, et demum deorsum deflectitur, qua *colon* in rectum desinit.

Quando doloris sedes sit in ieiuno et ileo, vel mesenterio. Frequentissime in sinistro hypochondrio sub costis spuriis dolor percipitur, quem plerumque *lieni* tribuunt. Verum

Quando in duodeno, vel ieiuni initio. lien

Is alios dolores mentitur. lien

Quando colo insideat. lien

Qui mentitur lienis dolorem, insidet lien

lienens loco ut plurimum intestina ibi afficiuntur, iis nempe *in inflexionibus vel ieiunibus vel coli versus hypochondrium sinistrum.* in locis, in quibus varie inflectuntur et retorquentur. Isque dolor hypochondriacis viris et hystericis feminis permolestus esse consuevit. Si enim pituita, aut mucus iners, aut flatus, aut excrementum, aut alia similis causa haereat *Eius causa.* in *inflexionibus ieiuni* intestini aut *coli*, qua ad hypochondrium sinistrum ¹⁾ vergunt, dolor quidem fixus in eo hypochondrio excitabitur, et sane magis profundus, quando *Ab iisdem causis quando afficiatur extremum ilei et principium coli.* *ieiunum* laborat, minus vero quando *colon.* Idem pariter accidit non procul ab inguine dextro, si, quod non infrequens est, eadem causae haeserint circa extremum *ilei et principium coli.* *coli* principium; quo loco tum saepe durus et circumscriptus tumor manui tangenti se exhibet et renititur, donec *Signa eius propria.* causa dolorem inferens illinc discussa sit.

1) HOFFMANNUS *de intestinor. dolorib. sect. II. cap. V. p. 178.*

§. XC.

Haec de loci affecti significationibus. Pauca modo de *Signa propria cuiusque colicae.* signis, quorum ope causas peculiares cuiusque *colicae*, sive colicarum differentias diversasque naturas cognoscimus. Et primum colicam *flatulentam* indicant dolor itidem fixus, aut, *FLATULENTAE.* quod frequentius est, vagans atque errans, tumor et tensio resonans ventris, borborygmi, interdum difficilis inspiratio; quae omnia flatibus ore aut ano explosis sedari solent. Interdum in hac specie venter ita tenditur, ut umbilicus enormiter protuberet, herniamque umbilicalem sive *omphalocelen* incurrat. Saepe superiorem *coli* partem flatus occupant, quo casu propinquitas ventriculi iecinorisque facit, ut quae pars, et qua ex causa excrucietur, difficilior sit explicatu. Raro sola aëris copia intestina dilatans morbum facit, *Causa non est solus aër plerumque.* sed saepe spasmiis alicubi intestina constricta aërem concludunt intra quendam intestinorum tractum, ut calore loci expansus tunicarum intestinalium superet renisum, atque in enormem saepe magnitudinem, manui extrinsecus manifestam, intestina ipsa distendat.

§. XCI.

Signa PITUITOSAE tam acris, quam non.

SPASTICAE et CONVULSIVAE. VERMINOSAE. SANGUINEAE, haemorrhoidalis, vel catamenialis.

STERCORALIS.

ACCIDENTALIS ab ingestis, a frigore etc.

Inflammatoria atque ENTERITIS. Haec cito transit in gangraenam. Intestinarum inflammatione sine febre et dolore aliquando datur.

Ponderis autem sensus *colicam a pituita et muco viscido*, sed *minime acris*; fixi et terebrantis *colicam a pituita acida* aut *salsa*, aut alio quocunque humore irritante adhaerenteque; contorsionis acerbissimae, plerumque vagae ac erraticae, raro fixae, cum globi ad fauces adscendentis sensu, et urina tenui, aquea, crebro emissa, tremoribus, horripilationibus, oscitationibus *colicam spasticam et convulsivam* ¹⁾, sive *hystericam ac hypochondriacam*; rosionis demum sensus et morsus veluti cuiusdam per intervalla revertentis cum magna symptomatum varietate, *verminosam* significare dicitur. *Sanguineam haemorrhoidalem* aut *catamenialem* primum suspicari licet ex absentia aliarum causarum, deinde ex consuetarum evacuationum defectu, sive menstruorum, sive haemorrhoidum, aut denique ex imminente earundem periodico fluxu, et quandoque febrili motu, qui in his excitari plerumque solet. *Stercoralem* esse cognoscas, si alvus iam ab aliquot diebus clausa fuerit, si gravitatis et repletionis sensus in ventre percipiatur, atque aliquod in alimentorum copia aut qualitate peccatum antecesserit. Hinc quoque, et praesertim examine eorum, quae aut gesta sunt, aut assumpta, *colicae accidentalis ab ingestis*, a frigore aliisque evidentibus levibusque causis diagnosis facile elicietur. Dolore vero acuto, tactum non ferente, aut ad levem quamque pressionem recrudescente, partis tumore, calore, pulsatione febrisque comite modo maiori, modo minori *colica inflammatoria* atque *enteritis* se prodit. Hic autem animadvertendum est, intestinorum inflammationem, quae cito in *gangraenam* lethiferam desinit, interdum colicis doloribus clanculum et praeter expectationem supervenire, nullis in pulsu febris indiciis, aut plane exiguis deprehensis. Id pluries cadaverum sectiones demonstrarunt. Immo ex MORGAGNII, VALSALVAE, RIVERII, SIMSONIS, HAENII observationibus constat, inflammationes, ut aliarum partium, sic intestinorum dari non modo sine febre ulla, sed etiam

sine ullo dolore, nervorum forte sensu deperdito, aut eorum *Signa, quibus innotes-
cere possit,* facta paralyti. Cum autem signa haec deficient, ex ALBER-
TINIO MORGAGNIUS eas agnoscendi modum sic docet. *Pul-* iuxta ALBER-
sus humilis et debilis potius, et qui, si bene attendas, sibi TINIIUM et
obscure dissimilis sit, abdomen autem tensum et durum, MORGA-
et cum dolore quodam; facies denique insoliti aliquid, sed GNIUM.
in aliis aliud, ostendens, ut interdum oculos quasi ex-
terrefactos, alias livorem quendam circa labra animad-
verterim; haec fere (nam aliquando linguam etiam ad-
notavit haud bene se habentem et quandam sitim) mihi
accidit, ut in eiusmodi casibus se observanda praeberint ²).
Sed aegrum habuit HAENIUS, in quo tensio, et dolor, et
ventris obstructio deficiebant ³).

1) LORRYUS describit *colicam simpliciter convulsivam*, cu- *Simpliciter*
ius peculiare symptoma fuit *anxietas quaedam inexplicabilis.* CONVULSIVAE
Dissecto cadavere reperit *intestina*, praesertim *colou*, valde ad- *ex LORRYO*
stricta, stomachum vero in binas divisum cavitates ob *signa.*
strictionem in medio eius exortam. *Hist. de la sociét. roy.*
de méd. T. II. p. 195. et seqq. Ex sched. auct.

2) *Epist. anat. med. XXXV. n. 21.*

3) *Rat. med. XIV. sect. I. cap. 3.*

§. XCII.

In *colica biliosa* dolor atrocissimus, ab initio plerum- *Signa BILIO-*
que vagus, deinde in puncto fere quodam defigitur, et quasi *SAE.*
terebra intestina perforare videtur, aut quasi iniecta fascia
constringere. Hunc comitantur os amarum, sitis ingens,
interdum rauco, imo etiam aphonía, calor interiora urens,
abdominis tensio, vomitus, deiectionesve biliosae, et non
raro febris acuta ardensque. At vomitio alvique deiectio *Facilis eius*
tanta aliquando est, ut in *cholera*, aut in *iliacam pas-* *transitus in*
sionem, sive *ileum* proprie dictum facile transeat. Postre- *cholera aut*
mum maxime evenit, quando, progrediente malo, dolor uni *iliacam pas-*
fere loco infigitur, alvusque penitus clausa est. Id etiam *sionem sive*
ileum proprie
dictum.
colicae biliosae proprium est, quod subinde mitescat, imo
etiam per aliquot horas quandoque cesset, sed mox atrocius
exacerbetur et recrudescat; quam rem eiulatibus et vultu

*An colica
haec eadem
sit cum in-
flammatoria.*

tetro, ubi malum imminet, solent aegri praedicere. Nonnulli colicam hanc cum inflammatoria unam eandemque esse censuerunt, sed perperam. Illud vero certissimum est, in *enteritidem* saepe ipsam mutari.

§. XCIII.

*Signa colicae
SPASMODICAE
et convulsivae
NERVOSAE
etiam dictae.*

Fieri autem nequit, quin in quavis *colica*, ubi dolor paulo acrior nervos fibrasque divellit, spasmi et convulsivae affectiones excitentur, vel facile superveniant. Si vero spasmi et nervosi systematis passiones fuerint insigniores, umbilicus et muscoli abdominales introrsum veluti trahantur, dolores altius videantur defigi, atque ad lumbos produci, unde spinales nervi egrediuntur, vertigine aut atroci dolore caput tentetur, epilepsia etiam, aut paralysis pedum, vel manuum, aut utrorumque accedat ¹⁾, aut in eam dolor desinat, alvusque ita compressa atque adstricta sit, ut vix clysterem admittat; tunc *colica spasmodica et convulsiva* ²⁾, imo etiam

Colica PICTONUM ad hanc speciem referri debet.

nervosa ³⁾ generatim vocatur. Hanc video etiam nominari *colicam Pictonum*, quod Pictonibus praecipue infensa creditur; verum neque eorum tantummodo propria est ⁴⁾, neque quae apud eos *epidemice* aut *endemice* grassari visa est CITESIO ⁵⁾, omnes *colicas spasmodicas* complectitur, sed potius quaedam earum species potiori iure habenda est. Alii, qui in ea plexum mesentericum ⁶⁾ mesenteriumque praecipue affici opinati sunt, *mesentericam* etiam non inepte appellant ⁷⁾. Nec defuerunt qui eam a *spinali medulla* primario affecta, *illaesis intestinis et mesenterio*, deducendam autumarint, et peculiari novoque nomine excogitato *rhachialgiam* vocaverint ⁸⁾, e colicarum genere eam excludentes ⁹⁾.

Cur mesenterica dicta.

Cur rhachialgia etiam dicta.

1) TISSOTIUS *Epistol. varii argumenti* p. 152: *De causis*, ait, *colicarum, quae paralysin inferunt, disceptatur. Ultro crederem, vina nonnulla, venena et scorbutum tres esse causas earum, nec plures dari. Acerbissima ex aliis causis colicae non excipiuntur paralysi. Hacc tamen dubie propono. Ex sch. auct.*

2) HOFFMANN. *Med. rat. system. T. IV. sect. 2. c. V.*

§. 9., VOGEL. *de cognosc. et cur. h. c. aff. class. III. dolor. colic.* §. 442.

3) TOWN. apud ALLENIIUM *Synops. P. II. c. 4. p. 156.* edit. Venet., BUCHAN. *Medic. domestic. T. II. p. 424.*

4) Nam eidem obnoxiae sunt insulae *Caraïbae, Barbadae, Hungaria, Franconia, Moravia, Austria* et regiones aliae.

5) FRANC. CITESIUS *Diatrib. de nov. et popul. apud Pi-Colicae epictones dolore colico bilioso.* Paris. 1639. *Epidemicam inter-demicae dum fuisse huiusmodi colicam testatum faciunt non pauci scri- exempla.* ptiores. In Moravia et Silesia seculo sextodecimo grassatam fuisse patet ex LANGII *epistola de torminibus ventris a febre relictis*, itemque ex CRATONIS *litteris ann. 1582, de para- PAULLI AEGILYSI ex colica.* Sed prae ceteris animadversione dignus est NETAENARRA- locus PAULLI AEGINETAE (*lib. III. cap. 43. versus finem*), tio memora- qui sic habet: *Puto autem COLICAM AFFECTIONEM, QUAE bilis.* ETIAMNUM REGNAT, *ex huiusmodi pervenisse humoribus (te- duioribus et mordacibus), quae ab ITALIAE quidem REGIONI- BUS INCEPIT, IN ALIIS AUTEM MULTIS ROMANORUM R. P. LOCIS PESTIFERAE CUIUSDAM LUIS MODO SIT GRASSATA; ex quo ple- rique in comitalem morbum, alii in ARTUUM RESOLUTIONEM, sensu incolumi, nonnulli in utramque sunt prolapsi; et eor- um, qui in comitalem morbum inciderunt, plures interi-ere; ex illis vero, qui in RESOLUTIONEM, plures evaserunt; tan- quam in crisi, CAUSA ALIORSUM ex loco, quem infestaverat, conversa.* Si PLINIUS (cuius locum supra in nota I) ad *Hoc testimo-* §. LXXXII. adduximus) cum *novum morbum colicam* esse nio locus scripsit, hanc *epidemicam*, de qua PAULLUS meminit, intelle- PLINII nota- xisset; non posset *falsitatis insimulari*, ut insimulatus a SEN- tus excusari NERTO et TRONCHINIO fuit; nam huiusmodi *epidemicam colicae potest, et spasmodicae constitutio* fortasse multis ante annis, nimirum *qua ratione.* sub TRAIANO incepit, et perrexit grassari de una in aliam re- gionem usque ad P. AEGINETAE tempora, qui HONORIO impe- perante florebat. *Ex sch. auct.*

6) WILLISIUS *Patholog. P. II. c. XV. Pars primario in colica affecta ipsi visa est esse mesenterium, quod est valde sensile; cuius transitus est, materiam morbificam non per arteriam, sed per nervos deferri, eiusque sedem non esse intestinorum tunicas, sed mesenterii plexus nervcos.* Ex sched. auct.

7) ETTMÜLLERUS *T. II. p. I. Coll. pract. sect. XI. p. 183.*

8) ASTRUCIUS in *thesi Monspeli* edita ann. 1751, cui titulus: *An morbo colicae Pictonum, rectius rhachialgiae dicto, venae sectio in brachio?* SAUVAGESIUS *Nosolog. class. VII. ord. V. n. 29.*

9) *Rhachialgia* LUDWIGII est *dolor spinæ dors.* Ραχίς Quid RHA- enim *spinam dors,* Ἀλγίω *doleo* denotat. ASTRUCIUS ex hy- CHIALGIAE pothesi *colicos dolores a nervis medullæ spinalis male affe-* nomine in- ctis repetit. Hunc secutus SAUVAGESIUS *rhachialgiae* nomen *telligendum* transtulit ad *colicam Pictonum, saturninam et convulsivam.* sit.

Duplex est, sympathica et idiopathica.

Rhachialgia sympathica ex colicis doloribus.

Item ex doloribus haemorrhoidalibus.

Hinc colicae haemorrhoidales.

Item ex doloribus menstruantium, gravidarum et puerperarum.

Abscessus lactei unde oriuntur.

Item ex colica nephritica.

A spasmodicis primarum viarum.

Sed revera *rhachialgia* LUDWIGII, id est *verus dorsi dolor* spectaret ad genus morbi, quod a SAUVAGESIO *lumbago* dicitur. *Rhachialgia* alia est *idiopathica*, alia *sympathica*. CL. DELIUS hos omnes dolores voluit potius appellare nomine *notalgiae* a *Νῶτος*, dorsum, et *Ἀλγίω* doleo. Primum de *rhachialgia sympathica*. In *colicis doloribus* non solum *zona coli*, sed etiam *religiosa intestina* tensionibus molestis afficiuntur. At *plexus mesaraici* ad aortam descendendo adeo *spinæ dorsi* adhaerent, ut eidem antè quasi agglutinati videantur, ideoque non solum *vagos spasmos* in variis tubi *intestinalis* partibus efficiunt, verum etiam *spinam lumbarem in consensum* trahunt. Hinc accedit saepe, ut vicina *lateralia* simul doleant, et *spasmi* ad *thoracem* et *costas* ascendendo *pleuriticis* saepe *dolores* mentiantur; qui tamen mox cessant, quando *causa spasmodicorum intestinalium* sublata est aptis remediis. *Dolores haemorrhoidales* saepe ad *os sacrum*, ad *lumbos*, ad *spinam* producantur. Non enim id tantum a vasis turgentibus et varicosis in ano, intestinis, mesocolo et ab hypogastrica oriundis repeti debet, sed praecipue a nexu *plexus hypogastrici* ad *intestinum rectum* usque descendens cum *nervis ossis sacri* et vicinis *spinalibus*. Hinc *colicae* etiam *haemorrhoidales*; nam ab intestino *recto* tensio producit ad *lumbos* et ad *intestina*. *Dolores menstruantium, gravidarum* et *puerperarum* saepe ad *lumbos* propagantur. In iunioribus tamen puerperis saepe tensiones molestae in *dorso* excitantur ex *spinæ dorsi* infirmitate, cuius nimirum partes iustum robur nondum acquisiverunt. Gravidæ enim molem ventris et pondus vix ferre possunt, unde tanta imbecillitas *spinæ* et *coxendicum* remanet, ut per plures hebdomades eruribus vix insistere possint, et vacillent, et si sibi a motibus violentis non temperant, aut in partu difficili valde laborarint, *dolores habituales in spina dorsi* per totum vitae tempus molestos patiantur ex hac causa. Eisdem incommodis obnoxiae etiam sunt adultiores feminae, quando per validos in partu nixus *ligamenta, musculos* et *nervos* ad *spinam lumborum* et coniunctas cum *osse sacra coxas* vehementer urserint et distraxerint. Ex hac forte causa *abscessus lacteos*, ut vocantur passim, crebrius ad *spinam lumbarem* et inferiores partes, quam in aliis locis oriri probabile videtur. Ne igitur his aerumnis affligantur, necesse est, ut iusta quiete partibus restitutionem pristinam et firmitatem concilient. In *colica nephritica* ob nexum *plexus renalis* cum *mesaraicis*, et ob connexionem cum *vertebris* ad *spinam dorsi* dolores tensivi ascendunt. Interdum *dolor nephriticus* minus molestus est *regioni renum*, et magis deorsum ad *inguina*, ad *testes* et ad tractum *cruralis nervi*, et praecipue inter incedendum ad *spinam lumbarem* producit. In *febris* quoque *lassitudines, tensiones vagae* et *dolores dorsi* ex dyscrasia humorum pendent. Hinc *lumbago febrilis, variolosa*, species *rhachialgiae* sunt. Possunt vero *dolores dorsi* et *lumborum* ab aucto sanguinis motu et impetu fieri. Verum plerumque a *spasmodicis primarum viarum* ad *spinam* productis repetendi sunt. Imo a *spina* *spasmi* ad

Ἐγκέφαλον produci possunt, et capitis dolores per consensum excitare. Sed de *sympathicis* non plura. Modo de *idiopathi- Rhachialgiae species* quaedam *idio-* *pathicae* est dolor quidam *purgens* et *fixus* in confiniis *tho-* *idiopathicae* *racis* et *lumborum*, tensione sua ad *latera lumborum* et *tho-* *quae.* *racis* sese extendens, qui validos nixus, saltus improvidos in- *Doloris ratio* aequali pede, contorsiones *spinæ dorsi* subitas, aut etiam su- *et sympto-* *bitas* in alterutrum *latus corporis* conversiones subsequitur. *mata eius.* Cum hac *rhachialgiae specie* sæpe respirationis organa male afficiuntur, ita ut præcipue profunda inspiratio brevis, et nonnihil dolens animadvertatur. Ille dolor plerumque, dum quiescit corpus, quiescit et ipse, imprimis si aeger aptum sibi inveniat positum, Excitatur vero mox ad initium motus, aut ad eius continuationem. Aliquando etiam continuus est, nempe quiescente corpore silet, anxiamque reddit respirationem. In *Doloris cau-* *lumbis* ortus, ibique *fixus* non raro increseit, ita ut totam *sae.* *spinam* dorsi occupet, et paulo post dolorem vel universi ca- pitis, vel occipitis saltem moveat. In his *doloribus* causa vi- detur vis aliqua *spinæ dorsi* illata. Sed vis etiam musculis illata idem efficiet. A *flatibus*, ab *hydrope*, a *graviditate*, a *tumentibus mesenterio* et *ovario* premitur aut distrahitur *spina dorsi*, et dolet. Quando per nixus, saltus, gestationes *Spinæ luxa-* *tiones.* ponderum vis *spinæ* infertur, raro *luxatio* evenit. Potius si simul *spina* extrinsecus a tergo ictu feriatur, vertebrae run- puntur, aut distorquentur, aut subluxantur. Interdum *liga-* *Ligamento-* *menta* dilacerantur, *casa* comprimuntur aut dehiscunt, *humo-* *rum caso-* *res* effunduntur, et lentæ corruptiones *materiae* effusae et *ab-* *ruaque la-* *scensus* ad *spinam dorsi* et *osteosteatomata* fiunt. Illi lentam *cerationes.* *vertebrarum cariem*, hæc *tumores* inducunt, quibus vicinae *Abscessus et* *osteosteato-* *more* nascuntur, ex pravis tamen abscessibus ad *tumores natis* *mata, eorum-* *eroduntur* vicinae *ossium partes*. Utroque morbo post mul- *que noxae.* *tos spinæ* cruciatus *macies* et lentæ febres aegrum demum *Hinc febres* *conficiunt.* Vide de his *dissertationem inauguralem* JOANN. *lentæ et ta-* *GOTTHELF. HERMANNI de osteosteomate.* Lips. 1757. Ex *liga-* *mentis* distractis, aut ruptis, aut laxatis *exostoses* natae expli- *cantur.* Musculi quoque patiuntur, inflammantur, effusiones, *stases*, oedemata incurrunt; hinc *dolores* et etiam *abscessus.* *Exostoses.* *Luxantur* et ipsi e sua sede depulsi. Vid. Cl. POUTEAU Mé- *Musculorum* *lauges de chirurgie.* Lyon 1760. *morbi.*

LUDWIG. *Adversar. med. pract. T. I. P. IV. artic. 4.*

Omnia ex *schedis auctoris* adiecta. Vide etiam *Part. I. hu-* *ius Vol. IV. §. LXXIV.*

§. XCIV.

Nos vero, retento generico *colicae spasmodicae* no- *Colicae* *mine*, quod magis proprium et magis accommodatum cre- *SPASMODICAE* *divisio in pri-* *mariam et* *secundariam.* eam cum Cl. BONTAEO ¹⁾ dividimus in *primariam* *et secundariam.* *Primaria* illa est, quæ a causa externa *secundariam.*

Quae primaria. in ventriculi intestinorumque cavum manifesto immissa proficiscitur. Haecque duplex statui debet, *metallica* nempe, sive *saturnina* ²⁾ a metallicis, *plumbeis* praesertim corpusculis, sive pulveris, sive fumi et halitus forma deglutitis oriunda, et *vegetabilis*, sive a succis aut potibus ex vegetabili regno depromptis progenita ³⁾. Ad *metallicam*, seu potius *saturninam* referri debet *colica plumbariorum, figurorum et pictorum*, et si qua alia est ⁴⁾. Ad *vegetabilem* vero *colica Pictorum CITESII, damnoniensis HUXHAMII* ⁵⁾, *iaponica KAEMPFERI, hungarica et franconica SENNERTI, moravica et austriaca HOFFMANNI*, et reliquae similes varietates, quas vina, cerevisiae, aut acida vegetabilia, aut fructus acidi austerique faciunt. Ad *secundariam* porro, cuius causa interior est, sanguinique primario inest, spectant *arthritica MUSGRAVII et TRONCHINII, scorbutica SENNERTI et VANZELSTI* ⁶⁾, *febrilis RIVERII* ⁷⁾ et *melancholica*; quas nimirum arthritica, aut rheumatica, aut scorbutica materies, aut febrium non rite solutarum recrementa, aut atra bilis congesta in imi ventris visceribus procreare consueverunt.

1) *Dissertation. sur la coliq. du Poitou dans le Journal de medec. par Mons. VANDERMONDE. T. XV. p. 399.*

2) *Metallicae* nomen latius est, iisque arridet, qui eam oriri posse existimant a mercurio, ab arsenico, a cinnabari, a cupro aliisque metallicis rebus. *Saturnina* vero rectius nominari videtur illis, qui a solo *plumbo*, aut ab eius praeparatis *cerussa, lithargyro, minio, saccharo, extractis, tincturis* deducunt. Inter hos primas tenet SAMUEL STOCKHAUSENIUS libro *de lithargyrii fumo noxio, morbifico, eiusque metallico frequentiori morbo etc. Goslar. 1656*; qui liber prodiiit Parisiis ann. 1776 in linguam gallicam versus cum notis a Cl. GARDANO adiectis — *Traité des mauvais effets de la fumée de la litharge etc.* Nec praeteriri debet JOANN. GUILIELM. HILTMANNI *Dissert. de colic. saturnina metallurgor. Gottng. 1752.*

3) CITESIUS l. c., SENNERTUS l. c., aliique.

4) TRONCHINUS *de colic. Picton. etc. 1757.*

5) *De morb. colic. Daunonior.*

6) *De podagra 1738.*

7) *Prax. med. l. X. c. 1.*; FERNEL. *Pathol. l. VI. c. 10.* et aliorum.

§. XCV.

Metallica sive *saturnina* ceteris frequentior est, atrocior et pertinacior. Haec reliquis minus vaga est, certiorque sedem servat, nimirum intra intestinorum et mesenterii potissimum ambitum. Incipiente malo, ut habemus ex Cl. WILSONE, qui illud in plumbi fossoribus ad fodinam *Lead-Hills* saepius observavit ¹⁾, primum se exserit molestiae cuiusdam et ponderis inusueti sensus circa ventriculum, praesertim circa superius eius orificium. Quandoque etiam intestina dolore corripuntur. Quibus haec eveniunt, saliva dulcis et quasi coerulea est, veluti iis, qui plumbum ore receptum dentibus mandunt, pulsus parvus, cutis frigida et saepe viscido sudore madida, crura torpent ac vacillant, vires languent, appetitus deficit, atque assumta non digeruntur. Inter haec non raro diarrhoea supervenit, aegrisque affert salutem, dummodo brevis et moderata sit. Nam si diutius persistat, maiora mala portendit. Ita affecti nondum lecto affiguntur, sed incedunt adhuc, et ad suas res incumbunt. At si symptomata haec perseverent, aut si qui iis conflictatur, spiritibus aut liquoribus vinosis, dum stomachum plenum habet, aut paulo post plumbi tractationem se repleat, statim corripitur dolore fixo ventriculi, aut infimae abdominis partis, qui saepe ab uno illo extenditur ad alterum usque, tumque revera morbum se exserere dicendum est. Proprium *colicae metallica*e fere est, attactu et pressione nihil exacerbari. At doloris acerbitas tanta plerumque est, ut homines in desperationem fere adigantur, anxii summopere fiant, agitentur assidue, horrescant, urinas aut nullas, aut paucas et stranguriosas ²⁾ emittant. Plerumque tamen nec sitiunt, nec febricitant. Interim alvus ita adstricta est, ut non modo quicquam ab ea egeratur, sed nec clysteribus aditum permittat, et si quid arte educatur, durum id est, globosum, et stercus paene caprinum aemulatur. Haec autem summa pertinaxque alvi adstrictio cum insigni musculorum abdominalium atque umbilici in-

*Symptomata colicae metallica*e seu *saturninae* ex WILSONE referuntur. *Primus gradus sive levioris morbi initia.*

Secundus gradus, quo se morbus exserit gravior.

*Quid magis proprium sit colicae metallica*e.

Signum fere pathognomonicum alvi

adstrictio cum insigni musculorum abdominalem et umbilicalem introrsum contractione. Delirium ferox.

Coma et apoplexia. Solvitur interdum morbus parestesiarum manuum, vel pedum, vel utrorumque, vel asthmate sicco, vel ictero, aut alvi fluxu. Epilepsia gravis inter dolores supervenit aliquando, mox in paralytin desinit.

trorsum contractione colicae metallica constans et proprium signum constituit. Ceterum dum haec ingravescent, pulsus, si WILSONEM audiamus, interdum attollitur, incallescit cutis, vertigo et capitis dolor acerrimus accedunt, quibus aut stuporis quaedam species, aut delirium ferox succedit, ut dentibus se ipsos lacerent, extrema corporis convellantur, vires prouant, arteriarum micatus intermittant, finemque malis coma aut apoplexia imponat. Sed frequentius est, post diuturnos cruciatus, enormes vomitus et singultus, convulsiones, animi deliquia, artuum contractiones malum terminari (id quod intra XIV. plerumque dies contingit) manuum aut pedum, aut utrorumque *paresi*, sive motus, non vero sensus abolitione; interdum *asthmate sicco*, *ictero*, aut *alvi fluxu*. Nec rarum est, mediis in doloribus *epilepsiam* gravem, quae sine interruptione multas horas aegrum concutiat, repente supervenire. Quae ubi tandem conquieverit, non tamen putandum est, in tuto aegri res positae esse; nam saepe paulo post revertitur, atque vitam in discrimen adducit ob cerebri laesionem; aut, ea cessante, paralytica membrorum resolutio succedit, aut *colica* iterum reviviscit et saevit.

1) *Journal de médecine de M. VANDERMONDE. T. VIII. p. 135.*

2) *Ibid. p. 106.*

§. XCVI.

Natura harum colicarum adhuc obscura est.

Multa de hisce *colicarum* speciebus et cogitata subtiliter et scripta erudite sunt a clarissimis expertissimisque viris¹⁾, sed dolendum vehementer est, post innumeras editas de iis commentationes, naturam tamen earum adhuc in obscuro latitare, nec satis nobis perspicuum esse, quae potissimum pars afficiatur, qua ratione earum causae remotae agant, qualemque labem aut noxam sive fluidis, sive solidis partibus inurant. Nam cadavera eorum, qui ex hisce *spasmodicis colicis*, et praecipue *metallica* sive *saturnina* obierunt, diligentissima quamquam sectione reserata, non mul-

tum tamen lucis attulerunt. Difficillimum quippe est, in *Causa ab*
 morbis praesertim, in quibus nervi proxime afficiuntur, cau- *effectibus*
 sam ab effectibus dignoscere. Plerumque crudelissima co- *morbis,*
 lica extinctos nihil praeter *pallida, flatibus distenta exhi-* *in quibus*
bere intestina, asseverat TRONCHINIUS ²). Imo addit, Cl. SE- *nervi pro-*
 NACIUM *quinquaginta et ultra secuisse cadavera colica Pi-* *xime affi-*
ctonum defunctorum, quin ulla causae vestigia in iis po- *ciuntur, non*
 tuerit detegere; qua de re per litteras anno huius saeculi *bene distin-*
quinquagesimo ab eo certior est factus. Id etiam confir- *qui potest.*
 mat sectione anatomica, cui pictorem andegavensem subie- *Res confir-*
 cit FERNELIUS ³), in cuius cadavere *iecur, lien, ventricu-*
lus, renes sani apparuerunt, et nulla *in vesicula fellis ob-*
structio, nulla in mesenterio humoris vitiosi congestio,
nihil denique in ulla alia parte, quod tantorum fuisset
malorum causa, observari potuit. Excipit tamen eos ca-
 sus, in quibus reliquiae *februm imperfecta crisi soluta-*
rum, vel non bene curatarum, aut scorbutus, aut melan- *Exceptions*
cholia morbum fecerint, nam aliqua *vestigia in cadaveri-* *quaedam ob-*
bus inveniri concedit. Id non solum observatione ex P. MI- *oculos ha-*
bendae.
 LONIS medici pictaviensis *adversariis* adducta, qua constat
 in cadavere cuiusdam *Franciscani intestini ieiuni membra-*
nas bile aeruginosa turgentes, a se invicem distentas, non
procul ab hepate, imo flatibus distentum intestinum tuni-
casque omnes (excepta exteriori a peritoneo nata) bilis
 acrimonia *exesa, nec immune* etiam ipsum *epiploon* fuisse;
 verum duabus quoque propriis comprobare non dubitat. In
 quarum priore refert de viro *melancholico* post graves ae-
 rumnas *colicis doloribus* enecato, et *partem concavam hepa-*
tis vicinaque loca *atroviridi pigmento* tincta prosectoribus
 exhibente. In altera sectionem hominis *colicis doloribus*
scorbuticis defuncti adducit, in quo *intima intestinorum*
tunica muco orbata, atque humorum acrimonia ubique *le-*
siter exesa, eorumque, sicut etiam *mesenterii vasa vari-*
cosa et sanguine atro plena cernebantur ¹).

1) Vid. CITESIUM l. c., SENNERTUM l. c., RIVERIUM l. c.,
 CRATONEM l. c., GRASHUYSIUM, *De col. picton. tentamen,*

TRONCHINIUM *l. c.*, HUXHAMIUM *l. c.*, STOCKHAUSEN. *l. c.*, ILSE-MANN. *l. c.*, BONTAEUM *l. c.*, BACKER. *l. c.*, HAENIUM *Rat. med. P. IV. cap. 8.*, LIEUTAUDIUM *Diar. med. observat. L. I.*, MASSUET. *Dissertat. sur la coliq. dans la bibliothèq. raisonnée. T. VII. p. 144. et 279.*, et CAR. STRACKIUM, qui quas iam de colica Pictonum *diario med. Parisino ann. 1765 mens. April. p. 235. et ann. 1766 Februario mense p. 125.* inseruit *observationes*, accuratius collectas latine reddidit, et Lipsiae ac Francofurti edidit ann. 1772; nec non alios quamplures. *Ex schedis auctoris hanc auctorum seriem depromsimus. Eam fortasse contexuit, ut sibi constaret, quae loca consulenda essent, ut posset de hac colicae specie diagnosin, quam nondum absolverat, rectius decernere.*

2) *De colic. Picton. cap. XIX.*

Observationes anatomicae.

I.
WILSONIS.

3) *Plures alias inter schedas auctoris invenimus historias et observationes anatomicas, quibus haec pathologia magis innotescere potest. Quare eas adicere his libet, ne quicquam omisum a nobis sit, quod lucem legenti asferre queat.*

Cl. WILSON, a quo novimus animalia, quae vaporibus exponuntur a fusione plumbi manantibus, aut herbis ab iisdem maculatis vescuntur, in eadem incidere mala in quae homines incidunt, sequentem refert observationem. *In cane colica saturnina demortuo inceni tunicam interiorem ventriculi et intestinorum pulvere plumbi hinc illinc incrustatam; itemque leves sparsas inflammationes, quarum aliquae in gangraenam transierant, et perforatae erant. Excrementa pauca et valde dura. Tunicae intestinorum valde crassae, et eorum cavitas valde imminuta. Vid. l. c. Cl. LIEUAUDIUS (Diar. med. T. I. l. I. observ. 76.) in pictore, inquit, post colicam saturninam sputum sanguinis. Praeter pulmonum et pleurae vitia, duodenum et ieiunum ileumque hinc illinc inflammatum. Hepar obstructum, et pancreas durum. Idem (ibidem observat. 425.) in cadavere juvenis aerarii fabri colica saturnina denati observavit intestina summe tumida, maculisque lividis et nigris signata. Colon variis in locis constrictum, praeter pulmonis vitia. Idem (ibidem observat. 433.) vidit in alio colica saturnina intra triduum defuncto colon et rectum ultra modum distenta cum variis maculis gangraenosis et nonnullis constrictionibus. Observavit quoque in alio pictore (ibid. observ. 77.) eodem morbo rapti intestina variis in locis constricta et quasi strangulata cum multis maculis rubro lividis et gangraenosis, praesertim in ieiuno et ileo, quorum vasa valde tumebant; nec ab inflammatione et maculis immunem ventriculum. Item in pictore eodem dolore correpto, quem delirium et convulsiones ante mortem exceperant inventum ab illustri viro (observ. 450) epiploon gangraenosum, colon angustius, cellulis oblitteratis mere cylindricum, caecum mire distentum et putrefactum, cystide fellea atra bile turgida. Idem quoque (ibid. observ. 1772) refert de lapidario, qui post colicam saturninam et manuum contracturam, a qua reconvalescebat, coepit intumescere cum dolore, et febris lenta*

II.
LIEUTAUDII.

III.
Eiusdem.

IV.
Eiusdem.

V.
Eiusdem.

VI.
Eiusdem.

VII.
Eiusdem.

confectus est. Eius *intestina livida* invenit, *sanie* innatantia et pulmones duris tuberculis, et quasi cartilagineis scatentes, et pus passim habentes. Demum (*ibid.* l. 2. *observat.* 151.) historiam habet artificis, qui ex *colica saturnina* obiit. Huic *venter intumuerat cum tensione*. *Intestina* flatu *ultra modum distenta*, et praesertim pars *coli epigastrica*, cui promior *hepatis pars quasi contusa ecchymosin* exhibebat.

VIII.
Eiusdem.

§. XCVII.

Neque satis inter auctores constat, num *epilepsia* et *Dissensus auctorum, utrum epilepsia et paralysis sint a metastasi, aut a nervorum con-*
paralysis, in quam incidunt aegrotantes, a *metastasi*, an vero a sola *nervorum paris vagi ac intercostalis communi-*
catione, cum quibus nervi *brachiales* et saepe *crurales* *con-*
sentiunt, sit repetenda. Dolorum tamen sine ulla excre-
tione cessatio, quae accedente *epilepsia* graviore, aut *para-*
lysi contingit, epilepsiae facilis in apoplexiam transitus, diu-
turna et pertinax paralyseos duratio, et demum *tumores*,
qui gangliorum instar in metacarpo manuum et metatarso
pedum simul prorumpunt, prius videntur favere senten-
tiae. Quibus si addideris curationis rationem, qua et *para-*
lysis et *tumores* eiusmodi discutuntur, eandem adhuc pro-
babiliorem reddes. Nec obstat, interdum *paresin* huius-
modi evanescere solis remediis abdomini et interne adhibi-
tis, ut SWIETENIUS sibi suadet. Nam D. HILARYUS ¹⁾ *Nil obstat*
historiam narrat, e qua cognoscitur, *morbi materiem pa-*
ralysin manuum effecisse, qua per externa applicita medi-
camenta discussa, *dolor intestinorum* rediit, et hoc iterum
cessante, manus denuo *paralysi* captae sunt ²⁾.

SWIETENII
obiectio con-
tra metastasi-
sententiam.

1) *Observations on the changes of the air etc.* p. 182.

2) *Cl. auctor inter adversaria sua quaedam excerpta habet ex supra laudato CAR. STRACKII de colica Pictonum libello, quae huc transferenda non dubitamus, ut morbi obscura indoles clariore in luce, si fieri potest, aliorum observationibus collocetur.*

„Inquit primum STRACKIUS, an certi aliquid de causa alio-
quin dubia huiusce morbi statui possit. Alii in plumbo ac
cerussa, alii in lithargyro, stanno, cupro, antimonio crudo,
alii in diversis pigmentis, nec non in pomis, pyris,
uvis non satis maturis eam quaesiverunt. Hinc morbum alii
pictorum, deauratorum, figulorum, alii *Pirtonum vegetabi-*
lem, alii colicam metallicam appellarunt. TRONCHINIUS octo

Multiplices
causae iuxta
alios obser-
vatores.

diversas eius species numerat. JOH. GRASHUYS pro causa huius morbi habet quidquid interiorum intestinorum tunicam mucosa suo exiit. CITESIUS nomen a gente *Pictonum* deducit. Alii morbi rationem paene ignotam pronunciant.

Causa iuxta
STRACKIUM.

„Ex variis observationibus didicit praeter dictas causas aliam causam saepe occurrere, nimirum *materiam arthriticam vagam*, in *infimum ventrem delatam*, ad quam solam etiam direxit curationem; suamque methodum aegrorum historiis comprobavit. Uti autem consuevit decocto lignorum, antimonio crudo, balneis calidis ac tepidis, hisque indicationi causali satisfecit. Ad balnea suasit aquas thermales Wisbadenses, balneisque usus est ad morbum praecavendum; facile enim morbus revertitur, et tanto certius, quo brevius balnea fuerint adhibita. Quapropter ducenties et ultra balnea usurpanda iubet passim suis aegris.

Signa colicae
ab arthritico
humore.

„Inter *signa colicae ab arthritica materia* refert, quod medio in termino musculi abdominales adeo sensiles contractique sint, ut se erigere aeger nequeat, sed incurvo corpore et inclinato capite esse debeat. Idque pathognomonicum habet.

„Non negat causas supra memoratas interdum colicam efficere, nunquam vero *colicam pictonum*. Refutatis itaque, qui colicam *Pictonum saturninam* appellant cum CL. MUSGRAVE colicam *arthriticam* esse asserit, atque *antimonium*, quod inter causas huiusce colicae recenset TRONCHINIUS, esse optimum contra *colicam Pictonum* remedium.

Diagnosis.

„*Diagnosis* vel facilis est, vel difficilis. Facile ab unoquoque cognoscitur, si dolor vagus aliarum atque aliarum partium externarum et internarum fuerit, et demum in abdomen se materia arthritica contulerit.

Quando ar-
thritica ab
aliis distin-
guatur.

„Difficilius distinguitur, ubi dolor ab initio ventrem occupat fixus, num colica a *materia arthritica* sit, an ab alia causa. Distinguitur tamen per has notas. Si nulla alia causa verosimilis sit, quae cum arthritica comparari possit, si dolor vehemens adsit, si sine febre et inflammatione cum pulsu parvo et lento, si cutis color flavus olivaceusque, oculi concavi, limbo plumbeo cincti sunt, si dolores articulares aeger sensit, si etiam citam et magnam membrorum lassitudinem atque defatigationem post labores exiguos cum asthmate, si debilitas somno finito maior est, quam ante eum, si sudor cutim urit, eaque papulis miliaribus referta est, si in faciei, atque potissimum frontis cute titillatio erronea, ubi aeger manu admota nihil sentit, urina tenuis cum stranguria urens, seu subalbicans veluti serum lactis cum sedimento albo laeve, pingue mittitur. Haec signa arthriticam causam auctori videntur denotare.

Prognosis.

„Exitus materiae *arthriticae* fit vel sudore, vel urina, vel abscessu, rarissime per alvi fluxum; interdum alternatim per sudorem et urinam, quibus interveniunt abscessus.

„Bonum est, si intenditur dolor circa XV. balneum. Morbi tunc materia movetur, ac febris accedit.

„Singulare est *arthritidis* vagae miasma, atque ab omni alio morbo diversum, ac epidemicum esse potest. Non convenit

cum *podagra*. Nodi enim podagricorum si ulcerantur, albam, calcaream, inodoram materiam effundunt, contra arthriticorum materiam nigram, putridum ovi vitellum olentem, sine tamen ossium carie. Hinc vesicantia et foniculos etiam laudat.
Ex comment. Lipsiens. Vol. XVIII. P. IV. p. 674.

§. XCVIII.

Colicae demum *stomachicae, pancreaticae, mesentericae, hystericae, nephriticae, hepaticae*, quibus notis distinguantur, dicendum modo superest. Quod attinet ad primam; de illa iam satis in *capite VI. de gastrodynia* actum est. *Pancreatis, uteri, mesenterii*, tam peculiaris sedes, natura, moles, quam morbi, sive chronici, sive acuti earum partium, medico perdiligenti tantum luminis asferent, quantum ad harum partium dolores a reliquis dignoscendos opus est. *Hepatica* a ceteris non solum sede, verum etiam *ictero*, *urina crocea*, *faecibus alvi albicantibus* crebraque reversione distinguitur. *Nephritica* renum alterutrum constantissime torquet, iuxta ureteris longitudinem exporrigitur, testem sursum retrahit, cruris stuporem infert, urinae interdum difficultatem inducit, aut certe tenuem et claram primum, deinde subsidentem ac arenulis refertam demittit, a cibo fere non ingravescit, vomitu aut deiectione non sublevatur; contra vero in intestinorum dolore evenit, in quo etiam *urina iam ab initio crassior et saturatio*r meitur.

Colicae reliquae.

STOMACHICAE signa.

PANCREATICAE, HYSTERICAE, MESENTERICAE.

Signa HEPATICAE.

In doloribus intestinorum urinae quales ab initio.

P r o g n o s i s.

§. XCIX.

Colica, quamquam cito saepe et ad salutem terminatur, malum tamen non est contemnendum. Quandoque enim dolorum atrocitate et continuatione citissime vitam adimit. Prava indicia sunt febris, vigiliae, alvus pertinaciter compressa, virium exsolutio, singultus, vomitus, ileus, extremorum refrigeratio, sudor frigidus, syncope, convulsio, epilepsia. Plerumque in inflammationem gangraenam-

Prognosis generalis.

Prava signa.

De unaquaque

*quid sperandum, quidre-
timendum.*

*Quae minus
periculi ha-
beant.*

*In vermino-
sa indigita-
tionis pericu-
lum.*

*Magis peri-
culosae coli-
cae quatenus
sint.*

*Hippocrati-
ca progno-
stica.*

*Quid ab epi-
lepsia timen-
dum.*

*Quando coli-
ca reverti
possit.*

*An paralysis
quae tollit
dolores, bona
undecumque
sit.*

*Signa fausta
in colicis a
metastasi,
scorbuto,
rheumate ac
perspirabili
retento.*

*Alia signa
bona.*

*Indigita-
tionum exem-
pla.*

que intestinorum, aut sphacelum desinit ¹). *Flatulenta*, nisi a musto aut aliis rebus fermentescentibus oriatur, minus periculi habet, uti etiam *hysterica*, *hypochondriaca* et *convulsiva* simplex, *pituitosa*, *accidentalis* ab ingestis et *verminosa*. In hac tamen timor est, ne intestina perforentur, aut intro suscipiantur, atque indigationibus strangulentur ²). *Biliosa* et *inflammatoria* periculosiores sunt. Sed his adhuc *spasmodica*, *pictaviensis*, *metallica*, sive *satur-nina* magis timenda. Et *lumborum*, inquit AUCTOR COACARUM ³), ac *tenuioris intestini diuturni dolores*, et *circum praecordia labores*, in aegris una cum febre cibum fastidientibus, eos dolor intensus ad caput progressus non sine convulsionis specie celeriter interficit. Ex HIPPOCRATE item habemus: *Quibus tormina, et circa umbilicum dolores, et lumborum dolor est, qui neque purgante, neque aliter*

solvitur, in hydropem siccum firmari ⁴). Epilepsia super-veniens ut plurimum lethalis est. Curato et discusso dolore, si alvi excrementa aegre et globulorum instar tantum prodeant, timendum est, ne *colica* brevi revertatur. *Paralysis* vero colicos dolores tollit quidem plerumque, et proximum vitae periculum amovet; sed diuturnam aegritudinem, a qua difficillime sanantur aegroti, accersit. Bonum est in ea, quae a *metastasi arthritidis, rheumatismi, scorbuti, perspirabilis* retenti profluit, ad artus dolores redire, maculas ad cutim erumpere, sudoribus largis, calidis, aequalibus corpora perfundi. Interdum etiam solatio est narium, haemorrhoidum fluxus, aut diarrhoea.

1) Hic locum obtinent aphorismi HIPPOCR.: *Ab ileo vomitus etc.*, et *Ileus cum apprehenderit etc.*, quos ultimo loco inter notas §. LXXXVI. ex sch. auct. retulimus.

2) In defuncto ex *colico* dolore aliisque symptomatibus invenit ROBINIUS *coecum* intestinum intra *colon* susceptum. Ab eodem inventum quoque est intestinum *rectum*, quod parte sua superiore receperat intra se *coecum* et *coli* partem non minimam; similemque observationem habet LEBLANCUS. In utroque autem aegro aderant praeter dolores ventris acutissimos etiam vomitus. *Mém. de l'académ. de chirurg. T. XI. p. 353. 354. Ex sch. auct.*

3) Num. 317.

4) Aphor. XI. sect. IV.

C u r a t i o.

§. C.

In quavis *colica* ea medendi ratio optima erit, quae *Indicationes*. indicationibus respondeat. Indicationes vero non aliae esse possunt, quam quae in capite de *gastrodynia* (§. LXXX.) expositae sunt, neque alia quoque *curatio* (§. LXXXI.). Praesente igitur dolore sanguis mittatur e brachio, pede, *Curatio ge-* haemorrhoidibus in *colica sanguinea, inflammatoria, cata-* neralis coli- *meniali*, itemque in *biliosa* ¹), aut alia quacunque, si fe- *V. S. quibus* bris, calor, sitis, pulsus magnitudo inflammationis suspicio- *colicis ido-* nem iniiciant. Cucurbitulae etiam tam siccae, quam scari- *nea.* *Cucurbitulae* ficatae abdomini, imo plantis pedum revellendi scopo adli- *tam siccae* beri interdum possunt, imprimis in *spastica*, in *sanguinea*, *quam scari-* in *inflammatoria*. His utique praesidiis spasmus quoque, *ficatae.* *Vesicantia.* quo intestina aliaeque partes afficiuntur, solvi solet. Imo *Vesicantia.* in his PRINGLIUS ²) vesicantium dolenti loco applicitorum utilitatem commendat. Dolorem vero proximius respiciunt *Dolorem le-* olea blanda et recentia magna copia et saepe intrinsecus *nientia quae.* data, enemata, quae molliunt, iniecta, fomenta, cataplasmata, linimenta ventri calide imposita, semicupia tepida, maxime in *biliosa* ³), et remedia ex opio parata, causa praesertim materiali aut subacta, aut imminuta. Causam vero materia- *Causa ma-* lem corrigere, ac cito blandeque evacuare omni ope niten- *terialis corri-* dum est. *genda et eva-* *cuanda.*

1) In *adversariis auctoris* manu DALLARMII, eius quondam discipuli et amici carissimi, adnotatum legimus, se vidisse Faventiae in praenobili viro S. Stephani P. et M. equite huiusmodi *colica* summa cum *aurigine* affecto, quae eum saepe corripuerat, ab auctore nostro pluries sanguinem missum esse felicissimo curationis eventu, quin tamen aeger vel in *colicam*, vel in *auriginem* iterum inciderit. Haec ideo adicere libet, ut intelligatur, quantum a vero aberrant nonnulli, qui statim ac aegros *aurigine* corripiti vident, exclamant, a sanguinis missione omnino esse abstinendum. Sit modus in rebus. Vide

tamen §. CCXLIV. Vol. I. de febribus, quando cautius eadem administranda sit. Vide etiam *Trattato delle acque di s. Christoforo* p. 82. et seqq.

2) *Malattie d'armata* P. III. c. 2. §. V.

3) ROBERT. PORTER. *Essais de méd. d'Edimb.* T. III. p. 438.

§. CI.

Curatio FLA-
TULENTAE et
CONVULSIVAE.

BILIOSAE.

STERCORA-
LIS.

Compressio abdominis plerumque levamen affert in *flatulenta* et *convulsiva*; et praeterea spiritus nitri dulcis ab HARTMANNO et HOFFMANNO laudatur, liquor anodynus mineralis, costoreum, et chamomillae decoctum aliaque carminativa dicta. Remittente dolore, quod post enemata injecta incidit, alvus etiam duci utiliter potest lenienti remedio, rhabarbaro, manna, pilulis BECHERI aliisque similibus. In magna vero aëris rarefacti copia ac ventris inflatione saepe potus frigidae, et frigida extrinsecus admota aërem cōercet, et fibras ad reagendum impellit¹). Haec quoque non raro profuit in colica *biliosa*²); cui conveniunt etiam subacida, serum lactis, tamarindorum et cassiae dilutum aliaque huiusmodi. Ad aestum compescendum, lentorem humorum attenuandum, bilisque acritatem *alcalinam* corrigendam aquae potui dandae instilletur etiam succus aliquis acidus ex iis, quae vegetabilia suppeditant, uti succus limonii, mali citrei aut aurantium, syrupi ex his parati, itemque berberum, rubi idaei etc.; nec, ubi morbus urgeat, a valentioribus abstinendum pluries a nobis propositis. In colica *stercorali* purgandum validius est. Non solum clysmatibus leniter stimulantibus, et praecipue ex decocto foliorum *tabaci*, verum etiam manna cum oleosis copulata, oleo ipso lini aut olivarum propinato alvus ad excretionem sollicitanda erit. Nonnulli (ut REDIUS) aquam *tectuccianam*, sal anglicum magna aquae copia dilutum, imo cathartica per opii additionem mitigata proponunt, ut SYDENHAMUS, RIVERIUS³) et HUXHAMIUS⁴), quotiescunque levioribus non obediat malum. GALENUS opio aloën addebat. HOFFMANNUS testatur, se novisse homines plebeios atroci inte-

stinorum dolore vexatos, qui *fumi nicotianae deglutitione in instanti liberi evaserint* ⁵). Ad *piluitosam* incidentia, PITUITOSAE. salina, gummi ammoniacum, semina dauci cretici, sapo venetus commendantur; sed prudentis tantum medici est iisdem opportune uti. SCARDONA aquas thermales acidulas ardente sirio epotas, in hac colica etiam inveterata ceteris omnibus anteferebat; *remedium enim est, inquit ipse, infinitis propemodum experimentis comprobatum* ⁶). Quae *vermibus* VERMINOSAE. opportuna sunt, alibi (*cap. X.*) speciatim tradentur. *Me-* Et a meconio, *conium* vero, aut *luc coactum* in infantibus blande educunt lacte coacto, *mellita, oleosa, syrupus cichorei cum rhabarbaro, fel bo-* dolore par- *villum ventri illitum, clysmata, suppositoria. In partu, si* tus tam vero, *dolore vires deficient, dantur aquae cerasorum nigrorum, melissae, citri, aurantiorum, vel panis tantillum vino me-* quam spurio *raco intincti, ius carniū etc. Si dolores spurii fuerint, aliquid laudani liquidi adiacere oportebit. Si hystericismus* HYSTERICAE. accedat, sufficiet aquis supra laudatis addere guttas aliquot tincturae succini vel castorei et cochleatim dare. In colica *hysterica, quae sedem in utero habet, aut partibus eidem adsitis, Cl. ROCHARDIUS, exemplis adductis curationum, contendit* ⁷), clysteres ex frigida singulis bihoriis iniectos, et lintea ex eadem expressa ventri apposita omnem absolvere curationem ⁸).

1) GALENUS in dolore a *flatulento spiritu* orto miraculi instar tollit *cucurbitulam siccam cum multa flamma* impostam. Vid. *meth. med. lib. XII. Ex sched. auct.*

2) Vid. GALEN. *l. c. cap. VII.*, TRALLIANUM *lib. X. p. 175.*, AVICENNAM *lib. III. tractat. III. cap. 6.*, AMATUM LUSITAN. *lib. I. centur. 2., lib. II. cent. 46.*, LUDOVIC. SEPTALAM *Ani-* *madvers. med. lib. VII. sect. 81.*

3) *Observat. med. centur. I. observ. 1.*

4) *De morb. colico Damnouiorum*, ubi sequentem formulam praescribit.

Rec. *Cochl. min. a scrup. j. ad semidrachm.*

Calomelan. scrup. ss.

Laudan solid. gran. j.

Olei caryophyll. gutt. j. M. F. pil.

Post duas tresve doses praecipit sennae infusum, aut mannae decoctum sumendum. Interdum quoque oleum ad unc. vj. etc.

5) SWIETEN. §. 964. p. 131.

6) *Lib. III. p. 64.*

7) *Journal de méd. Janvier. 1772. p. 42.*

8) In *colica menses suppressos* secuta RIVERIUS et HOFFMANNUS commendant *aquae frigidae* usum, SWIETENIO teste (*l. c.*), imo clysteres ex eadem iniiciendos proponunt. *Exsch. auct.*

§. CII.

Curatio
SPASMODI-
CAE.

Emollientia
tam intrinse-
cus quam
extrinsecus
adhibenda.

Quando an-
tiscorbuticis
et diaphore-
ticis uten-
dum.

Balnea.

Revellentia.

Colicae ab
ACORE et PO-
TU ACIDORUM
quae medela.

Iam vero de *colicae spasmodicae* curatione, in quam saepe transeunt praecedentes, aliquid dicere oportet. In hac generatim exulent acria quaecunque, cathartica, et generosiora artis adiumenta¹). Sanguinis missio vix locum obtinet. Quae molliunt et mulcent, quae spasmos tollunt tam intrinsecus, quam extrinsecus praestantiora sunt, ac demum quae blande et epieratice alvum solvunt. Non desunt tamen exempla, quibus usus fumi *tabaci* in anum insufflati probetur. HAENIUS quoque in *colica clausa* dicta, sive *pictaviensi* feliciter alvum pertinaciter clausam a XIV. diebus reseravit in quodam *studioso homine* infuso saturatissimo purgante, cuius dosis *quadruplicem dosin consuetam* excedebat, sed per vices dato, donec alvus liquaretur²). Contrariam item huic antispasmodicae methodum laudant DUBOISIUS et BOUVARTINIUS, qua citissime curatas eiusmodi colicas testantur, quaeque in acribus consistit clysteribus, emeticis et catharticis rabidioribus, interpositis tamen opiatibus. Si a *retento perspirabili*, si ab *imperfecta februm crisi*, si ab *arthritide*, si a *scorbuto* oriatur, diaphoretica atque antiscorbutica adhibenda, uti decocta ex lignis, praesertim *sassafras*, iura viperarum, succi ciclioreacei et vegetabilium antiscorbuticorum, balnea, aquae thermales, frictiones, epispastica. Ubi vero *acor austerus* et *acidus potus* morbo originem dederint, sudorifera ex camphora opio mixta, et infuso salviae, alcalica, absorbentia, iura carniurn, gelatinae, et demum chalybis usus convenientissima sunt. Aliis incassum adhibitis, SYDENHAMIIUS pondere semidrachmae pro dosi efficax expertus est balsa-

num peruvianum. China commendatur a PETRO DE RO *Quae SATUR-*
TUNDIS ³), ad drachmam unam pro dosi sumenda ⁴). At *NINAE.*
in *metallica* sive *saturnina*, si recens causa sit, vomitu sta-
tim eiicienda est, dato postea paregorico. Morbo iam in-
valescente, praeter fots emollientes, balnea et communia
dolori leniendo idonea (§. C.), opii vim experiri licet, quod
dimidii grani pondere cum camphorae tantillo singulis tri-
horiis dari potest, donec dolor conquiescat. Post huius
effectum alvus eccoproticis laxetur, deinde demulcentia,
oleosa, serum lactis, lac asinum, equinum, caprillumve
dintissime cum sapone veneto usurpentur. Hic quoque ve-
sicantium et sinapismorum usus mira praestat ⁵). Cl. BIS-
SETUS, praeter modo indicata, bezoar minerale, sive ter-
ram siculam absorbentem praesentissimum esse remedium
contendit, si ab arsenicalibus halitibus aut moleculis mor-
bus fiat. Landat etiam vesicatoria anteriori et supernae fe-
morum parti apposita. Salivatione ingruente, laxans prae-
scribit ex semuncia salis cathartici cum seminibus anisi vino
decocta ⁶).

1) GESNERUS, PLATERUS, SPIGELIUS, SENNERTUS, WEP-
FERUS, WILLISIUS, HOFFMANNUS, BORDEVIUS, HAENIUS, SAU-
VAGESIUS, LUDWIGIUS etc.

2) *Rat. med. P. I. p. 4. et plura ibidem P. III. cap. II.*
De colic. Pictonum, quae videsis.

3) *De vict. rat. in febr. acut. etc. p. 167.* Hunc corticem *Colicae* PE-
quoque commendari ab aliis in *colica periodica*, testatur SWIE-
RIODICAE cu-
TENIUS §. 757., ab aliis autem theriacam, ante paroxysmum *ratio.*
exhibitam. BAGLIVIVS vero docet, hanc colicam *periodicam*
brevis feliciterque evanescere, si tribus horis ante invasionem
dolorum lene purgans detur; imo quoscunque alios dolores
per repetitas eiusmodi purgationes cessare. *Ex sch. auctor.*

4) Boni effectus, quos in quadam *colica Pictonum* gravis- *Aqua benedi-*
simis convulsionibus stipata peperit *aqua benedicta* RULANDII *cta* RULANDII.
per clysterem in anum immissa, accensentur a *Diario medico*
Paris. mens. Jun. ann. 1782. p. 92. Ex sched. auct.

5) Cl. TISSOTIUS (*epist. var. argum. p. 152.*) tres habet *Methodus*
historias *colicae a plumbo* ortae, ad cuius curationem balneum Cl. TISSOTII
aquae tepidae, enemata ex olei olivarum et syrupi althaeae *in curanda*
ana uncia j. et semis commendat. Potui aquam syrupo althaeae *colica satur-*
medicatam praescribit. Pro eccoprotico eius formula est: *nina.*
Rec. Seri lact. lib. j., in quo solv. mann. ping. unc. j. β.
Colatur. add. syrup. alth. unc. j., nitri gr. xij., syrup. pa-

pae. alb., et aq. naphae ana drachm. j.; cuius unc. ij. omni h. quadrante calide sorbillentur. Cataplasmata mollientia ventri applicat, vapores aquae calidae in anum immittit, et enemata mollia singulis bihoriis. *Mann. unc. j. in multo sero solutae* dari iubet tertia quaque hora, donec purget. Audet dare usque ad octo et amplius mannae uncias (*Ibid. observ. 2.*). *Ex sched. auct.*

6) *Medical essays and. observent. etc. p. 92.*

De huius colicae curatione legi meretur dissertatio Cl. V. JO. ALEX. EQ. BRAMBILLAE, *quae inserta est T. I. actorum acad., caes. reg. Josephin. med. chir. pag. 152. Editor.*

§. CIII.

Curatio
PARESEOS.

Paresi vero, quae colicam saepe excipit, atque a TRONCHINIO occalescentiae nervorum, ac mucii lymphaeque roscidae, qua alluuntur, defectui tribuitur, si recens et curabilis adhuc sit, medendum est immittendo membra in ventres animalium modo mactatorum, eorum fricatione frequenti et repetita, balneis thermalibus, nervinis linimentis, volatilibus applicatis aut assumtis, gummi ferulaceis, balsamo de Mecca, vel peruviano mixtis, parva dosi diuque intrinsecus datis, vino leni canariensi, malvatico, graeco, maderensi parca manu usurpatis, coelique mutatione. Tandem etiam electricitas tentanda est, ut vis nervea et muscularis excitetur ¹). Auro etiam fulminante quosdam ab hoc morbo liberatos, memoriae prodidit PETRUS ORTESCHIUS in suo *diario medico* anni 1763, *Venetis edito num. XI. 2*). Reliquis colicarum differentiis ea opponuntur, quae causarum varietatibus conveniunt ³). Reditus porro morbi, qui *prae ceteris*, ut SYDENHAMIVS ait ⁴), *ex natura sua recidivus est*, impediatur religiosa victus ratione, animi tranquillitate, equitatione, aequali pedum et ventris servato tepore, potu aqueo, acidulis, lacte, peruviano cortice, imprimis si *colica* periodice recurrit, chalybe, alvique lubricitate.

Curatio aliarum colicarum.

Qui impediatur colicae reditus.

1) *Apposite ad paresin, quam colica saturnina infert, electricitatis ope tollendam multa ab auctore proposita invenies in nota 3) ad §. CXLII. et sequenti §. CXLIII. Vol. III.*

Pareseos curatione ex
TISSOTIO.

2) TISSOTIVS (*loco citato*) ad paresin tollendam, aperta prius alvo, admovet *emplastrum de galbano crocato*. Bolos

ingerit ex camphora, benzoë, assa foetida, pulvere radices helenii et balsamo peruviano, saccharo contrito; superbibendum suadet decoctum ex bardana, sassafra et althaea, partes inferiores succinatis perficari, diaetamque eupeptam praescribit. *Ex sched. auct.*

3) Curationem colicae *ictericae, hepaticae, mesentericae, pancreaticae* sequentibus videsis capitibus XIII. XIV. XV., in quibus de singularum earum partium morbis speciatim agitur. *Editor.*

4) *Sect. IV. cap. 7.*

CAPUT VIII.

DE ALVO ADSTRICTA AC ILEO.

§. CIV.

Longa nimis faecum in intestinis, praecipue crassioribus mora *alvus adstricta* vocatur; si vero faeces penitus sistantur, etiam *obstructa*. Difficilis itaque, aut prorsus impeditus excrementorum ad anum descensus, atque ab eodem exitus causam constituit morbi proximam. Id autem fieri potest vel a languido intestinorum motu, ab eorum laxitate, dilatazione, atonia, insensibilitate, vel contra a nimio sensu, irritabilitate, spasmu, a bilis, succique pancreatici defectu, a muci, quo deliniuntur intestina, inopia, a nimia vasorum lacteorum inhalantiumque absorbendi potestate, a neglectu stimuli naturalis, quo ad egerendum invitamur, ab immixta alicubi intestinorum amplitudine, quam induxerit vitata ab ortu, aut a morbis structura, tumor in ipsis obortus, contractio spastica, tunicarum crassities, aut induratio, coalitus, compressio, intestinorum complicatio, indigitatio¹⁾, eorum in angustum locum introitus, uti in hernia abdominali, umbilicali, crurali, inguinali, et ipsius scroti²⁾.

1) *Indigitatio*, sive *incagnatio* intestinorum (nisi admodum magna et simul arcissima) non potest, iudice MOR-

GAGNIO, *ileum* inferre. HALLERUS etiam, cum tam in homine, quam in brutis viderit huiusmodi invaginationes sine inflammatione, et facile per emissum flatum solutas, existimat ex hac causa *ileum* minime oriri; *nimis enim*, inquit, *mobile et sponte solubile malum est, sique grave foret aut funestum, cum suam declararet inflammatione sua, et ciborum ad eam partem intestini collectione, quae intro suscipitur. Verum neutrum mali genus unquam cum invaginatione coniungi vidi.* Opusc. patholog. observat. XXVII.

2) MORGAGNIUS (*epist. XXXIV. n. 35.*) *volvulus*, inquit, *vel ab hernia etiam exigua, vel ab inflammatione intestinorum, vel a susceptione eorum, sed dura, coarctata et prorsus onuem viam praeccludente, vel ab aliis causis occludentibus, vel vehementer stimulantibus repetitur.* Ex sch. auct.

§. CV.

Causae proëgumenae.

His quasi viam pandunt temperamentum calidum et siccum, perspiratio aucta, potus parcus, alimenta viscida, sicca, austera, medicamenta adstringentia, saturnina, irritantia, cathartica acria, salitorum abusus, vita sedentaria, affectio hypochondriaca ac hysterica, obstructions tumoresque imi ventris, cerebri et spinalis medullae vitia, unde intestinorum paralysis¹⁾, vesica urinaria quocunque modo distenta, graviditas, uteri, vaginae, intestini recti tumores, haemorrhoides coecae et non pauca alia²⁾.

1) RUYSCHIUS inter causas *ilei* refert *intestinorum tenuium paralyisin.* Ex sched. auctor.

2) *Ex crescentiam* singularem in *crasso intestino* genitam, et deinde excretam, veramque *hydatidem* referentem, quae alvinam deiectionem difficiliorem reddidit, legimus a MECKELIO observatam. Vid *Mém. des scienc. et bell. lettr. de Berlin, ann. 1759. p. 36.* Ex sch. auct.

§. CVI.

Definitio ILEI.

Si vero alvus ita obstruatur, ut ea, quae per anum excerni deberent, sursum redeant, ac vomitu expellantur, cum plerisque recentissimis morbum *Ἐλϰον*, sive *iliacam passionem*, sive *volvulum*, sive etiam, ut barbari loquuntur, *miserere mei* appellamus. Nos enim ab eorum sententia discedimus, qui nomen hoc *iliaco dolori*, aut *intestinorum* inflammationi tantum tribuunt. Largimur quidem,

Distinctio inter ileum, et dolorem iliacum, et

in *ileum* haec mala saepe desinere, aut cum *ileo* non raro *intestinorum inflammatio-*
 coniungi, non tamen hanc unicam et perpetuam *ilei* cau-
 sam esse contendimus. Praeterea in his affectibus *comitus*
 ac *alvi* pertinax *obstructio*, quae *ilei* naturam constituunt,
 neque semper, neque adeo ut in *ileo* urgere videntur.

§. CVII.

Hinc patet, causam eius proximam esse inversum, sive *Causa pro-*
 antiperistalticum *intestinorum* motum, quem efficit quidquid *xima ilei.*
 in tubo intestinali vim contractilem alicubi ita auget, ut
 actio eius peristaltico partium superiorum motui praevaleat,
 aut inferiorum motum debiliorem superior, utpote validior, *Causae oc-*
 ad se adducat et trahat, aut demum quidquid ita itinera *casionales.*
 claudit, ut alimentorum et faecum versus inferiora progres-
 sus impediatur, uti spasmus vehemens et convulsio, vomitus
 violentissimus, inflammatio, colici atque iliaci dolores,
 et eorum causae alibi (§. LXXXVI. et LXXXVII.) expo-
 sitae, omnesque paulo ante (§§. CIV. CV.) recensitae ¹).

Cl. MECKELIUS invenit in muliere, quae saepius de dolore *Exemplum*
 in dextra regione iliaca conquesta fuerat, quaeque post ca- *ilei a calculo*
 sum ab alto dolorem vividiorem percepit, vomituque bilioso *in ieiuno.*
 per tres dies vexata decessit, calculum in ieiuno intestino
 e latere dextrae regionis umbilicalis, quo totum eius cavum
 obturabatur ²). Mira quoque LIEUTAUDII observatio est ³) *Aliud ver-*
 de puero, in cuius cadavere circa finem intestini ilei ver- *minum clau-*
 mes in glomerem pugni molem aequantem, ac intestinum *dentium*
 prorsus claudentem reperti sunt convoluti. *prorsus*
ileum inte-
stinum.

1) Huc transferantur allata superius (§. XCIX. in nota 1)
 ex ROBINO et LEBLANCO *indigitationum* exempla. Item ob-
 servationes MORGAGNII de causis *volvuli* in nota ad §. CIV.

2) *Histoir. de l'acad. roy. des scienc. et bell. lettr. de*
Berlin 1759. p. 35.

3) *Histor. anat. med. T. I. p. 75.*

D i a g n o s i s.

§. CVIII.

*Signa alvi
adstrictae.
Signa ilei.*

Alvus adstricta aut *obstructa* (§. CIV.) ex aegri imprimis sermone innotescit. Neque difficilis cognitu est *ileus* (§. CVI.). In hoc enim vel nihil omnino deicitur, vel certe paucum et tenue. Paucum autem excerni potest, si intestinum non sit penitus clausum, et si ab appendiculis, quae in ileo saepe reperiuntur, in annulum musculorum abdominalium delapsis ibique strangulatis *ileus* morbus oritur. Abdomen dolet, praesertim circa umbilicum, tenditur, intumescit, ac inter initia cibi fastidium et nausea est, deinde vomitus primum cibi potusque, tum etiam bilis aliorumque humorum, ac demum putrium, foetidarum faecaliūque materierum inter summas anxietates et crebra animi deliquia. Neque interdum ab his abest febris, enteritis, singultus, convulsio, delirium et reliqua exitialia symptomata,

*Faeces, quae
infra obstaculum sunt,
et suppositoria et clysteres ex ore
reddi possunt.*

quibus atrocissimas colicas stipari docuimus. Nec tantum excrementa, quae supra obstaculum colliguntur, aut collecta antea esse possunt, verum etiam quae infra illud reperiuntur, imo clysteres et suppositoria ipsa per os interdum redita narrantur. Quod ultimum, etsi non satis certis observationibus fortasse innitatur, non tamen omnem prorsus fidem superare nobis videtur. Si enim causa motum intestinorum invertens eiusmodi sit, ut eorum capacitatem nullibi occludat, aut non omnem deleat, aut, si etiam occludat, id non recto intestino sit (nam nulla universi intestinorum canalis pars inmemis esse potest ab eiusmodi malo, ut sectiones cadaverum ¹) demonstrarunt); poterunt sane in anum iniecta ab inverso intestinali motu sursum abripi, aut vi adacta ultra obstaculum transvelli, et sursum libere ferri.

*Quomodo
explicetur.*

*Nihil officit
calentia
BAUHNI.*

Sed inquires, impedimento erit valvula coli. Minime quidem. Nam haec ita ab irruentibus materiebus, quae e colo in ileum ingredi nituntur, urgeri potest, ut cedens et deducta liberum iis aditum relinquat, sicuti iniectiones ope

machinae hydrostaticae in anum, ac ex ore prodeuntia ostendunt ²). Adde, interdum *valvulam ipsam rumpi et dilacerari*, ut docet HALLERUS ³).

1) In *ileo* intestino ipso inveniuntur stercora; ergo non omnia in crassis (HAENIUS *Rat. med. T. II. p. 76.*). Non ergo stercorum vomitus ex *colo*. In tenuioribus etiam MORGAGNIUS faecum globulos observatos narrat (*Epist. anat. med. XXXIX. n. 29.*). *Ex sch. auct.*

2) Dilatio *ilei* et *coli* diducit valvulae BAUINI hiatum, ut intestinorum inferiorum faeces vomitu reddantur. *Ex* HAGENOTTO *et* HAENIO *Rat. med. T. II. p. 71. et 72.* Hanc autem valvulam clysterum vi superari asserit HALLESIIUS *experiment. XXV. haemostat. n. 1. et 2.* Negat id in vivis evenire HAENIUS *ib. p. 73.*, nec facile admittit MORGAGNIUS. Sed alibi (*P. III. c. 2. p. 104.*) ex HAENIO ipso constat, in vivis quoque superari, quod SWIETENIUS etiam affirmat, ubi de *hydroconstatere*, sive de machina hydrostatica MARTINII loquitur. *Ex sch. auct.*

3) *Prim. lin. physiolog. n. 738.*

P r o g n o s i s.

§. CIX.

Alvus adstricta quando viscerum fortium et ingentis absorptionis effectus est, nullam creat molestiam, etsi sex, *Alvus adstricta modo nulla, modo gravia mala infert.* octo vel plures dies non deiciat. Alioquin magna et gravia mala, cibi fastidium, ventris tensionem, anxietates, capitis dolores, vertigines, haemorrhoides, colicas, enteritidem, febres putridas, ac demum *ileum* ipsum. Imo dum magna spiritus contentione nititur homo alvum exonerare, si juvenis sit in haemoptysin, si aetate provec-
Ilei prognos.
Qui lethalis.
Qualis non.
Quaenam mortem praenuncient.
 tior aut senex in apoplexiam ex vasorum cerebri ruptionem incidere interdum cernitur. *Ileus* incerti plane exitus morbus est, plenusque discriminis. Qui ab inflammatione aut gangraena oritur, lethalis semper est; ut plurimum tantum qui ab hernia, nam interdum eam curari, testis est GARENGEOTUS. Minus periculi habet, qui a faecibus induratis manifestisque aliis causis facile auferendis progignitur. Ubi iam male olentia vel nigra per os eiciuntur, vel debilitas

summa, oris foetor, pulsus exilis, convulsio, refrigeratio, pallor praesto sunt, mortem mox imminere significatur.

An vomitus stercoreus lethalis.

Senes plerumque moriuntur.

Vomitus stercoreus passim lethalis audit. Exempla vero contraria GARENGEOTUS ¹⁾, BONETUS ²⁾ et MATTHAEUS DE GRADIBUS referunt. Senes plerumque momento temporis euecantur; inter vomendum enim suffocati saepe deficiunt. Lethalem *ileum* cum sectione cadaveris vide in *commentariis de rebus in scientia naturali et medicina gestis* ³⁾.

Ileus cum vomitu stercoreo, si alvi fluxus accedit lethalis.

Item accedente ventris tumore, ischuria, stranguria, convulsionibus, maculis rubris et nigris.

Gravi *iliacae passioni* si superveniat *alvi fluxus*, paucis post horis moritur homo, nam sphacelata sunt omnia; hinc lethalis fluxus ⁴⁾. Idem timendum, si ventris tumor accedat, et flatus copiosi pedendo exeant ⁵⁾. Si supervenerit urinae suppressio, stranguria, ventris inflatio, aut convulsiones, malum est lethale ⁶⁾. Gangraena quoque terminari inflammationem intestinorum significant maculae rubrae aut lividae, quae extrinsecus interdum apparent ⁷⁾.

1) *Académ. de chirurg. T. I. P. III. p. 355.*

2) *Med. septent. T. I. lib. III. sect. XV. cap. 29. 30. 32.*

3) *Tom. XVIII. p. 400.*

4) FELICIUS *Dei presagio medico p. 164.*

5) BAGLIVIVS *in appendic. ad dysenter.*

6) *Id. ibid. l. I. c. XIII.*

7) SWIETEN. §. 848.

C u r a t i o.

§. CX.

Quomodo alvus adstricta solvenda sit.

Victus et potus ratio. Alvi ductentia.

Alvus adstricta aut etiam *obstructa* solvenda erit iis quidem adiumentis, quae causarum (§§. CIV. CV.) cognitio indicabit. De quibus cum passim in superioribus actum sit, non convenit iterum dicere. Universim proderit exerceri, perfricari abdominis regionem, victu humido et lubricante uti, largius bibere, oleribus et pane rudiori ac nigricante vesci, subinde aliquid mellis, aut mannae, aut cassiae, aut salium mediorum assumere, et clysmata saepius adhibere.

REDII me-

REDIUS ante epulas quartam unciae partem ex pulpa cassiae

sumendam praecipit, donec alvus molliatur. Acetaria quo-
 que aceto per mannae et sennae infusionem medicato con-
 dienda iubet. Pilulas *gummosas* commendat GORTERIUS ¹⁾,
 alii *Becherianas* laudant, alii *balsamicas* HOFFMANNI, aut
francofurtenses, et sic porro. Suppositoria item ex butyro
 salito, aut ex sale gemmae, agarico, colocynthide melle ex-
 ceptis utiliter ano induntur, ut ad deiiciendum sollicitetur
 alvus. Haec quoque aperiri potest balneo, vaporibus ²⁾,
 fotu, unguento arthanitae maioris umbilicali regioni impo-
 sito, quod in pueris saepe voto respondisse visum est. Be-
 tae succus iniiciendus a ROTUNDIO praescribitur, quo nil
 praestantius esse arbitratur ³⁾. Nonnulli iubent pedibus
 nudis incedere super frigidum pavementum, et aqua perfu-
 sum; verum non semper innoxium id est. At ratio causa-
 rum habenda ubique erit.

1) *Pilulae GORTERII gummosae.*

Rec. *Gummi ammoniac. drachm. ij.*

Sal. polychrest. drachm. ij.

Gumm. sagapeni drachm. j.

Diagryd. scrup. j.

M. et c. s. q. balsam. peruviani F. pil.

Dos. scrup. j. quotidie.

2) HAMILTONIUS (*De prax. regul. et feb. miliar.*) conve-
 nire ait ad alvum laxandam sedere supra vaporem aquae ca-
 lentis. Fetus autem laudantur a BARBEYRACIO. *Med. form.*
p. 339.

3) *De vici. rat. in acut. p. 119.*

§. CXI.

In *ileo* motus intestinorum ad naturalem ordinem re-
 digi non potest, nisi causa irritans tollatur, spasmus sede-
 tur et alvus aperiatur. Huc fere ea transferenda sunt, quae
 ad vomitum compescendum (§. LII), atque dolores inte-
 stinorum curandos supra (§§. C. CI. CII.) proposuimus.
 Danda enim tam superne, quam inferne ea sunt, quae la-
 xent, molliant, aperiant alvumque subducant. Clysteres
 imprimis causae accommodati anteferuntur. Si stimulo in-
 digeant, sal gemmae in iis dissolvi debet, aut electuarium
 benedicta laxativa, aut lenitivum, aut mel ex rosis. In-

Curatio
ILEI, sive
VOLVULI.

Laxantia
ulcunque
ducentia.
Clysteres
qui.

Intrinsecus danda. tripsecus oleosa iam alibi commendata usurpentur. SWIETENIUS testatur, in saevissimo *ileo* oleum lini ad libram potatum pluries ab orci sancibus eripuisse aegrotantes ¹).
Oleosa.
Antiemeticum RIVERII. Quoniam vero vomitus fere interno remediorum usui impedimento esse solet, in ipso morbi principio *antiemeticum RIVERII*, quod ex salis absinthii scrupulo uno vel altero, et succi limonii unciiis duabus vel tribus constat, dum adhuc effervescit propinandum est. Huic *mixturae salinae* addi potest, vel substitui pulvis radice *colombo*, quem alias ex WHITEO, PERCIVALIO et JOHNSONIO proposuimus ²).
Pulvis rad. colombo. LEACKIUS, ut laudata mixtura blandior evadat, eidem adiiicit sperma ceti et gummi arabicum. Aliis quoque mixturis, quae gratia et odore ventriculum viresque languentes reficiant, uti oportet, iisque adiiiciendum aliquid eorum, quae sedant et spasmos leniunt. Ex aquis itaque menthae, totius citri, florum aurantii, cinnamomi, confectione alkermes, theriaca, diascordio, laudano liquido SYDENHAMII, syrupo kermesino, aut corticis citri parari poterunt.

1) §. 603. et 690.

2) *Vol. I. de febribus §. CCCCXCVI.* haec habet auctor. *Interdum evenit, ut vomitus et nausea nullis medicamentis etiam iterato adhibitis sedentur. Iure tunc suspicari licet, bilem adhuc acrem et corruptam in causa esse, cur haec symptomata perseverent. Quo in casu ter aut quater in die scrupulum aut semidrachmum radice Colombo, aut eius extracti, aut aliqua cochlearia eius diluti dari iubent, ut bilis vitiosa indoles emendetur. Vid. ibid. antecedent. §. CCCCXCV. et huius Vol. IV. part. II. §. LXX. in notis.*

§. CXII.

Si ab hernia malum sit, quae curatio. Repositio. Celotomia. Si a faecibus induratis argentum vivum et globuli plumbei.

Sedulo inquirendum est, an malum ab *hernia* oriatur. Quo casu tentanda repositio illico est ¹), et ea non succedente, properandum est ad *celotomiam*, seu herniae operationem ²), quae non differenda sane est ultra horas XXIV. Quid opportunum sit, ubi induratae faeces intestina oppleant, non est cur repetamus, quod alibi (§. imprimis CL etc.) fusius dictum est. Silentio tamen hic praetereundum non est argentum vivum et globuli plumbei, tamquam

remedia, quibus toties in desperatissimis *ileis* apertas fuisse alvos, a cll. et expertissimis viris asseritur. Et quod attinet ad argentum vivum, eius libram unam vel alteram proponendam nonnulli praecipiunt; alii vero selibra contenti videntur. Prudentissime autem se gerunt, qui eius quantitatem definiunt ab uncia una ad duas, vel etiam interdum ad quatuor. Cl. BLANCHINIUS ita ab usu mercurii timet, ut drachmam unam vel scrupulos jv. tantum dari velit singulis duabus horis in *volvulo* ³). Similis quoque ponderis globuli plumbei devorandi proponuntur. Utrumque enim remedii genus faeces alvinas induratas, aut intestinorum intus susceptiones pondere suo resolvere putant. Ut autem felicius leniusque agat remedium, ex olei amygdalini aliquot unciiis assumi consuevit. Cavendum vero ab hisce est in *ileo* ab inflammatione orto, aut in gangraenae metu, morbo nimirum proveciore, aut in eo, quem *herniae incarcerationis* foveant; plus enim noxae, quam utilitatis afferrent. Cl. MARTINUS GHISIUS Cremonensis duos vidit *volvuli* casus, in quibus tres unciae mercurii crudi, sed sero nimis datae fuerant; invenitque in cadaveribus partem ilei prope coecum gangraenosam et discissam, ex qua mercurius in cavum abdominis una cum faecibus irrepserat ⁴). Praeterea curandum est, ne diutius in intestinis mercurius inmoretur, nam ptyalismus inde esset timendus. Neque tutissimum est illis uti in quolibet intestinorum mutuo ingressu; si enim superius intestinum in inferius protrusum sit, negant quidquam inde emolumenti sperandum. Interdum excrementa durissima in recto intestino prope anum ita haerent, ut neque ulterius progredi possint, neque immitti ea siant, quibus molliantur eruanturque. Tunc chirurgi opera opus est, qui ea apto instrumento discerpant, divellat extrahatque.

Utrorumque dosis.

Cautio in eorum usu necessaria ad damna vitanda.

GHISII observatio.

Quando inutile remedium habetur.

Quando chirurgica manu opus sit.

1) In *crurali hernia*, dum reponitur, debet intestinum oblique impelli versus regionem umbilicalem. In *inguinali* contra oblique versus ilia. In veteribus herniis *completis*, in magnis intestinorum in scrotum prolapsibus, ubi annulus peritaeae est laxior, reponi saepe nequeunt intestina ob stercoreis coacervationem. Tunc nihil praestantius est, quam enc-

Methodus GOURSAUDII reponendi hernias. Quando reponi ne-

queunt, quid praestet agendum.

Faeces induratae quo modo solvantur.

Aegri positus qui.

Recentis et incompletæ herniæ curatio.

Curatio habitualis.

Quando utraque reponenda.

Roborantia quæ, et quando.

Diversitas causarum diversam curationem exposcit.

Celotomia iuxta LOVI-SIUM.

An gastrotomia peragenda in iliaca passione.

HEVINII solutio.

inata acria adhibere (et iam ab initio, antequam gravia symptomata incidant, aut inflammatio accedat), et purgantibus uti. *Sal epsomense ad uncias ij. in pinta aquæ dissolutum*, et partitis vicibus datum mira præstitit. Cito solvuntur scybala, intestina intus revocantur, et laxatur alvus feliciter. Positus etiam perpendicularis capite deorsum converso, pedibus sursum elevatis plurimum confert reductioni. Plerumque sufficit dorso incumbere, capite aliquantum elevato, humeris depressis, natibus elevatis, retractisque cruribus et genubus. Emollientia, antiplilogistica, venaesectiones in recenti *hernia incarcerata crurali vel inguinali et incompleta* convenire GOURSAUDIUS monet, quia partium angustiae et constitutio inflammationem faciunt celerem. Contra in *habituali hernia* et laxiori annulo. In priori cito debet sectio institui; in posteriori saepe differri ad plures dies sine periculo potest; nam exempla habemus, repositas feliciter fuisse post dies octo, decem et ultra quin inflammatio et gangraena accessisset. In hac etiam interdum roborantia conveniunt. Generatim in summa laxitate magis tuta sunt roborantia. In eo casu, in quo aëris copia inflat intestina, unde difficile repositio obtinetur, glaciæ applicatio locum habere potest; in aliis noxia est. Vid. *Mém. de l'acad. roy. de chirurgie T. XI. p. 411. Ex sched. auct.*

Causae incarcerationis herniarum sunt diversae, adeoque diversa quoque esse debet pro diversitate causarum curandi ratio. Legi meretur dissertatio inscripta — *Sur la différence des causes de l'étranglement dans les hernies par M. GOURSAUD*, quæ exstat *ibidem p. 382. Ex sch. auct.*

2) De *celotomia*, sive herniæ operatione legenda LOUISII dissertatio, quæ eodem *Vol. XI.* laudati operis *mém. de l'acad. de chir. p. 442.* prostat. An *gastrotomia*, sive sectione abdominis curari queat *iliaca passio* ab intestinorum indigitatione, sive a *volvulo* orta quaerit D. HEVINUS a veteribus, et speciatim a modernis, inter quos BARBETTA aliique eandem proponunt; et negative concludit. I. quia incerta est eius causa, et dignosci haud potest certis signis, quæ communia esse solent aliis causis passionis iliacæ. II. quia causæ multiplices sunt, et indigitatio minus frequens causa. III. quia operatio periculo plena est, et saepe inutilis etiam foret. IV. quia locus determinari non potest, ubi causa mali existat. Consentes habet SAVIARDUM *observ. chirurg. XXXIV.*, et SWIETENIUM §. 964. Vid. dictum. *Tom. XI. des mém. de l'acad. roy. de chir. p. 315. Omnia ex sched. auct.*

3) *Lett. V. intorno alle febb. maligne. d. 240.*

4) *Lettere mediche. Lett. I p. 65.*

§. CXIII.

Fumus tabaci insufflatus in anum, vel ex eius decocto

Præterea in *ileo* præsentissimum auxilium esse prædicatur *fumus tabaci* ope fistulae in anum insufflatus¹); cui quidem substitui æque bene potest, nisi mea me fallit opinio,

nio, enema ex eius decocto aut infuso quod supra (§. CI.) *enemata in-*
in *colico* dolore commendavimus. Nec desunt qui aërem *licienda.*
magna vi per follem immittendum in intestina doceant, ut
eorum complicationes aut indigitationes removeantur. Post *Frigida effu-*
alia incassum tentata, alvus interdum soluta est aqua fri- *sio repentina*
gida repente in pedes, crura, abdomen nudum effusa; *in nudum ab-*
enim *in praecipiti periculo recte fieri* cum AULO CORN. *domen, pedes*
CELSE assentit HOMIUS, quae alias omittenda essent. Sed *et crura.*
tutius est balneo uti tepido. Saevissimum *ileum* Cl. HA- *Tutius bal-*
ZONIUS in muliere gravida, omnibus aliis incassum tentatis *neum tepens.*
iterato balneo domestico curavit, quibus exclusus foetus *Observatio*
fuit, et mater liberata. Bis in die ante abortum, semel *mulieris gra-*
vero post abortum balneum ingrediebatur ²). Demum aqua *vidae.*
tepens ope machinae ei similis, qua ad incendia extinguenda *An hydro-*
utuntur (*hydroconstaterium* vocant), lente et paulatim in *constaterii*
anum iniecta. *Ileum* compescuisse saepe visa est, ut ex *utilis usus ha-*
HAENII et VIDEMARII fide compertum habemus. Sed eius *bendus sit.*
usus videtur iam exolevisse; quod, si utilis fuisset depre-
hensus, non ita facile certe evenisset. SYDENHAMUS ca-
tulum vivum nudo ventri semper iubebat accumbere per
biduum vel triduum, donec *ileus* cessaret. Reserata alvo, *Ad prophyl-*
vomitu aliisque symptomatibus evanescentibus, non ita cito *laxin.*
a remediis desistere oportet, neque a tenui et liquida vi-
ctus ratione recedere, aut prophylaxeos legibus se subtra-
here; nam facile morbus reverti potest.

1) Instrumentum ab HAENIO et SCHAEFFERO describitur;
sed simplicius a GAUBIO in suis *adversariis* p. 45.

2) VANDERMOND. *Tom. IV. janvier 1756. p. 110.*

CAPUT IX.

DE HAEMORRHOIDUM VITIIS.

§. CXIV.

Venae haemorrhoidales.

Aliae internae, externae aliae.

Anastomoses.

Rectum intestinum quibusdam obnoxium est vitiis, quae ab *haemorrhoidibus* venis manant. Sunt vero *haemorrhoidales* venae vel *internae* sive *superiores*, vel *externae* sive *inferiores*. Illae in *ramum mesentericum*, et deinde in *venam portam*; haec vero in *ramum hypogastricum* venae *cavae* sanguinem effundunt; in quem *ramum hypogastricum* sive *iliacam internam* etiam *vena pudenda* aliaeque e vicinis partibus venae prodeuntes concurrunt. Notandum tamen est, venas has tam *internas*, quam *externas* miris anastomosibus, WINSLOVIO teste, inter se communicare.

§. CXV.

Duplex haemorrhoidum vitium.

Differentiae.

Fluentium divisio.

Spontaneae et non spontaneae.

Item criticae et symptomaticae.

Coecarum divisio.

Prout vero sanguis per has venas refluens vario se modo habet, varia etiam vitia in iis oriuntur. Sed duo sunt potissima, nimirum earum *tumor dolorque* multiplex, vel *sanguinis* ab iisdem *varia* et saepe *immodica profusio*. Hinc *haemorrhoidum* differentiae permanent. Sunt enim vel *internae*, vel *externae*; *coecae* aliae, sive *clausae*; *dolentes* item aliae, sive *furentes*; *apertae*, vel *fluentes* aliae. *Fluentes* item distinguuntur in *spontaneas*, quae aperiuntur provido naturae conatu, ut se a superfluo sanguine liberet, veluti contingit in muliebri uteri excretionem, et in *non spontaneas*, quae a morbo statum pendent. Haec rursus dividuntur in *criticas*, quae ad aegri salutem, et in *symptomaticas*, quae ad eiusdem perniciem sanguinem fundunt. *Coecae* autem, quae a magnitudine et figura, quam intumescunt acquirunt, aliae dicuntur *parvae*, aliae *magnae*, item *cervicales*, *vesicales*, *nasae* aut *mora* referentes; ac demum ab earum prava vel benigna natura, *malignae*, *cancrosae*, *gangraenosae*, vel *mites* et *benignae*.

§. CXVI.

Haemorrhoidum *coecarum* causa proxima est sanguis in *Causa pro-*
 iis restitans et collectus; *fluentium* vero ea, quae reliqua-
 rum sanguinis excretionum. Remotae praecipuae habentur *fluentium.*
 sanguinis boni copia, vel cacochymia, acrimonia peculiaris, *Causae re-*
 hypochondriaca atque atrabilaris constitutio, venae ipsae in-
 trinsecus, vel extrinsecus compressae a spasmō, ab infarctu
 viscerum (praesertim *systematis vasculosi venarum* tum *me-*
sentericarum, tum *portae*), ab utero gravido, a partu dif-
 ficili, a faecibus duris, aut aliena continentibus, a recti in-
 testini prolapsi per sphincterem contractione, venarum ni-
 mia laxitas sive a vi externa illata, sive a natura ac here-
 ditario quasi iure acquisita, absentia potentiarum, quae san-
 guinis per venas reditum iuvare solent, multa ad desiden-
 dum mora, procidentia ani, equitatio crebrior et longior,
 diuturna trunci corporis perpendicularis positio, evacuatio-
 num naturalium aut consuetarum defectus, dysentericum
 acre irritans, criticum naturae molimen, muci depravatio,
 irritatio quaecunque per medicamenta, sive cathartica, sive
 rhubarbarina, sive aloëtica ¹⁾, aphrodisiaca, aromatica, vinosa,
 vaginae et vesicae morbi, paedicatio, et frequens hirudi-
 num administratio.

1) LANGEUS (*miscell. verit. fasc. I. p. 108.*) Aloë, inquit,
haemorrhoides ciet. At aloë enecantur feles, lupi, canes,
culpes et volutiles. Inter cœna vegetabilia igitur reponenda
aloë. Quare eius usus damnandus est. Inter sched. auct.

D i a g n o s i s.

§. CXVII.

Externae haemorrhoides oculis patent; *internae* speculo *Signe dia-*
 ani aut digito inmisso deteguntur. *Coecae* in tumores par-
 vos *varicum* instar dilatantur; interdum castaneae, aut etiam *gnostica ex-*
 ovi columbini magnitudinem referunt; alias tota ani peri-
 pheria tumens et inaequalis apparet; quandoque iustestini
 recti extremum ita extrorsum invertitur, ut simiae podicem
internarum,
tum coeca-
rum.

aemuletur. Distinguendae vero sunt a *rhagadibus*, *thymis*, *condylomatis*, *ficis* et *cristis* ¹). *Verae* haemorrhoides venarum capita repraesentant, plerumque nigricant, aut rubent intense, rotundae sunt, et venas occupant, secus ac in memoratis vitiis contingit. In *fluentibus* sanguis excretus distinguitur a reliquis cruentis alvi fluxibus; quod excrementorum attritu effunditur, plerumque excrementa subsequitur, interdum ea quidem, sed paulo ante tantummodo, praecit.

Rhagades.
Condylomata.
Thymi.
Fici.
Cristae.

1) *Rhagades* sunt fissurae ani. *Condylomata* pelliculae sunt durae, sive rugae ani induratae et oblongae, concolores, nec venas attingunt. *Thymi* tubercula carnea, colore candida, vel rubentia, sed doloris expertia sunt. *Fici* item tubercula thymis maiora, livida, dolentia, differuntque ab haemorrhoidibus, quod carnosi sunt. *Cristae* demum, *carunculae* cristas galli gallinaeci referunt. *Ex sch. auct.*

§. CXVIII.

Quinam hisce vitiis obnoxii.
Symptomata praecedentia, vel comitantia.

Pallidos, melancholicos, hypochondriacos plerumque homines vexant. Quibus imminet, dolor ut plurimum os saecrum occupans cum peculiari ad anum vel rectum intestinum pruritu percipitur; saepius cum *tenesmo* ac molesta ad deiciendum incitatione, etsi faeces nec durae sint, nec difficulter prodeant. In aliis haec mitius, in aliis gravius urgent, nec nisi sanguine amisso remittuntur. Saepe accedunt prostratio appetitus, dolor assiduus in alvi praesertim deiectione excrucians, vertigo, cephalalgia, et quandoque febris.

P r o g n o s i s.

§. CXIX.

Coecarum exitus bonus.

Coecae vel resolvuntur, vel indurantur, vel inflammatione adscita in abscessum terminantur. Quando pus sanguineum paucum ex iis prodit, facile, sed gradatim plerumque detumescunt sine alia noxa. Si vero suppuratio gravis fuerit, saepe fistulam relinquit; sicuti etiam antiquae, vel

Quando fistulas, ulcera, morbos

irritatae in ulcera aliaque mala saepe desinunt. In pueris *chronicos inducant.* et adolescentibus imbecillam valetudinem earum fluxus indicat, et cum in his facile supprimatur, chronicis morbis viam *Alia boni et mali exitus praesagia.* parat. Qui post trigesimum annum accedit, statisque temporibus recurrit, melioris omnis est. Saluberrimus est in corpore plethorico, alioquin bene valente; quinquagesimo demum, vel sexagesimo aetatis anno certis statis periodis recurrens. Si in his supprimatur, subiti et gravissimi morbi superveniunt. Immodicus vero si fuerit, cachexiam, hydro-pem, tabem inferre consuevit. In morbis gravioribus, si copiosius fluant haemorrhoides, morbumque levent aut tollant, *criticae* sunt; contra *symptomaticae*. Si loco sanguinis mucum, aut serum album, aut ichorosum fundant, laxitatem, obstructionem glandularum, intestinorum angustiam, ulcera, scirrhus, caucros fistulasque declarant.

§. CXX.

Haemorrhoides *fluentes* plethoram potissimum et caco-*Fluentium* chymiam tollunt. Hinc HIPPOCRATES inquit: Qui haemor-*bona ex* rhoidibus laborant, neque pleuritide, neque peripneumo-*HIPPOCRATE* nia, neque ulcere phagedaenico, neque furunculis, neque *prognostica.* *terminthis* ¹), fortasse neque lepra, neque aliis corripuntur ²). *Melancholicis et nephriticis haemorrhoides super-* venientes, bonum ³). *Insanientibus si varices aut haemor-* rhoides supervenerint, insania solvitur ⁴). GALENUS *me-* *lancholiam et nephritidem curari per haemorrhoides* inquit, utpote quae sanguinis veluti faecem evacuare soleant. In Coacis item habetur: Quae apoplecticis veniunt haemorrhoides, salutes ⁵). Quae phthisicis autem accidit sputorum suppressio, mentem nugacem infert; his spes est apparituram haemorrhoidem ⁶). -

1) Tumores subnigro-virides *termintha* sunt, terebinthi fructum aemulantes.

2) *Lib. VI. Epidem. sect. III. text. XXVIII. et lib. de humorib.*

3) *Aphor. XI. sect. VI.*

4) *Aphor. XXI. sect. ead.*

5) *Coac. n.* 478.6) *Ibid. n.* 437.

C u r a t i o.

§. CXXI.

V. S.
*Hirudines.**Incisiones.**Emollientia*
et resolven-
*tia.**Succus sem-*
pervivi.
Unguentum
de linaria,
populeum
nutritum.
*Oleosa.**Iniectiones,*
clysmata,
eccoproctica.
Fluxum ni-
mium com-
pescencia.

Coëcis, dolentibus, inflammatis vena in brachio, imo etiam in pede secta prodest, itemque hirudinum applicatio. Si tumeant pertinaciter, etiam incidi et reserari possunt. Ceterum emollienti, anodyno, resolventi fotu, cataplasmate, linimento leniendae sunt. Pulmento ex malis acidulis et vino rubro coctis confecto, ac ope lintei repetitis vicibus ano inposito dolorem earum leniri, tradit LANGEUS¹⁾. Verbasci flores decocti, sambuci folia ad putrilaginem cocta, aut etiam contusa, et crebro adnota a RIVERIO laudantur. Ex sempervivi succo, aut portulacae et butyro recenti egregium fit linimentum. Celebratur ab HORSTIO aliisque pluribus unguentum de linaria, quod ex foliis et floribus linariae in adipe suillo coctis et expressis, vitello ovi addito, paratur. Nec sua laude caret unguentum populeum nutritum, oleum seminum lini, butyrum *cacao*, oleum vitelli ovorum, et alia huiusmodi. Iniectionibus praeterea, clysmatibus, eccoproctis ex cassia, aut manna, aut sale medio alvus aperta servetur. Flores sulphuris ex pulpa cassiae dati coëcas aperire, sistere immodicas dicuntur.

1) *Miscell. verit. fascic. I. pag. 7.*

§. CXXII.

Nimum earum fluxum compescunt venae sectio, decoctum tamarindorum, prunorum nostratum, urticae mortuae, acetosae, corticis viridis aurantiorum, simaroubae, pulvis myrobalanorum, trochisci de carabe, pilulae de bdellio, flores sulphuris cum floribus cassiae, fungus melitensis, coralia, terrae sigillatae, spiritibus acidis mineralibus, et iis extrinsecus adnotis, quae adstringendi facultate pollent,

qualia *Vol. III. cap. XII.* in haemorrhagia narium commendavimus. Ubi vero haemorrhoidum fluxus habitualis et *Habitualis* consuetus fuerit, cavendum est, ne penitus sistatur. Aduri *non sistendus omnino.* enim solent improvide a chirurgis, aliisque remediis suppressi. Sed monet HIPPOCRATES, a diuturnis sanato haemorrhoidibus, si una non servetur aperta, periculum esse, *Chirurgorum imperitia.* aquam inter cutem, vel talem advenire ¹). Si consueta *Suppressus* haemorrhoidum evacuatio suppressa sit, revocari potest vena *quomodo revocandus.* pedis secta, pilulis ex aloë, myrrha et croco, fotibus ano admotis, aquae tepidae vapore, foliis ficus affrictis, chalybe intus dato, et similibus.

1) *Aphorism. XII. sect. VI.*

§. CXXIII.

Pro varia vero causarum, a quibus haemorrhoides excitantur, ratione modo aperientia, modo temperantia, modo saponacea, modo roborantia conveniunt. Hinc sales medii, *Varia pro varietate causarum curatio.* succi cicliorei, agrimoniae, nasturtii aquatici, horraginis, fumarinae, trifolii acetosi, millefolii, plantaginis, chalybs, serum lactis, imo lac ipsum, si nutriendum etiam sit, commendari solent. Tandem aquae thermiales efficacissimae sunt ad omnia e corpore inquinamenta eluenda. Victus ratio sit blanda, *Quae praecipue in usum veniant.* nec acria aut aromatica admittat. Motus tum corporis, tum *Vitae regimen.* animi nimii evitentur.

CAPUT X.

DE VERMIBUS INTESTINORUM.

§. CXXIV.

Vix ulla humani corporis est pars, in qua vermes interdum quispiam non repererit, aut reperire sibi visus sit. *Vermium sedes frequentior intestina.* Frequentissime vero in intestinis stabulantur, et quidem ge-

Praecipua eorum genera.

LUMBRICI.
Sedes eorum.
In quo differant a terrestribus.

ASCARIDES.
Ab acaris quomodo differant, atque a lumbricis.

nere et magnitudine admodum varii et multiplices. Praecipua eorum genera sunt *lumbrici*, *ascarides*, *cucurbitini*, et *lati*, quibus etiam nomen est *taenia*, *solium*, et *vermis solitarius*, quod non plures uno in intestinis nidulari et latere, sed perperam, creditum est. *Lumbrici*, ut plurimum *tenuia* intestina occupantes, sunt teretes, coloris albidii, interdum rufi, modo sex vel octo pollices, modo pedem unum vel alterum longi, figura lumbricis terrestribus similes, structura vero, tarditate, duritie ab iis valde discrepantes. *Ascarides* sunt teretes, albique et ipsi; sed tenuissimi, vix transversum digitum longitudine qui maiores sunt aequantes, *acaris*, qui caseo innascuntur, valde affines, plerumque intestino tantum *recto* inhabitantes. Differunt ab *acaris*, quod nullam subeant metamorphosin, a *lumbricis* vero, quod minimi sint et numero copiosissimi¹).

1) Vid. VAN-PHELSUM *hist. phys. ascaridum*. Lucard. 1768.

§. CXXV.

CUCURBITINI.
Eorum sedes.
An TAENIA ex his coalescat.

Vermes *cucurbitini* semen cucurbitae, vel potius cucumeris quodammodo referunt, unde eorum nomen. Intestina *crassa* plerumque incolere creduntur, et saepe faecibus innixti prodeunt. Hos AMATUS LUSITANUS et LOULETUS *ascārides* nominarunt. Ex his mutuo iunctis et in longum dispositis *vermem latum*, sive *taeniam* consurgere putavit VALLISNERIUS. Negant vero recentiores, qui tamen fatentur, *taeniam*, quam dicunt *cucurbitinam* PALLASII, PLATERI, et *articulis longioribus* praeditam BONETI, saepe extremos ac veteres suos articulos dimittere, nimirum in vermes *cucurbitinos* viventes mobilesque dissolvi; quod mihi metipsi pluries vidisse contigit. Germanis, belgis et aliis Europae populis familiares *cucurbitini*.

Qui illis obnoxii.

§. CXXVI.

TAENIAE *descriptio.*

Utcunque vero res se habeat, *taenia* est lumbricus latus, articulis quibusdam distinctus, decem, viginti, triginta

et plures ulnas longitudine saepenumero adaequans. Plures *Multae eius species.*
 eius species a medicis describuntur praeter illam, quae ex *cucurbitinis* coalescere videtur, quamque paulo ante (§. CXXV.)
 memoravimus. Imprimis binae aliae notatu dignae sunt, vi- *Capitata et ucephala.*
 delicet taenia *capitata* Helvetis potissimum, et quadrupedi-
 bus infesta, et taenia *acephala*, sive non capitata, quae spe-
 cies ambae articulis minoribus quidem constant, sed unum
 ac simplicem vermem efficiunt, ut anatome, microscopia,
 iniectiones ostendunt. Intestina *tenuia* praesertim incolere *Sedes taeniac.*
 traduntur, verum haud raro alibi etiam repertae fuere. Qui
 plura de *taeniis* desideret, consulat VALLISNERIUM, PLATERUM¹⁾,
 HILDANUM, CLERICUM²⁾, ANDRYUM, RAULINIUM, GONTARDIUM,
 LINNAEUM³⁾, VOGELIUM⁴⁾, BONETUM⁵⁾ aliosque naturalis historiae scriptores.

1) *Taenia prima artic. min.* PLATERI et *taenia secunda*, seu *vermis cucurbitinus* eiusdem. Vid. *Prax. med.* PLATER.

2) *Taenia prima* LE CLERC. *Hist. des vers. pl.* V. f. 1., pl. VI. f. 2., pl. VII. f. 1., pl. II. f. 1. 2. 4. *Taenia secundi generis* eiusdem. *Ibid.* pl. I. A. et pl. II. etc.

3) *System. natur. Taenia vulgaris* et *Taenia lata*; *taenia osculis marginalibus solitariis* etc.

4) *De cognosc. et curand. hum. corp. affect. Capitata et acephala*; et *taenia cucurbitina* eiusdem.

5) *Mém. présent. à l'acad. des scienc. T. I. Taenia à anneaux courts*; et *taenia à anneaux longs*. Item *taenia*, aut *solum à épines* et *anneaux* ANDRYI; et *solum sans épines* eiusdem ANDRYI. Idem *lumbricus latus* TYSON. *Act. angl.* ann. 1683. n. 146. etc. *Ex sched. auct.*

§. CXXVII.

Praeter haec vermium genera in hominum intestinis *FASCIOLA et TRICHURIS.*
 reperiuntur quoque *fasciola* (quae non articulata est, sed
 crassior et obesior ipsa taenia), et *trichuris*, vermiculus
 nempe gracillimus, tenuissimus, splendens, pellucens, cor-
 pore tereti rotundo VII. linearum, et proboscide filiformi
 XV. linearum longitudine; incola plerumque intestini *recti*
 et *coeci*, interdum etiam ventriculi. Horum descriptio vi- *Sedes tri- churidis.*
 deatur apud ROEDERERUM¹⁾ et WAGLERUM²⁾, nec non
 apud GUIL. FABRICIUM, qui eos *lumbricellos aciculares*

*Innumerae
aliae caric-
tates.*

vocat. Sed praeterea multi alii vermes eorumque varietates a medicis rariorum historiarum collectoribus referuntur, nimirum *nigri, virides, rubri, pilosi, cornuti, mirificoque capite praediti*, et innumeris paene qualitatibus monstrosi ³⁾).

1) *Guett. Gel. ann. 1761. n. 25.*

2) *Dissert. de morb. mucoso etc.*

3) PAULLUS LUPUS observavit quandam vermium speciem, *poduram datiscam* *Linna.* nuncupatam, de qua fit mentio in diario italico *Arcisi sulla salute umana* ann. 1780. Vide *ibid.* In eodem *diario italico Florentiae* a IOU. ALOISIO TARGIONIO edito anno 1782. n. 50. de his plura reperies. Consulendus quoque ROSENSTEINIUS est — *Maladies des enfans etc. Ex sched. auct.*

§. CXXVIII.

*Dissensus de
origine ver-
mium in cor-
pore humano.*
*LUMBRICI in-
geniti esse
videntur hu-
mano cor-
pori.*

*Ascaridum,
cucurbitino-
rum, taenia-
rum origo
incertior.*
*Quaenam
eorum gene-
si faveant.*

De origine vermium in humano corpore disputatum a medicis et philosophis diu est, nec certi adhuc quidquam statutum. Sed *lumbricorum* genus, cui pares nullibi hactenus reperti sunt, eorumque frequentia in quavis aetate et quocunque sexu, non exceptis recens natis et lactentibus, imo *uterino foetu*, in quo vermes *lotos* enasci docuit HIPPOCRATES ¹⁾), favere videtur eorum opinioni, qui homini haec animalcula ingenua esse putant. An idem affirmari possit de *ascaridibus*, de *cucurbitinis*, de *taeniis*, non admodum facile est definitum. Id tantum videtur experientia comprobari, quaedam huiusmodi hospitem generationi et propagationi favere, quaedam eosdem irritare, ac in furorem agere, ita ut vel numero et consuntione chyli, vel pravis halitibus et excrementis, vel punctione, irritatione, morsu nobis non levia inferant damna. Eorum germinationem promonent ea omnia, quae idoneum ipsis nidum praebent, aut alimentum, uti viscida et farinacea legumina, abusus carni, fructus horaei, lac et lacticia, debilis et laxa corporis constitutio, aer humidus et calidus, locorum palustrium inhabitatio, aquae impurioris potus, bilis inertia, et cetera, quibus copiosiores visciditates in intestinis progignuntur atque accumuluntur. His etiam dulcia et saccharo confecta adnumerari solent. Verum REDIVS dulcibus acidisque suc-

cis affusis eos, saltem *lumbricos*, lacerari, mirifice torqueri ac convelli vidit.

1) *Lib. IV. de morb. XXVII. n. 2.*

D i a g n o s i s.

§. CXXIX.

Nulla plane aetas, ut diximus, a vermibus immunis videtur, minime omnium infantilis et puerilis, in qua ideo semper de vermibus suspicari licet. Ast infantes et pueri longe frequentius ab *ascaridibus* et *lumbricis*, viri autem magis a *cucurbitinis* et *taeniis*, interdum etiam *fasciolis* et *trichuridibus* vexantur; feminae vero crebrius adhuc quam masculi; sic porro ut omnis aetas hominis alicui ex his *vermium* speciebus obnoxia sit. Latent plerumque vermes in corporibus, nec satis certis indiciis se produnt, signa enim aut obscura, aut aequivoca esse solent, cum variae ac diversae causae saepe eisdem gignant effectus, aut similitudinis specie decipiant. Etenim haud raro evenit, vermes fuisse reperi-
Omnis aetas et sexus vermibus subicitur. Qua specie infantes et pueri, qui viri, qui foeminae torqueantur.
 tos, ubi nulla de iis oborta fuerat suspicio, aut penitus abfuisse, ubi multa eorum praesentiam indicare videbantur; quod postremum duabus historiis confirmatum est a Cl. TORDIO¹). Sola itaque vermium per os aut anum expulsio omnem dubitationem et diagnoseos ambiguitatem tollit.
Vermium signa obscura et aequivoca. Unicum signum evidens quodnam sit.

1) *Coll. soc. med. Harniens. Vol. I. p. 21.*

§. CXXX.

Generatim vero scire licet, eos, in quibus vermes latent, plerumque languidos esse, et nausea affectos; quandoque etiam vehementer appetere, dum tamen eorum corpus non alitur, et macie conficitur, halitum ab ore acidum emittere, tussicula sicca subinde vexari, animi deliquiis facile corripi, sudore frigido perfundi, faciei colore vario, modo nempe pallido, modo rubro, sed plerumque pallido infici, pupillae dilatationem sive *mydriasis* exhibere¹), salivam uberiores ex-
Signa diagnostica frequentiora.

spuere, multa siti teneri, saepe convelli, imprimis infantes et pueros, somniis turbulentis et pavoribus agitari, dentibus stridere, saepius deglutire, quasi bolum faucibus haerentem haberent, in ventrem revolvi, qui plerumque tumet et tenditur, doloribus colicis, aut cardialgicis, aut morsibus crebris circa umbilicum torqueri, quod manu ad ventrem admota et eiulatibus, contorsionibus aegri significant, quandoque ieiunos gravius affici, alimento vero sumto relevari, alvo modo adstricta, modo fluxa esse, faeces cinereas, albidas, aut virides, foetorem acidum plerumque spirantes deicere, narium pruritu molestissimo et sanguinis ab iis identidem stillicidio subiici, ac febribus erraticis preliendi Pulsum exilissimum et singultum in pueris semper signum vermium ponit BAGLIVIVS ²). Solet vero pulsus esse inaequalis, obscurus, deficiens. Addunt alii tremores, spasnum cynicum, oculorum contorsiones, fugaces genarum rubores. Ex JOH. HENR. RAHNIO habemus, *mydriasin* saepe signum esse vermium in intestinis latentium ³). ANTONIVS autem COCCIVS ⁴) monet, a vermibus interdum omnia fere *symptomata passionis hypochondriacae* inferri. In febre quadam epidemica, quam *putridam verminosam* et *malignam* vocavit CL. LEPECQUIUS DE LA CLOTURE, et quae erat *gastricoputrida verminosa*, observavit ut peculiare signum *rosionem ventriculi* ⁵).

Rosio ventriculi.

1) RAHN. in *dissertat. de visc. abdom.* 1771. p. 20.

2) *Giornale de medic. di Venez.* 1774. p. 217.

3) *L. c.*

4) *Bagni di Pisa* p. 228.

5) *Observations sur les maladies épidémiques* p. 91. *Exsch. auct.* Vid. *Vol. de febribus* §. CCCLXXXVI.

§. CXXXI.

Fere omnes morbos a vermibus genitos auctores observant.

Nullum demum fere tam grave symptomata est, quod interdum *vermes intestinorum* non excitaverint. BOERHAAVIUS ab iis ortas vidit *febres acutas, lentas, hecticas, malignas, putridas, epidemicas, famem caninam, bulinum,*

*soporem, delirium, BARTHOLINIUS nauseas, vomitus, dysenterias; PARACELUS phrenitidem; MARCELLUS DONATUS et SCHENCKIUS catalepsin; FORESTUS aphoniam; ZACUTUS LUSITANUS, GRUELINGIUS, RHODIUS, MOEBIUS viderunt epilepsiam, quam in se ipso quoque vidit FABIVS COLUMNA; febres vehementes et erraticas, syncopes, praefocationem, colicos dolores, manias RIVERIUS, HOFFMANNUS, LUDWIGIUS; febres putridas contagiosas, epidemicas MOREALIUS, et antea iam ETTMÜLLERUS; palpitationes, capitis dolores, vertigines, coecitatem, tusses, singultus TOZZIUS; ileum, volvulum LIEUTAUDIUS; pleuritidem, ischuriam, ventriculi et intestinorum perforationem *) HOFFMANNUS, et nos, passimque clinici omnes, speciatim VOGELIUS, SCHULTZIUS, DOEVERENIUS, STÖRCKIUS alique. In maniaco, qui ante mortem lumbricorum copiam vomuit, *Observatio LUDWIGII.* invenit LUDWIGIUS tres magnos lumbricos teretes mortuos, vesiculae felleae inclusos ¹⁾). LIEUTAUDIUS etiam ²⁾) *Aliae LIEU- TAUDII.* reperit in cadavere pueri febre acuta extincti lumbricum proce- riorem, quo ductus choledochus obturabatur. Illuc autem videbatur delatus fuisse ex cystide fellea. Idem narrat ³⁾), quod mirabilius est, se invenisse in cadavere foeminae febri maligna peremtae lumbricum itidem in ductum pancreaticum adactum, planeque eum obstruentem. Idemque in alio puero invenit intestinum ileum circa finem glomere lumbricorum pugni magnitudinem aequante penitus occlusum ⁴⁾).*

1) *Comment. de reb. in scient. nat. et medicina gestis Vol. XIV. p. 664.*

2) *Hist. anat. med. T. I. p. 211.*

3) *L. c. p. 248.*

4) *L. c. p. 75.*

*) Exemplum perforationis intestinorum a vermibus videtur in diario (*Journal de médecine*) mens. iun. ann. 1782. pag. 551. *Ex sched. auct.*

§. CXXXII.

Vermium cucurbitinorum ac taeniarum signa magis propria esse videntur morsus circa ventriculum, aut alicuius *Signa magis propria cucurbitinorum*

*et taenia-
rum.*

vivi animalis intus se moventis crebra et molesta sensatio, abdominis quaedam inflationes, quae subsidunt, posteaque recurrunt, appetitus auctus, insignis virium imminutio, macies, color faciei plumbeus aut flavus, deliquia, visus obscuratio, oculorum lacrimatio ¹), vertigo caduca, crurum vacillatio, et *ramenta quaedam cum excrementis veluti semina cucurbitae aut cucumeris alvo interdum reddita* ²).

In quibusdam *socis interceptio cum sputis ex ore multis,*

*Qui illis ma-
gis obnoxii.
Ascaridum
signa.*

tormine ventriculi, vel etiam dolore ³). Plerumque hisce *vermibus* laborant, qui palustria loca incolunt, aquis impuris victuque pravo utuntur. *Ascarides* potissimum manifestantur pruritu circa anum, alvi frequenti deiectione, foetore faecum. Adultis aeque ac pueris infensi sunt. HIP-

*Vulvae mu-
lierum saepe
molesti hu-
iusmodi ver-
miculi.*

POCRATES in *foetu uterino* eos etiam invenit. Apud foeminas saepe in vulvam prorepunt, et pruritus in ea intolerabilem excitant. Tunc non tantum in excrementis alvinis, sed etiam in urina apparent. Cl. COUSINIUS narrat ⁴), mi-

*Observatio-
nes COUSINII.
AUCTORIS.*

litem per urethram eiecisse *vermem teretem* octo pollicum latitudine, et multos alios similes a pluribus annis eicere solitum. An ab intestinis aliqua cum ureteribus, aut reserata praeter naturam communicationis via? Vidimus in cadaveribus vermes sibi ex oesophago viam parasse in cavum thoracis, per foramen in cavum abdominis. In puella decenni, visceribus omnibus sanissimis, a vermibus suffocata invenit HALLERUS os et fauces lumbricis plenas, duos vero teretes in aspera arteria ad *cordis sedem*, inque *pulmonis principio* ⁵).

HALLERI.

*Historia
morbi a tae-
nia proge-
niti.*

1) SAUJOTI medici galli exstat observatio (*Journal de méd. juill. 1783. T. XI. p. 22.*) de *taenia* et *vermibus* cum *chorea* s. *Viti*, eiusque *signis*, quae huiusmodi est. „Puella quaedam annorum IX. ab octo diebus die nocteque exagitabatur assiduis et inordinatis motibus in brachiis et cruribus. Difficulter loquebatur impedita veluti lingua. Mens constabat. Ridicule incedebat trahendo veluti pedes alterne post se. Aegre admodum et post varias motiones poculum ori admovebat, tumque haustu praecipiti bibebat. Oculi lacrimabant, et continuo in motu erant, atque os varie movebatur, ac torquebatur. Respiratio libera, pulsus parvus, celer, inaequalis, sitis magna, urina aqua, venter tumidus. Dolebat circa um-

bilicum assidue, deieciat mollia, mucosa, colore argillaceo, facies pallida, et corpus macie confectum, quamvis iam a sex mensibus immodica et insatiabili fame vexaretur. *Lacrimae Unde diarrhoea, macies, tumor ventris, dolor circa umbilicum et gnosis. excrementa alvi* diagnosin vermium fecere. Praemisso *clystere ex decocto fic. ping.*, mane deinde datum remedium ex *unc. jv. infusi helminthochorti, unc. ij. olei ricini, et unc. j. syrup. flor. persici.* Quater puella deiecit cum quinque *lumbricis* variae magnitudinis. Postero die repetitum remedium, datis prins *jv. granis mercurii dulcis et granis xij. rhabarbari.* Oeties alvus laxata est, et eiecit TAENIA quinque cum dimidio pedes longa. Mox omnia symptomata evanuerunt, et convalescere aegra coepit. Vino china china medicato cito bonum colorem et habitum recuperavit.“ *Ex sch. auct.*

2) HIPPOCR. *de morb. IV. 27. n. 39.*

3) *Ibid. n. 40.*

4) *Act. Helvet. T. VIII. p. 192.*

5) *Opusc. pathol. observ. IX.*

Prognosis.

§. CXXXIII.

Periculo carent *ascarides*, feliciusque curantur. Neglecti tamen tenesmus atque inflammationem, vel ulcera *prognostica.* intestini recti inducere possunt. Non item *lumbrici* et *taeniae*; in his enim maior difficultas saepe occurrit, nec vitae deest periculum. Albi minus, quam nigri aut rufi, difficultatis et discriminis habent. *Vermes*, quando cum aliis morbis copulantur, si prodeant, plerumque summam putrefactionem, quam effugere videntur, significant. Saepe autem cum excrementis exeunt morbo ad *iudicationem* tendente, et tunc *bonum* esse HIPPOCRATES ¹⁾ docuit.

1) *Pracnot. 72. Coac. 601. De iudicat. V.*

Curatio.

§. CXXXIV.

Indicationes sunt vermes sedandi, necandi, expellendi, *Indicationes.* nidos eorum deturbandi, symptomata leniendi, et causas, a

Oleosa amaricantia et opiata.

Acida tam vegetabilia, quam fossilia.

Emetica et cathartica.

Pueris aptiora.

quibus foveantur, removendi. Oleosa imprimis, amaricantia ac opium habentia vermibus stuporem inducunt, symptomata leniunt, et ad exitum expulsionemque praeparant. Gummata graveolentia, salina saburram viscidam, in qua et nascuntur et crescunt, non modo destruunt, sed etiam vermes ipsos fugant. Enecare eos dicuntur oleosa, acida tam e vegetabilibus, quam e fossilibus elicita ¹), et dulcia; sed nullum certa fide remedium adhuc cognoscitur, quod vere eos enecet. Sopitos, aut mortuos, aut languidos *anthelminthicis*, vel *opiatis*, ut PLANCO mos erat, redditos expellunt emetica ²) et clysteres imprimis ex lacte et saccharo parati. Inter haec commendantur ialappa, diagrydium, mercurius dulcis, aloë, rhabarbarum, conserva florum persici, aut ex his composita. Pueris magis convenit syrupus cichorei cum rhabarbaro, aut florum persici, aut rotulae ex rhabarbaro. In his quoque utiliter extrinsecus illinitur abdomen oleo tanacetii, unguento arthanitae maioris, vel aloë hepatica et myrrha felle bovillo subacta; quae alvum leniter solvunt.

1) *De anthelminthica acidorum fossilium praestanti vi saepe auctor voluminibus praecedentibus locutus est, ideoque his addantur, quae ibi leguntur. Vid. §. CCCI. CCCII. et alibi Volumine I. etc. et hic quoque P. II. §. XXXII. etc.*

2) BIANIERE *Journal de Monsieur VANDERMONDE T. V. octobr. 1756.*

§. CXXXV.

Praestantiora anthelminthica.

Vermes expellendi et occidendi laude praestant semensantonici, sive cinae, coralina maritima, summitates tanacetii et hyperici, ruta capraria, sive galega, ruta hortensis, absinthium, radix valerianae sylvestris, filicis maris, graminis, cornu cervi ustum, vel tantum limatum, testae ovorum contusae, assa foetida, myrrha, petroleum, oleum hyperici *Matthioli*, spiritus vitrioli, vitriolum martis, camphora, aethiops mineralis, pollen sulphuris aut eiusdem accensi in vinum immersio. Cl. TODIUS summis laudibus extollit tartarum et vinum emeticum, quibus ducentes se vidisse testatur ¹) vermes deiectiones. Quod remedii genus iam antea BROUZE-

Tartarus et vinum emeticum.

TUS

TUS ²) commendaverat. Aquam etiam nonnulli laudant, in quam libra una vel altera plumbi liquati fuerit iniecta ³). Sed timendum est, ne aqua arsenicali vapore imbuta noxam inferat aegrotanti ⁴). Aqua olim etiam, in qua argentum vivum diu multumque agitatum fuit, imo argentum vivum *Argentum vivum anthelminthicum.* magni fiebant; hodie vero de eorum viribus anthelminthicis ⁵) dubitatur. Aqua autem multo sale imbuta a nobis ⁶) et a THOMA LEIGH ⁷) iure laudatur.

1) *Coll. soc. med. Haeniens. Vol. I. p. 21.*

2) *Comment. de reb. in scient. natur. et medic. gestis Vol. IV. p. 487.*

3) *Gazzett. med. d'oltremonti ann. 1762. n. 16.*

4) Vid. supra quae traduntur de dolore colico a saturninis inducto.

5) *Nullam vim anthelminthicam hydrargyro inesse usque ab anno 1753. AUCTOR ostendit peculiari opusculo inscripto: „De anthelminthica argenti vivi facultate; in 4. Faventiae.“ Id postea aethiope minerali et unguento etiam mercuriali aliis initis experimentis et observationibus confirmavit; quae adhuc exstant inter eius inedita scripta. Vid. Vol. I. de febr. cit. §. CCCCII. Editor.*

6) *Trattato delle acque di S. Cristoforo. Faenza 1761.*

7) *Opuscoli medic. pratici di LUIGI TARGIONI T. IV. p. 115.*

§. CXXXVI.

Hisce et similibus auxiliis nonnunquam etiam *taeniae* TAENIAE cedunt. Plerumque tamen pertinacius resistunt. *Acta academica Edimburgensia* proponunt tanquam specificum remedium stannum limatum, magna et fere octupla sacchari pinguis dosi exceptum. Sex drachmas prima die, altera tres tantundem tertia deglutiendas praecipiunt; quarta vero alvum cathartico ducendam ¹). Alii commendant portulacam, oleum nucibus expressum, atque ex vino alicantino propinandum ²). Itemque vitrioli martis grana sex extracto tanaeteti excepta, ac in bolum redacta ³). Verum et stannum, et martis vitriolum aequae ac *graveolentia*, et sales, et amara saepe irrita fuisse certo scimus ⁴). Cl. RATHIERIUS potentissime expelli *taeniam* asserit ⁵) sequenti remedio:

Rec. *Pulv. sabinae* gr. XX., *sem. rutae* gr. XV., *mercur. dulc.* gr. X., *ol. tanaceti* gutt. XII., *syrup. flor. pers.* q. s. M. f. bolus, cuius dimidia pars detur mane, altera vesperi, et desuper hauriatur cyathus vini, in quo nuclei persicorum per hor. XII. fuerint macerati. Cl. quoque

Aliud Cl.
BISSETI.

BISSETUS cum cetera remedia frustra tentaverit, solum *gummi guttæ* seu *cambogia* invenit efficax, et quasi *specificum*, cuius grana XV. cum extracto *gentianae* in forma *pilulari* pro una dosi exhibuit ⁶). Huic simile videtur illud, quod Parisiis iussu regis vulgatum fuit, quodque magno pretio accepto revelavit vidua quaedam Helveta, NOUFFER cognomento dicta, *taeniarum* curationibus iamdiu celebris reddita ⁷). Praecipua componentia sunt radix *filicis maris*, sive non ramosae C. B., *panacea mercurialis*, *resina scammonii*, et *gummi guttæ*. Sed illud primum tutius, et ae-

Arcanum
HERRENSCHWANDII.
Aliud VOGELII.

que efficax est ⁸). Arcanum quoque HERRENSCHWANDII, ut ex VOGELIO habemus ⁹), constat ex *gummi guttæ*, *sale absinthii* et *carbone fraxini*. VOGELIUS ipse nihil valentius novisse testatur adversus *taenias*, quam radicem *filicis* in pulverem contritam ad scrupulum unum vel semidrachmam cum granis tribus *gummi guttæ* circiter, mane et vesperi per aliquot dies datam. Generatim sane validiora purgantia ad *taenias* expellendas proponuntur, ut *colocynthis*, *scammonium*, *gummi guttæ*; nec laudatoribus carent spiritus fermentati, vina generosiora, uti *Alicantina* et *Hispanica*, quorum usu non raro eictas legimus *taenias*. Sed *tartarus emeticus* aquae copia dilutus et *epicratice* datus nobis videtur ad *taenias* accommodatissimus ¹⁰).

Purgantia
validiora.

Vina gene-
rosiora.

Tartarus
emeticus.

1) Vol. V. art. 7. p. 103.

2) Giorn. di med. Veneto ann. 1763. n. 22.

3) Ibid. n. 8. 1764. p. 62.

4) TODE Coll. soc. med. Havn. Vol. I. p. 21.

5) Journ. de mēd. 1768. T. XXVIII. p. 44.

6) Medical essays and observat. p. 186.

7) Aliud nuper in Galliis remedium adversus *taenias* mandato regis editum in vulgus, cuius auctor est Cl. RENAUDIUS nosocomii Barjacensis medicus, quodque tum etiam profuisse

Specificum
RENAUDII ad-
versus tae-
nias.

fertur, cum illud viduae NOUFFER haud prospere cessit. Est autem huiusmodi. *Detur vesperi aquae fontis clyisma cum saponis drachma una. Sequenti mane stomacho ieiuno una item drachma pulveris rad. filicis maris cyatho aquae, pourpier dictae, exhibeatur admixta. Ita diebus quinque fit. Quibus elapsis pulveri eidem adiecta dosi aquilae albae, iallippae et rhabarbari cum melle q. s. f. boli ore sumendi. Potus quotidianus sit decoctum rad. mori.* Ex sched. auct.

8) *Scelta d'opuscoli etc. di Milano 1776. T. XIII.*

9) *Academ. praelection. de cognosc. et curand. morb. p. 652.*

10) Femina quaedam feбри, dyspnoea, virium prostratione et doloris punctorii sensu in dextro latere laborabat. Vena secta, datum enema. Menstrua accedunt. His cessantibus *Emeticum* sumsit. Quinques et viginti alvus soluta est. Mixtura assumpta ex laudano liquido et confectione hyacinthina; eiecit *taeniam* quinque ulnas longam. *Act. Helvet. T. VI. p. 216.* Similem ego in viro habui observationem. *Ex adversarii auctor.*

Hic animadvertendum quoque est, Cl. RAYMUNDIUM *taeniam* *Oleum ricini.* e corpore eduxisse ope *olei ricini*, et quandoque magna dosi *olei olivarum*, vel *amygdalar. dulcium*, superadditis *duabus drachmis corticis rad. mori feminae in pulverem redacti.* Vid. *Hist. de la société roy. de méd. Vol. II. p. 226.* Ex sched. auctor.

§. CXXXVII.

Ascarides aqua tectucciana, aut porrectana, aut s. Christophori in agro Faventino, quae alvum subducatur, sale cathartico Epsomensi, aut mirabili *Glauberi*, enematribus ex oleis expressis, vel decoctione tanaceti, lacte, saccharo, melle occiduntur, suppositoriis ex aloë et melle averruncantur, destruuntur. LANGEUS pro infantibus utitur *seminibus citri.* Conquassantur numero XII., vel XV., et in *lactis vaccin. unc. jv. coquuntur*, et deinde fortiter exprimentur. Continuatur remedium per tres pluresve dies, usque dum vermes cum scybalis eiciuntur ¹⁾). In omnium *Diaeta.* vero curatione vermium diaetae quoque ratio habenda est, quae sit causis, a quibus vermes foveantur, removendis opportuna.

1) *Miscell. verit. Fasc. I. p. 85.*

CAPUT XI.

DE TYMPANITE.

§. CXXXVIII.

Ad intestina quodammodo pertinet illud morbi genus, quod *Τυμπαίτης*, sive *Τυμπαίας* appellatur. In eo abdomen universum ita intumescit ac tenditur, ut manu percussum tanquam tympanum resonet. Sed huiusmodi tensio tumorque abdominis resonans, ut *tympaniam* vere constituat, debet esse stabilis et diuturnus. Reliquae enim abdominis inflationes breves et summopere variantes, aut in acutis morbis cito oborientes rectius *meteorismi* ¹⁾ nomine distinguuntur. Vocatur etiam *hydrops siccus* et *flatulentus*.

Meteorismus.
Hydrops siccus.

1) Pluribus de *meteorismo* ventris ab Auctore disputatum est *Vol. II. §. CCCLXVII. CCCLXVIII. CCCLXIX.*, quae hic quoque opportuna esse possunt, si in memoriam revocentur. *Editor.*

§. CXXXIX.

Causa proxima frequentior.
Minus frequens.

Rarissima.

A sede triplex species.
Intestinalis,
abdominalis,
emphysematicus.

A causis et ab origine multiplex.

Frequentissima eius causa est ventriculi et intestinorum, aut alterutrius tantum cavi ab aëre intus collecto ac urgente ingens distentio. Rarius vero aër in abdominis cavo extricatus, vel in ipsum ab intestinis irrumpens, totumque abdomen distendens; rarissime demum idem aër intra intestinorum aliorumque viscerum tunicas collectus, id est verum eorum omnium *emphysema*. Hinc a sedibus, quas implet, distrahitque aër, variae oriuntur *tympanitae* differentiae; nimirum *tympanites intestinalis* ¹⁾, *abdominalis* ²⁾, *emphysematicus* ³⁾, vel ex his etiam *compositus* et *mixtus*. Ratione causae etiam dicitur alius *spasmodicus*, *asciticus* alius, et sic porro. Ratione originis alius *primarius*, *secundarius* alius etc.

1) SMETIUS, HILDANUS, SAXONIA *intestinales* describunt, ideo consulendi sunt. *Ex sch. auct.*

2) Penes VALLESIIUM, BALLONIIUM, COMBALUSIERIUM *abdominalis* descriptio est. *Ex sched. auct.*

3) De *emphysematico* in *actis Petropolitanis* COMBALUSIERIUS et DUVERNEYUS agunt. *Ex sched. auct.*

§. CXL.

Reliquas causas, remotas nimirum iam memoremus. *Causae remotae.*
 Hae sunt atonia fibrarum intestinalium et ventriculi, intestinorum aliqua pars constricta ¹⁾ sive organico vitio, sive tumore, sive spasmo, dyspepsia, apepsia, aër uberior intestina replens, colici dolores, et imprimis spasmodici, hysterici, frequentius recurrentes, debilitas totius corporis et viscerum abdominalium, febres intermittentes non recte iudicatae, aut inopportune suppressae, victus crudus, flatulentus, fermentescens, potus similis, aut spiritu praeditus, aut etiam ultra modum frigidus, mucus et pituita in intestinis collecta, bilis defectus, aut inertia, medicamenta cathartica, aut alia, quae tonum intestinorum labefactarint, opii, oleosorum, aquae tepidae abusus, alvi adstrictio diuturna, aut contra nimia et pertinax solutio, aut repentina fluxus eius suppressio, metastases, intestinorum vulnuscula, corruptio, ulcus, perforatio, viscerum putrefactio, cystidis felleae ruptio aut vulnus, unde bilis in cavum abdominis effundatur, pus, aqua, sanguis in eodem cavo collecta, emphysemata, fluor albus, lochiorum aut catameniorum profluvium, aut retentio, rhachitis, icterus, affectio hypochondriaca et alia.

1) Cl. BAGARDUS (*Traité pratiq. de l'hydropisie et de la jaunisse par Monsieur MARQUET. P. III. p. 160.*) observatione quadam ostendit *tympaniten* intra peritonaeum existentem, ex qua mors post diem duodecimam secuta est. Inciso enim abdomine aër cum sonitu magno et foetore exiit. Intestina ter solito ampliora erant, hinc inde erant perforata, inflammata, gangraenosa, potissimum qua *mesenterio* adhaerent; *rectum* ad sex vel septem pollicum distantiam ab orificio summe contractum, ac si ligatum esset. Scybala omnia in colo. Causa erat pessarium in fundo vaginae haerens, et *intestinum comprimens ac strangulans*. Cereum longum et rotundum immissum remedio fortasse fuisset. *Comment. Lipsiens. Vol. XVII. p. 691. Ex sched. auctor.*

D i a g n o s i s.

§. CXLI.

Signa quaedam externa.

Manu ventri admota dignoscitur. Venter durus et tensus renititur, nullam fluctuationem, si simplex sit morbus, sed sonitum, leve murmur et quendam veluti rugitum reddit, frequens ructus desiderium est, nulla fovea in tumore digitis presso remanet, nisi *anasarca* simul concurrat, nullum, aut leve ponderis augmentum corpus percipit, reliquum corpus extenuatur, pedes raro, et non usque adeo,

Symptomata morbi progressum comitantia.

ut in aliis hydropis speciebus, tument. Principium morbi plerumque leviter fertur; quoniam ructus et flatus emissi eum levant. Increscente vero morbo flatus non amplius prodeunt; anxietas, tussis sicca difficilisque respiratio accedit, pulsus fit vehementior et celerior et subdurior naturali, alvus tardior magis magisque evadit, scybala duriora aegerrime eiciuntur, color faciei demum perit, oedemata, aut *anasarca*, interdum etiam *ascites* superveniunt, ac aeger tunc misere occumbit. *Quibus tormina, inquit HIPPOCRATES¹), et circa umbilicum dolores, et lumborum dolor, qui neque purgante, neque aliter solvitur, in hydropem siccum firmatur.* Id autem evenit, quod eiusmodi dolores in suppuratum abeunt, effunditurque pus in cavum abdominis.

1) *Aphor. XI. sect. IV.*

§. CXLII.

Signa tumoris tubi intestinalis.

Interdum si pars aliqua tubi intestinalis magis turgeat, ibi etiam tumores oblongi aut rotundi protuberant, et tactui se exhibent, quandoque etiam oculis. Ex loci vero tumefacti sede modo ventriculus, modo colon, modo aliae

Emphysematici. Abdominalis.

partes affici cognoscuntur. In *emphysematico* planior ac aequalior tumor est, minorque resonitus percipitur. In *tympanite* vero *abdominali* non tantum resonat attactum abdomen, verum etiam aëris fluitantis motum, si utrinque

manu admota percutiatur, et quasi undulationem exhibet. Quod magis etiam patebit, si causae praecesserint, quae aërem in cavum abdominis immittere aut extricare possunt, simulque vera alicuius humoris fluctuatio se prodatur.

P r o g n o s i s.

§. CXLIII.

Incipiente *tympanite* curationis spes aliqua affulget; *Quando spes* nam interdum ex voto succedit, imprimis si atonia sola, aut *salutis sit aliqua.* bilis defectus, aut multa pituita eum efficiat. Plures tamen ex his quoque pereunt, quam servantur. Inveterato vero *Quando non.* malo vix quidquam spei superest. Si a laesis, ruptis, corruptis ventriculo, intestinis, visceribus oriatur, aut cum ascitè aquoso, aut purulento, aut anasarca copuletur; tunc nullam recipit medelam. Nihil hic proficiunt flatuum exitus, aut alvi fluxus, qui potius exitium propinquum, si subitanens et frequens sit, portendit. A mictu tamen cruento *VOGELII observatio.* interdum solvi malum, auctor est VOGELIUS ¹). Interdum detumescit nonnihil venter, ac fallacem spem alit; sed paulo post iterum invalescit tumor. *Vomit* *cruentus* superveniens fere lethalis est, praesertim si animi deliquia cum eo *Signum lethale vomitus cruentus.* iunguntur. Virium lapsus, macies, febris, appetitus deiectio, *Alia signa lethalia.* enteritis, ileus, ischuria, dolor colicus ingravescens, umbilici aut intestinorum inflammatio, et crurum sphacelus si supervenerint, certam mortem significant. Lethalis quoque est, qui a rupta cystide fellea effusaque bile oritur.

1) *De cognosc. et curand. morb.* §. 665.

C u r a t i o.

§. CXLIV.

Quando *tympanites* a *vitiis coctionis primae*, ab *ato-* *Tympanitae curatio varia.* *nia* et *debilitate*, a *bilis defectu* aut *inertia*, ab *alvo ob-* *Eccoprotica,* *structa* ac *pigra* oritur, curari debet *eccoproticis*, *amaris,* *amara,* *sapo-*

nacea, aperientia et roborantia.

Enemata acria quae.

Aër ex ano syringa educendus.

Extrinsecus adhibenda.

Emphysematici curatio eadem.

saponaceis, aperientibus, uti sunt pilulae *Becherianae*, tartareae BONTII, de gummi ammoniaco QUERCETANI, rhabbarum, sapo venetus, elixirium proprietatis PARACELSI, gummi ferulacea, extractum et decoctum ex absinthio, chamomilla, abrotano, baccis inniperi, cortex cascarillae, aurantiorum, peruvianus, semina anisi stellati, dauci cretici, foeniculi, coriandri, ac demum chalybs. Enemata quoque acria ex decocto nicotianae, rutae, florum chamaemeli, meliloti, sambuci, urina pueri aut vituli, interdum frigida, laudantur. Sed imprimis aërem ex intestinis esse exsugendum nonnulli iubent per syringam stanneam ampliorem in anum immissam, embolo saepius educto, sicque aëre evocato. Extrinsecus fricandum abdomen est balsamis, oleis, spiritibus penetrantioribus; fovendum sacculis ex surfure, sale communi et speciebus carminativis calide applicitis, vel emplastris de galbano, de meliloto, de baccis lauri, unguento de arthanita maiori, vel aqua frigida, quae etiam potui danda est, vel fascia cingendum, et leniter comprimendum. Similia conveniunt etiam *emphysematico*.

§. CXLV.

Quando sanguis mittendus.

Antispastica quae et quando.

Quando antiseptica adhibenda.

Paracentesis.

Roborantia et adstringentia quando magis idonea.

Si a *suppressis lochiis* aut *catameniis* oriatur, sanguinis missio, hirudinum applicatio et lenia emmenagoga locum habent. Antispastica quoque, ubi *spasmi* et *convulsionès* morbum faciunt, opportunissima sunt; inter quae oleum et laudanum, aqua frigida, aut nive glaciata tam intrinsecus, quam extrinsecus adhibita, et castoreum praestant. Ubi *putrefactio* aut *puris effusio* morbo originem dedit, acida, resinosa, antiseptica danda sunt. Si demum aër in cavo abdominis contineatur, paracentesi educi potest, licet saepe, causa remanente, morbus non tollatur, imo in peius saepe ruat. A nimis *evacuationibus* orto roborantia, amara, adstringentia medentur ¹).

1) *Tympanitae anomali* curationem saponaceis, antihysterics, antiscorbuticis et martialibus remediis peractam videbis *Vol. I. p. 354. comment. acad. Edimburgens.*, auctore Cl. ALEXANDRO MONRO. *Ex sched. auct.*

CAPUT XII.

DE OBSTRUCTIONIBUS ET TUMORIBUS
VISCERUM ABDOMINIS.

§. CXLVI.

Quotiescunque viscus aliquod durius, quam eius natura ferat, aut mole auctum sit, et renitatur, id esse ob-
structum a medicis communiter dicitur. Sic *glandulas obstructas* vocant, quando mole augentur, aut ex mollibus durae ac tactui resistentes fiunt. *Obstructionem* vero nasci
Boerhaavia tunc docent, quando *arteriae minimae*, quas *conicas* pu-
viana obstru- tant, angustiores sive proprio vitio, sive alieno factae liquo-
ctionum ribus traiciendis non valent, aut liquores ipsi densitatem,
theoria. crassitiem, visciditatem eam obtinuerunt, propter quam in minima vasorum capillamenta ingredi nequeunt, aut demum vis vasorum contractilis ita langueat, ut humores propellere ulterius non possit. His omnibus causis humores in minimis vasis haerere et colligi, partes dilatari, repleri, indurescere, augeri tradunt, et *obstructiones* progigni.

§. CXLVII.

At multa obstare videntur, quo minus in eiusmodi ex-
 plicatione penitus conquiescamus. Et primum arterias mi-
 nimas non *conicas*, sed *cylindricas* esse nuperrimae anatomi-
 corum observationes evincunt. Itaque humor, qui in eas
 semel ingressus est, a decrescente vasorum diametro impe-
 diri non potest, ne ulterius iter suum prosequatur. Sed
 demus, humorem vel vasorum vitio, vel proprio in iis haerere.
 Tunc vasa ab eodem repleta ut coeca et solida ab hydraulicis
 habentur. Nihil vero in ea influere, nihil amplius recipi ab iis
 potest. Ergo neque distendi, neque in maiorem molem dilatari
 possunt, nam humor appellens statim eo se convertit, quo minor
 est resistentia; in vasa igitur
Repugnantia dictae theoriae demonstratur ex
figura minimarum arteriolarum et legibus hydraulicis.
In ea hypothesis vel nequeunt vasa mole augeri,

vel si augentur, minime indurescere. tur libera et patula, vel etiam retrogrado modo refluit. Si primum, poterit quidem vasorum capacitas paulatim ab influente liquore augeri, non vero pars indurescere, et in tumorem attolli. Si alterum, nec vasa dilatari, nec pars mole, et volumine adaucto naturae limites excedere unquam poterunt. Oportet ergo mutationem aliquam in obstructa parte contingere, quam ob rem ea et mole in dies excreseat, et duritie acquisita renitatur. Haec autem mutatio quatenam, quaeso, erit, nisi *cellulosi textus*, quo viscera et glandulae pene conflantur, *dilatatio, extensio et repletio*? Si enim cellulosus textus laxetur, si vacua eius spatia humori influenti magis, quam convenit, cedant, si copiosiores aut spissiores admittant, nec valida satis vi eum propellant et dimoveant, idque lente et successive contingat, prout nempe cellularis textura magis magisque enervatur, aut ab humore influente urgetur; expeditissimum est intelligere, quomodo paulatim cellulae dilatatae ac humore congesto distentae non tantum partium molem auctam, verum etiam duritiam renitentem exhibeant; et quomodo simul aliquis humorum per reliqua earum vasa circuitus per severet, eiusque partis, quae obstructa est, nutritionem et vitam conservet. Idem quoque eveniat necesse est, si, quae in vasorum tunicis foraminula exstant, quaeque pori inorganici vocantur, aut lateralia vascula, quae in cellulas patent, ab humore per propria vasa progredi impedito, ac aliorum sibi viam quaerere coacto urgeantur, dilatentur, repleantur; nam tunc in cellulosa spatiola vasis interiecta adiget maior humoris copia, qui si praeterea lentus viscidusque sit, eo magis ad omnia obstructionum phaenomena explicanda valebit.

§. CXLVIII.

Praecipue partes h. c. obstructionibus obnoxiae. *Obstructionibus obnoxiae* esse possunt omnes nostri corporis partes; sed imprimis sunt *hepar, lien, mesenterium, omentum, pancreas, renes, ovaria, uterus et corpora glandulosa* ¹). Si vero glandula aliqua, aut peculiaris cellulosi a peculiari

textus particula alicubi tantum intumescat ac induretur, aut vas aliquod lymphaticum in ampullam expandatur (quod ta-
men nonnulli hodie, quos inter PORTALIUS, fieri posse ne-
gant), varia tumorum genera oriuntur, nempe *solitaria*,
circumscripta, *membranis adnata*, *viscerum superficiei* saepe
adhaerentia, *strumosa*, *cystica*, *folliculata*, *hydatidea* et
sic porro. Pro varia etiam humoris infarciensis natura et
diverso obstructionis gradu, aut tumoris forma, figura,
symptomatis, varia etiam nomina sortiuntur, *steatomatis*,
sarcomatis, *scirrhi*, *cancri* etc.

*parte cellu-
lost textus,
a vasis lym-
phaticis tu-
mores varii.
Varia quo-
que nomina
ab humore
infarciente,
tumoris for-
ma, figura
etc. sortiun-
tur.*

1) *Tumor durus, indolens in epigastrio etc.* descriptus
ab auctore est *observatione XXII.* operis inscripti: *Observa-
tionum medicarum, quae anatomiae superstructae sunt etc.,
quas collegit ediditque anno 1764. Cl. BENVENUTUS Lucensis.
Editor.*

§. CXLIX.

Remotas causas suppeditant languida et debilis corpo-
ris constitutio, fibrarum atonia, viscerum et crassi humores,
acida, austera, glutinosa, pinguis, adstringentia, coagulantia
tum remedii, tum alimenti forma assumpta aut applicata, im-
perfecta ciborum coctio, depravata chylosis, febres diutur-
nae, aut praepostere suppressae, evacuationes nimiae, aer pa-
luster, aquarum insalubrium potus, vini aut spirituum vino-
sorum abusus, vita deserta, animi curae, moeror, affectio hy-
pochondriaca et hysterica, spasmi, aliaeque omnia, quae aut
tonum partium laedunt, aut debitam sanguinis crasin de-
pravant, aut motum eius retardant impediuntque.

*Causae re-
motae.*

D i a g n o s i s.

§. CL.

Praeteritorum commemoratio causas, a quibus obstru-
ctio oriri solet, patefacit, et ad eius diagnosi viam pan-
dit. Signa vero praesentia praebet tensio, gravitas, dolor
fixus et obtusus, tumorque in aliqua abdominis parte. In-
terdum adest respirationis difficultas, et tussis profunda et

*Quae pan-
dant viam
diagnosi.
Signa obstru-
ctionis iam
praesentis.*

Recens obstructio non facile percipienda.

Animadversio.

Quando scirrhosam aut cancrsam naturam acquisiverit.

Alia mala, quae accedunt.

secca, quae aut a diaphragmate sursum protruso, aut a nervis consentientibus originem ducit. Notandum tamen est, cum obstructio parva et recens est, non facile eam percipi, solumque aliquam in eius, quae afficitur, partis actione laesionem apparere. Non vero statim ac aliqua in functionibus viscerum imi ventris laesio occurrit, obstructions accusare licet; quia saepe mala huiusmodi ab imbecillo et male affecto ventriculo, aut a succorum gastricorum depravatione, aut a spasmis oriuntur. Dolor item omnis abest, si *scirrhosam* naturam vetustate *obstructio* acquisiverit, aut contra acutus et pungens, et cum ardoris sensu excitatur, quando in *carcinoma*, sive *cancrum*, aut *abscessum* eadem commutetur. Haec diu trahuntur, sensimque augentur. Accedunt demum malus corporis habitus, cachexia, inacies, atrophia, febres lentae, oedemata, urinae crassae, lateritiae, ascites, anasarca et variae hydropis, aliae differentiae.

§. CLI.

Obstructio hepatis signa.

Lienis obstructio.

Pancreatis, omenti, mesenterii, renum, ovariorum, uteri.

Tumores omenti multiplices sunt.

Si *hepar* obstructum est, in hypochondrio dextro, aut in epigastrio, prout dexter vel sinister eius lobus laborat, tumor et renisus percipitur, nisi sub costis spuriis altius delitescat; facilius in dextrum latus decumbitur, et *icteri* symptomata, imprimis si *concava hepatis* pars afficiatur, saepe se exserunt. Si vero *lien* intumuerit, in sinistro hypochondrio tactui se prodit, interdum antrorsum aut deorsum probabitur, sinistro in latere commodior decubitus est, et si hunc corporis situm matent aegri, in dextramque partem recumbant, ponderis et tractionis sensum in opposita percipiunt. Tumor, dolor, pondus transversim sub ventriculi fundo residet, si *pancreas* infarctu detineatur. Media vero in ventris regione, aut circa ilia, aut in hypogastrio *obstructionis* symptomata notantur, si *mesenterium*, si *omentum*, si *renes*, si *ovaria*, si *uterus* laborent, adsuntque harum partium laesae functiones. *Omenti* tumores multiplicis sunt naturae, prout vel *aqueus* humor, vel *gelatinosus*, vel *pinguis*, vel alterius naturae, vel *aër collectus* eos gignit.

Hydatides, quae reperiuntur in *omento*, non ex vasis sanguiferis aut lymphaticis dilatatis, sed ex *cellulosa* tela formari docet PORTALIUS ¹). Flatu enim horum tumorum parietes in cellulosam telam ipse mutavit, et nonnunquam pinguedinem inter eorum laminas invenit. Tumores hi tactu percipiuntur regione, qua residet omentum. Saepe ita mobiles sunt, ut aegri situ mutato ex uno latere in aliud delabantur. Si materia pingui et crassiori turgeant, et mole ac pondere per morbum aucti sint, molestas tractiones tensionesque visceribus, quibus adhaerent, inferunt, imprimis ventriculo, unde saepe molestissimus vomitus excitatur ²). *Mesenterio* innati tumores profundius haerent, minus mobiles sunt, et centrum ventris magis tenent. *Emphysemate* etiam *omentum*, eodem PORTALIO teste, interdum laborat, aëre intra eius laminas evoluta et collecto; quod etiam sine putredine accidit hypochondriacis et hystericis. Tumor hinc ortus mobilis est, exterius tactu percipitur, et elasticus est, quem curat equitatio et balnei usus. *Scirrhi* autem duritie et absentia doloris, ut supra innuimus, se produnt. His obnoxiae maxime mulieres, quae pluries utero gestarunt ³). Scire vero oportet, haec omnia saepe fallere ob viscerum situm pluries variatum, aut intestinorum complicationes, tumoresque adnatos, ut alibi saepius monuimus.

Hydatides omenti ex cellulosa tela conflantur.

Earum sedes et mobilitas.

Signa earum si a materia crassiori, aut aucta mole sint.

Mesenterii tumores.

Signa emphysematis omenti et eius curatio, si hypochondriacis aut hystericis accidat.

Scirrhus.

Qui ei magis obnoxii.

1) *Histoire de l'académ. roy. de l'année 1770. et 1771. p. 541.*

2) *Comment. de reb. in scient. nat. et medic. gest. Lips. T. XXI. p. 408.*

3) In graviditate saepe *omentum* ab utero premitur, repellitur, ac in se ipsum revolvitur ut nonnunquam inflammetur, indurescat, et tumores variae formae efficiat duros et oblongos, situm modo obliquum, modo transversum occupantes. Huiusmodi tumores in mulieribus, postquam peperere, inveniuntur in earum abdomine, et per multos etiam annos gestantur sine magno incommodo. RUYSCHIUS in mulieris cadavere observavit *omentum* duos digitos crassum, tres latum, *spitham*. 1/12. longum, adiposo carnosum, imo *scirrhosum*. *Ex sched. auct.*

P r o g n o s i s.

§. CLII.

*Quid de recenti obstructione.**Quid de inveterata.**Quomodo interdum solvantur.*

Ex iis, quae hactenus dicta sunt, facile elici potest prognosis. Generatim *obstructio* recens et iuvenibus super-
veniens resolvitur; inveterata vero, ac senili aetate contin-
gens ferme incurabilis est. Haemorrhoidum fluxus, febris
intermittens, interdum vomitus cruentus, diarrhoea non raro
levamen afferunt. Interdum quoque narium haemorrhagia
lieni tumido remedio fuit, ut observavit MENGINIUS Bo-
noniensis.

C u r a t i o.

§. CLIII.

*Indicationes.**Alcum lenientia praecipua.**Crebri clysteres.**Qui, et quando sanguis mittendus.*

Ad omnes vero *obstructiones* reserandas oportet crassa
attenuare, stagnantia dimovere, acria diluere, coacta fluida
facere, vias patulas reddere, spasmos sedare, avertere, to-
num fibris restituere, ac singulares antecedentes causas ar-
cere. Quae ut assequamur, lenienda primum est alvus, et,
ut dicitur, per epicrasin; imo id identidem, dum reliqua
remedia, quae aperiunt et deobstruunt, adhibentur, oppor-
tune faciendum est. Rhabarbarum, cremor tartari, tartarus
solubilis, manna, aloë, pilulae tartareae *Bontii*, de ammo-
niaco *Quercetani*, de tribus cum rhabarbaro ceteris prae-
feruntur. Clysteres quoque frequenter iniecti tam solven-
dae alvi, quam proxime in viscera per vasa absorbentia li-
quorem infundendi causa a multis summopere commendan-
tur. Nec alienum est sanguinem mittere, saltem hirudinum
ope, si plethora, si graviditas, si catameniorum aut hae-
morrhoidalis fluxus suppressio morbo occasionem dederit.

§. CLIV.

Aperientia e vegetabilibus selecta.

Inter vegetabilia aperiendi vi praedita quinque radices
aperientes, nimirum radix apii, asparagi, foeniculi, petrose-

lini et rusci primum sibi vindicant locum. In calidioribus *Quae siccioribus teuperamentis aptiora.*
siccioribusque temperamentis radix graminis, cichoreum, taraxacum, fragaria, acetosa, agrimonia, fumaria, beccabunga ceteris antecellunt. In laxiori frigidaque corporis constitutione radix rubiae tinctorum, filicis, curcumae, absinthium, abrotanum, marrubium, nasturtium aquaticum, raphanus rusticanus, cortex mali aurantii magis opportuna videntur.

Decocta et succi ex his expressi vere, aut concreti hieme *Decocta et succi, addito sero luctis.*
adhibendi parantur; quibus addendum est serum lactis vac- *Saponacea et incidentia quae.*
cini aut caprilli. Simili laude praestantissima sunt saponacea et incidentia, ut gummi ammoniacum, sagapenum, opopanax, sapo Venetus, terra foliata tartari, liquor terrae foliatae, sales lixiviales, neutri, tartarus vitriolatus, sal polychrestum, arcanum duplicatum, sal ammoniacum, eius flores, tinctura antimonii acris, kernies minerale ¹), mercurius dulcis. HUXHAMUS testatur, se millies expertum vim medicam tartari regenerati, sive terrae foliatae in obstructions; imo etiam ei tanquam efficacius substituendum docet sal volatile C. C. aceti spiritu saturatum ²). Saponem ex alcali purissimo et oleo stillatio coalitum, nempe *Helmontianum*, laudat in frigidissimis corporibus BOERHAAVIUS ³). GEDEON HARVEIUS tincturae salis tartari cochlear unum mane et vesperi proponit ⁴). Obstructiones reserat, et urinas ciet. Tinctura haec fit unciiis ij. salis tartari calcinati in spiritu vini non rectificati, sed optimi, ad quatuor digitorum supereminentiam, digesti in igne arenae, donec color flavescat. Tunc decanthur ad usum. Succus uvarum recens expressus fundit omnia, et proinde reserat, et obstructa aperit, teste SWIETENIO ⁵). GUILIELMUS FARRIUS usu interno et externo cicutae *obstructiones hepatis et lienis*, a quibus et tussis, et ascites, et anasarca ortus erat cum tertiana febris coniunctus, discussit ⁶). LANGEUS narrat, absinthii extractum cum sapone Veneto ad semidrachmam in dies singulos intra tres hebdomadas mira praestitisse in *hepatis et lienis* obstructionibus ⁷). Idemque affirmat, in atrophia infantum et puerorum ab imi ventris et mesenterii

Terra foliata tartari.

Sal volatile c. c. Helmontianum.

Tinctura salis tartari HARVEI.

Uvarum succus recens expressus.

Externus et internus usus cicutae.

Extractum absinthii cum sapone veneto.

Sal Glauberianum cum luctis sero in pueris.

*Decoctum
scrophula-
riae.*

*Sapo Venet.
et ipeca-
cuanha, et
oleum semi-
num lini in
fine.*

obstructione sal *Glauberianum* in sero lactis diu continua-
tum optime prodesse ⁸). LEDELEURYUS laudat decoctum
scrophulariae, saponem Venetum, et ipecacuanham refracta
dosi, et in fine oleum seminum lini adhibet felici cum
effectu ⁹).

1) GEOFFROY *Mat. med. T. I. p. 126.*

2) *Observat. de aëre et morb. epidem. T. 1. p. 144.*

3) *Chem. T. I. p. 395.*

4) *De art. curand. morb. expectat. p. 25.*

5) §. 605. n. VIII.

6) *Med. observat. and inquiries T. IV.*

7) *Miscell. verit. Fascic. I. p. 55.*

8) *Ibid. p. 79.*

9) *Comment. Lips. de reb. in sc. nat. et med. gest. Vol. VIII. P. III. p. 423. 424.*

§. CLV.

*Roborantia.
China china
et chalybeata.
Quae fomen-
ta, inunctio-
nes et empla-
stra.*

His tempore idoneo diuque adhibitis addenda deinde
sunt roborantia, uti millefolium, cortex Peruvianus, ferrum
et eo parata. Insuper fomenta, frictiones, inunctiones ex
oleo capparum, chamomillae, absinthii, unguenta et empla-
stra, uti de arthanita, de cicuta, de ranis cum mercurio,
saponatum BARBETTAE (additis pro re nata gummi ammo-
niaco, galbano, elemi) extrinsecus adhibita non negligen-

*Aquae mine-
rales et bal-
nea.*

*Embroche,
et eius uten-
di ratio et
cautelae.*

tur. Aestivo tempore conveniunt aquae minerales acidulae,
aut catharticae amarae, aut ferratae, et balnea. Sed nihil
praestantius est *embroche* ex lacte primum, aut decocto
emollienti, deinde ex aqua thermali, aut ferrata, vel fabro-
rum. Administratur autem remedium istud, ut stillatim ex
alto in affectam partem eiusmodi liquores decendant. Ca-
vendum autem in eius administratione est a nimio impetu,
qui dolorem aut inferre, aut intendere, si iam adsit, cum

*Quid tumor-
es mobiles
coëreat.*

*Quid medea-
tur frigidis,
humorum*

aegri damno posset. *Tumoribus mobilibus* et pondere mo-
lestis levamini sunt fasciae abdomini circumductae, quarum
ope sublevantur ¹). GORTERIUS animalia viventia, aut ea-
rum viscera tepentia obstructis iugiter applicata magnopere
lau-

laudat, utpote calore naturali concretos a frigore aliaque *concretionibus.* simili causa humores optime resolventia ²).

1) PORTALIUS *l. c.*

2) *De secret. humor. §. 33.*

§. CLVI.

In victu cruda, farinosa, pingua, flatulenta, facile ¹ de- *Victus et potus.* generantia, acida, austera vitentur. Potus sit aqua purissima aut incoctis vegetabilibus, aut chalybe candenti immisso alterata, aut vinum tenue, album, absinthites moderate usurpatum. Aëris purioris delectus, equitatio, vectio, *Aëris puri delectus. Equitatio etc.* peregrinatio ita necessaria sunt, ut his curatio carere non possit. Quid scirrhis ¹), cancris, abscessibus ²), atrophiae ³), hydropi ⁴) expediat, alibi iam pluries a nobis *Quid scirrhis cancris, abscessibus.* expositum est.

1) Uteri tumorem, qui tangenti scirrhusus videbatur, solo *Observationes variorum.* chamaepityos usu, nullo exterius adhibito auxilio, nulla excretionem subsequuta, feliciter discussit ALBERTINIUS. MORGAGN. *rum.* *Epist. anat. med. XXXIX. n. 35.* Cave vero ab hoc remedio, ubi sanguinis ex utero sit profluvium. *Id. ibid.* VALSALVA uteri et mammarum scirrhus coërebat venae sectione bis vere, bisque autumnis instituta. *Id. ibid.* LANGEUS *glandularum tumores*, et recentes mammarum scirrhus, quos nec mercurius, nec cicuta attingeret, felicissime curat petroselino conciso et aegrotantis urinae incocto, partique induratae imposito. *Miscell. verit. Fasc. I. p. 26. Ex sched. auct.*

2) Vid. de scirrhis, cancris et abscessibus comm. de inflammation. §. LXXVIII. Vol. I., et §§. CCCVI. CCCVII. CCCVIII. CCCLIX. de febrib., et Vol. II. §. CCCXXXIII. etc. Vol. III. §§. CCCLXXXVII. CCCLXXXIX. CCCXCVII. Vol. IV. P. II. §. XVI. etc.

3) De atrophia Vol. IV. P. I. cap. III. etc., aliisque locis.

4) De hydropo vid. Vol. III. cap. II., et hic P. I. cap. V. P. II. cap. XI.

De paracentesi in hydropo ascitico etsi opportunior loquendi Nota Editor locus videretur esse, ubi cap. V. prima huius Vol. partis ris.

AUCTOR de hydropo pectoris speciatim agens, de quolibet etiam hydropo humani corporis generatim agit; mihi tamen tunc aliis pluribus intento non est tempus relictum consulendi hac de re eius medica adversaria. Haec autem postea percurrenti mihi nonnulla de eiusmodi operatione in abdomine instituenda ab eo ibidem adnotata contigit observare, quae adicere hoc loco malui, etiam si minus proprius, nec nova

*Paracentesis
abdominis
in ascite.*

eadem, et fortasse utilia videantur, quam penitus intercideret. En AUCTORIS ipsissima verba. Paracentesis eo in loco fieri debet, qui est medius inter umbilicum et anteriorem spinam ilci. Hic neque nervi, neque vasa insignia, neque rectus musculus sunt. Securior igitur locus pro operatione est is. Aqua vero educi debet omnis una vice, ne ingressus aër corruptionem aliave mala symptomata inducat per vices aquam educendo. Ne autem integrae aquae extractioni superveniant deliquia etc. proponitur cingulus, cuius descriptio et usus refertur a Cl. ALEXANDRO MONROO *T. I. artic. XVIII. p. 255. (Essais de méd. d'Edimburg.) edit. Parisiensis.* Hoc enim cingulo sic omnia abdominis viscera comprimuntur, ut comprimerentur, si aqua adesset. Quo fit, ne deliquia et synopes, ut alias fieret, sequantur ex relaxatis visceribus, et nimium illico a pondere liberatis. GARENGEOTUS (*T. I. observation. p. 298*) iubet, antequam *paracentesis* celebretur, ut aeger exercitio utatur, eo quidem consilio, ut partes aquei humoris in cavitate stagnantis crassiores tenuioribus probe miscantur, et sic facilius exeant. Quod si post paracentesin dubium sit, adesse huiusmodi crassas particulas retentas, iniici vult aquam hordei ad eas eluendas educendasque. *Ex adversar. auct.*

CAPUT XIII.

DE MORBO REGIO ET DE CALCULIS FELLEIS.

§ CLVII.

*Quid sit
morbus re-
gins.*

Nitidus, albus rosensque cutis universae color pluribus modis deturpari solet; nimirum vel praeter modum flavescit, vel viret, vel nigricat, vel pallet, vel vario et mixto quasi pigmento inficitur. Hunc morbum graeci ἰκτερόν¹), nostri *morbum regium*²), modo *arquatum*³), modo *au-*

*Unde icterus
plerumque
sit.*

riginem, modo *bilis suffusionem* vocant. Ab hepatis morbis atque a bilis excretionem impedita aut imminuta, etsi plerumque, non tamen ab hac sola causa, nec semper *icterus* nascitur. Saepe in *ictericis* nullum hepatis vitium, nulla ductuum biliferorum labes, nulli calculi fellei. Depravata

enim sanguinis mixtio, aut seri, aut lymphae eius vitata natura, citra hepatis aut bilis culpam, universae cuti, salivae aliisque corporis succis alienum non raro inducit colorem (ut ex certissimis observationibus liquet), similem nempe illi, quem bilis in sanguinem refluens, ac per universum corpus diffusa inferre consuevit. Ille *magis proprie icterus*, hic *minus proprie*, et latius sic vocatur *). Color itaque sanguinis, aut eius seri et lymphae insigniter a naturali statu deflectens causa huiusce morbi proxima statui potest.

Ab aliis est citius quoque, sed tunc minus proprie icterus dicitur.

Causa proxima icteri.

1) *Ictidos civerra*, mustelae silvestris species, cuius oculi *auriginosi* sunt. *Icteros* avis eiusdem coloris, qua spectata curari, ipsam vero avem mori PLINIUS narrat. *Ex sched. auctor.*

2) *Regius*, quia secundum eundem PLINIUM hoc morbo aulici laborant plerumque. *Ex sched. auctor.*

3) *Arquatus*, quod arcus coelestis, sive iridis colorem refert. *Ex sched. auctor.*

4) VVEDELIUS, PARACELUS, LANGIUS, STRAUSSIIUS, BONETUS *Thes. med. T. II. p. 855.*

§. CLVIII.

Ad causas vero remotas pertinent primum nimia bilis copia, aut rarescens natura, qua fit, ut non omnis facile excerni possit, sed pars aliqua in sanguinem refluat ¹), aut bilis acritas alcalina, qua ductus biliferi irritantur contrahunturque, vel impedimentum aliquod in ductus hepatici ramis, vel in eius trunco, vel in choledoch, quod bili secretae ad intestinum duodenum liberum transitum deneget. Id autem efficiunt vel grumuli bilis viscidioris coactae, vel calculi fellei hepatici, vel cystici, quibus occluduntur ductuum biliferorum meatus, vel viscidus mucus in intestino duodeno collectus, vel meconium in pueris, quo orificium choledochi obstruitur, vel lumbrici intestinales in choledochum dilatatum ingressi ²), vel omnium horum ductuum imminuta capacitas. Haec porro imminuitur vel spontanea et lenta ductuum contractione, rigiditate, vel spasm, vel extrinseca compressione ab infarctibus, congestionibus tumoribusque vicinarum adsitarumque partium repetenda. Quo

Causae remotae.

Quomodo imminuitur ductuum biliferorum capacitas.

referuntur inflammatio, praesertim simae hepatis partis, obstructio, scirrhus, tubercula varii generis, spasmi ³) hypochondriaci atque hysterici, febres acutae, vel intermittentes, venena acria et drastica, ut monet HOFFMANNUS, monentque alii, dolores colici, intestinorum, praesertim duodeni et coli distentio aut inflatio, pancreatis moles aucta et scirrhosa, otium, desidia diuturna, aut frequens corporis in anteriora inclinatio, cui quaedam artes ac litterarum studia obnoxia sunt, animi perturbationes, ira, terror subitus, moeror, victus durus, crassus, viscidus, spirituum ardentium abusus, graviditas, hypochondrii dextri ictus, meconium retentum, subita corporis ex natatione refrigeratio, cachexia, lienis tumores obstructionsque, viperac aliorumve animalium morsus venenati ⁴).

MARCKARDII
opinio a TODIO
reiecta.

1) Bilis per febrim mota, attenuata in sanguinem resorbetur, urinam et oculos icterico fere colore tingit, docente SWIETENIO §. 587. Cl. MARCKARDUS in libro Lipsiae edito ann. 1778., cui titulus — *Medicinische Versuche I. etc.* — opinatus est, *icterum* non nasci a bile *hepatica* refluyente, nisi *cystica* etiam influat. Sed eius sententia a TODIO in laudati libri recensione refellitur. Vide argumenta apud HAENIUM *T. I. Praelect. in instit. pathol. p. 119. in additament.* *Ex sched. auctor.*

2) G. I. BEUTHIUS auctor est, non raro *vermes* ex duodeno in vesiculam felleam repere, ibique morando *icterum* efficere. Vidit ipse *lumbricum* valde crassum et magnum *vesicula fellea* inclusum. Vid. *Comment. med. Lipsiensia. Vol. XVIII. p. 713.* LIEUTAUDIUS quoque invenit *lumbricum choledochum* penitus obstruentem. *Hist. anat. med. T. I. p. 211.* Tres pariter *lumbricos teretes* in eadem *cysti fellea* vidisse s. LUDWIGIUS affirmat. *Ex sched. auct.*

3) A spasmis *icterum* nasci negant COE et HEBERDENIUS sed *spasmos* probant subiti ex pathemate *icteri* geniti, observantibus TODIO, CULLENIO, MONROO ac DRUMMONDIO pos. Cl. SYDENHAMII. *Ex sched. auct.*

4) A *viperac* morsu in quodam servo Imperatoris colorem *porraceum* totius corporis vidit GALENUS *de l. effect. I. P. c. 8.* A morsu interdum *boiciningae*, sive *crotalophori* aliorumque serpentum corpus *flavescere* constat. *ICTERUM a feli domesticac* morsu XL. dies durantem vidit JOSEPH. LANZONIUS. *Ephemer. N. C. etc.* *Ex sched. auct.*

§. CLIX.

Distinguitur *morbis regius* in *primarium* et *secundarium*, in *legitimum* et *non legitimum*, in *criticum* et *symptomaticum*, in *flavum* et *nigrum*, in *periodicum* et *non periodicum*, in *brevem fugacemque* et *diuturnum ac contumacem*. *Periodicum*, sive potius *recurrentem* efficere ple-
rumque calculi fellei creduntur. In *cystide* praesertim *fellea* hi frequenter offenduntur; suntque lapilli variae magnitudinis, figurae, coloris et substantiae. Minimi, granulosi, parvi, maiores, maximi, angulosi, asperi, cubici, quadrati, quadrangulares, polygoni, conici, sphaerici, ovaes, cylindrici, interdum seiuncti, interdum in massulas coacti et congesti, flavi, sublutei, lutei, crocei, pallidi, candicantes, albido-bruni, citrini, luteo albi, fulvi, fusci, subnigri, atrii, coerulei, cinerei, rubri, argentei, aurei, subvirides, variegati, pellucidi instar crystalli, aut carbonum, aut chrysolithi speciem referentes, aut gummi arabico similes, ex variis quasi stratis, sive lamellis, aut radiatis striis compacti, ducenti interdum, trecenti, septingenti, milleni, et, si FASCHIO credendum est, bis mille, et ter mille sexcenti quadraginta sex; interdum pauciores, olivae, avellanae nucis, ovi columbini magnitudinem aequantes, interdum unici, et totam cystidem opplentes, duri, molles, friabiles, aquae ut plurimum innatantes, ad ignem flammam (ut flavi) concipientes, aut crepitantes, ut plerumque nigri, sive calcarei, aut etiam liquescentes, et sic porro ¹).

Differentiae morbi regii.

Calculi causa frequens periodici, sive recurrentis. Calculorum descriptio secundum infinitas eorum varietates.

1) Vid. MORGAGNIUM *epist. anat. med.* XXXVII, SABATIER. *Tentam. med. de variis calculor. biliar. speciebus etc.* et BOUCHERUM *observations sur les pierres biliaires etc.* Icteri ex calculis felleis historiam videre est Tom II, Essais de medec. d'Edimbourg. Ex sched. auct.

D i a g n o s i s.

§. CLX.

Icterus autem cognoscitur potissimum ex vario cutis, Signa icteri oculorum ac urinae colore. In ictero flavo, sive bilioso flavi aut biliosi.

cutis flavescit imprimis circa tempora, aures et pectus. Oculorum pars, quae alba esse solet, lutea, bileque suffusa apparet. Urinae sunt turbidae, croceae, eodemque colore immisum linteum inficiunt, quod aliae urinae non praestant; imo non raro morbum ipsum antecedunt, ac praesagium, cum saturate rubrae, antequam alibi flavedo se exserat, redduntur.

Sudoris et salivae.

Cur omnia quandoque ictericis flava esse videantur.

A bilis diffusionem omnes corporis partes intus etiam flavescunt.

Alia symptomata.

An faeces semper albicantes.

Febris ratio.

Diuturnitas morbi citiorem et nigrum inducit colorem.

Interdum a liene tumido atraque bile oritur nigricans color.

Sputum, saliva, sudor ex BORELLII observatione ¹⁾ interdum flavescunt, os amarescit, et sitis adest plerumque molesta. Nec desunt eorum exempla, quibus omnia flavo tincta colore videntur, quod a toto oculo, a cornea, ab humore aqueo infectis repetendum est ²⁾. Tanta enim bilis per corpus universum diffusio est, ut vasa, musculi, viscera, ossa ³⁾, adeps lutea reperiantur ⁴⁾. Ad haec accedunt corporis gravitas, circa ventriculum interdum dolor, appetitus deiectio, nausea, quandoque vomitus, agrypnia, pruritus in toto corpore, aut singularibus quibusdam eius partibus, alvus plerumque adstricta, atque excrementa grisea, cinerea, albicantia, quae potissimum eveniunt, ubi bilis tota in sanguinem refluere cogitur. Si enim choledochi iter non omnino occludatur, aut causa *icteri* sit in cystico ductu, tunc faeces tingi possunt ⁵⁾. Febris quandoque initio *icterum* subsequitur, videturque excitari a repentina bilis in sanguinem traductione, sed huiusmodi febris saepe brevis est, ac cito evanescit. Quandoque diuturniori tantum *aurigini* supervenit, et lenta est ac diuturna. Interdum vero ea *icterum* antecedit, ut in morbis acutis; interdum ea sibi comitem in qualibet accessione adiungit, ut in febribus tertianis saepe contingit. Ubi vero morbus diuturnior, corpus totum vel cum virore ⁶⁾ quodam pallescit, vel temporis diuturnitate, flavedine in dies incremente, nigrum colorem inducit; tuncque urinae ipsae fusco atroque colore opacantur. Interdum vero huiusmodi nigricans color non ab *icteri flavi* et *biliosi* diuturnitate aut intensiore eius gradu originem ducit, sed a *liene tumido* ac *atra bile* totum sanguinem inficiente nativumque corporis colorem commaculante; quod facile manu ipsa ad hy-

pochondrium admota aliisque atrabilaris morbi notis innotescit.

1) *Centur. I. observat. 68.*

2) Non modo VARRO, LUCRETIUS, SEXTUS EMPIRICUS, CASSIUS, GALENUS, sed et MERCURIALIS, HOFFMANNUS, SYDENHAMUS, BOERHAAVIUS, SWIETENIUS et nuperrime Cl. DURAZZINIUS rem observationibus illustrarunt. *Ex sched. auct.*

3) Ossa flavo colore tingi, et cartilagineas etiam flavas observavit SWIETENIUS §. 850. Item BEUTHIUS *l. c.*, et MAXIMIL. STOLLIUS *Rat. medend. P. III. Sect. V. observ. VII. Ex sched. auct.*

4) Vid. *Ephemerid. N. C. dec. I. ann. IV. observ. 194.*, MORGAGNI *Epistol. anat. med. 37. citat.*, et Cl. STÖRHK. *ann. medic. I. p. 150.*

5) HAENIUS *Rat. med. P. IV. c. III. p. 120.* Observat tamen idem HAENIUS *T. I. Praelect. tract. de ictero*, alvi excrementa interdum alba esse, quin *icterus* adsit. Tunc vero opinor, secretionem bilis non fieri. *Ex sched. auct.* Observationes autem non desunt MAX. STOLLII (*l. c. p. 355.*), ex quibus patet, ductus bilem ad intestina ferentes in *ictericis* apertos saepe inventos esse. Sed morbus erat plerumque cum *pulmonum et pleurae magna inflammatione*. An tum *icterus* erat a *spasmo*? an a *bile exulcerante*? Item *ex sched. auct.*

6) In *ephemerid. N. C. observation. XLI. p. 61.* legimus, *Rarae observationes. LANZONIUM* vidisse *ictericum* quadragenarium, cui *facies tota* *virescente* usque ad guttur virebat, *dextera* autem corporis pars nigricabat, et *sinistra* flavescebat, ita ut in eo tres diversi notarentur colores. Mirum, quod partes, quae prius virebant, paulatim flavae factae sunt, et quae atrae, flavae deinde redditae, et vicissim laeva iam flava paulatim nigra evasit, donec post vigesimum diem unus color flavus ubique fieret. In eodem opere *centur. III. observat. LXIV. p. 145.* BEHRENSIUS refert historiam *icteri* dimidii corporis in homine septuagenario, qui ab ira in *apoplexiam* incidit, deinde in *hemiplegiam dextri lateris* derivantem, quod latus eodem tempore occupavit *icterus*, et ita exacte corpus divisit, ut *dextra pars nasi* esset *icterica*, minime vero *sinistra*. Vid. ETTMÜLLERUM *collect. oper. pract. T. II. p. 844.* Etiam MEINARDUS SIMON DUPUIS in dissertatione inaugurali *De homine dextro et sinistro* similem prorsus habet observationem, quam tamen putat hactenus apud nullum alium auctorem reperiri. At, praeter modo allatas, eandem fecit observationem Cl. VALSALVA, et phaenomeni rationem explicat MORGAGNIUS saepe laudata *epistola XXXVII.*, quam videsis. *Ex sched. auct.*

§. CLXI.

Ex sanguinis depravata miscela ac seri lymphaeque vi-
tiis aurignem nasci dignoscitur, si nullus ad hepatis regionem

Signa aurignis ortae a sanguinis de-

pravatione et a seri, lymphaeque vitiiis. doloris aut molestiae sensus sit, si malus corporis habitus antecesserit, si urinae *icteri* signum non exhibeant, si excrementa non albicent, et facile prodeant, si vipera aliudve animalis venenati genus ante monorderit, aut venenum fuerit propinatum.

§. CLXII.

Icterus contumax et recurrens haud semper a calculis est. Neque, ut perperam credunt plerique, putandum est, *contumacem* aut *recidivum icterum* a calculis cysticis semper oriri (§. CLIX.). Nam saepissime in cystide fellea reperiuntur calculi, quin antea ulla *icteri* indicia se prodiderint. Id testantur LAELIUS A FONTE, PECHLINIUS, ETTMÜLLERUS, VALLISNERIUS, HALLERUS alique multi memorati a Cl. MORGAGNIO ¹), cui etiam contigit videre undeviginti homines, praeter alios quatuor a VALSALVA descriptos, qui calculos in cystide fellea habebant, et nemo tamen ex his morbo regio laboraverat. Ostendit praeterea idem eruditissimus vir, in iis, qui calculos cysticos habentes *ictero* obnoxii fuerunt, praeter hosce calculos alia hepatis vitia inventa fuisse. Quae si probe notentur, et simul ea, quae postea dicentur, animadvertantur, perspicuum erit, nulla signa certa calculis hisce pathognomonica esse, quidquid alii contendunt, nec nisi coniectura suspicari licere de eorum praesentia. Nam pondus, gravitas, dolor etiam ad inuicronatam cartilagine protensus, icterus contumax et periodicus aliaque eiusmodi aliis vitiis aliisque causis communia sunt. Sola igitur calculorum per intestina evacuatio, aut per os reiectio eos certo detegit. Ideo MORGAGNIUS dissolvi faeces suadet, cribroque secerni, ut si transeant calculi, videri possint ²). Cavendum tamen est, ne cum iis calculis, qui forte *intestinorum* sunt ³), confundantur. Mihi saepius accidit, vere *biliarios* vomitu eiectos intueri.

Calculi fellei sine ictero saepe dantur. Ictericis aliis vitiis hepatis laborantes praeter calculos felleos. An signum ullum calculorum huiusmodi pathognomicum.

Confundendi non sunt cum calculis intestinalium.

1) *Epist. cit. XXXVII. n. 31.* Vide etiam SCARDONAM *lib. III. cap. X. §. 10.*, ANTONIUM FELICIUM *Del praesagio medico p. 135.* et HALLERUM *Opuscul. patholog. observat. XXXIII.*

2) *L. c. n. 44.*

3) De calculis in intestinis et variis corporis partibus inventis legendus est laudatus SCARDONA *l. c. cap. XI. §. 1.*, MANETTUS in *notis ad SAUVAGESII dissertationes pag. 74.* et *Gazzetta medica d'Oltremonti n. 49. ann. 1763. etc. Ex sched. auct.*

§. CLXIII.

Itaque *calculi cystici* tunc solum *icterum* inferre possunt, quando figura acuminata aut pondere cystidem lacerant ac distrahunt ¹⁾, aut extrinsecus vi comprimuntur, aut in cysticum ductum a cystica bile, aut positu et compressione adiguntur, inducuntque tantam *irritationem*, ut etiam ductus communis sive *choledochus* spasmo afficiatur, bilisque excretionem impediat, vel demum quando in choledochum ingressi ibi haerent, ac eum penitus obstruunt clauduntque. Utroque vero casu vel ab *irritata cystide*, vel ab eius nimia per bilem cysticam copiosiore *distentione* ingens dolor in hypochondrio dextro excitatur, *icterumque* antecedit, imo subinde revertitur, *icterum* item revocans, aut eum intensiorem coloratioremque faciens. *Colicam ictericam* sive *hepaticam* aptissime vocant. Haec autem non semper a calculis, verum interdum a grumis bilis amurcosae ductum *choledochum*, aut a quacunque alia causa eundem ductum occludente, aut ab ipsa etiam bile cystica densiore et maiorem iusto acritatem per moram adepta exoriri potest.

Quando icterus cere a calculis sit.

Irritatio aut distentio cystidis cum dolore ingenti et ictero recurrenti COLICA ICTERICA sive hepatica dicitur.

Colica haec ab aliis causis quam a calculis oriri potest.

1) Haemorrhagias quandoque calculi inferunt. Disrupti ab iis rami venae portae exemplum legimus in *Diario medico Parisiensi anni 1732. mense Julio. Ex sch. auct.*

§. CLXIV.

Colica autem *icterica* adultos et senio proximos plerumque corripit, raro adolescentes. Prae ceteris eos, qui temperamento bilioso aut melancholico praediti sunt, et vitae desidi victuique lautiori aut animi curis magis dediti. Initio se prodit molesta tensione, gravitate, pondere in hypochondriis, praesertim aliquo post cibum assumptum intervallo, et saepe intra plurium mensium spatium recurrit. Deinde doloris sensum infert modo obtusi, modo acuti circa

Quinam obnoxii colicae ictericae et quibus ea signis se prodit ab initio.

Levior morbus, celeri flatu ortus,

ab initio despicitur, citoque evanescit. ventriculi aut scrobiculi cordis regionem, cardialgiae instar, cum continua ad hepatis locum anxietate internaque inexplicabili molestia. Brevi vero aut sponte aut ope carminativi cuiusvis remedii desinit, veluti a flatibus aliove in victu errato penderet. Sed die postera, si attente inspiciatur, album oculi, et speciatim ad angulum maiorem, plerumque leviter flavel, ac urina apparet solito saturatior et fere rubea, imo saepe alvus deficit multa subflava aut subviridia; quod ubi accidit, non semper in oculis ac urinis color, de quo modo dixi, se exhibet. Redit subinde malum, quandoque ad multos menses, et eodem modo decedit, quin aegris aut medicis timorem incutiat, cum nunquam desit aliqua manifestior causa, in quam facile reiiciatur, donec tandem vehementius corripial, diutiusque vexet et manifestissima *aurigine* terminetur. Quae intra paucos dies ut saepe evanescit, sic etiam aut *critica* aut *sympathica* ab intestini duodeni dolorifica contractione haberi solet.

§. CLXV.

Signa ingraescentis morbi. Verum non diu in hac fallaci mentis persuasionem licet versari; nam, *ictero* vix discusso, aut ad finem properante, ex levissima quacunque causa eo redit dolor cum summae distractionis tensionisque sensu circa iecur, ventriculum et cordis scrobiculum, anxietate irrequieta, tanto partium affectuum cruciatu et tumore, ut ne levem quidem manus contactum ferant, magna pectoris angustia, nausea, vomitione aut ad vomendum incitamento. Quandoque dolor ad lumbos dorsumque, quandoque ad umbilicum ac ensiformem cartilaginem protenditur¹); illuc enim duodenum pertingit, huc hepatis ligamenta pertinent; quandoque febrem acutam cum pulsu citato ac duro excitat, et adeo atrociter torquet aegrotantes, ut neque membra extendere, neque alia ratione decumbere, nisi in anteriora et ventrem, curvato corpore, possint. Haec modo diutius, modo brevius trahuntur, et quemadmodum saepe initio repente invadunt, sic interdum extemplo et sine ulla declinatione momento temporis de-

Nausea, vomitus aut vomituritio.
Doloris ratio et symptomata.
Haec mala inopinato invadunt, et inopinato de-

dunt; saepius tamen lente et gradatim, subsequente semper totius corporis, aut saltem faciei et pectoris colore icterico, alvo tarda et adstricta, urina pauca et crocea. Decedunt momento temporis, quando cystis fellea unica veluti evacuatione depletur. Depletur autem, quando magno impetu effundit bilem in oppositum obstaculum, et cum hoc ipsam in duodenum protrudit, vel quando remanente obstaculo, eam in hepaticum ductum eiusque ramos repellit, inque sanguinis vias transfundit. Id vero aut propriis viribus, aut comprimementum musculorum abdominis et diaphragmatis contractione adiuta praestat. Si non unico impetu, sed repetitis concussionibus id fiat, lente etiam et gradatim malum decedit. Quae tunc ex alvo prodeunt excrementa, dura et cinerea plerumque esse solent, imo talia saepe visa sunt, nimirum grisea, pallida, argillacea, duobus vel tribus diebus proxime accessionem morbi antecedentibus; quod sane manifestum indicium est, iam tum bilem in intestina non traieci coepisse. Interdum vero haec ipsa alvi excrementa, si morbus inter initia sit, leviorque fuerit accessio, hac evanescente, flava et biliosa egeruntur; quod porro bilem impedimenta superasse, ac tandem in intestina prorupisse significat. Impedimenta autem superantur aut dilatata viarum angustia, aut obstaculo propulso, sive id concrementum biliosum, sive calculus fuerit, qui deinde in excrementis aqua solutis et per cribrum traiectis reperiri solet.

cedunt, sed saepius lente et gradatim. Quando et qui repente decedant.

Quando lente et gradatim. Quis color excrementorum.

1) FRIDERIC. HOFFMANNUS observat (*Medic. system. ration.*), in calculorum suspitione *ponderis sensum ad cartilagineum ensiformem* adesse.

§. CLXVI.

Quaelibet vero accessio non ultra diem unum, vel alterum, vel triduum, quod longissimum est intervallum, producit. Nam intra hoc temporis spatium cessat omnis dolor, et quaecunque epigastrii atque hypochondrii oppressio et anxietas; eoque proximior videtur pristina valetudo, quo iam cutis et urinae manifestius clarescunt. Sed quietis eius-

Duratio accessionum morbi et quietis intervalla.

modi intervalla redeuntisque spem sanitatis excipiunt modo singulis hebdomadis, modo singulis mensibus, modo citius modo serius eodem ordine omnino memorata symptomata, et post crebros iteratosque cruciatus continua fit ictERICA cutis infectio, subinde tamen sua incrementa habens, sed mitiora, neque adeo gravia, quia fortasse viae patentiores paulatim redditae bilis resorptioni magis favent. Diffunditur tunc per universum corpus aurigo sive bilis suffusio, os amarescit et nauseat, ciborum desiderium non solum deletur, verum etiam eorum odium ac aversatio accedit, pruritus intolerabilis cutim afficit, flavedo intensior facta nigricat, corpus macie conficitur, pedes intumescunt, et pedetentim hydrops abdominis consequitur.

Quando totum corpus aurigine inficiatur, et omnia deteriora fiant. In fine hydrops abdominis.

§. CLXVII.

Hic est frequentior communiorque morbi incessus, quem, *Quando lenta morte omnia finiuntur.* *Quando tympanites oritur.* *Quando hepatitis, vel gangraena, vel tabes immincat.* ui opportune curetur, lenta quidem, sed certa mors manet. Interdum vero accidit, ut cystis fellea, quae saepe turgida et distenta et infra iecoris limbum protuberans manu ipsa facile percipi solet, in vehementiore aliquo conflictu dehiscat, effusaque bile in cavum abdominis exitialem *tympaniten* repente procreet. Interdum etiam dolor est adeo acutus, et ita vehemens febris, ut hepar inflammatione tentetur, haecque vel gangraena et morte celeri, vel suppuratione et abscessu, vel tabe terminetur.

1) *Colicae ictericæ* absolutissimam historiam medendique rationem habet N. AUCTOR in laudato opere — *Trattato delle acque di s. Cristoforo etc.* — a pag. 82. usque ad pag. 118.

§. CLXVIII.

Corollaria. Sedes morbi descripti, causa eius proxima et remotæ.

Ex his omnibus ergo eruitur, *colicae ictericæ* sedem in cystide felle aadnexusque biliferis ductibus esse statuendam, causamque eius proximam non aliam excogitari posse, quam cystidis felleae *vehementem* aut *irritationem* aut *distentionem*, quarum alteram aut bilis cysticae densitas cum acritate coniuncta, aut calculi cystici inferunt, aut etiam lunbrici per

choledochum in cystidem ingressi, quales BEUTHIUS observavit ¹⁾, alteram vero bilis ipsa e suo folliculo egredi cohibita ab aliquo impedimento, quod cysticae bili vel totum, vel magna ex parte iter praecludit, ne libere exire, et per choledochum in duodenum se transferre possit. Quo sane *Discrimen inter colicam ictericam et icterum simplicem.* differe videtur ab *ictero* simplici et doloris *ex-* parte; nam in hoc *bilis* speciatim *hepatica* accusanda est, quod neque ad cystidem, neque ad intestina libere feratur; contra vero in illa *bilis* praecipue *cystica* aut densitate et acredine peccat, aut calculis scatet, aut choledochum praeterfluere impedita-refluit in cystidem, ibique congesta morbum facit ²⁾. Quot autem modis id contingere queat, et qua ratione tam atrox malum excitetur, cum a nobis supra indicatum est, tum facile quisque intelliget, si rem animo rite pervolverit.

1) *L. c.*

2) Vide §. CLXIII.

P r o g n o s i s .

§. CLXIX.

Icterus flavus minus *nigro* periculosus est. *Criticus* *Icteri flavi et nigri prognostica.* tutissimus omnium, et speciatim qui in febribus die *septima*, aut *nona*, aut *undecima*, aut *quartadecima* supervenerit, si *Critici et a febribus geniti.* *symptomata mitescant*, ut monet BAGLIVIVS ¹⁾ *nec dextrum hypochondrium durum sit* ²⁾, *neu durum fiat* ³⁾, ut *Epidemici.* notavit HIPPOCRATES. *Epidemicus* quoque et in infantibus recens natis facile discutitur. Non ita si ab hepatis inflammatione, scirrho, abscessu, aut a calculis oriatur. *Ab hepatitide, scirrhis, abscessibus et calculis.* Facilius vero curatur in iuvenibus robustisque corporibus, quam in senibus, infirmis et cachexia laborantibus. Solvitur saepe *urina turbida, crassa et multa, sudore, diarrhoea, Bonae criseos notae.* fluxu haemorrhoidali. *Symptomaticus* porro plerumque exitium portendit, excepto eo, quem *febris* insert *intermittens*; nam febre per chinam sublata et ipse evanescit. Nec valde

Quid de ictero ab hysterica vel hypochondriaca affectione convulsiva, aut à sola graviditate proficiscitur; nam cito spasmis sedatis desinit, vel foetu edito tandem finitur. Qui aut gravitate orto.

Si niger et ab indurato lienis sit.

Quinta exitus diuturni icteri.

Quid praesagium de ictero a grippathemate, et subito magnoque terrore.

Praesagium colicae ictericae.

Quid de haemorrhagia, quae ictero superveniat.

timendus est, qui ab *hysterica* vel *hypochondriaca* affectione *convulsiva*, aut à sola *graviditate* proficiscitur; nam cito spasmis sedatis desinit, vel foetu edito tandem finitur. Qui *lienem durum* subsequitur, et *niger* est, non vacat periculo; quin imo *lethalis* plerumque est, si ei singultus et sopor, aut vomitus bilis atrae vel sanguinis superveniat. Item qui *diuturnus* est, ob maciei, hecticae, hydropis metum non caret periculo. Hunc etiam non raro subsequuntur atroces in abdomine dolores et sanguis magna copia sursum et deorsum erumpens, unde animi deliquium et mors. Verisimile tunc est, cancrorum acrem ichorem erosisse vasa ⁴). Longa enim bilis in sanguine mora putridam alcalescentemque dissolutionem inducit. *Icterum* a gravi animi perturbatione ortum cum delirio, sopore, febre et convulsionibus die *quarta* mortiferum vidit VALSALVA ⁵). Alium morbo regio correptum, postridie quam subito vehementique terrore fuerat affectus, mox delirum et convulsum intra horas ab incepto delirio *viginti quatuor* periisse, idem auctor commemorat ⁶). *Colica icterica*, etsi diuturna et contumax, si tamen rite tractetur, nec viscerum labes, nec aetas obstant, non raro remediis obtemperat. Quibus *iecur*, inquit HIPPOCRATES ⁷) *vehementer dolet, iis succedens febris dolorem solvit*. Hoc verum saepe est in *colica icterica*; febris enim plerumque pendet ab evacuatione cystidis et a bilis in sanguinem refluxu. Interdum vero *apoplexiam* ab *ictero flavo* aut a *calculis cystidis felleae* subito natam non inficiamur. *Haemorrhagiae*, quae saepe *ictero* superveniunt, compescentur, ut docet HUXHAMIIUS ⁸), decocto seminum canabae ex lacte, emulsione seminum papaveris albi et amygdalarum dulcium post levem sanguinis missionem, si febricula postulet, et pulsus ferat, et lenem alvi expiationem.

1) *De crisi et diebus criticis etc.*

2) *Aphor. 64. sect. VI.*

3) *Aphor. 64. sect. VI.*

4) VAN SWIETEN. §. 946.

5) MORGAGN. *epist. 37. n. 2.*

6) *Id. ibid.*

7) *Aphor. 52. sect. VII.*

8) *De aëre et morbis epidem. T. I. p. 142.*

C u r a t i o.

§. CLXX.

In plethoricis, aut evacuationem aliquam suppressam habentibus, in *hepatitide*, aut eius metu, in graviditate en-
ratio a sanguinis missione inchoanda est. Ubi copia, aut
raritate, aut acritudine bilis regurgitat, attemperetur ava-
cueturque diluentibus acidulis et eccoproticis refrigerantibus,
sero lactis, succis limonii, acetosae, endiviae, cichorei, cremore
tartari, tamarindis magna aquae copia dilutis. Si visciditas,
inertia, densitas in bile eminet, si obstructionibus hepar labo-
rat, aperientia omnia capite antecedenti XII. commendata op-
time conveniunt, et imprimis sales medii, itemque sapo ve-
netus, fel tauri inspissatus, ac alvum lenientia, uti rhabar-
barum et tartarus solubilis, vel etiam vitriolatus, sal epso-
mense. Aqua vero marina, aut *tectucciana* et *S. Christo-*
phori vel quocunque modo imbuta sale, iure et merito in-
ter egregia medicamina refertur. Pueris et infantibus, ini-
primis si a meconio morbus est, syrupus cichorei cum rha-
barbaro decoctumque radicis graminis prodest. *Spasmos*,
si ab his fiat morbus, optime leniunt oleosa, emollientia,
opium atque antihysterica. Quem venena *icterum* intule-
runt, morsus venenati, febres ¹⁾ aliique morbi, is non aliam
curationem postulat, quam quae morbis primariis convenit.

Quando in-
ciendum a
V. sectione.
Temperantia
et diluentia
quae et
quando.
Quando ape-
rientia al-
cumque le-
mentia.
Aqua sale
imbuta.

Quaenam
puerorum
medela.
Quae spas-
mos leniant.
Si a venenis
est morbus,
a febribus etc.

1) *Icteron*, qui *tertianis quartanisque* diuturnis et vagis
superveniebat sequenti electuario felicissime curabat SCARDONA.

Rec. *Chin. chin. s. p. unc. j. sal. absinth. sal. ammon.*
arcan. duplic. extract. rhabarb. ana drachm. ij. M. et c. s. q.
syrup. de cichor. cum rheo f. electuar. cap. mane drachm. ij.
Superbibend. decoct. theiform. summit. absinthii, fol. verben.,
chaenuedr., agrimon. Valet etiam ad curandas tertianas, quar-
tanisque contumaces, Lib. III. cap. V. §. 31. Ex adversar.
auctor.

§. CLXXI.

Prima et praecipua curationis pars in colica icterica. In *colica* vero *icterica* curationis prima et praecipua pars est operam dare, cum dolor acerbissimus urget, ut *spasmus* sedetur, viae biliferae expediantur, et quidquid in iis haeret ad intestina per choledochum transferatur. Altera, postquam dolor conquieverit, ut eius reditus praecaveatur; quod efficitur iis, quae concretiones et calculos vel dissolvunt ¹⁾, vel expellunt, vel praecavent. Sunt autem singulae hae curationis partes ita distinguendae, nec tempora confundenda. Sed ea ferme ratio observanda est, quae in *calculi urinarii* curatione prae oculis haberi consuevit ²⁾.

An mixtura aetheris citriolici et spiritus terebinthinae calculos solvat.

Calculi incisione extracti.

1) DURANDUS (*Mém. de l'acad. roy. de médec. T. I. p. 288.*) narrat, duas curationes peractas *calculorum felleorum* ope *mixturae aetheris citriolici* et *spiritus terebinthinae*. Sed Cl. GRUNERUS in peculiari dissertatione *de calculis felleis* (*vid. thesaur. dissert. medic. rarior. T. I. edit. ann. 1784. p. 191.*) institutis experimentis nihil esse deprehendit, quod calculos dissolvat, nec laudatam quidem *mixturam*. Concedit tamen aliquid praestare *terram foliatam tartari*, *alcohol vini*, idemque cum *uaphtha nitri*, *spiritum nitri dulcem*, *liquorem antispasmodicum* PROTESII. Non potuit vero confirmare laudes, quas tribuit MURRAYUS *alcoholi*, *oleo terebinthinae aethereo saturato*, et a PERCIVALIO prius commendato. *Ex sched. auct. Calculos vesicae felleae per incisionem eductos fuisse*, exempla habes in *commentariis medicis Lipsiensib. T. IV. p. 478.* Vid. JOH. HENR. SCHULZE dissertationem: *an deuntur medicamenta, quae calculum in vesica communiunt?* *Ibid. Vol. VI. P. II. p. 232. Ex sched. auct.*

2) Vid. *Essais de médec. d'Edimbourg. T. I. artic. 33. p. 369.* et MORGAGNI *Epist. cit. XXXVII.*

§. CLXXII.

Qui dolori medendum.

Quando f. S. opportuna.

Cur emetica et purgantia

Cum igitur *dolor* accessit, etiam atque etiam laxandum est oleosis, emollientibus, diluentibus, demulcentibus, anodynis et, ubi vehementior est, etiam opium habentibus. Nec fots, cataplasmata, insessus, inunctiones, clysmata, quae molliunt, quaeque spasmos leniunt, omittenda sunt. Si vero sanguinis plenitudo est, vel febris supervenit, eius etiam missio opportuna erit, non modo ut inflammatio praecaveatur, verum ne turgentia quoque vasculorum viarum angustiae angeantur. Ut porro quae molliunt sedantque com-

commendantur omnia, ita quae irritant vehementer suspecta *suspecta ha-*
habentur, uti emetica et purgantia medicamenta, licet his *beantur.*
interdum impedimenta sublata narrentur. Etenim ni viae
satis laxatae fuerint (quis autem satis eas laxatas cogno-
verit?), HOFFMANNO, ROVERHORSTIO, SCHEFFELIO, MOR-
GAGNIO ¹⁾ aliisque testibus, noxia aut ancipitia esse solent.

1) *Epist. laudat. n. 44. et seqq.*

§. CLXXIII.

Dissolvunt potenter concreta biliaria aqueus potus te- *Biliarium*
pens; spiritus vini cum spiritu terebinthinae commixtus, suc- *concretio-*
cus graminis et taraxaci, mel, tartarus solubilis, sapo vene- *num dissol-*
tus, radix pareirae bravae, tinctura salis tartari, aquae mi- *centia.*
nerales salitae, et demum frictiones lenes ad hepatis et cy-
stidis regionem adhibitae. His interposita lenia eccoprotica, *Eccoprotica.*
et imprimis rhabarbarum tinctura sacra LEMERYI, cremor
tartari calculos ad excretionem atque ad intestina alliciunt.
Sed prae ceteris confert longus diuturnusque vegetabilium
aperientium et emollientium usus, quo solo multos novi fe-
licissime curatos ¹⁾. Imo his solis etiam morbi reditum
vidi sublatum, quem in finem demum ea omnia, quae robo-
rant, quaeque causas proëgumenas et procatarecticas avertunt,
dintissime adhibenda sunt. Hodie celebratur ut efficax bi- *Aether ci-*
liarium calculorum dissolvens aether vitrioli, sed oleo tere- *trioli et*
binthinae, ut irretiatur, ne avolet, ad aequas partes ad- *oleum tere-*
mixtus. Datur ex hac mixtura cochlear parvum a *binthinae.*
caffe mane et vesperi ²⁾. Asellorum etiam in *ictero* curando *Asellorum*
non exigua laus est ex WILLISII ac ETTMÜLLERI fide. *usus ex WIL-*
Horum prior utitur formula hac: Rec. *milleped. viv. n. l. ETTMÜLL-*
vel LX., croci orientalis semidrachmam, nucis moschatae LERO.
drachmam unam. His una contusis affund. aqu. chelidon.
unc. jv. F. expressio et bibatur. Sed LANGEUS ³⁾ monet *Monitum*
rationem doseos habendam esse; nam in tenellis haemopty- *LANGEI.*
sim induci a sale alcalino, quo insecta haec scatent, ipse
testatur ⁴⁾.

1) Vere succo graminis ac sero lactis, aestate aquis spandanis, hieme sapone veneto ad integrum biennium adhibitis SWIETENIUS *icterum* iam a XII. annis mulierem infestantem felicissime curavit §. 950.

2) *Éléments de chimie* par M. MORVEAU T. 5. et *Nuovo magazzino toscano* Vol. VIII. p. 30. Vide tamen, quae in nota I. ad §. CLXXI. afferuntur ex schedis posthumis auctoris.

3) *Miscellanea veritatis fascie. I. p. 56.*

GREDDINGII
remedium.

4) Ceteris addere liceat medicamentis unum etiam a GREDDINGIO propositum. *Formatur extracti belladonnae partibus VIII. et pulveris foliorum eius partibus V. massa pilularis, cuius pilulae ex sesquigrafo singulae parantur. Datur una pro vice in ictero pertinaci.* Effectus sunt insignis calor, arteriarum omnium vehementior pulsatio, capitis temulentia, largus sudor, deiectiones virides, urinae copia. Intra decem dies huius remedii ope curatio obtenta narratur. *Comm. med. Lipsiens. XIX. p. 121. Ex sched. auct.*

CAPUT XIV.

DE

HEPATIS, LIENIS, PANCREATIS, OMENTI MESENTERIIQUE INFLAMMATIONIBUS.

§. CLXXIV.

H E P A T I T I S.

Quid hepatis.

Quae hepar occupat inflammatio, *Ἡπατίτις* dicitur; morbus non ita frequens apud nos, ut in utraque India, ubi populariter grassari ex fide HOMII et LINDII a VOGELIO ¹⁾

An frequens morbus sit.

perhibetur. Sed frequentissimam esse contendit FERREI-
NIUS ²⁾, saepiusque ab ea *minorem* eius lobum affici, quam

Venosa et arteriosa.

maïorem. Rarior est *venosa*, quae nimirum venae portarum ramis hepar reptantibus insidet, quam *arteriosa*, ac imprimis ea, quae superficiem hepatis adnexasque membranas corripit, si LUDWIGIO fides habeatur.

1) *Prælection. de morb.* §. 218.

2) *Histoire de l'académ. des scienc. annor.* 1766. 67. 68. p. 121.

§. CLXXV.

Causae communes alibi a nobis fuerunt expositae. Fere *Hepatitis* propriae sunt temperamentum cholericum et melancholicum, *causae remotae.* hypochondriaca affectio, calculi fellei, colica icterica, bilis crassa aut acris, ira veliemens, haemorrhoidum fluxus cohibitus, febris ardens, biliosa, continua, aut intermittens, metastases, ictus gravior hepatis illatus aliaeque. Signa quoque aliarum inflammationum huc transferenda sunt, nimirum febris continua, sitis, calor, pulsatio et reliqua. Sed *Huius notae diagnosticae. Signum ex FERREINIO* praecipue tanquam pathognomonicum signum habetur ¹⁾ dolor, quem pressa hepatis aliqua pars excitat, vel auget. *pathognomonicum.* Tactu autem exploranda est aegro in dorsum decumbente, et genibus retractis flexisque, ut muscoli abdominis laxentur et manui obediant.

1) FERREINIUS *l. c.*

§. CLXXVI.

Dolor autem in hypochondrio potissimum dextro et epigastrio, quae tument, sed sine ulla externi coloris mutatione, insidet modo vehemens et continuus, modo tensivus et pungens, modo etiam obtusior et profundior, qui saepe dextrorsum ad pectus, ad iugulum humerumque eiusdem lateris propagatur; nonnunquam torporem dextrae quoque manui infert, et decubitus in utroque latere molestus, sed imprimis in sinistro reddit. Ob viciniam et nexum diaphragmatis respirationis actio laeditur, inspiratio praesertim difficilius est, tussis accedit sicca, frequens, brevis et dolorem intendens, ab assumpto cibo magnae oppletionis sensus, anxietas praecordiorum, pulsus debilis, frequens lipothymia insurgunt. Interdum ventriculo et duodeno in consensum tractis vomitus biliosus, diarrhoea et singultus prope strangulans se adiungunt. *Doloris ratio. Torporem manus dextrae interdum excitat. Respirationis laesio. Tussis ratio. Anxietates, lipothymiae. Vomitus biliosus, diarrhoea et singultus.*

§. CLXXVII.

Si *gibba* hepatis pars tantum afficitur, verosimile est, *Signa inflammationis* diaphragma magis et respirationem pati, coloremque icteri-

gibbae hepatis partis. Simae inflammatione partis signa diagnostica. cum tunc abesse. Si vero *sima* affecta sit, ventriculum et duodenum potissimum laedi arbitramur, *icterum* cum alvo adstricta aut excrementis albicantibus supervenire, pulsumque debiliorem et animi deliquia crebriora esse ¹). Icterus enim a compresso vel spastice contracto choledochu oritur, pulsum vero debilitas animique defectiones non tantum a spasmis, sed etiam ab impedito sanguinis per venam portarum ad eavam et ad cor refluxu videntur repetendae. FERREINIUS praeter signum pathognomonicum supra (§. CLXXV.) notatum et praeter febrim, effectum etiam huius morbi esse dolorem, qui cardialgiam mentiatur, contendit ²).

Unde icternus et animi defectio. Dolor cardialgiam mentiens ex FERREINIO.

1) Icterus cum hepate suppurato observatum, descriptumque vide *T. II. p. 425. Essais de méd. d'Edimbourg. Ex sched. auct.*

2) *L. c.*

§. CLXXVIII.

Interdum alias inflammationes vel mentitur, vel comitatur. Hinc fallax diagnosis. Magni viri decepti. Non raro *hepatitis* ventriculi inflammationem, aut *pleuritidem* aemulatur. Interdum etiam cum *hepatitide gastritis*, aut *pleuritis*, aut *peripneumonia* coniungitur. Interdum peripneumonia aut alii pulmonum morbi *hepatitidis* speciem exhibent. Quod ne dum tironibus, verum etiam exercitioribus et veteranis errandi causam praebet. VALSALVA enim (ut MORGAGNIUS refert ¹), et MICHAEL SARCONIUS ²) *inflammationem pulmonis* pro *hepatitide* falso habuerunt. Pulmonis enim dextri inflammatio potest eius molem ita augere, maxime inferiorem partem occupans, ut diaphragma et hepar deorsum protrudat. Tunc dolor pleuriticus inferior erit, locumque occupare videbitur, quo hepar situm esse solet. Observatio tamen SARCONII utrumque morbum potius una copulatum fuisse ostendit, alterum nempe *suppuratione* terminatum, alterum *resolutione*, uti *hepatis aucta moles* ³) innuere visa est.

Cur inflammatio pulmonis hepatitidem mentitur.

Quid sentientium de Sarconiana observatione.

1) *Epist. anat. med. XX. n. 30. et 31.*

2) *Parte I. pag. 208.*

3) *Inter schedas auctoris nonnulla ad auctam hepatis molem spectantia inventa sunt, quae hic addenda videntur quo-*

niam ex iis patet, quaenam sit eius morbosa indoles et naturae cuiusque curandae ratio, sive acutus, sive chronicus morbus sit.

CL. CRAWFORD *hepatis auctam molem* sine alio eiusdem *Exemplum* vitio observavit, diligenterque descripsit anno 1771 in opere, *hepatitis insi-* cui titulus: *Médec. de Lond. chap. III. pag. 232.* Signa ab *gniter aucti* eo ibi tradita huiusmodi sunt. Abdomen tumet atque indu- *cum eius no-* rescit multum et repente, quin ulla undulatio in eo percus- *tis ex CRAW-* sione percipiatur. Respiratio difficillima, quod praecipuum *FORD.* symptoma est. Praecessere virium omnium deiectione, adstrictio- *Symptoma* nis sensus in pectore, vertigo capitis ad quemlibet corporis *praecipuum.* motum. Subsequitur crurum et pedum oedema, dorsum do- let, sitis adest inextinguibilis et cibi fastidium. Pulsus est debilis et parvus, qui tamen post sanguinis missionem maior, plenior et distinctior fit. Facies est rubra et florida. Prout augetur ventris tumor, augetur etiam respirandi difficultas. Haec duo symptomata post paucos dies a morbi invasione plurimum molesta fiunt. Brevi post aeger queritur oppressionem ad cordis regionem et adstrictionem sub cartilagine ensiformi, quae intolerabilia evadunt, suffocantque intra modicum temporis intervallum. Vertigo interdum corripit, ut stare non *Sectio cada-* possit, seque lecto tradere debeat, ne in syncopen incidat. *veris.* Aliqui sentiunt hac occasione cordis palpitationem. Sectio ca- *Curatio.* daveris ostendit *immensam hepatis molem* ambo hypochondria occupantem et ad hypogastrium descendentem. Superior pars sursum reprimi diaphragma, et sic pulmones comprimit. Morbus acutus est, cui venae sectio et repetita purgantia remedio sunt.

I. FR. DE VILLIERS in *notis* ad dictam *medicinam practi-* *Signa eius-* *cam Loudinensem pag. 223.* ex eodem vitio *chronicum mor-* *bum fieri interdum tradit.* Tum vero lente accedit ex lenta *quando chro-* sanguinis congestionem, tam in *hepate*, quam in *liene*. Eidem *nicus est ex* mulieres inprimis post catameniorum discessum obnoxiae sunt. *VILLIERSIO.* Paulatim duo haec viscera mole augentur, vel eorum alteru- *Qui ei ob-* *trum.* Mox aegrotans corripitur asthmaticis insultibus, pon- *no.rii.* dere, dolore et calore ad stomachi regionem, praesertim post *Sigua dia-* cibum, quo tempore vapores ad caput ascendunt. Plerumque *gnostica tum* adiungitur alvi adstrictio, quae malum adauget. Quando viscera *hepatitis, tum* huiusmodi aucta mole sunt, ut cadant in hypogastrium, tunc *lienens aucti.* tantum medicus consulitur, quia amplius aegri nequeunt re- spirare, nec ventris ferre pondus. Dum hoc malum gignitur, *Naturae co-* quod saepe fit intra decem annorum spatium, natura interdum *uamina.* quaerit se liberare modo narium haemorrhagia, modo haemor- *Curatio.* rhoidum fluxu, sed semper imperfecte. Corpus languet et pul- sus; sed venae sectio, et duae tresve purgationes vires pulsus- que erigunt. Tunc pulsus fit durus et plenus, ideoque se- cunda venae sectione opus est aliisque purgationibus. Vesicae loco affecto fructu non caret. VILLISIUS etiam de hoc morbo consulendus est.

§. CLXXIX.

*Prognosis
hepatitidis.*

*In ea singul-
tus malus.
Quid de abs-
cessu.*

*PORTALII
observatio
anatomica.
An vera sit
SWIETENII
opinio de
china china
noxia, quan-
do intermit-
tentibus ad-
iungitur he-
patitis.*

Quam ob rem diligentissime omnia et singula sympto-
mata perpendenda sunt, ut errori nullus locus relinquatur,
aut certe a praecipiti nimis iudicio cavere prudentissimum
erit. *Hepatis autem inflammatio* desinit vel in mortem, vel
in alios chronicos morbos, ut reliquae inflammationes. *Sin-
gultus ab hepate inflammato malus dicitur* ab HIPPOCRATE.
Abscessus interdum ad exteriora vergit, et peritoneaeo accre-
tus manum chirurgicam exposcit ¹⁾. Sponte resolvitur urina
multa et subsidente, sudore, diarrhoea, sanguinis e naribus
aut haemorrhoidibus profluvio, vomitu, ac interdum etiam
expectoratione. Exitum affert, si pus aut in abdominis, aut in
pectoris cavum effundatur. In cadavere viri post superatum
icterum de dolore hepatis ac virium languore conquesti, prae-
ter purulentam in abdomine colluviem absumentumque omen-
tum, hepar magnum in inferiori sua parte abscessum ingentem
pureque sordido scatentem continens invenit PORTALIUS ²⁾,
et ei proxima pars coli erat putredine tacta. Saepe *hepa-
titidem cum febris intermittentibus* coniungi monet SWIE-
TENIUS, ac in pessimam dysenteriam a corrupta bile tran-
sire, si febris imprimis china china fuerit immature curata ³⁾.
Sed tanti viri pace saepe perviano huiusmodi cortice id
mali averti potest, ut alibi (*Vol. I. de febris*) innuimus,
et a nobis aliisque observatum est.

1) Vide tractatum de abscessibus hepatis Tom II. *Mém. de l'académ. roy. de chirurgie etc.*

2) *Histor. anatom. med. T. I. p. 163.*

3) §. 946.

§. CLXXX.

S P L E N I T I S.

*Splenitis du-
plex est.*

Signa eius.

Lienis quoque inflammatio vocatur suo nomine *Σπληνίτις*.
Splenitis vera et *primaria* rarior est; *secundaria* vero lie-
nique obstructo superveniens non infrequens. Dolet tunc
hypochondrion sinistrum modo ad laevam coli partem, aut
claviculam, imo scapulam humerumque eiusdem lateris, item-

que ad costas spurias dolor obscurus, interdum etiam lancinans et acutus fertur, modo epigastrium versus protenditur. *Tumor* lienis figuram refert, tactus impatiens est, et modo in alterutrum latus decubitus impedit. *Pleuritidis* symptomata saepe adsunt ¹⁾, absunt vero *nephritidis*. Si abscessus vel ulcus fiat, iisdem prope notis, quibus in hepate, poterit deprehendi. Involucrum lienis *osseum* interdum reperitur per morbi diuturnitatem ²⁾.

1) Vide *Part. I. huius Vol. IV. caput IV.*

2) MORAND. *Comm. acad. Paris. Vol. VII. p. 138.*

§. CLXXXI.

Pancreatis omentique inflammationum signa obscura admodum sunt; sed a loci, quo iacent haec viscera, et laesarum functionum ratione petuntur ¹⁾. *Mesenterii* vero inflammationis saepe cum *enteritide* coniungitur, et similia infert symptomata. Lenta interdum est, ac tabem, quam dicunt *mesentericam*, comitatur ²⁾. Locus vero doloris totam umbilicalem lumbaremque regionem tenet.

1) Abscessum in omento et peritonaco cuiusdam asciticae sine laesione hepatis et lienis vidit COLUMBUS. *De re anatom. lib. XV. pag. 491. edit. Paris. Ex sch. auct.*

2) De tabe dicta *mesenterica* et similibus consulatur *caput III. de phthisi Part. I. Vol. IV. §. LIV.*

C u r a t i o.

§. CLXXXII.

Hepatitidis curatio venae sectione, emollientibus ac aperitivis, nec non blanda alvi ductione peragitur ¹⁾. Si alvum critice fluxuram praevideat clinicus, leniter sollicitet enematis emollientibus, fomentis ad lumbos, ad abdomen, potu ex lactis sero depurato cum roob sambuci aut syrupo totius citri, decoctis ex herbis subacidis, resolventibus, uti tamarindorum pulpa, vel cassiae fructibus, melle, nitro, aut tartari cremore et huiusmodi. Acris purgantia, utpote quae

HEPATITIDES
curatio.
Alvi crisis
adiuvantia.

Haemorrhui-

*giam narium
quid prae-
munciet et so-
veat.*

*Diaphore-
tica.*

*Diuretica et
expectoran-
tia quae et
quando.*

*Qui solvatur
interdum.*

*Quando in-
flammati-
o gravissima
est, quid
praestan-
dum.*

An F. S.

*Quando hi-
rudines hac-
morrhoidi-
bus applican-
dae.*

*Decocta ar-
nicae et sca-
biosae.*

Epispastica.

*Tumori su-
perstiti, di-
scussa febre,
quomodo me-
deamur.*

inflammationem augerent, contraindicantur. Ubi narium pruritus, rubicunda tumensque facies, pulsus dicrotus venturam haemorrhagiam praenuncient, fomentis ac vaporibus frontem internasque nares et circumpositas partes laxare optimum erit. Insuper materiam inflammatoriam e corporis periphæria sudoris instar egredientem egregie promovent, sustinentque lecti tepor, florum tiliae, aut sambuci fortis infusio largiter hausta, aut idem lactis serum calide potatum. Quod si crisis per urinae aut scretus vias fieri incipiat, mitissima diuretica et blandissima saltem expectorantia adhibeamus, illud HIPPOCRATIS monitum prae oculis semper habentes: *quae ducere oportet, ducenda sunt, quo maxime vergat natura, per loca conferentia*; et quidem eo, quod eidem naturae placet, modo. Haemorrhoidum quoque aut uteri fluxu *hepatitis* solvi potest, quibus evacuationibus obsecundare, dummodo non excedant, summi erit momenti. Ceterum hepatis graviores inflammationes efficaciori antiphlogistica cura, alias descripta ²), tractandae sunt, ut forte abscessus plurimum metuendus antevertatur. Ramificationibus venae portarum tantum inflammatis, quam minimos effectus edent venae sectiones. Quo in casu haemorrhoidibus externis, quae per anastomoses cum internis, proindeque cum vena portarum communicant, admovendae hirudines sunt. Decoctum arnicae cum floribus, praemissa venae sectione in loco parti affectae proximiori, aliis remediis praefertur, ex quacunque causa stasis sanguinis alicubi sit, ut inflammatio amoveatur ³). BAGLIVIVS ad praecavendam *gangraenam* in interiorum viscerum inflammationibus decoctiones radicis cum et foliorum scabiosae plurimi facit ⁴). Epispastica dextro hypochondrio admota, si concava pars hepatis laboret, vix prodesse solent. Tamen reliquis parum proficientibus, haec quoque addi possunt. Saepe, discussa febre, qui superest tumor, resolvitur remediis balsamicis vegetabilibus, uti terebinthina, balsamo *Copaivae* etc. Demum benigna manus mederi non cesset, donec et hepar et universum corpus expurgatum non sit.

1) FERREIUS L. c.

2) Vid. *Comm. de inflammation. Vol. I. et P. I. Vol. IV. cap. IV. et alibi. Item: Disputation. academ. GINESII ROSSI etc., praeside I. B. BURSERIO, de praecipuarum partium inflammationibus, Ticini habitam 1771.*

3) LANGEUS (*Miscell. verit. fascic. I. p. 69.*), qui monet ibi, cavendum esse, ne *arnicae* loco veniat *aster luteus*. *Arnica foliis carnosis, crassis et disco floris lanuginoso* ab omnibus aliis cognatis plantis distinguitur. *Ex sch. auct.*

4) *De febrib. malign. et mesentericis etc.*

§. CLXXXIII.

Essentiale nullum *hepatitidis* inter et *splenitidis* curationem discrimen interest, nisi *topica* excipiantur, quae sinistro opponuntur hypochondrio, et primae sanguinis missiones, quarum institutio iuxta quorundam opinionem sinistro in cubito fieri debet. Hic obiter animadvertant velim tirones, *pancreatis, epiploï mesenterique* inflammationum certam ab exordio diagnosin statui non posse; graviora enim symptomata absunt, levis est febris, dolor obscurus, vix aliquis inest aestus ac sitis; unde sub iis vitae munia obire homines possunt. Saeviens vero harum partium inflammatio iisdem paene antea celebratis antiphlogisticis fugatur subsidiis. Uno verbo illis artis adiumentis, quae *pleuritis* postulat, etiam in hisce morbis curatio perficienda est. Si qua differentia intercedit, eadem peti debet ab iis, quae de *ictero, gastritide ac enteritide, sive intestinorum doloribus* proposita sunt ¹).

1) Vid. capita praecedentia VI. VII. VIII. et XIII.

CAPUT XV.

DE NEPHRALGIA, SIVE DOLORE NEPHRITICO, ET DE CALCULIS URINARIIS.

§. CLXXXIV.

Quicumque *dolor renes* ambos, vel eorum alterutrum, quod frequentius est, corripit, is Νεφραλγία, videlicet *nephralgiae*.
Nephralgia,

sive Colica nephritica, sive nephritis.

Vera et spuria iuxta aliquos.

Differentiae nephralgiae iuxta auctorem.

num dolor, sive nephriticus, itemque colica nephritica appellari consuevit. Nonnulli dolores renum uno *nephritis* nomine complectuntur; sed eam distinguunt in *spuriam* et *veram*. *Vera* est, quam *renum inflammatio* excitat, *spuria*, quam aliae causae. Cum vero omnis *renum dolor*, a quacunque causa ortus, sola symptomatum gravitate et solo gradu differat, praestat singulos, cuiusvis generis demum fuerint, *nephriticos* vocare, et perspicuitatis causa eos dividere in *inflammatorios* et non *inflammatorios*, utrosque in *sanguineos, rheumaticos, arthriticos, calculosos, convulsivos, ulcerosos, purulentos* et sic porro, prout sanguis, serum acre, arthritis, rheumatismus, calculus, ulcus et abscessus eos procreaverint.

§. CLXXXV.

Causae communes.

Causae magis propriae.

Causae aliis doloribus communes hic quoque locum habent; sed praecipue tanquam huius affectus magis propriae recensendae sunt contusio, vulnus, abscessus, ulcus¹⁾, tumor, sanguinis congestio, seri acrioris, arthritici, rheumatici, scorbutici, venerei appulsus, haerens urina ob itinera impedita, validi corporis nisus, diuturna equitatio aut vectio in rheda, longus in dorsum decubitus, spasticae nervorum affectiones, calculi in renum pelvi²⁾ aut ureteribus infixi aut exitum tentantes, hereditaria labes, immodicus concubitus, acriora diuretica et imprimis ex cantharidibus petita, itemque externus earum nimis usus.

Ulcus renum, observatio HAMILTONI.

1) „Puella XII. annorum dolorem in regione renum ad inguina usque tendentem tres menses perpessa est una cum calore urinae et acrimonia, copiosa in urinis purulenta materie, siti, calore hectico ac tabe et facie Hippocratica, ita ut nec se erigere, nec recte ambulare posset. Ulcus renum recens, quia dolebat, creditum est. Igitur haec praeccripta remedia sunt. Rec. *Rhabarb. semidrachm., spermat. ceti, baccae lauri ana scrup. j., opobalsam. gutt. x., terebinthinae chiae q. s., ut f. pilulae mediocres. Sume jv. mane, et vespri, superbibendo haustum postetici radicib. althaeae alterati. Sumat pro potu decoct. hordei syrupo althaeae q. s. edulcatum: et duobus uocibus continuis pilul. Matthaei dimid. scrup.* Dolor lenitus est pilula Matthaei; sitis hordei decocto lenita et diluta. Hecticus calor urinaeque acrimonia

eodem correctâ, et syrupo althaeae ad vias urinarias potius determinatus. Rhabarbarum deterisit, mundificavit, eodemque tendebat spermatis ceti vis resolvens. Terebinthina et opobalsamum serviebat ad corroborandas relaxatas partes. Baccarum lauri adiectio dolores ventris avertebat et nauseam. Intra mensem haec remedia effecerunt, ut aegra libera e lecto surgere et incedere potuerit, et intra tres menses perfecte convalesceret. Sed semper in iis persistere opus fuit, neque ad alia transitum fuit." HAMILTONUS *Prax. med. reg. pag. 18. 19. 20. 21. Ex adversariis auctoris.*

2) *Inter adversaria item auctoris sequentem legimus historiam, quae deprompta est ex T. I. art. 20. p. 275. Essais de méd. d'Edimbourg.*

„Vir LIII. annos natus robusto corporis habitu, carnoso, sanguinis vasis admodum late prominentibus, maxime in brachiis ante IV. annos laborare coepit ex violentis doloribus, latius dextrum versus dextri renis regionem occupantibus, qui dolores nunquam omnino quieverunt. Interdum tamen per intervalla remittebant, et in ceteris bene habebat. Multa remedia adhibuit ex consilio PITCAIRNII aliorumque medicorum, sed sine emolumento, si excipias aquam calidam ad 12. lib. pondus, quae non nihil auxilio fuit. Saepe integros menses ita saevis doloribus est vexatus, ut super simplex lintem pavimento instratum iaceret, et aliquod percipiebat solamen latus affectum pavimento adprimendo fortiter. Quidquid per urinas reddebatur dolorum tempore paulo post speciem albuminis ovi referebat. Obnoxius quoque erat frequentibus diarrhoeis, quae erant sine dolore, et ab alvi tunc deiectione continere se poterat diem integrum. Urinam quoque colligere in vesica tunc poterat, donec impleta esset; et cum mingeret, interdum una vice sola sex urinae libras eiciebat. Vario victu utebatur et potu, ovis scilicet, butyro, carne frixa, potionibus spirituosis et aromaticis, vino albo etc., quae omnia dolores incitabant. Sola cerevisia tenuis enim aliquantum solabatur, quo fiebat, ut saepe de ea potaret. Sub initium anni 1731 rheumate decubuit graviore, quod tabes exceperit, et die XXIX. Martii obiit, licet antea nunquam pectoris affectibus laborasset. Sectione cadaveris in dextri renis pelvi repertus est lapis, qui dimidiae unciae pondus aequabat, figuram vero referebat triangularem superficiemque granulosis accretionibus asperam. In substantia vero renis alter lapis minor, qui tantum gr. XVI. ponderabat, erat formae quadratae irregularis. Praeter hos duos lapides aderant hinc et inde variae lapideae concretiones, sed praecipue in excretoriis glandularum locatae. Harum multae grano arenae maiori aequales erant. Vid. M. I. DOUGLAS *ibid.*

De genesi, et principiis calculi si quis cupiat doceri, consulat BOERHAAVIUM §. 1415, HALLER. in *opusc. pathol.*, GEOFFROY. *Mater. med. T. I. p. 51.*, SCARDONAM *Lib. III. cap. XI. §. II.*, et *Comment. med. Lipsiens. Vol VI. P. IV. p. 628.* aliosque plures. *Ex advers. auct.*

Lapis in renem pelvi, alia DOUGLASSII.

Sectio cadaveris.

D i a g n o s i s.

§. CLXXXVI.

Varia doloris nephritici ratio.

Dolor in lumbis percipitur modo dextram, modo sinistram, modo utramque partem tenens, prout alteruter vel uterque *renum* afficitur; modo obscurus est, et sensum ponderis gravantis affert, modo acutus et pulsans est, increscitque in iis corporis motibus, quibus lumbi tenduntur. Praeterea dolor iuxta ureterum ductum propagatur ad vesicam testesque, qui ex eo latere, in quo morbus est, sursum

An a spasmo usque ad testes propagetur.

saepe adducuntur. Id autem ex spasmo passim explicatur. Sunt vero, inter quos primas tenet Cl. RUTTYUS Anglicus, qui docent id fieri, quia ureteres subter vasa deferentia decurrunt, ideoque vel ea urgent, vel irritant, ut contracta testem attollant. Stupor demum cruris accedit, ex nervorum scilicet cruralium compressione. Spasmo enim musculi *psoae* et *iliaci* interni affecti nervos ipsos strangulant ¹⁾.

Cruris stupor ex cruralium nervorum compressione.

Urinae variae affectiones.

Alvi ratio.

Vomitum sympathicus, aut comitumritio.

Urina vero modo pauca et rubra, modo pallida et aquosa, modo acris et lixivialem spirans odorem, modo foetida, purulenta, mucosa, arenulis scatens se prodit. Alvus plerumque laxa est; in summo tamen cruciatu et ipsa adstringitur, ac borborygmis obstrepat. At frequentissime ob nervorum consensum hisce omnibus vomitus vomendique cupiditas adiungitur.

1) Vid. Tab. EUSTACH. XIX. et VAN SWIETEN. *De nephrit.*

§. CLXXXVII.

Inflammationis quae signa sint.

Causa frequentissima dolorum a calculis. CALCULI RENUM.

Quae omnia, si inflammatio dolorem efficiat, aut in eam dolor transierit, graviora tunc saepe fiunt, et febris acuta cum pulsu duro praesto simul est. Cum vero frequentissime *calculi* nephriticis doloribus causam praebeant (nam etsi calculi ubique in nostro corpore reperti fuerint ¹⁾), in renibus tamen et vesica urinaria praecipuam sedem habent), non erit inutile de hisce paulo fusius agere. Et

Et primo quidem pro diverso loco, quem occupant, et varia, quam tenent, figura varietatem doloris aliquam faciunt. In renibus enim haerentes, et laeves, et sphaerici obtusum *Calculorum* potius dolorem et gravativum; contra vero acutum magis *varietates variant intensi-* ac acerbum inferunt, si asperi, angulosi acuminative fuerint, *tatem doloris.* et praesertim hic tunc augetur et saevit, quando e renibus *Acutissimus* in ureteres descendunt; imo acutissimus plerumque evadit, *fit eorum* cum angustum ureterum tractum, qui prope vesicam est, *transitione* superant, et in vesicam ipsam illabuntur. Ubi vero iam in *per ureteres* vesica maius spatium invenerint, dolor cessat, aut solum *in vesicam* pondus, aut aliquod in urina reddenda impedimentum, aut *descendendo.* creber ad mingendum stimulus percipitur.

1) Lapillos, sive *calculos* vidit COLUMBUS in renibus, in pulmonibus, in iccore, in vena portae, in vesica, in intestino colo, in venis haemorrhoidalibus, in umbilico, in cystide fellea (*De re anatom. lib. XV. p. 491.* Lapidem quoque in cavo abdominis vidit LITTRIUS (*Mem. dell' accadem. di Parigi T. VII. p. 229. edit. Venetae*). Et I. G. KRÜGERUS alium observavit calculum in palato genitum. Vid. *Comment. acad. scientiar. Petropolitanae T. I. P. IV. p. 374.* Ex sch. auctor.

§. CLXXXVIII.

Scire autem oportet, dolores subinde, aut etiam repente interdum conquiescere, si nempe calculus iter in ureteres tentans iterum spastica eorundem contractione ad pelvim repellatur, aut de loco angustiore in latiore migret (ureterum enim capacitas saepe non una ubique est), aut positionem transitui aptiorem acquirat. Quod attinet ad *Quomodo interdum dolor subsideat.* doloris locum atque ad urinae conditionem, quando calculi morbum faciunt, cuique patet, illum imprimis secundum *Sedes eius, si a calculis est, et urinae conditio.* ureteres dirigi vesicam testiculosque versus, hanc vero variam esse debere, initio plerumque tenuem et parcam, imo interdum suppressam, progrediente calculo, aut iam in vesicam illapso, multam, turbidam et saepe arenosum sedimentum habentem reddi. Non raro etiam aliquid cruenti urinae exhibet, sed id solum evenit, ubi calculus renium vasa, aut aliarum partium, per quas transit, sauciaverit. *Cur interdum urinae cruenta.*

§. CLXXXIX.

*Arenae non
semper sunt
calculi renum
indiciu.*

*Quando cal-
culos indi-
cent.*

*Quando alio-
rum morbo-
rum sympto-
mata sint.*

Notandum vero est, arenulas sabulumque non semper calculi iudicium praebere. Nam interdum hae prorsus absunt praesente calculo, qui quandoque repertus fuit in renibus, quin unquam dolor aut arenulae in urinis praecesserint ¹⁾. Eas demum calculum significare credendum est, aut ad calculosas concretiones pertinere, quae statim ac urina reddita est subsident, nec exacte urinae immiscentur, digitisque compressae non ita facile comminui possunt ²⁾. Quae carent his notis, plerumque scorbuticae ac hypochondriacae affectionis symptomata tantum haberi possunt. Atque haec quidem de calculis renum satis.

1) In cadaveribus, eorum, qui nunquam, dum viverent, *dysuriam, ischuriam, lumborum et inguinum dolorem* similesque *nephriticos affectus* passi erant, reperti sunt calculi et lapilli, ut BONNIUS testatur *lib. De officio medic. cap. I. pag. 14. edit. Lipsiens. Ex sch. auct.*

2) *Vide notum ad §. CCLXIX. Vol. III. ex Cl. MORGAGNIO depromptum, ubi fusius haec de arenulis doctrina ab auctore exposita est.*

§. CXC.

*Signa quaedam calculi
vesicae con-
tenti.*

*Pondus in
perineo.*

*Mingendi im-
pedimentum.*

Tenesmus.

*Dolor et pru-
ritus ad glan-
dem penis.*

*Interdum
urinae
cruentae.*

*Mucus albus
in urinis.*

*Omnia haec
incerta signa,
quia scirrhus
communis.*

Modo ea signa praetereunda non sunt, quibus *calculus vesicae*, quando in ea sumserit incrementum, distingui solet. Haec si non omnia, pleraque saltem observantur. Pondus in perinaeo, impedimentum quoddam inter mingendum, quo saepe urinae fluxus intercipitur, facilior eius exitus supino corpore et adductis ad ventrem genibus, tenesmus, aut crebrum mingendi et deiciendi simul desiderium, dolor et pruritus ad penis glandem molestus, penis frequentior rigiditas et corporis in vesica moti quidam sensus, dum homo reclinat, aut saltu vehementiore concutitur. *Calculo* aucto vectio, equitatio et concitatio motus ferri nullo modo potest, ac urina tunc cruenta redditur. Inveterato autem iam malo multum mucosae gelatinae albuminis instar ad matulae fundum urinae deponunt. Verum haec aut non semper se produnt, aut non satis certa calculi indicia habentur, quia

scirrhus vesicae collo ¹⁾ innato, aut aliis *tumoribus* communia sunt. Cl. BAGLIVIVS ait rectissime: *calculus vesicae ad amussim mentitur scirrhus vesicae, ut bis in cadaveribus vidimus* ²⁾. Ad calculum dignoscendum cathetere in *Signum uni-* vesicam immisso, aut digito in anum inducto opus apprime *cum quale.* est, ut certum de eo iudicium statui queat.

1) *Haec fere omnia symptomata diu passus est Cl. AU- Obscuro* CTOR, etsi nullus in eius cadavere calculus repertus sit, si deprompta lapideam concretionem excipias cartilaginea capsula magnitudinis avellanae inclusam, quae in cellulari textu scroti infixae sectione ca- erat. Abscessus quidem ingens detectus est tum in vesica daveris cl. urinaria, tum in dextro rene, cuius erat moles adaucta, et auctoris. puris magna copia utrobique apparuit. Fortasse a scirrhus intus genito et postea suppurato morbus fuit, cuius quidem non leve indicium attulit, callosa durities, quae in interiori vesicae collo prominebat, et parvi scirrhi, quibus adhaerere partes hic illic scatere visae sunt. Editor, ex historia visi et reperti a docto chiriatro praetorianorum GEORGIO KAVINA, qui praesto fuit anatomicae sectioni, scriptis mandata.

2) *Lib. I. Praxeos. Cap. XIII. Quanti intersit prae-* cepta etc. Vide quoque ANTON. DE HAEN. *P. III. cap. IV.* p. 176. *Rat. med.*

P r o g n o s i s.

§. CXCI.

Nephritis tam spuria quam vera haud spernendum est *Inflammatio-* malum. Inflammationis enim metum vel eam comitem ha- *nis periculum* bet. Hinc omnes inflammationis exitus timendi sunt. Multa *et damna.* pariter a solo vehementiori dolore et spasmio imminent, ut de urina retenta ac in sanguinem refluyente nihil disseram. Calculorum vero, ut nullum adhuc certum remedium dete- *An reme-* ctum est, sic nulla salutis spes, nisi in eorum expulsionem, *dinum calculi* quando ea possibilis sit ¹⁾, aut in sectione chirurgica, quae *et spes adsit* tamen plena discriminis saepe est. *salutis.* Qui calculo renum pe- reunt, circa finem convulsionibus aut delirio pereunt, ob- servante BAGLIVIO ²⁾.

1) Narrat DELAHIRIUS, quendam eiecisse calculum olivaris magnitudinis, dum se humi pronus inclinasset, ibi nonnullas

litteras scriptitaturus. *Mém. de l'académ. de Paris. T. VII. p. 237. edit. Venet. Ex sch. auct.*

2) *De ictero flavo etc.*

C u r a t i o.

§. CXII.

Nephralgiae curatio.

I. S. Lenientia, emollientia, enemata, fotus, semicupia.

Diuretica omnia, nisi mitiora, procul arcenda. Item acria, balsamica et lithontripica.

Potui danda.

Curatio doloris nephritici tentanda illico est sanguinis missione primum e superioribus, deinde etiam ex inferioribus partibus, oleo seminum lini, amygdalarum dulcium, aut olivarum, lenienti ex cassia medicamento, emollientibus quibuscunque, tam intrinsecus adhibitis, quam extrinsecus admotis, enematibus nimirum, fotibus, semicupiis et, si necessitas postulet, etiam opiat. Procul arceantur diuretica, nisi fuerint mitissima et ad emolliendum idonea, aut temperantia, itemque acria, balsamica et lithontripica ¹⁾ quaecunque ita dicta. Potus sit aqua ex malva, althaea, verbasci floribus, foliis parietariae, radice glycyrrhizae, aut purissima fontana subacido succo vegetabili, aut nitri tantillo, aut oxymelle adiuta. Atque haec fere singulis doloribus nephriticis, non exceptis, quos calculi faciunt, opportuna sunt.

HULMII methodus ad calculos urinarios dissolvendos.

1) NATHANAEL HULMIUS ad calculos urinarios dissolvendos sequentem methodum divulgavit. *Solvantur XV. grana salis tartari in uncis quatuor aquae purae, et tota mixtura uno haustu sumatur, cui statim aliae quatuor unciae aquae purae superbibantur, quibus XX. guttae spiritus levis citrioli addantur.* Utrumque remedium quater in die et instis intervallis repetitur: ita per tres aut quatuor hebdomadas continuatur. Si quis excitetur ardor in vesicae ambitu, tunc ad dies aliquot suspendatur, intereaque sumantur emulsiones. Si venter non obtemperet, clysteribus et tantillo pulpaе cassiae adjuvetur. Potui aqua et vini albi aliquantulum detur. Quaeso tamen animadvertatur, in vesica aegroti, quem curavit auctor, vel curasse credidit, postquam aliquo tempore obiit, multos calculos fuisse repertos, qui nondum certe soluti erant, sicut testatur MEINARDUS SIMON DU PUI in dissertatione *De homine dextro et sinistro.* *Ex sch. auct.*

§. CXIII.

Ad prophylaxin.

Dolore discusso et resoluta inflammatione, tentanda est prophylaxis iis remediis, quibus causae remouentur. Generatim

ratim victus ratio accuratior, exercitatio moderata, aquarum *Thermæ.*
thermalium potus, serum lactis, lac asinum et caprillum, *Lac.*
abstinentia vinosorum liquorum omnibus convenire solent.
Calculus vero commendantur sapo venetus ¹), aqua calcis *Calculosis*
crustaceorum ²), virga aurea, radix cardui stellati, eryngii, *aptiora.*
ononidis, folia hederæ terrestris, veronicæ, acmellæ, ver- *Aqua calcis*
besinae aliaque e vegetabilibus desumpta et vi diuretica prae- *crustaceo-*
dita, uti cepae, raphani, rapae, pastinacæ, porri, apium, *rum.*
petroselinum, beta, tragopogon ac similia. Succus betulae *Diuretica.*
e superioribus ramis verno tempore sauciatis, crassitiem cir- *Betulae suc-*
citer trium digitorum habentibus, exstillans singulis mane *cus.*
diebus ad aliquot cochlearia usque ad levamen datus calcu-
losos, teste primum HELMONTIO et BOYLEO ³), deinde
LANGEO ⁴), mirifice sublevat. Est succus acidulus. Ser-
vari potest in lagena vitrea, si in ea inversa fili sulphurati *Quomodo*
ardentis fumus excipitur, et eo extincto statim succus im- *ad usum ser-*
mittatur, et orificium arcte deligetur ex CNOEFFELII fide. *cetur.*
Sic incorruptus servari diu potest. Proponitur quoque con-
tra podagricos dolores. *Arenulae et calculi minores felici-* *Adversus*
ter expelluntur pulvere baccarum iuniperi, vel earum diluto *arenulas*
cum lacte caprillo aequa parte remixto, et per aliquot dies *Pulvis bac-*
continuo ⁵). Nec sua laude fraudanda est radix pareiræ *car. iuniperi,*
bravae, quæ etiam tum locum meretur, cum *ulcera et ab-* *vel cum lacte*
scensus in viis urinariis suborta fuerint ⁶). HAENIO quo- *caprillo dilu-*
que in ulcere renum, ureterum et vesicae cum calculi su- *tum earum.*
spicione proficua visa est uva ursina ⁷). Laudantur etiam *Radix parei-*
varia iniectionum genera ⁸). LANGEO est summum antine- *rae bravae*
phriticum illud HENRICI MEIBOMII, quod fit ex aequali *ulceribus*
parte terebinthinae venetae et extracti cascarillae. Datur *quoque*
ad grana sex cum aqua nymphaeae, donec urina clarescat, et *prodest.*
dolores cessent, quod intra paucos dies evenire asserit ⁹). *Iniectiones.*
Iuxta nonnullos nitrum, si singulis XIV. diebus sumatur *Antinephri-*
iusta dosi, a calculis praeservat, ut SCARDONA animadver- *ticum MEI-*
tit ¹⁰). Quod praestare etiam tradunt mucilaginoso et un- *BOMII.*
ctuoso, veluti lac, hordei et oryzae decocta. Carnes lixae
magis calculosis, quam frixae conveniunt. Vina eligenda mi-

nus austera, aquae potandae levissimae et purissimae fluminum, suadente MEADIO ¹⁾). Decubitus in dorso vitandus; magis in latere renis affecti.

Observationes circa
usum aquae
calcis.

1) Lixivium ipsum saponariorum optimum et innocuum lithontripticum habetur. De hoc exstat liber anglice scriptus ROBERTI HOME *chirurgi, et Londini editus in 8. ann. 1783.* Vid. *Journal de médec. T. LX. p. 264. Ex sched. auct.*

2) *Vol. III. p. 10. et 52., et Vol. IV. p. 611. Comm. de reb. in sc. nat. et med. gestis:* ubi plura ex WALPOLE et WHYTIO referuntur. Modus adhibendi dictam aquam ex ostrearum calce habetur *ibidem p. 613. et Vol. V. Tentaminum Edinburgensium etc.* Ninia tamen eius dosis, ut observat HUXHAMUS, *phthisin, scorbutum* et similia inducit, quod monet etiam HAENIUS et proprio tandem periculo ostendit ipse WALPOLE. *Ex sch. auct.*

3) BOERHAAVIUS *Chem. T. II. p. 95.*

4) *Miscell. veritat. Fasc. I. p. 21.*

5) LANG. *l. c. p. 22.* HOFFMANNUS corticem radiceis acaciae, eius decoctum, roob iuniperi et cynosbati specifica quadam virtute pollere tradit, cum ex imbecilli, et remisso renum tono morbus est. Adversus calculos non modo minores, sed maiores etiam MARIANUS celeberrimus chirurgus remedium sua experientia comprobatum proponit, quod est huiusmodi. *Rec. Semin. upii sylvestr. drachm. jv. Florum cardui stellat. unc. j. Siccantur in furno et deinde fiat pulvis. Dosis semidrachma vel scrup. ij. semel vel bis in die.* Iniectione quoque utebatur ex carduo stellato. *Ex advers. auct.*

6) Vid. GEOFFROYUM *T. I. p. 189. et 100. Formula prostat p. 443.* Est autem huiusmodi. *Rec. Radic. butuae pulver. Radic. liquirit. pulv. ana scrup. sem. Balsam. copaiv. q. s. M. f. p. cap. mane et vespere.* Vide de ulceribus renum SCARDONAM *cap. de renum et vesicae calculis §. 15.* Si ulcera renum et vesicae erysipelatosae sint, ut saepius contingit, detrimentum accipiunt, referente FR. HOFFMANNO, *a balsamicis omnibus, resinosis et oleosis,* GEOFFROY. *l. c. p. 438. Ex adversariis auct.*

7) *Rat. med. P. III. c. 4. P. IV. c. 7.* Vid. BAREIRAC. *medicament. form. p. 163.*

8) Vid. *Comment. de reb. in S. N. et M. gest. Vol. IV. p. 273.,* ubi fit mentio de libro a BUTTERO edito, in quo ratio exponitur calculis medendi iniectionum opè. *Ex advers. auct.* Vid. DESSAULT *Dissertation sur les pierrès etc. et Essais de méd. d'Edimb. Vol. VII. p. 124. etc.*

9) *l. c. p. 30.*

10) *Lib. III. cap. XI. §. X.*

11) *Monita et praecepta medica cap. X.*

CAPUT XVI.

DE MICTU CRUENTO ET HAEMORRHAGIA PENIS.

§. CXCIV.

Sanguis quandoque e *renibus*, *ureteribus* et *vesica* cum *urina* fertur, eamque *cruentam* reddit. Raro purus et solus prodit, nisi ex *urethra* tantum profluat, *Αίματουρία* sive *mictum cruentum* vocant. Causae sunt, quae reliquarum haemorrhagiarum, sed imprimis plethora, ictus, calculi, aut eorum transitus difficilior, vehementior motus, exercitatio, vectio, haemorrhoides vesicae, ulcera urinarias vias occupantia, dyscrasia scorbutica, cantharidum usus, consuetudine sanguinis evacuationis, quae ex aliis partibus fieri solebat suppressio ¹).

Definitio mictus cruenti.

Causae.

1) Legi meretur historia *mictus cruenti a callo* vesicae, quam ZWINGERUS refert *T. Act. helvet. p. 13. Basileae edit. ann. 1757. Ex sched. auct.*

§. CXCV.

Urina rubra a febrili motu, aut assumpta radice rubiae, aut fructibus *opuntiae* comestis tincta, confundi cum *urina cruenta* non debet. Illa tenuis, perspicua est, nec lintea immissa aut chartam tingit; haec vero turbida, crassior, et saepe sanguinem vel sanguinis grumulos ad fundum vasis deiecit, signaque affectae partis, e qua erumpit, plerumque non desiderantur.

Discrimen inter urinam cruentam et alias urinarum rubrarum species.

D i a g n o s i s.

§. CXCVI.

Si a *renibus* sanguis descendit (proprie tunc *haematuria* vocari potest), copiosus esse solet et intine urinae per

Sanguis e renibus, qui proprie haematuriae vocatur.

maturia est, eiusque notae. mixtus. Dolorem alii abesse, alii comitari tradunt. Sed neutrum constans est. Si ex *ureteribus* prorumpit, paucus, sed tamen cum aliquo circa ilia, aut lumbos, aut umbilicalem regionem hypogastrium versus dolore mingitur, et causae, quae ureteres laeserint, antecedere illum consueverunt. Ex *vesica* promanans pariter multus esse potest, plerumque in grumos et thrombos coactus, interdum nigricans, interdum floridus et purus, interdum urinae, sed non probe, commixtus. Atque is saepe cum dolore aut ardore et aliqua etiam difficultate meiendi coniungitur. Sed haec aliaque signa quamplurimum variari possunt.

§. CXCVII.

HAEMORRHAGIA PENIS.

Stymatosis. Iluc spectare videtur *haemorrhagia penis* sive *stymatosis*, plerumque a pathologis praetermissa. COELIUS AU-
Quid hoc nomine intelligendum. RELIANUS tamen de ea loquitur *libro V. capite IV.* Hac intelligimus *sanguinis puri ex interiori penis meatu*, sive
Eius symptomata. urinae itinere, itemque ex *glande*, aut *praeputio profluvium*; quod dum minime mingendi cupiditas est, sine ulla
Penis conditio. urinae emissionem, sine nisu et saepe sine dolore ex aperto exesoque sanguifero vase contingit. In hoc profluvio modo
Copia sanguinis. penis flaccidus est, modo riget; sanguinis quoque copia varia est, nam interdum intra aliquot uncias continetur, interdum ad plures etiam libras ascendit. Quandoque intra
Fluxus ratio. unam vel alteram horam desinit, alias diutius protrahitur. Nec desunt exempla fluxus eiusmodi saepius recurrentis, imo
Quandoque periodicus. periodos statas servantis, quales habet fluxus menstruus aut haemorrhoidalis, aut etiam tunc solum erumpentis, quando
Causa quae. coitus celebratur, aut pollutiones superveniunt. Causae non aliae, quam quae supra memoratae sunt, hic quoque afferri possunt.

P r o g n o s i s.

§. CXCVIII.

Magnitudo periculi in hoc morbo ex sanguinis effusi *Unde pe-*
 copia, ex continuatione aut recurso, ex symptomatibus, aut *tenda.*
 morbis coniunctis, ac demum ex partis affectae ratione aesti-
 matur. Minus discriminis in eo est *sanguinis fluxu*, qui *Haemorrha-*
 sedem in *pene* habet. Magis vero in eo, qui e *vesica* et *gia penis le-*
ureteribus profiscitur, omnium maxime demum timendus, *Ureterum*
 qui e *renibus*. *Periodicus* autem, nec copia excedens sine *gravior.*
 noxa esse consuevit. *Renum gra-*
vissima.

C u r a t i o.

§. CXCIX.

Curaturo *mictum cruentum* tria potissimum incumbunt; *Indicationes.*
 causae scilicet ablatio, sanguinis, si acritate aut inquinamen-
 tis scateat, emendatio, et partium tandem, e quibus sanguis
 effluit, confirmatio. Quare inquirendum primo est, an san-
 guis copia peccet, an acritate et dissolutione. Copia tolli *V. S. in bra-*
 tur illico vena secta in brachio, quo etiam auxilio illud con- *chio si copia*
 ficitur, ut sanguinis motus ad superiora avocatus minori ad *sanguinis*
 partem, unde elabitur, impetu foratur, locumque relinquat, *peccet.*
 ut aperta aut disrupta vasa se contrahant coalescantque.
 Emitti etiam poterit hirudinum venis sedalibus applicatione, *Quando uti-*
 si fluxus haemorrhoidalis suppressio aut mensium morbo oc- *lis hirudinum*
 casionem dederit. Si vero ex signis alibi a nobis pluries *applicatio ve-*
 expositis appareat, sanguinem aut putredine colliquescere, *nis sedalibus.*
 aut acritatibus inquinari ac dissolvi (nisi cum hisce vitiis *Antiseptica*
 magna vasorum plenitudo coniungatur), omissa sanguinis *quae et*
 missione, praestabit antisepticiis putredini, aut demulcenti- *quando.*
 bus edulcantibusque acritudini obviam ire. Inter quae pri- *Demulcentia.*
 mum locum sibi vindicant acida omnia tam vegetabilia, quam
 fossilia ¹⁾), cortex peruvianus, sinarouba, antiscorbutica tem-

peratoria, serum lactis acidulatum, emulsa e seminibus frigidis, mucilaginosa quaecunque, gummi tragacantha, arabicum, atque his similia. Sed prae ceteris aquae frigidissimae potus et lac ²⁾, imprimis ovillum ut deusum, ignito chalybe alteratum, aut succo aliquo, qui peculiari et notae acritudini adversetur. Lac potissimum convenit, si cantharides aut acria medicamenta morbum fecerint. Si vero motus vehemens corporis, ictus, contusio aut calculus vasa sanguifera ³⁾ perruperit aut dilaceraverit, iis, quae sanguinis copiam et motum imminuunt, addenda etiam summa tum animi quies est, temperatissimoque in loco aeger sic collocandus, ut potius ad frigidum inclinet. Quae observanda etiam sunt pro rerum circumstantium ratione in aliis etiam quibuscunque morbi originibus; sed ita sit oportet aegri positus, ut dorso lumbisque quamminimam incumbat. Speciatim mictus ab ictu aut contusione ortus optime curari dicitur decocto florum et foliorum aruicae, aut radice rubiae tinctorum cum hydromelite.

Frigidissimus aquae potus, et lac chalybe alteratum etc.

His addenda corporis animique quies et frigidus locus.

Quinam aegri positus.

Decoctum aruicae, aut rad. rubiae tinctorum.

1) Vid. *Vol. II. §. 242. et 271.* Ibi prae ceteris *acidum citriolicum* in *mictu cruento* excellere auctor tradit. Vide quoque, quae supra proposita sunt §. LXX. et LXXI. adversus *fluxum cruentum*.

Observatio POISSONIERII.

2) CLERICUS (*Histoir. natur. de l'homme malade. T. II. p. 31.*) narrat, quendam post varia ac diuturna morborum genera, quibus vexatus fuit, incidisse in *mictum cruentum*. POISSONIERIUS ex reliquorum remedium irritum usu coniecit, medendi rationem immutandam esse, ideoque ei auctor fuit, ut lacte vaccino uteretur, ut vacca surfuribus aqua subactis urticisque pungentibus vesceretur. Lacte sic medicato aeger convaleuit. Tribus post annis obiit tamen aeger ex fungo vesicae innato; quod nullo modo officere observat CLERICUS medicae huius lactis facultati, cum sciamus XX. et ultra haemoptoicos eodem remedio fuisse restitutos. *Ex sched. auct.*

3) Haemorrhagiam a calculis inductam ob aliquam ramum venae portae disruptum novimus ex observatione quadam inserta diario medico *Journal de médec. mensis Iulii ann. 1782.* *Ex sch. auct.*

§. CC.

Adstringentia quae et quando.

Quod si *laxitas* atque *atonía* causam praebent, aut *mictum cruentum* subsequuntur, etiam adstringentia in usum

vocanda sunt, uti succus plantaginis, urticae non urentis, decocta ex equiseto, consolida maiore, millefolio, additis trochiscis de carabe aut Gordonii, prae ceteris ab HOLLE-
RIO et DURETO laudatis, terra catechu, bolo armena, fungo
melitensi atque aliis, de quibus dictum est, ubi de aliarum
partium haemorrhagiis verba fecimus. Neque vulneraria le- *Quando bal-*
nique balsamica vi praedita remedia aliena sunt, si ab *samica pro-*
abscessuque sanguis profundatur. Extrinsecus etiam et fri- *sint.*
Topica.
gida actu et leviter adstringentia admoventi possunt.

§. CCI.

In penis haemorrhagia, si vere talis est, compressione, *Ad penis hae-*
frigidae adpersione iniectisque lenibus adstringentibus, uti *morrhagiam.*
aqua vulneraria, vel Rabelii, vel plantaginis cum saccharo *Prigidae*
saturni aut alumine crudo ¹⁾, vel decocto chinae chinae et *aspersio,*
similibus utendum est; nisi sanguinis paucitas et periodicus *compressio-*
eius fluxus periculi expers omnem curationem supervaca- *nes et inie-*
neam reddat. In hisce autem morbis quies imperanda ad *ctiones ad-*
prophylaxin et victus potissimum accuratissima ratio est. *stringentes.*
Motus, exercitatio, venus sedulo vitentur. Pulmenta ex *Prophyla-*
hordeo et oryza et iuscula cancerorum fluviatilium, imo esus *xeos regulae.*
eorum laudantur. Aquae item medicatae aestivo tempore.

1) Videsis *Vol. II. §. cit. CLXXI. in nota* formulas scri-
luctis aluminosi et specifici helvetiani, et quae sequenti nota
fusa ibi ab auctore disseruntur de acidorum vi et natura.

CAPUT XVII.

D E D I A B E T E.

§. CCII.

A mictu cruento ad *nimiam* urinae profusionem pro- *Quae urinae*
gredimur, non quancunque (nam saepe in hydropis aut *profusio*
morbosa, de

qua hic agitur. acutorum morborum solutione, aut post perspirationem cohibitam, aut uberiores potum, spasmosque hypochondriacos ac hystericos innoxie profunditur), sed eam, quae vires prosternit, corpus tabefacit, et siti inextinguibili extorret¹⁾.
Urinarum symptomata et varietates in diabete. Hanc graeco nomine Διαβήτην sive *diabeten* vocamus. Itaque urina in eiusmodi morbo vel copiosius emittitur, quam assumpti potus aut seri in sanguine existentis quantitas postulare; et sine dolore mingitur, vel saporem, odorem coloremque potus assumpti parum aut nihil mutatum refert, vel chylo ipsi simillima est. Hinc in aliis aquea et cruda, in aliis pallida, turbida aut crassa, quandoque melle quasi tincta, et simul dulcis²⁾, quandoque alba ac inodora, interdum etiam violam redolens emittitur.

1) Quae copiosior urina ab humiditate in aëre hospitante absorpta redditur, utpote nihil noxae inferens, a nobis plane excluditur.

2) Quando urina mellis aut sacchari odorem et saporem refert, *verus diabetes* est iuxta quosdam auctores; cumque *diabetem anglicum* appellat SAUVAGESIUS, quod Anglis familiaris est. Vide TARGIONI *Opuscoli fisico-medici* T. II. p. 53. *Ex sched. auct.*

§. CCIII.

Variae diabetae species. Hae variae urinarum excretiones uno vulgo nomine comprehendi solent. Sed praestat eas cum ETTMÜLLERO in varias species distinguere, nimirum in *diabetem verum*, in *nothum* sive *spurium*, ac in *chylosum*¹⁾. *Verus* est cita per urinam potulentorum parum aut nihil mutatorum transmissio; *diabetes* enim a Διαβαίω, quod est *cito transeo*, derivatur. *Nothus* sive *spurius* is est, in quo plus urinae redditur, quam sit putulentorum assumpta quantitas. In hoc fere colliquatio quaedam totius sanguinis videtur adesse. In tertio demum *chylus* cum urina aut urinae loco mingitur. In *prima* igitur specie *cruditas* potius, quam quantitas, in *altera immodica copia* considerantur. Inter has quendam quasi gradum constituit intermedium ea, quae qualitate peculiari et *chyloso* succo se distinguit.

1) ODOARDUS BARYUS distinguit *diabetem* in quatuor species. *Primam* confert cum diarrhoea, et dicit *chylum* in ea *BARYI.* immutatum per renes excerni. *Secundam* repetit ex tubulis renalibus dilatatis ex compressione eorum aliquot ob calculos; unde reliqui dilatentur oportet. *Tertium a sanguinis colliquatione* ex vitiata bilis natura. *Quarta est nervosa et convulsiva.* *A treatise on the three different digestions etc. Loudon 1759. sect. III. Ex sch. auct.*

§. CCIV.

Causa non una esse potest. Modo hepatis viscerum- *Multiplices*
que chylicationi dicatorum debilitas, modo sanguinis colli- *causae pro-*
quatio serosa, modo renum laxitas et atonia, modo ex his *ximiae.*
plura simul concurrunt. Remotae vero sunt potus aquosi, *Remotae.*
calidi, copia nimia et diu assumti, vini abusus, nimius aquae
thermalis potus imprimis valide urinam cientis; diuretica va-
lidiora ¹⁾, mercurialium et resolventium usus diuturnus, ve-
nena acria et colliquantia, vita nimis exercitata, aut otiosa
nimis, veneris abusus, humidus aëris constitutiones, refrige-
ratio corporis, renum morbi, uti nephritici dolores, absces-
sus, calculi, metastasis arthritidis iuxta SYDENHAMIIUM, ma-
gna nervorum irritatio iuxta WHYTTIUM ²⁾, ut in dentitione,
hepatis ³⁾ lienisque obstructions, morbi acuti aut chronici
praegressi, morsus dipsadis ⁴⁾; quibus adduntur ab aliis ⁵⁾
primarum viarum saburra, digestio vitiata aliaeque similes
causae; sed in his casibus *diabetes sympathicus* est.

1) HILDANO, WILLISIO, LISTERO observantibus.

2) Vid. TISSOT. *Epist. varii argum.*

3) MEADIUS in *diabete* mortuis semper aliquid steatomatosi referre hepar invenit; quod *crassiores et oleosae partes minus subactae in refrigeratis corporibus figantur in hepate.* *De viper. pagin. 117.*

4) A morsu serpentis, qui *dipsas* dicitur, ARETAEUS vidit *diabetem* exortum, ut memoratur ab AETIO *Tetrabibl. IV. sermon. I. cap. 22.* Ab huiusmodi serpente morsus obiit AULUS TUSCUS miles CATONIS in Africa, LUCANO teste. Serpens viperæ similis est. Hic morbus vocatur *διψαζος*, quod sitim infert. Vid. PAUL. AEGINET. *lib. III.* et BOMAR. *Dictionn. de chymie etc. Ex sched. auct.*

5) M. BAUME *lettre à l'auteur du Journal.* Vid. *Volum. LVII. p. 224. du Journ. de médecine de Paris.*

D i a g n o s i s.

§. CCV.

*Symptoma-
mata.**Macies, sitis,
siccitas fe-
bris interdum
hectica.**Lumborum
dolor.**Crebra ex-
spuitio.**Testium et
pedum oede-
ma.**In peripneu-
moniam de-
sinit.**Observatio
LOCKII ex
COCCHIO.*

Quocunque modo *diabetes* corripiat, alimentum corpori subtrahitur; hinc macies ingens, sitis, interdum febris hectica et interiorum partium siccitas consequuntur. Lumbi praeterea et coxae saepe dolent, viscera aestuant, saliva crebro expuitur, nonnullis testes, et pedes leviter intumescunt, imo interdum in peripneumoniam ¹⁾ aut difficilem deglutitionem aliqui incidunt, qua demum finis malo imponitur et vitae.

1) IOHANN. LOCKIUS, referente COCCHIO (*Bagni di Pisa* p. 271.), septem aegros ex *diabete* laborantes vidit, qui post duos vel tres annos obierunt ex *peripneumonia*, et sanguinem expuerunt uno vel altero ante mortem die. Idipsum vidi ego in comite SUMMARIVA Laudensi. *Ex sched. auct.*

Prognosis et Curatio.

§. CCVI.

*Quando cu-
rabilis sit,
quando non.*

Levior morbi gradus saepe curabilis est. Si iam invaluerit, vix remediis cedit, infirmis praesertim corporibus, cachecticis, senibus, venere fractis superveniens. Periculosus summo opere est in febribus ardentibus aut malignis ante

*CURATIO ge-
neralis.**Temperan-
tia, incras-
santia et ro-
borantia.**Lac vacci-
num medi-
cutum.**Demulcen-
tia.**Farinacea.
Refrigeran-
tia.**Anodyna.
Adstringen-*

crisin contingens. *Curatio* autem causis accommodanda est. In universum perficitur temperantibus, crasin sanguini debitam et robur solidis partibus, et maxime renibus restituentibus. Hinc omnia incrassantia, ut serum lactis aluminosum ¹⁾, lac vaccinum ²⁾ cum aqua plantaginis coctum, aut cum philonio, gelatinae extremitatum vituli aut vervecis, iuscula raurarum, cremores oryzae, hordei, avenae, pulmenta farinacea sagou, radicis saleb, aut orchidis morionis, emulsiones e seminibus frigidis, ex amygdalis dulcibus, gummi arabicum, tragacantha, et anodyna ex nymphaea, portulaca et papavere albo parata. His quae adstringunt et roborant

addenda sunt, iam supra memorata; sed praecipue martialia, *tia et roborantia.*
 tinctura chinae, coralliorum, conserva rosarum antiqua, co-
 toneorum, sorborum et similia. Quae de tinctura cantha- *Quid de tin-*
 ridum adversus *diabeten* referuntur ³), vix fidem meren- *ctura cantha-*
 tur. In *diabete* a *diureticis* excitato rhabarbarum ad semi- *ridum cre-*
 drachmam cum tartaro solubili saepius dandum suadet VO- *dendum.*
 GELIUS. MEADIUS alique Angli commendant aquam *bristo-*
lensem aquae calcis persimilem ⁴). Imo WILLISIUS ipsam *lensis.*
 calcis aquam proponit ⁵), cui MACBRIDIUS adiici vult in- *Aqua calcis.*
 fundique corticum quercus portionem ⁶). BAGLIVIVS lau-
 dibus effert pilulas ex catechu ⁷). Alii aquas ferratas. COC- *Aquae ferra-*
 CHIO acidulae cum diaeta lactea probantur, item aqua gla- *tae.*
 cie frigefacta ⁸). Alienum non est etiam externis adstrin- *Acidulae.*
 gentibus uti renum regioni admovendis ⁹). Ex his patet,
 quatenam victus ratio esse debeat et vitae regimen. Potus
 sit ex chalybe alteratus et vinum austerum ac meracius.

1) MEAD. *cap. IX. sect. II. Monit. et praecept. med. Fit*
tribus drachmis aluminis pulverati, et in libras jv. lactis pan-
lulum cocti injecti. Sumitur autem ad uncias jv. ter in die.
 BRISBANIUS interim asserit, sibi parum respondisse tum serum
 aluminosum, tum corticem peruvianum et reliqua adstringen-
 tia. Utiles tamen reperit emulsiones amygdalarum dulcium cum
 gummi arabico. *Select. cases in the practic. of medicine etc.*
London 1772. Ex sched. auct.

2) *Historiam* diabetae spurii ab AUCTORE curati, quam *Historia dia-*
ex eius diario italico anni 1782 deprompsimus, huc trans-
ferre libet, ut patent non modo diabetae lacteae utilitas, sed
ctore curati.
quandoque etiam in huiusmodi morbo sanguinis missionem
obtinere et utilem esse posse. En historia ad verbum latine
reddita. „Mense maio huius anni (1782) rogatus praesto fui
 seni septuagenario maiori, sanguineo biliosoque habitu prae-
 dito, qui, cum nondum ab *hemiplegia* penitus evasisset, *dia-*
bete spurio correptus copiose ita mingebat, ut quotidie urinae
 uncias amplius CLX. aut CLXX. redderet, quin tamen eius
 potus tertiam ponderis partem aequaret. Urinae quippe natu-
 rales erant et clari perspicuique coloris. Sed duobus ab hinc
 mensibus omnia incassum adhibita remedia fuerant. Rhabar-
 barum ergo ad purgandum cum tamarindorum pulpa epieratice
 sumendum statim suasi, mittendumque item sanguinem e pede,
 quod aberrationibus ferme maniacis rapi inciperet, et pulsus
 satis validi ac duriusculi essent. Tum longiorem lactis usum,
 adiecta chinae chinae tinctura, praescripsi. Hisce remediis
 paulatim imminutus *diabetes*, atque mense transacto, ex quo
 iisdem utebatur aegrotus, a morbo omnino liber evasit, et

*Sanguinis
missio in
diabete.*

domo exivit. Quod vero attinet ad *sanguinis missionem in diabete*, animadvertere hic volo, non multo pridem me convenisse quendam eodem morbo laborantem; et simul ex vesicae renumque etiam fortasse abscessu iamdiu suppurationibus obnoxium, cui sanguinem mitti pluries imperavi, quotiescunque nimirum febris spirandique difficultate fere peripneumonica corripiebatur; quod factum quidem optimo semper cum eventu est. Sanguis vero crusta pleuritica contextus apparuit, responditque ad amissum duro validoque pulsui. *Hactenus auctor. Aeger primus, cuius historiam retulimus, fuit dominus HIERONYMUS CASATUS, qui Mediolani ad Celsianum pontem habitabat.*

3) MORGAN (*Practique mechanique etc.*) laudat *cantharidum tincturam*, quae conficitur ex *semuncia cantharid. infus. in elixir. citriol. lib. j.* Dosis a guttis *XV. ad XXX. vel LX. bis, ter in die; superhaustis aquis bristolensibus.* Eandem tincturam etiam BRISBANUS *l. c.* commendat, quia *diabeten* oriri putat ex *paralysi nervorum renalium.* Vid. *Raccolta di opuscoli fisico medici di LUIGI TARGIONI T. II. p. 7.* Noster ad idipsum Anglos reprehendit in fine §. *CCLXII. Volum. II.* Vide ibi.

4) *De ciper. p. 118.*

5) *Cap. de diabete.*

6) *A methodical introduction to the theory and practice of physic. London 1772.*

7) *Lib. I. cap. XII.*

8) *Bagni di Pisa p. 270.*

9) TISSOTIUS praescribit corpus universum oleo perfricari, datis interius interim roborantibus, et praesertim rheo; *morbus enim fit ex aucta respiratione cutanea, quae enormis esse demonstratur ex plurium observationibus, et praesertim Cl. MELZ et KRATZENSTEIN. Epist. var. argum. p. 141., ubi etiam subdit: cantharides cuti applicitas expirationem augere, inspirationem imminuere, revellere, cutis functiones restituere. Num ergo diabetae prosunt? Ex sched. auct.*

CAPUT XVIII.

DE URINAE INCONTINENTIA EIUSQUE
SUPPRESSIONE.

§. CCVII.

Quando urina e vesica, insciis aut nolentibus aegris, *Quid sit in-*
plerumque sine stimulo exit, morbus vocatur *urinae incon-*
continentia, sive *enuresis* SAUVAGESII; quae definiri potest *mi-*
ctio involuntaria atque *inopportuna*. Pueris praesertim ac *Qui ei ob-*
puellis inter dormiendum accidit; somno enim obrutis vires *noxii.*
animales sopiuntur, aut sphincter resolvitur, aut stimulo,
quin excitentur, ad mingendum quasi evigilarent sollicitati
urinam emittunt. Paralyticis, item epilepticis, delirantibus,
apoplecticis et morti proximis frequens morbus est. Senes
item, herniosi, gravidae, puerperae, fistulis aut calculis ve-
sicae laborantes, lithotomiam aut vertebrarum luxationem
passi, aliisque viarum urinarum vitiis affecti obnoxii huic
morbo sunt. Hinc *enuresis infantum*, sive *nocturna*, pa- *Differentiae.*
ralytica, *spastica*, *calculosa*, *primaria*, *secundaria*, *idio-*
pathica, *symptomata* profluunt.

§. CCVIII.

Causa praecipua vel est sphincteris vesicae nimia laxi- *Causae pro-*
tas, vel relaxatio, aut violenta et spastica fibrarum vesicae *ximae.*
contractio, cui non satis reniti possit sphincteris resistentia. *Remotae.*
Causae remotae facile ex dictis erui possunt. Contrarium
huic vitium exhibet *Ισχυρία* sive *urinae suppressio*, cuius *ISCHURIA.*
duplex genus est, *vera* nimirum et *spuria*. *Vera* dicitur, *Quid et quo-*
quando urina tota in vesica urinaria colligitur et retinetur, *tuplex.*
nec quidquam eius profluit. *Spuria* vero, quando vesica *Quae vera.*
vacua est, nec ulla e renibus urina in ipsam descendit, quia *Quae spuria.*
vel in iis non secernitur, vel secreta nequit libere suum
iter prosequi.

§. CCIX.

Cur a renibus urina non secernatur.

Vitia sanguinis quae et quot.

Quanam vitia renum.

Ureterum vitia.

In renibus autem non secernitur, vel secreta ad vesicam non fertur, primum vitio *sanguinis*, si crassus, viscidus nimis fuerit, vel copiosior affluat ad renes, vel motu celeri eos praeterlabatur, vel a renibus arceatur, compressis vasis emulgentibus ab aneurysmate aut a polypo obstructis, deinde *renum* culpa, si spasmo eorum tubuli sint affecti, vel atonia et paralyti laborent, vel renes turgeant ob impeditum sanguinis ab ipsis per venas emulgentes refluxum, vel extrinsecus compressi a pinguedine, a faecibus coli, ab hydropicorum aqua, vel alia causa suum munus obire non possint, vel obstruantur a calculis, ab arenulis, a viscidis et crassis humoribus, a pure, ab inflammatione, ab apostemate, a scirrhus aliove tumoris genere. Deferri ad vesicam urina demum non poterit, si similia *ureteribus* accendant, quae urinae iter praeccludant, et imprimis si eorum extrema ostia coaluerint.

§. CCX.

Causae impediētes excretionem urinae.

Vesicae paralysis, vel abdominis musculorum. Distractio, vel delapsus vesicae in scrotum.

Callus rugaeque colli vesicae.

Hernia interioris eius tunicae, vel vena varicosa.

Spasmus sphincteris.

Urethrae obstructions.

Eadem vitia

In *vesicam* vero *urina* delapsa excerni prohibetur, si irritabilitas aut nervea eius vis langueat aut deficiat, ut in eius paralyti accidit, si vires aliae comprimētes minime eam afficiant, ut in abdominis musculorum paralyti aut laxitate nimia, si ex distractione immodica elasticitatem et tonum vesica amiserit, si in scrotum delapsa sit, uti fit interdum in *herniis* scroti, sive cysticis, observante RUYSCHIO et STOLLIO ¹), si vesicae *collum* durum, cartilagineum rugosumve ²), ut senibus accidit, evaserit, si *interior vesicae tunica* laxior facta prolabatur ³), vel vasis varicosis praeter modum intumescat, si *sphincter* spasmo contractus sit, neque causis urinam impellentibus cedat, si *urethra* tam initio, quam progressu obstruatur a calculo, a muco, glutine, pure crassiore, a grumis sanguinis ⁴) vel aliis corporibus alienis, vel si arctetur claudaturve inflammatione, callo, tumoribus, scirrhis, carunculis, fungosis excrescentiis in eam natis, vel in locis ei proximis, nimirum *utero*, *vagina*, *in-*

testino recto, vesiculis seminalibus, prostata, glandulis innata pro-
Cowperianis, perinæo ⁵); *scroto, pene, vel etiam quocun-*
que modo hisce partibus ingenter tumentibus. Quibus omni-
bus addere oportet vulnera renum, ureterum, vesicae, imo
harum partium violentam disruptionem ⁶).

Renum, ure-
terum, vesi-
cae vulnera
et disruptio.

1) Praeter RUYSCHUM, STOLLIIUS id, inquam, observavit; *Hernia ex*
nam *Part. III. Rat. med. p. 429.* refert exemplum herniae *vesicae in scro-*
scrotalis, in qua vesica urinaria comprehendebatur, quae inter *tuni delapsa;*
muscùlos rectos abdominis a se invicem dimatos supra ossa *STOLLII ob-*
pubis herniose prodierat. *Ex sch. auct.* *servatio.*

2) Id vidi ego in JO. BAP. GUIBIO medico Faventino, vi- *Rugae colli*
ditque PORTALIUS (*Mém. de l'académ de Paris etc. ann. 1770.* *vesicae.*
1771. p. 236.); et GILCHRIST. (*Noe. act. phys. med. Edin-*
burg. T. III.) Ex sched. auct.

3) BORDENAVIUS vidit vesicam hominis in duos veluti sac- *Hernia inte-*
cos divisam. Revera alter ex his erat *hernia interioris eius*
membranae, transversim per interstitia muscularis protrusae. *branae vesi-*
Musculares fibrae erant invicem diductae. Fibrae vesicae mu- *cae; obser-*
sculares sunt tantum *longitudinales*, carent *circularibus* et *vatio.*
transversis validis, quibuscum colligantur; ideo facile a se in- *BORDENA-*
vicem secedunt. Hinc intervalla, in quae interiores tunicae *VIUS.*
sese immittunt, maxime ad latera, quia ex lateribus vesica non
fuleitur ullo munimine, ut antè et postè. *Hist. acad.*
scient. Paris. ann. 1775. In *centriculo* autem, etsi eiusdem
herniae non desint (ut §. LII. iam diximus), non fiunt ex
interiori eius membrana, quia in ea sunt *fibrae circulares* va-
rii ordinis. PETRIOLIUS (*Corso anaton. p. 92.*) observatio-
nem habet ex medico DE RUBEIS depromptam de quadam
puella, quae in oppido Paliani agri romani ischuria vesicali
plures dies laboraverat, frustra adhibitis omnibus remediis, ne
cathetere quidem excepto. Huic tertia die, qua curabatur, in-
tumuit abdominis pars infima, et adeo atroci dolore vexata est,
ut ei mors imminere videretur. Sed quarta die conatu magno
mingere tentans eiecit paulo post per urethram oblongam mem-
branam, flaccidam, mollem pro vesica putrefacta perperam ha-
bitam. Sed revera fuit vesicae mucosa membrana a nervea
discreta propter crassescentiam, et integra eiecta, quae in frusta
divisa saepe mingitur a calculosis. Puella certe postea facile
minxit, et sanitati restituta plane est. Etiam ROHAULTIUS
(*Memoria dell' accadem. di Parigi. Edit. Venet. T. VII.*
p. 236.) vidit frusta vesicae urinae eiecta in ischuria vesi-
cali. *Ex adversar. auct.*

Differt ab
herniis ven-
triculi.
Vesicae in-
terior tunica
mucosa edu-
cta ex ure-
thra.

4) *Ischuriam vesicalem* ortam a sanguinis gravis vesicae *Ischuria ve-*
adhaerentibus ob hiatum *vasorum varicosorum in colle vesi-*
cae vidit, et curavit dominus DE LA PERCHE. Extraxit dictum *sicae a gru-*
sanguinem ope syringae, cui parvum elysterem aptaverat, cera *vis observa-*
ad coniunctionis laca circumducta, eamque in modum tubi *tio D. DE LA*
adspirantis adhibuit. Idipsum etiam alio simili casu praestitit. *PERCHE.*

Vide *Hist. de l'acad. roy. de méd. T. II. p. 242 et 244.*
 HALLERUS in huiusmodi ischuria perinacii sectionem, ut in lithotomia, proponit. *Ex sch. auct.*

Stranguria a vesicae hernia in perinaeo; PIPLETI observatio.

5) PIPLETUS junior (*Mém. de l'acad. roy. de chirurg. T. XI. p. 283.*) stranguriam ab hernia vesicae in perinaeo ita describit. „Praecessit contusio, aut conatus aliquis enormis, accessit dolor primum acutus, deinde obtusus in perinaeo, difficilis mictus et paucus pro qualibet vice, et manibus perinaeo compresso faciliior exitus urinae. Si corpus antea inflectebatur, tumor in perinaeo apparebat mollis, rotundus aut oblongus, et in horizontali positu pressione evanescebat. Erat prope urethram et parum ab ano distans. Causa erat diductio fibrarum elevatorum ani et musculi transversi, qui claudunt inferius pelvim. *Ex sched. auct.*

Exempla ruptae vesicae urinae.

6) In partu difficiliore mulieris annorum XXXVIII, primiparae *disrupta est vesica* urinaria versus superiorem eius partem, unde urina copiose intra abdomen effusa. Obiit nona a partu die. Vid. *Observ. et disquisit. med. societ. Londinens. Vol. IV. p. 58.* Lethalis uteri inversio cum vesicae urinae ruptura videatur in *Comment. de reb. in sc. nat. et med. gest. Lips. Vol. XVIII. P. III. p. 409.* *Ex sched. auct.*

D i a g n o s i s.

§. CCXI.

Signa ischuriae spuriae.

Ischuria notha sive *spuria* cognoscitur, si vesica in tumorem non attollitur, si nullus circa pubem dolor, et nulla ad perinaeum gravitas percipitur, si demisso in vesicam cathetere nulla urina invenitur.

Signa verae.

Contra in *vera* molestus gravitatis, doloris et distractionis sensus circa lumbos est, vel renum ureterumque affectorum signa se produnt, immo saepe superveniunt ab urinoso sero retento aut refluente angustiae et anxietates praecordiorum, sensuum torpor, ad somnum summa proclivitas, halitus foetet, sudor urinam redolet, corpus et facies ut in anasarca intumescit, et multa alia gravia symptomata accedunt, quae mortem accelerant.

P r o g n o s i s.

§. CCXII.

Quid sperandum, quid timendum de

Urinae incontinentia pro causarum varietate plus vel minus difficultatis habet. In pueris quae *nocturna* dicitur tem-

temporis processu sponte plerumque tollitur. In adultis et senibus raro curabilis est, vel saltem diuturna et pertinax. Maius vero negotium facessit, et maius affert periculum *ischuria tam vera, quam spuria* ob inflammationis impri-
mis metum, nec prius cessat, quam causae fuerint sublatae. *Secundaria* tollitur morbo, unde profecta est, curato re-
motisque impedimentis, si quidem removeri possunt.

urinae incontinentia.
Quid de ischuria tam vera, quam notha.

Quid de secundaria.

C u r a t i o.

§. CCXIII.

Sphincteris laxitas, atonia, paralysis roborantia et nervina exposcit, qualia sunt cortex peruvianus, uva ursi, virga aurea, mars, terebinthina, succinum, mastiche; extrinsecus vero tum perinaeo, tum ossi sacro aut spinae lumbari ad-
movenda sunt oleum terebinthinae aethereum, succini, formicarum, balsamum antiparalyticum GHERLII, stillicidia aquae medicatae et similia. Neque frigidae adpersiones omittendae sunt. Vesicantia ad quasvis paralyses commendari, neminem latet, et praesertim origini nervorum, qui ad partem paralyti tactam procedunt, applicita. Quam ob rem ut in artuum superiorum resolutione nuchae apposita plurimum boni praestant, sic eadem de causa ossi sacro in inferiorum paralyti admovenda esse existimat Cl. THOMAS DICKSON¹⁾, eiusque auxilii utilitatem et praestantiam in urinae incontinentia ex sphincteris resolutione pluribus historiis demonstrat. Rem eandem duobus exemplis confirmat etiam illustris FOTHERGILLIUS²⁾. Pueris et senibus atonia laborantibus HOFFMANNUS convenire docet millefolium, veronicam, hederam terrestrem, fragariam, agrimoniam et radicis aca-
ciae corticem. Sed pueris noctu inter dormiendum min-
gentibus³⁾ prodest vesperi a potu abstinere, vel saltem parcissimo uti, vel subinde a somno excitari, ut moniti min-
gant. Si vesicae spasmus aut convulsivae affectiones incontinentiam efficiant, anodyna ac antispastica convenientissima sunt. Reliquas causas accommodata remedia tollunt.

Ad sphincteris laxitatem aut paralytin.

Tonica et anodyna.

Topica.

Embroke.

Vesicatoria ossi sacro applicanda.

Observationes DICKSONII et FOTHERGILLII.

Senum et puerorum incontinentiae aptiora remedia.

Si a spasmis aut convulsivis affectibus sit.

1) *Medical observat. and inquiries by a society. Vol. II. p. 311., Vol. III. p. 102.*

2) *Ibid. p. 138.*

*Observatio
LEGERI de
urinae no-
cturna incon-
tinentia cu-
rata.*

3) *Nocturnam urinae incontinentiam* LEGERUS chirurgiae magister Parisinus in tribus puellis non minoribus XIII., XV. et XXIV. annorum curavit sequenti remedio. *Rec. Pulv. cantharid. gr. vj., extract. borag. drachm. ij. Misce probe, et divide in partes aequales num. XXIV. Detur una dosis singulis noctibus.* In ea, quae aetate erat XXIV. annorum continuatum est remedium per septuaginta dies, et subinde aucta dosis cantharidum. Si quid ardoris in urina sub hoc remedio percipitur, commendatur decoctum seminum lini potandum. *Vid. Journal de médecine. Janvier 1781. pag. 72. Ex sched. auct.*

§. CCXIV.

*Ischuriae verae curatio.
Emollientia
et antispas-
modica.*

*Candelulae
cathacretic-
ae.*

*Cathetere
urina fre-
quenter edu-
cenda.*

*Quando acu
triquetra et
ubi vesica
perforanda.*

*Diurctica
citanda.*

*TODII obser-
vatio de
ischuria ab
urina reten-
ta, sive re-
tardata mi-
ctione.*

*Quando ab
atonía vesic-
ae est, quae
curatio.*

*Cortex pe-
ruvianus.*

*Spuriae cu-
ratio.*

Ischuriae verae modo emollientia, insessus, semicupia, modo haemorrhoidum aperitio, enemata et lenia alvum solventia, modo nervina, roborantia et antispasmodica; modo candelulae dilatantes, suppurationem inducentes, et leniter cathacreticae pro varia causarum ratione opportunissima sunt auxilia. Sed imprimis frequens et diu continuata urinae per catheterem eductio. Si catheter demitti in vesicam minime possit, acu triquetra ex perinaeo vel ex intestino recto (quod tutius est) in vesicam immissa novum urinae iter parandum est. Diuretica vero et acria evitentur ¹). *Ischuriam* vesicalem a retardata mictione natam JO. CLEMENS TÖDIUS sustulit inunctione perinaei et hypogastrii ex oleo chamaemeli cocto, quocum aliquid olei destillati eiusdem erat commixtum. *Ischuriam* subsecuta est urinae incontinentia, sive *enuresis* SAUVAGESII, quae sublata est aspersa frigida ²) ³). Saepe *ischuria* oritur a laxitate et atonia ipsius vesicae, ut sphincteris resistentia superari nequeat. CL. MURDACKIUS MACKENZIE in huiusmodi casu post incassum adhibitam venae sectionem, clysteres, semicupia atque alia mollientia dedit corticem peruvianum summo cum effectu ⁴). In *spuriae* vero fere eadem quae in *vera* commendantur, excepto catheteris usu, qui, ut patet, supervacuum est. Non reprobantur quoque, quae urinam leniter

cient, quae vias laxant et aperiunt, quae crassos densosque humores incidunt attenuantque. *Diuretica hic non impro-
bata.*

1) Vid. §. CCLXXXIV. Vol. II., ubi Cl. AUCTOR diuretica convenire posse tradit tantummodo in *ischuria spuria, in qua urina deficit, quia in renibus non secernitur*; quemadmodum hic etiam innuit in fine paragraphi.

2) *Collect. soc. med. Havniens. Vol. I. p. 219.*

3) *In diario Italico cl. auctoris anni 1784 ultimo loco adnotatam legimus sequentem observationem.* Augusto mense comes SALAZZARIUS pater *ischuria vesicali* laboravit. Sanguinis missionibus, clysteribus, fomentis, semicupiis, cortice peruviano, frequentibus urinae extractionibus et simplicibus diluentibus anodynis curatio peracta. Quindecim elapsis diebus suppuratio aliqua orta est, nam, puris copia emissa, tum libere urinae redditae. A tuberculo in collo vesicae genito morbi causa mihi visa est repetenda.

4) *Medical observat. and inquiries by a society etc. 1758 p. 81., et Cl. Jo. BAPT. VIDEMARIUS 'clinicus Mediolanensis opere inscripto: De rariori quadam ichuriae specie.*

BEROLINI, FORMIS A. G. SCHADII.







